

COV ZAJ NYEEM HAUV COV TXOOS TEEV NTUJ HNUB CHIV (CÁC BÀI ĐỌC TRONG THÁNH LỄ CHÚA NHẬT)

LUB CAIJ NYOB NRUAB XYOO – MÙA THƯỜNG NIÊN

Nguồn:

- Fr. Yves Bertrais (Txiv Plig Nyiaj Pov), *NTAWV NTSHIAB 2002. (Imprimatur by Louis Chamniern, Bishop of Nakhonsawan Diocese).*
- Hmong American National Catholic Association (HANCA), *NQUA SUAB CAV TXOG TSWV NTUJ, 2012. (Imprimatur by the Most Reverend John C. Nienstedt, Archdiocese of St. Paul and Minneapolis, St. Paul, Minnesola).*
- <https://www.hmongrpa.org>

Biên soạn: Lm. Phêrô Lê Thanh Phục, C.Ss.R

HNUB CHIV 2 NRUAB XYOO A CHÚA NHẬT 2 THƯỜNG NIÊN NĂM A	10
HNUB CHIV 2 NRUAB XYOO B CHÚA NHẬT 2 THƯỜNG NIÊN NĂM B	12
HNUB CHIV 2 NRUAB XYOO C CHÚA NHẬT 2 THƯỜNG NIÊN NĂM C	15
HNUB CHIV 3 NRUAB XYOO A CHÚA NHẬT 3 THƯỜNG NIÊN NĂM A	18
HNUB CHIV 3 NRUAB XYOO B CHÚA NHẬT 3 THƯỜNG NIÊN NĂM B	21
HNUB CHIV 3 NRUAB XYOO C CHÚA NHẬT 3 THƯỜNG NIÊN NĂM C	23
HNUB CHIV 4 NRUAB XYOO A CHÚA NHẬT 4 THƯỜNG NIÊN NĂM A	28
HNUB CHIV 4 NRUAB XYOO B CHÚA NHẬT 4 THƯỜNG NIÊN NĂM B	31
HNUB CHIV 4 NRUAB XYOO C CHÚA NHẬT 4 THƯỜNG NIÊN NĂM C	34
HNUB CHIV 5 NRUAB XYOO A CHÚA NHẬT 5 THƯỜNG NIÊN NĂM A	38
HNUB CHIV 5 NRUAB XYOO B CHÚA NHẬT 5 THƯỜNG NIÊN NĂM B	40
HNUB CHIV 5 NRUAB XYOO C CHÚA NHẬT 5 THƯỜNG NIÊN NĂM C	43
HNUB CHIV 6 NRUAB XYOO A CHÚA NHẬT 6 THƯỜNG NIÊN NĂM A	47
HNUB CHIV 6 NRUAB XYOO B CHÚA NHẬT 6 THƯỜNG NIÊN NĂM B	52

HNUB CHIV 6 NRUAB XYOO C CHÚA NHẬT 6 THƯỜNG NIÊN NĂM C	54
HNUB CHIV 7 NRUAB XYOO A CHÚA NHẬT 7 THƯỜNG NIÊN NĂM A	57
HNUB CHIV 7 NRUAB XYOO B CHÚA NHẬT 7 THƯỜNG NIÊN NĂM B	60
HNUB CHIV 7 NRUAB XYOO C CHÚA NHẬT 7 THƯỜNG NIÊN NĂM C	63
HNUB CHIV 8 NRUAB XYOO A CHÚA NHẬT 8 THƯỜNG NIÊN NĂM A	66
HNUB CHIV 8 NRUAB XYOO B CHÚA NHẬT 8 THƯỜNG NIÊN NĂM B	69
HNUB CHIV 8 NRUAB XYOO C CHÚA NHẬT 8 THƯỜNG NIÊN NĂM C	72
HNUB CHIV 9 NRUAB XYOO A CHÚA NHẬT 9 THƯỜNG NIÊN NĂM A	75
HNUB CHIV 9 NRUAB XYOO B CHÚA NHẬT 9 THƯỜNG NIÊN NĂM B	78
HNUB CHIV 9 NRUAB XYOO C CHÚA NHẬT 9 THƯỜNG NIÊN NĂM C	81
HNUB CHIV 10 NRUAB XYOO A CHÚA NHẬT 10 THƯỜNG NIÊN NĂM A	84
HNUB CHIV 10 NRUAB XYOO B CHÚA NHẬT 10 THƯỜNG NIÊN NĂM B	87
HNUB CHIV 10 NRUAB XYOO C CHÚA NHẬT 10 THƯỜNG NIÊN NĂM C	91
HNUB CHIV 11 NRUAB XYOO A CHÚA NHẬT 11 THƯỜNG NIÊN NĂM A	94

HNUB CHIV 11 NRUAB XYOO B CHÚA NHẬT 11 THƯỜNG NIÊN NĂM B	97
HNUB CHIV 11 NRUAB XYOO C CHÚA NHẬT 11 THƯỜNG NIÊN NĂM C	100
HNUB CHIV 12 NRUAB XYOO A CHÚA NHẬT 12 THƯỜNG NIÊN NĂM A	104
HNUB CHIV 12 NRUAB XYOO B CHÚA NHẬT 12 THƯỜNG NIÊN NĂM B	107
HNUB CHIV 12 NRUAB XYOO C CHÚA NHẬT 12 THƯỜNG NIÊN NĂM C	110
HNUB CHIV 13 NRUAB XYOO A CHÚA NHẬT 13 THƯỜNG NIÊN NĂM A	112
HNUB CHIV 13 NRUAB XYOO B CHÚA NHẬT 13 THƯỜNG NIÊN NĂM B	115
HNUB CHIV 13 NRUAB XYOO C CHÚA NHẬT 13 THƯỜNG NIÊN NĂM C	120
HNUB CHIV 14 NRUAB XYOO A CHÚA NHẬT 14 THƯỜNG NIÊN NĂM A	123
HNUB CHIV 14 NRUAB XYOO B CHÚA NHẬT 14 THƯỜNG NIÊN NĂM B	126
HNUB CHIV 14 NRUAB XYOO C CHÚA NHẬT 14 THƯỜNG NIÊN NĂM C	128
HNUB CHIV 15 NRUAB XYOO A CHÚA NHẬT 15 THƯỜNG NIÊN NĂM A	131
HNUB CHIV 15 NRUAB XYOO B CHÚA NHẬT 15 THƯỜNG NIÊN NĂM B	135
HNUB CHIV 15 NRUAB XYOO C CHÚA NHẬT 15 THƯỜNG NIÊN NĂM C	138

HNUB CHIV 16 NRUAB XYOO A CHÚA NHẬT 16 THƯỜNG NIÊN NĂM A	142
HNUB CHIV 16 NRUAB XYOO B CHÚA NHẬT 16 THƯỜNG NIÊN NĂM B	146
HNUB CHIV 16 NRUAB XYOO C CHÚA NHẬT 16 THƯỜNG NIÊN NĂM C	149
HNUB CHIV 17 NRUAB XYOO A CHÚA NHẬT 17 THƯỜNG NIÊN NĂM A	152
HNUB CHIV 17 NRUAB XYOO B CHÚA NHẬT 17 THƯỜNG NIÊN NĂM B	155
HNUB CHIV 17 NRUAB XYOO C CHÚA NHẬT 17 THƯỜNG NIÊN NĂM C	158
HNUB CHIV 18 NRUAB XYOO A CHÚA NHẬT 18 THƯỜNG NIÊN NĂM A	162
HNUB CHIV 18 NRUAB XYOO B CHÚA NHẬT 18 THƯỜNG NIÊN NĂM B	165
HNUB CHIV 18 NRUAB XYOO C CHÚA NHẬT 18 THƯỜNG NIÊN NĂM C	168
HNUB CHIV 19 NRUAB XYOO A CHÚA NHẬT 19 THƯỜNG NIÊN NĂM A	171
HNUB CHIV 19 NRUAB XYOO B CHÚA NHẬT 19 THƯỜNG NIÊN NĂM B	174
HNUB CHIV 19 NRUAB XYOO C CHÚA NHẬT 19 THƯỜNG NIÊN NĂM C	177
HNUB CHIV 20 NRUAB XYOO A CHÚA NHẬT 20 THƯỜNG NIÊN NĂM A	182
HNUB CHIV 20 NRUAB XYOO B CHÚA NHẬT 20 THƯỜNG NIÊN NĂM B	185

HNUB CHIV 20 NRUAB XYOO C CHÚA NHẬT 20 THƯỜNG NIÊN NĂM C	188
HNUB CHIV 21 NRUAB XYOO A CHÚA NHẬT 21 THƯỜNG NIÊN NĂM A	191
HNUB CHIV 21 NRUAB XYOO B CHÚA NHẬT 21 THƯỜNG NIÊN NĂM B	194
HNUB CHIV 21 NRUAB XYOO C CHÚA NHẬT 21 THƯỜNG NIÊN NĂM C	197
HNUB CHIV 22 NRUAB XYOO A CHÚA NHẬT 22 THƯỜNG NIÊN NĂM A	200
HNUB CHIV 22 NRUAB XYOO B CHÚA NHẬT 22 THƯỜNG NIÊN NĂM B	203
HNUB CHIV 22 NRUAB XYOO C CHÚA NHẬT 22 THƯỜNG NIÊN NĂM C	206
HNUB CHIV 23 NRUAB XYOO A CHÚA NHẬT 23 THƯỜNG NIÊN NĂM A	209
HNUB CHIV 23 NRUAB XYOO B CHÚA NHẬT 23 THƯỜNG NIÊN NĂM B	212
HNUB CHIV 23 NRUAB XYOO C CHÚA NHẬT 23 THƯỜNG NIÊN NĂM C	215
HNUB CHIV 24 NRUAB XYOO A CHÚA NHẬT 24 THƯỜNG NIÊN NĂM A	218
HNUB CHIV 24 NRUAB XYOO B CHÚA NHẬT 24 THƯỜNG NIÊN NĂM B	221
HNUB CHIV 24 NRUAB XYOO C CHÚA NHẬT 24 THƯỜNG NIÊN NĂM C	224
HNUB CHIV 25 NRUAB XYOO A CHÚA NHẬT 25 THƯỜNG NIÊN NĂM A	230

HNUB CHIV 25 NRUAB XYOO B CHÚA NHẬT 25 THƯỜNG NIÊN NĂM B	233
HNUB CHIV 25 NRUAB XYOO C CHÚA NHẬT 25 THƯỜNG NIÊN NĂM C	236
HNUB CHIV 26 NRUAB XYOO A CHÚA NHẬT 26 THƯỜNG NIÊN NĂM A	239
HNUB CHIV 26 NRUAB XYOO B CHÚA NHẬT 26 THƯỜNG NIÊN NĂM B	242
HNUB CHIV 26 NRUAB XYOO C CHÚA NHẬT 26 THƯỜNG NIÊN NĂM C	245
HNUB CHIV 27 NRUAB XYOO A CHÚA NHẬT 27 THƯỜNG NIÊN NĂM A	249
HNUB CHIV 27 NRUAB XYOO B CHÚA NHẬT 27 THƯỜNG NIÊN NĂM B	252
HNUB CHIV 27 NRUAB XYOO C CHÚA NHẬT 27 THƯỜNG NIÊN NĂM C	256
HNUB CHIV 28 NRUAB XYOO A CHÚA NHẬT 28 THƯỜNG NIÊN NĂM A	259
HNUB CHIV 28 NRUAB XYOO B CHÚA NHẬT 28 THƯỜNG NIÊN NĂM B	262
HNUB CHIV 28 NRUAB XYOO C CHÚA NHẬT 28 THƯỜNG NIÊN NĂM C	266
HNUB CHIV 29 NRUAB XYOO A CHÚA NHẬT 29 THƯỜNG NIÊN NĂM A	269
HNUB CHIV 29 NRUAB XYOO B CHÚA NHẬT 29 THƯỜNG NIÊN NĂM B	272
HNUB CHIV 29 NRUAB XYOO C CHÚA NHẬT 29 THƯỜNG NIÊN NĂM C	275

HNUB CHIV 30 NRUAB XYOO A CHÚA NHẬT 30 THƯỜNG NIÊN NĂM A	278
HNUB CHIV 30 NRUAB XYOO B CHÚA NHẬT 30 THƯỜNG NIÊN NĂM B	281
HNUB CHIV 30 NRUAB XYOO C CHÚA NHẬT 30 THƯỜNG NIÊN NĂM C	284
HNUB CHIV 31 NRUAB XYOO A CHÚA NHẬT 31 THƯỜNG NIÊN NĂM A	287
HNUB CHIV 31 NRUAB XYOO B CHÚA NHẬT 31 THƯỜNG NIÊN NĂM B	290
HNUB CHIV 31 NRUAB XYOO C CHÚA NHẬT 31 THƯỜNG NIÊN NĂM C	293
HNUB CHIV 32 NRUAB XYOO A CHÚA NHẬT 32 THƯỜNG NIÊN NĂM A	296
HNUB CHIV 32 NRUAB XYOO B CHÚA NHẬT 32 THƯỜNG NIÊN NĂM B	299
HNUB CHIV 32 NRUAB XYOO C CHÚA NHẬT 32 THƯỜNG NIÊN NĂM C	302
HNUB CHIV 33 NRUAB XYOO A CHÚA NHẬT 33 THƯỜNG NIÊN NĂM A	305
HNUB CHIV 33 NRUAB XYOO B CHÚA NHẬT 33 THƯỜNG NIÊN NĂM B	309
HNUB CHIV 33 NRUAB XYOO C CHÚA NHẬT 33 THƯỜNG NIÊN NĂM C	312
UA NTEJ PLAUB HNUB CHIV NYOB NRUAB XYOO.....	315
HWM YES XUS UA VAJ HNUB CHIV 34 CAIJ NRUAB XYOO A ĐỨC GIÊSU KITÔ VUA VĨ TRỤ CHÚA NHẬT 34 THƯỜNG NIÊN NĂM C	316

HWM YES XUS UA VAJ HNUB CHIV 34 CAIJ NRUAB XYOO B ĐỨC GIÊSU KITÔ VUA VŨ TRỤ CHÚA NHẬT 34 THƯỜNG NIÊN NĂM B	320
HWM YES XUS UA VAJ HNUB CHIV 34 CAIJ NRUAB XYOO C ĐỨC GIÊSU KITÔ VUA VŨ TRỤ CHÚA NHẬT 34 THƯỜNG NIÊN NĂM C	322
HWM PEB LEEG HUAB TAIS, XYOO A CHÚA BA NGÔI, NĂM A	325
HWM PEB LEEG HUAB TAIS, XYOO B CHÚA BA NGÔI, NĂM B	328
HWM PEB LEEG HUAB TAIS, XYOO C CHÚA BA NGÔI, NĂM C	331
HWM LUB CIM YUG, XYOO A MÌNH VÀ MÁU THÁNH CHÚA KITÔ, NĂM A	334
HWM LUB CIM YUG, XYOO B MÌNH VÀ MÁU THÁNH CHÚA KITÔ, NĂM B	337
HWM LUB CIM YUG, XYOO C MÌNH VÀ MÁU THÁNH CHÚA KITÔ, NĂM C	340
HWM YES XUS LUB SIAB NTSHIAB, XYOO A THÁNH TÂM CHÚA GIÊSU, NĂM A	343
HWM YES XUS LUB SIAB NTSHIAB, XYOO B THÁNH TÂM CHỨA GIÊSU, NĂM B	346
HWM YES XUS LUB SIAB NTSHIAB, XYOO C THÁNH TÂM CHÚA GIÊSU, NĂM C	349

HNUB CHIV 2 NRUAB XYOO A CHÚA NHẬT 2 THƯỜNG NIÊN NĂM A

ZAJ NYEEM IB: His Xais 49,3.5-6

Cov lus nyob hauv ntawv His Xais

- 3 HUAB TAIS hais rau kuv tias: "His Xas Lais, koj yog kuv tus tub txib, kuv lub koob meej yuav nto nyob hauv koj."
- 5 Nyem no, HUAB TAIS hais lus lawm. Nws yog tus puab kuv nyob hauv kuv niam nrog cev kom kuv tau ua nws tus tub txib. Kom tau coj Yas Kos rov los cuag nws, kom His Xas Lais rov qab los nrog nws nyob ua ke. Vim kuv muaj nqis nyob ntawm HUAB TAIS xub ntiag, thiab TSWV NTUJ yog kuv lub zog."
- 6 TSWV NTUJ hais tias: "Koj yog kuv tus tub txib, koj rov tsa cov xeeb Yas Kos kom sawv, thiab koj coj cov His Xas Lais uas kuv txuag kom lawv rov qab los. Qhov ntawd yog qhov tsawg. Kuv tseem xaiv koj kom koj ua lub teeb ci ntsa kaj cov kuj cuab. Kom kuv txoj kev cawm mus txog npoo ntiag teb."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 39,2.4ab.7-10

Txais: TSWV NTUJ, kuv nyob ntawm no. **Kuv yuav ua raws li koj lub siab nyiam.**

1. Kuv tos ntsoov HUAB TAIS ! Nws khoov los ze kuv thiab nws hnov kuv lub suab. Nws tso ib zag nkauj tshiab rau hauv kuv lub ncauj, yog zaj nkauj cav txog peb tus TSWV NTUJ. **Teb**
2. Koj qhib kuv pob ntseg kom kuv hnov koj cov lus. Koj tsis xav yuav tsiaj thiab txhiam xws txi rau koj. Koj tsis kom kuv hlawv tsiaj los them txim txhaum. Kuv thiaj hais tias, "Koj saib, kuv tuaj cuag koj." **Teb**
3. Kuv tus TSWV NTUJ, kuv yuav ua raws li cov lus koj sau tseg rau kuv nyob hauv kaj ntawv. Kuv zoo siab ua raws li koj qhia. Koj txoj cai nyob rawv hauv kuv nruab siab. **Teb**
4. Kuv tshaj koj txoj kev ncaj nyob hauv cov txoos. HUAB TAIS, koj paub tias kuv yeej tsis cheem kuv di ncauj. **Teb**

ZAJ NYEEM OB: 1 Kos Lis Nthos 1,1-3

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 1 Kuv yog Paj Lug, tus uas TSWV NTUJ pom zoo hu los ua YES XUS PLEEV tus Hauv Paus Xa Lus.
- 2 Tus kwv Xos Thes Nos wb sau ntawv tuaj rau TSWV NTUJ lub Koom Txoos nyob Kos Lis Nthos. Wb sau ntawv tuaj rau cov ntshiab, nyob hauv YES XUS PLEEV, rau cov uas Ntuj hu lawv los ua neeg ntshiab, nrog tas txhua leej uas nyob tas qhov txhia chaw tuav txog peb tus HUAB TAIS YES XUS PLEEV lub npe.
- 3 Thov kom peb Txiv TSWV NTUJ thiab HUAB TAIS YES XUS PLEEV pub txiaj ntsim thiab kev thaj yeeb rau nej.

Yog Tswv Ntuj Lo Lus

NKAUJ CAV TXOG LUB MOO ZOO: Zam 1,14a.12a

As les lus yas. As les lus yas. Leej Lo Lus xeeb ua ib lub cev neeg nrog peb nyob. Cov txais nws thiab ntseeg txog nws lub npe, nws pub hwj huam kom lawv los ua Ntuj cov me nyuam. As les lus yas.

NTAWV MOO ZOO: Zam 1,29-34

Nej Mloog Ib Zag Nyob Hauv Zam Ntawv Moo Zoo

- 29 Hnub tom qab, Zam pom YES XUS tuaj ze ntawm nws, nws hais tias: "Nej ntsia TSWV NTUJ tus Yaj, tus daws qab ntuj neeg cov txhaum.
- 30 Tus ntawd yog tus uas kuv hais txog nws tias: Muaj ib tug neeg lawv kuv qab, nws yuav tuaj, nws twb huas kuv ntej lawm, vim nws xub nyob dua kuv.
- 31 Kuv tsis tau paub nws, tab sis kuv tuaj ua kab ke ntxuav nyob hauv dej kom xwv nws tawm los rau His Xas Lais pom xyeem.
- 32 Ces Zam ua tim khawv hais tias: "Kuv pom LEEJ NTUJ PLIG nqes saum ntuj xws li ib tug nquab los rau saum nws.
- 33 Kuv tseem tsis tau paub nws, tab sis Tus xa kuv tuaj ua kab ke ntxuav hauv dej, nws hais rau kuv tias: Tus uas koj yuav pom LEEJ NTUJ PLIG nqes los nyob saum nws, mas nws yog tus ua kab ke ntxuav nyob hauv LEEJ NTUJ PLIG NTSHIAB.
- 34 Kuv tau pom, ces kuv ua tim khawv tias nws yog TSWV NTUJ tus Xaiv."

Yog Huab Tais Yes Xus Lub Moo Zoo

HNUB CHIV 2 NRUAB XYOO B CHÚA NHẬT 2 THƯỜNG NIÊN NĂM B

ZAJ NYEEM IB: 1 Xas Muas 3,3b-10.19

Cov lus nyob hauv ntawv Xas Muas phau ib

- 3b Xas Muas pw hauv HUAB TAIS Kem Ntshiab uas TSWV NTUJ lub Xab Cog Lus nyob.
- 4 HUAB TAIS hu Xas Muas tias : "Xas Muas ! Xas Muas !" Tus me nyuam teb tias : "Kuv nyob ntawm no !"
- 5 Ces nws khiav mus hais rau Es Lis tias : "Koj hu kuv, kuv thiab los." Es Lis hais tias : "Tub, kuv tsis tau hu koj. Koj rov mus pw." Xas Muas rov mus pw.
- 6 HUAB TAIS rov hu nws dua tias : "Xas Muas ! Xas Muas !" Ces Xas Muas mus txog ntawm Es Lis, nws hais rau Es Lis tias : "Koj hu kuv, kuv thiab los ntawm no." Es Lis hais tias : "Tub, kuv tsis tau hu koj. Koj rov mus pw."
- 7 Xas Muas tseem tsis tau paub HUAB TAIS. Vim tsis tau muaj leej twg qhia HUAB TAIS lo lus rau nws.
- 8 HUAB TAIS rov hu Xas Muas zaum peb. Xas Muas sawv mus txog ntawm Es Lis, nws hais tias : "Koj hu kuv, kuv thiab los ntawm no."
- 9 Ces Es Lis thiab mam to taub tias yog HUAB TAIS hu tus me nyuam ntawd. Es Lis hais rau Xas Muas tias : "Koj mus pw. Yog muaj tus hu koj mas koj yuav hais tias : HUAB TAIS, koj hais lus mas. Koj tus tub txib mloog koj !" Ces Xas Muas rov mus pw qhov chaw qub.
- 10 HUAB TAIS tuaj nyob ntawd. HUAB TAIS hu nws xws li thawj peb zaug ua ntej tias: "Xas Muas! Xas Muas!" Xas Muas teb tias: "Koj hais lus mas! Koj tus tub txib mloog koj!"
- 19 Thaum Xas Muas hlob lawm, Tswv Ntuj nrog Xas Muas nyob. Tswv Ntuj tau hais dab tsi rau Xas Muas lawm, mas Tswv Ntuj tsis cia nws ib lo lus poob dag !

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 39,2.4ab.7-10

Txais: TSWV NTUJ, kuv nyob ntawm no. Kuv yuav ua raws li koj lub siab nyiam.

1. Kuv tos ntsoov HUAB TAIS ! Nws khoov los ze kuv thiab nws hnov kuv lub suab. Nws tso ib zag nkauj tshiab rau hauv kuv lub ncauj, yog zaj nkauj cav txog peb tus TSWV NTUJ. **Teb**
2. Koj qhib kuv pob ntseg kom kuv hnov koj cov lus. Koj tsis xav yuav tsiaj thiab txhiam xws txi rau koj. Koj tsis kom kuv hlawv tsiaj los them txim txhaum. Kuv thiaj hais tias, “Koj saib, kuv tuaj cuag koj.” **Teb**
3. Kuv tus TSWV NTUJ, kuv yuav ua raws li cov lus koj sau tseg rau kuv nyob hauv kauj ntawv. Kuv zoo siab ua raws li koj qhia. Koj txoj cai nyob rawv hauv kuv nruab siab. **Teb**
4. Kuv tshaj koj txoj kev ncaj nyob hauv cov txoos. HUAB TAIS, koj paub tias kuv yeej tsis cheem kuv di ncauj. **Teb**

ZAJ NYEEM OB :1 Kos Lis Nthos 6,13c-15a.17-20

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 13c** Kwv tij sawv daws, lub cev yog tshwj tseg rau HUAB TAIS, thiab HUAB TAIS kuj tshwj zias nws tseg rau lub cev.
- 14** TSWV NTUJ uas nws tau tsa HUAB TAIS sawv rov los, nws lub hwj huam kuj yuav tsa peb sawv rov los thiab.
- 15a** Nej tsis paub tias nej lub cev yog Leej Plev cov tes taw lod?
- 17** Hos tus nruab HUAB TAIS, nws nrog HUAB TAIS koom ib lub tswv yim xwb.
- 18** Nej txav deb ntawm txoj kev ua dev ua npua mog. Tas puas tsav yam txhaum neeg ua, mas tsuas yog txhaum tuaj sab nraud tuaj rau hauv neeg lub cev. Hos tus ua dev ua npua, mas nws ua txhaum rau nws lub cev kiag.
- 19** Nej tsis paub tias nej lub cev yog LEEJ NTUJ PLIG NTSHIAB lub tsev nyob lod ? Nws nyob hauv nej ; nej txais nws ntawm TSWV NTUJ los. Tab sis nej tsis paub tias nej tsis yog nej tug.
- 20** Vim muaj tus tau muas nej tiag! Li ntawd mas nej kav tsij ua kom TSWV NTUJ muaj koob mee nyob hauv nej lub cev mog!

Yog Tswv Ntuj Lo Lus

NKAUJ CAV TXOG LUB MOO ZOO: Zam 1.41.17b

As les lus yas. As les lus yas. Peb ntsib tus Mes Xias uas yog Leej Plev, tus coj txoj kev tseeb thiab lub txiaj ntsim tuaj rau peb. As les lus yas.

NTAWV MOO ZOO: Zam 1,35-42

Nej Mloog Ib Zag Nyob Hauv Zam Ntawv Moo Zoo

- 35 Hnub tom qab, Zam nrog nws ob tug thwj tim rov sawv ntsug nyob ntawd dua.
- 36 Nws ntsia YES XUS hla tuaj mus, nws hais tias : "Neb ntsia ! TSWV NTUJ tus Yaj."
- 37 Ob tug thwj tim hnov Zam hais li ntawd, nkawd raws YES XUS qab mus.
- 38 YES XUS tig los, nws pom nkawd raws nws, ces YES XUS hais rau nkawd tias: "Neb nrhiav dab tsi?" Nkawd hais rau YES XUS tias: "Las Npis, lo lus no txhais tias Xib Hwb, koj tsev nyob qhov twg ?"
- 39 YES XUS hais rau nkawd tias : "Neb tuaj, neb yuav pom." Ces nkawd mus, nkawd pom qhov chaw YES XUS nyob. Hnub ntawd, nkawd nrog YES XUS nyob. Thaum ntawd kwv yees plaub teev hnub qaij.
- 40 Ob tug thwj tim uas hnov Zam hais li ntawd thiab nkawd raws YES XUS qab mus, ib tug yog As Nres, Xis Moos Pob Zeb tus kwv.
- 41 As Nres xub ntsib nws tus tij laug Xis Moos, nws hais rau Xis Moos tias : "Wb ntsib tus Mes Xias lawm," - lo lus no txhais tias Leej Pleev-
- 42 As Nres coj Xis Moos mus cuag YES XUS. YES XUS ntsia Xis Moos, nws hais tias : "Koj yog Xis Moos, Zam tus tub, koj lub npe yuav hu ua Kes Fas," -lo lus no txhais tias- : Pob Zeb.

Yog Huab Tais Yes Xus Lub Moo Zoo

HNUB CHIV 2 NRUAB XYOO C CHÚA NHẬT 2 THƯỜNG NIÊN NĂM C

ZAJ NYEEM IB: His Xais 62,1-5

Cov lus nyob hauv ntawv His Xais

- 1 Vim muaj Xis Yoos, kuv yuav tsis nyob twj ywm. Vim muaj Yes Lus Xas Les, kuv yuav tsis so, mus txog lub caij nws txoj kev yeej tawm plaws xws li ib qho kaj, nws txoj kev yeej tawm plaws xws li ib teg tsau cig cig.
- 2 Cov kuj cuab yuav pom koj txoj kev yeej, tas cov vaj huv si yuav pom koj lub hwj chim. Luag yuav tis npe tshiab hu koj, yog HUAB TAIS lub ncauj yuav qhia.
- 3 Koj yuav zoo li ib lub mom teev kub muaj hwj chim nyob hauv HUAB TAIS tes. Zoo li ib lub kaus mom ua vaj nyob hauv koj tus TSWV NTUJ xib teg.
- 4 Luag yuav tsis hais ntxiv txog koj tias : "Tus luag tso pov tseg." Luag yuav hu koj tias : "Kuv lub chaw zoo siab." Luag hu koj thaj av tias : "Nkauj nyab tshiab." Vim koj yuav yog HUAB TAIS chaw zoo siab thiab koj thaj av yuav ua nkauj nyab tshiab.
- 5 Tus tsim koj, nws yuav qaws koj ua nws txij nkawm zoo li ib tug tub hluas yuav ib tug ntxhais nkauj xwb. Koj yuav ua koj tus TSWV NTUJ zoo siab lom zem, xws li tus nkauj nyab ua nraug vauv lub chaw sov siab dhia daj dhia luag.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 95,1-3.7-8a.9.10ac

Txais: Nej tshaj TSWV NTUJ cov hauj lwm muaj hwj chim rau ntiaj teb neeg.

1. Nej hu ib zag nkauj tshiab rau HUAB TAIS. Tas ntiaj teb, nej hu nkauj rau HUAB TAIS mas ! Nej hu nkauj cav txog nws lub npe. **Teb**
2. Nej yuav niaj hnuv tshaj nws txoj kev cawm thiab nws lub koob meej rau txhua haiv neeg paub. Nej tshaj txog nws cov hauj lwm nto moo rau ib tsoom haiv neeg. **Teb**

3. Tsoom haiv neeg cov cuab yim, nej cav lus zoo txog HUAB TAIS. Nej cav txog nws lub hwj chim. Tsim nyog nej cav txog nws lub npe muaj hwj huam. **Teb**
4. Nej teev hawm HUAB TAIS. Ntiaj teb neeg, nej txhos caug hawm nws. Nej hais rau cov haiv neeg hais tias, “HUAB TAIS ua vaj.” Nws tswj txhua haiv neeg raws kev haum pheej. **Teb**

ZAJ NYEEM OB: 1 Kos Lis Nthos 12,4-11

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 4 Kwv tij sawv daws, Ntuj pub ntau yam txiaj ntsim, tiam sis yog tuaj ntawm LEEJ NTUJ PLIG tib leeg tuaj xwb.
- 5 Muaj ntau txoj kab xwm, tab sis yog tuaj ntawm tib tug HUAB TAIS tuaj.
- 6 Muaj ntau txoj hauj lwm, tab sis yog tib tug TSWV NTUJ ua cov hauj lwm ntawd nyob hauv txhua leej tib neeg.
- 7 Ntuj pub LEEJ NTUJ PLIG rau peb kom peb pab tau tsoom sid.
- 8 Ib txhia, LEEJ NTUJ PLIG pub ib zaj lus thoob tsib rau lawv. Ib txhia, LEEJ NTUJ PLIG pub ib zag txuj ci rau lawv.
- 9 Ib txhia, LEEJ NTUJ PLIG pub kom lawv muaj ib lub siab ntseeg. Ib txhia, LEEJ NTUJ PLIG pub kom lawv txawj kho mob.
- 10 Ib txhia, LEEJ NTUJ PLIG pub kom lawv txawj ua hwj huam yees ntxwv. Ib txhia, LEEJ NTUJ PLIG pub kom lawv txawj ua Yaj Saub. Ib txhia, LEEJ NTUJ PLIG pub kom lawv txawj pom tias puas yog dab. Ib txhia, LEEJ NTUJ PLIG pub kom lawv txawj hais ntau xee lus. Ib txhia, LEEJ NTUJ PLIG pub kom lawv txawj txhais ntau xee lus.
- 11 Tas ib puas tsav yam ntawd, yog LEEJ NTUJ PLIG tib leeg ua, yog LEEJ NTUJ PLIG tib leeg muab faib rau zeej tsoom sawv daws, raws li nws nyiam.

Yog Tswv Ntuj Lo Lus

NKAUJ CAV TXOG LUB MOO ZOO: s. 2Tes Xas Los Nis 2,14

As les lus yas. As les lus yas. Ntuj hu peb los txais kev ntseeg nyob hauv Lub Moo Zoo kom peb tau txais HUAB TAIS YES XUS PLEEV lub koob meej. As les lus yas.

NTAWV MOO ZOO: Zam 2,1-11

Nej Mloog Ib Zag Nyob Hauv Zam Ntawv Moo Zoo

- 1 Peb hnuv tom qab, muaj ib rooj tshoob hauv lub zos Kas Nas xeev Nkas Lis Lais. YES XUS niam mus nrog lawv noj tshoob nyob ntawd.
- 2 Lawv caw YES XUS thiab nws cov thwj tim mus noj tshoob thiab.
- 3 Lawv tsis tshuav cawv ntxiv lawm, YES XUS niam hais rau YES XUS tias : "Lawv tsis muaj cawv ntxiv lawm."
- 4 Ces YES XUS hais rau nws niam tias : "Niad, tsis yog wb hauj lwm. Kuv lub sij hawm tseem los tsis tau txog."
- 5 YES XUS niam hais rau cov tub ce cawv tias : "YES XUS kom nej ua yam twg, mas nej ua huv tib si mog."
- 6 Nyob ntawd, muaj rau lub hub zeb teem dej rau cov Yus Das siv raws li lawv tej kev cai ntxuav tes. Ib lub hub ntim tau peb los plaub thoob dej.
- 7 YES XUS hais rau cov tub ce cawv tias : "Nej hliv dej kom puv cov hub no." Ces lawv hliv dej puv nkaus cov hub.
- 8 YES XUS hais rau lawv tias : "Zaum no, nej ce cov dej no nqa mus rau txiv thiaj com." Ces lawv ce cov dej ntawd nqa mus.
- 9 Thaum txiv thiaj com saj cov dej txia ua cawv, mas nws tsis paub cov cawv los qhov twg los. Tab sis cov tub ce cawv paub lawm, vim lawv yog cov ce. Txiv thiaj com hu nraug vauv los.
- 10 Nws hais rau nraug vauv tias : "Sawv daws ce cov cawv qab los haus tso. Thaum cov neeg qaug cawv lawd, mam li ce cov qab tsis heev los haus. Hos koj, koj muab cov cawv qab cia txog tav no."
- 11 YES XUS thawj lub cim yog zoo li ntawd. Nws ua thawj lub cim nyob Kas Nas xeev Nkas Lis Lais. Nws ua nws lub hwj chim tawm los rau pom, ces nws cov thwj tim ntseeg txog nws.

Yog Huab Tais Yes Xus Lub Moo Zoo

HNUB CHIV 3 NRUAB XYOO A CHÚA NHẬT 3 THƯỜNG NIÊN NĂM A

ZAJ NYEEM IB: His Xais 8,23b – 9,3

Cov lus nyob hauv ntawv His Xais

8,23b Yav thaud, TSWV NTUJ tsu tso Ntxas Npws Loos teb raug kev txaj muag ntau. Tab sis yav tom ntej TSWV NTUJ yuavv ua kom lub teb chaws nto moo : yog lub teb chaws nyob ntawm kev mus rau lub hiav txwv, yog Nkas Lis Lais teb.

9,1 Haiv neeg uas yav tas no lawv maub kev tsaus ntuj, nyem no lawv pom ib qho pom kev loj. Ib teg tsau loj ci tuaj kaj cov neeg nyob hauv lub teb chaws tsaus ntuj.

2 HUAB TAIS, koj tau ua kom lawv zoo siab tuaj, kom lawv qw suab lom zem. Lawv ua si nyob ntawm koj xub ntiag, ib yam li luag ua si thaum lub caij sau qoob loo.

3 Tus quab uas tsuam lawv, tus ntas nyob saum lawv xub pwg, tus zov cov neeg nyob txim rab qws, koj muab tsuj, xws li thaum Mas Dias lub hnuv nyoog.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 26,1.4.13.14

Txais: HUAB TAIS yog kuv qhov pom kev, nws yog tus cawm kuv.

1. HUAB TAIS yog kuv qhov pom kev. Nws yog tus cawm kuv, kuv yuav ntshai leej twg ? HUAB TAIS yog lub yeej ntsa zeb thaiv kuv lub neej, kuv yuav ntshai leej twg ? **Teb**

2. Muaj ib yam kuv thov ntawm HUAB TAIS, yog thov kom kuv tau nyob hauv HUAB TAIS tsev tas kuv sim neej, kom kuv tau ntsia ntsoov HUAB TAIS txoj kev hlub thiab tsob hwb nws lub tuam tsev. **Teb**

3. Kuv paub tseeb tias kuv yuav tau pom HUAB TAIS lub siab zoo nyob hauv cov neeg cial lub teb chaws. Koj tos ntsoov HUAB TAIS, koj tua siab loj, koj tos ntsoov nws mog. **Teb**

ZAJ NYEEM OB: 1 Kos Lis Nthos 1,10-13.17

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 10 Kwv tij sawv daws, kuv tuav txog peb tus HUAB TAIS YES XUS PLEEV lub npe thov nej, kom nej sawv daws koom siab koom ntsws. Txhob muaj kev sib ncaim nyob hauv nej pab neeg. Nej yuav hais kom sib haum.
- 11 Kuv cov kwv tij, kuv hnov cov nyob Kos Los Es hais tias, muaj lus tsis sib haum nyob hauv nej.
- 12 Kuv hnov tias nej nyias hais nyias tias : ‘Kuv yog Paj Lug tog !’ ‘Kuv yog As Pos Los tog !’ ‘Kuv yog Kes Fas tog !’ ‘Kuv yog Leej Plev tog !’
- 13 Leej Plev puas ua ob peb tog ? Puas yog Paj Lug tuag nyob saum ntoo cuam kom tau pab nej ? Nej puas tau txais lub Cim Ntxuav nyob hauv Paj Lug lub npe ?
- 17 Leej Plev tsis xa kuv mus ua lub Cim Ntxuav, nws xa kuv mus tshaj Ntuj lus ; kom kuv txhob muab tej lo lus thoob tsib zoo mloog los tshaj nws lus, kom kuv txhob saib Leej Plev tus ntoo cuam tsis muaj nuj nqis hnyav.

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 4,23

As les lus yas. As les lus yas. YES XUS tshaj Lub Moo Zoo hais txog HUAB TAIS Ntuj lub Ceeb Tsheej. Nws kho cov neeg tuaj cuag nws, lawv tej mob zoo hlo. As les lus yas.

NTAWV MOO ZOO: Mas Tais 4,12-23

Nej Mloog Ib Zag Nyob Hauv Mas Tais Ntawv Moo Zoo

- 12 YES XUS hnov tias luag ntes Zam lawm, ces nws rov mus Nkas Lis Lais.
- 13 Nws tso Nas Xas Las tseg, nws mus nyob ruaj rau Kas Fas Naus, ntawm ntug dej ntuj, nyob ntawm Ntxas Npus Loos thiab Nes Tas Lis ciam teb.
- 14 Li ntawd muaj raws li yaj saub His Xais xub hais tias :
- 15 Ntxas Npus Loos daim av, Nes Tas Lis daim av, kev mus rau dej ntuj, cov teb chaws nyob sab dej Yos Las Das tim ub, cov neeg teev pej kum dab uas nyob Nkas Lis Lais !

- 16 Haiv neeg nyob hauv kev tsaus ntuj pom ib qho pom kev cig loj loj kaj cov neeg maub hauv tub tuag lub teb chaws tsaus ntuj, ib qho pom kev ci tawm tuaj lawm.
- 17 Txij ntawd los, YES XUS pib ceeb toom hais tias : "Nej hloov siab mog, vim Ntuj lub Ceeb Tsheej los txog ze lawm."
- 18 YES XUS mus ko taw taug ntug dej ntuj Nkas Lis Lais, nws pom ob kwv tij : Xis Moos uas hu ua Pob Zeb, thiab nws tus kwv As Nres. Nkawd tseem tab tom pov vas ntses rau hauv dej ntuj, vim nkawd yog tub puav ntses.
- 19 YES XUS hais rau nkawd tias : "Neb raws kuv mus, kuv yuav tsa neb ua tub puav neeg."
- 20 Nkawd tso plhuav cov vas ntses tam sis ntawd, nkawd raws YES XUS mus.
- 21 YES XUS mus ntxiv, nws ho pom ob kwv tij ntxiv : Yas Kos, uas yog Ntxes Npes Dais tus tub, thiab Zam uas yog Yas Kos tus kwv, nkawd nrog nkawd txiv Ntxes Npes Dais nyob hauv nkoj, lawv tseem tab tom ntxiv lawv cov vas ntses. YES XUS hu nkawd.
- 22 Tam sis ntawd, nkawd tso plhuav lub nkoj thiab nkawd txiv tseg, nkawd raws YES XUS mus.
- 23 YES XUS ncig thooob lub xeev Nkas Lis Lais, nws qhia zeej tsoom nyob hauv cov tsev txoos, nws tshaj lub Moo Zoo txog Ntuj lub Ceeb Tsheej. Nws kho tas puas tsav yam mob, tas puas tsav yam txiab nkeeg hauv tsoom pej xeev zoo tas.

Yog Huab Tais Yes Xus Lub Moo Zoo

HNUB CHIV 3 NRUAB XYOO B CHÚA NHẬT 3 THƯỜNG NIÊN NĂM B

ZAJ NYEEM IB: Yos Nas 3,1-5.10

Cov lus nyob hauv ntawv Yos Nas

- 1 HUAB TAIS lub suab nrov tuaj rau Yos Nas yog zaum ob tias:
- 2 “Yos Nas, koj yuav mus kom txog lub tuam tsheej Nis Nis Vas. Tej lus uas koj yuav hais rau lawv mas kuv mam qhia rau koj hais.”
- 3 Yos Nas mloog HUAB TAIS lus. Yos Nas sawv kev tsees mus lawm Nis Nis Vas. Lub tsheej Nis Nis Vas yog ib lub tsheej loj thiab zoo siab. Yuav mus peb hnub thiaj hla dhau lub tsheej.
- 4 Yos Nas mus txog, nws mus ib hnub kev nws thiaj tuaj txog hauv plawv tsheej. Nws hais rau sawv daws tias: “Tshuav plaub caug hnub, cov neeg nyob Nis Nis Vas yuav raug rhuav tas.”
- 5 Tam sim ntawd, cov neeg nybo Nis Nis Vas ntseeg TSWV NTUJ. Ces lawv ceeb toom rau tsoom sid tias: “Tsis hais tus laus los tus hluas, tus hlob los tus yau, sawv daws yuav yoo mov thiab hnav ntaub tsaj them txim.”
- 10 TSWV NTUJ pom cov neeg nyob Nis Nis Vas muab siab rau tso txoj kev txhaum tseg tig los yuav lub siab tshiab, ces TSWV NTUJ hloov siab, nws tsis nplua lub tsheej Nis Nis Vas.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 24,4-5a.6.7c-9

Txais: HUAB TAIS, koj ua kom kuv paub koj tej kev.

1. HUAB TAIS, koj ua kom kuv paub koj txoj kev; qhia koj txoj xub ke rau kuv paub. Koj coj kuv mus taug koj txoj kev tseeb. Koj qhia kuv mas vim koj yog tus TSWV NTUJ cawm kuv. **Teb**
2. HUAB TAIS, koj nco txog koj lub siab khuv leej neeg thiab nco ntsoov koj lub siab nyiam uas koj ib txwm muaj. Koj txhob nco txog kuv cov txhaum. HUAB TAIS, koj nco txog kuv vim koj hlob kuv. **Teb**
3. HUAB TAIS siab zoo siab ncaj tas nrho ! Nws qhia nws txoj kev rau cov neeg txhaum. Nws coj cov neeg me mus rau txoj kev ncaj. Nws qhia nws txoj kev rau cov neeg me paub. **Teb**

ZAJ NYEEM OB: 1 Kos Lis Nthos 7,29-31

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 29 Kwv tij sawv daws, kuv hais rau nej tias, tsis tshuav zim txwv ntev lawm. Li ntawd cov muaj poj niam yuav koj lub neej xws li lawv tsis muaj poj niam.
- 30 Cov neeg quaj yuav ua xws li lawv tsis muaj chaw quaj. Cov nyob hauv txoj kev lom zem, yuav ua xws li lawv tsis lom zem. Cov muas tau cuab yeej, yuav ua zoo li lawv tsis muaj dab tsi ua lawv tug.
- 31 Cov uas siv tej twj nyob ntiaj teb no, lawv yuav ua zoo li lawv tsis siv. Vim ntiaj teb lub ntsej muag yuav dua.

Yog Tswv Ntuj Lo Lus

NKAUJ CAV TXOG LUB MOO ZOO

As les lus yas. As les lus yas. TSWV NTUJ lub Ceeb Tsheej los txog ze lawm, nej hloov siab mog thiab ntseeg txog lub Moo Zoo. As les lus yas.

NTAWV MOO ZOO: Mas Kos 1,14-20

Nej Mloog Ib Zag Nyob Hauv Mas Kos Ntawv Moo Zoo

- 14 Thaum luag ntes Zam lawm, ces YES XUS mus Nkas Lis Lais teb. Nws tshaj lub Moo Zoo qhia txog TSWV NTUJ, nws hais tias:
- 15 "Txog lub caij teem lawm, TSWV NTUJ lub Ceeb Tsheej los txog ze lawm : nej hloov siab, nej ntseeg txog lub Moo Zoo mog."
- 16 YES XUS taug ntug dej ntuj Nkas Lis Lais, nws pom Xis Moos, thiab Xis Moos tus kwv As Nres. Nkawd tab tom pov vas rau hauv dej ntuj, vim nkawd yog tub puav ntes.
- 17 YES XUS hais rau nkawd tias : "Neb raws kuv mus, kuv yuav muab neb hloov ua tub puav neeg."
- 18 Nkawd tso plhuav cov vas puav ntes tseg tam sis ntawd, nkawd raws YES XUS mus.
- 19 YES XUS mus ntxiv me ntsis tom ntej, nws pom Yas Kos, uas yog Ntxes Npes Dais tus tub, thiab Yas Kos tus kwv Zam. Nkawd kuj nyob hauv nkoj thiab, nkawd tseem tab tom ntxiv cov vas ntes.
- 20 YES XUS hu nkawd. Ces nkawd tso plhuav nkawd txiv Ntxes Npes Dais tam sis ntawv thiab cov tub zog rau hauv nkoj, nkawd raws YES XUS mus.

Yog Huab Tais Yes Xus Lub Moo Zoo

HNUB CHIV 3 NRUAB XYOO C CHÚA NHẬT 3 THƯỜNG NIÊN NĂM C

ZAJ NYEEM IB: Nes Hes Mis 8,2-4a.5-6.8-10

Cov lus nyob hauv ntawv Nes Hes Mis

- 2 Ces tus Leej Choj Es Nras nqa phau ntawv txoj cai tuaj tso ntawm lub Txoos hauv ntej. Nyob hauv lub Txoos muaj cov txiv neej, cov poj niam thiab cov me nyuam paub tab. Hnub ntawd yog hnub xiab ib lub xya hli.
- 3 Nyob ntawm lub tshav ncaj lub qhov rooj dej, Es Nras nyeem ntawv txij thaum nyuam qhuav kaj ntug mus txog hnub ntseg. Nws nyeem rau cov poj niam cov txiv neej thiab cov me nyuam paub tab sawv daws mloog. Sawv daws cug pob ntseg zoo mloog txoj cai.
- 4a Tus thoob xwm ntawv Es Nras sawv nyob saum ib lub sam thiaj uas lawv txhob txwm npaj rau nws sawv.
- 5 Es Nras qhib phau ntawv, sawv daws pom nws zoo. Vim nws nyob qhov chaw siab dua sawv daws. Thaum nws pib qhib phau ntawv mas tsoom sid sawv tsees.
- 6 Es Nras pib cav txog tus HUAB TAIS Tswv Ntuj nyob siab. Tas sawv daws tsa tes rau saum ntuj thiab teb tias : “Ua li ! Ua li !” Ces tas tsoom pej xeeb pe HUAB TAIS, lawv ntsej muag khoov ti av.
- 8 Ces Es Nras nyeem Tswv Ntuj txoj cai nyob hauv ntawv. Nws txhais lub ntsiab kom sawv daws to taub zoo.
- 9 Tus Leej Choj Thoob Xwm Es Nras hais rau tsoom pej xeeb tias : “Hnub no, yog ib hnub ntshiab rau nej tus HUAB TAIS Tswv Ntuj ! Nej tsis txhob nyob tej tug mluas mlob, nej tsis txhob quaj!” Nws hais li no vim thaum sawv daws hnov cov lus nthuav txoj cai mas sawv daws quaj.
- 10 Nws tseem hais ntxiv tias : “Nyem no, nej mus noj nqaij noj mov, haus dej haus cawv, nej nqa ib feem mus faib rau cov tsis tau npaj dab tsi. Hnub no yog ib hnub ntshiab rau peb tus HUAB TAIS ! Nej tsis txhob tu siab ! HUAB TAIS chaw zoo siab yog nej lub loog zeb !”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 18B,8-10.15

Txais: HUAB TAIS, koj cov lus yog ntsuj plig thiab yog txoj sia.

1. HUAB TAIS txoj cai zoo tas nrho, nws ntxiv zog rau tus ntsuj plig. HUAB TAIS tus txhooj nyob rauj nreb, nws ua kom tus neeg tswv yim tsawg thoob tsib tuaj. **Teb**
2. HUAB TAIS cov lus qhuab qhia yog lus ncaj ua kom neeg lub siab kaj. HUAB TAIS lo lus qhia ntshiab si ua kom neeg pom kev. **Teb**
3. Kev hwm HUAB TAIS yog kev dawb huv. Kev hwm HUAB TAIS yuav nyob mus li. HUAB TAIS txoj cai yog lus tseeb, yog cov lus txiav txim ncaj. **Teb**
4. HUAB TAIS yog kuv lub tsua, yog tus txhiv kuv. Thov kom cov lus tawm ntawm kuv lub ncauj thiab lub suab seev hauv kuv nruab plawv ntxim koj lub siab. **Teb**

ZAJ NYEEM OB: 1 Kos Lis Nthos 12,12-30

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 12 Kuv tij sawv daws, ib yam li neeg lub cev : neeg muaj tib lub cev xwb : tab sis muaj tes, muaj taw, muaj ntau yam : txhua yam yog lub cev, txawm tias muaj ntau ces, los yeej yog tib lub cev xwb. Nyob hauv Leej Pleev kuj zoo li ntawd.
- 13 Vim tias peb sawv daws tau txais lub Cim Ntxuav nyob hauv LEEJ NTUJ PLIG leeg, thiab nyob hauv tib lub cev xwb. Tsis hais cov Yus Das los cov Hes Las, cov qhev los cov twj lij, peb sawv daws puav leej tau haus txaus siab ntawm LEEJ NTUJ PLIG tib leeg.
- 14 Lub cev tsis muaj ib txhais ceg xwb : lub cev muaj ntau txhais.
- 15 Yog txhais taw hais tias : ‘Kuv tsis yog lub cev, vim kuv tsis yog txhais tes.’ Txawm tias txhais taw hais zoo li ntawd, los nws tseem yog ib ceg ntawm lub cev thiab.
- 16 Yog pob ntseg hais tias : ‘Kuv tsis yog lub cev, vim kuv tsis yog qhov muag.’ Tab yog pob ntseg hais li ntawd, los pob ntseg tseem yog lub cev tug thiab.
- 17 Yog tas lub cev ua qhov muag, mas yuav ua cas hnov suab nrov tau? Yog tas lub cev ua pob ntseg, mas yuav ua cas hnia ntxhiab tau?
- 18 Tab sis TSWV NTUJ tso txhua yam rau hauv lub cev, kom nyias nyob nyias chaw, raws li nws pom zoo.
- 19 Yog tas lub cev muaj ib ceg xwb, mas lub cev yog qhov twg ?

- 20 Muaj ntau ceg, tab sis yog tib lub cev xwb.
- 21 Li ntawd qhov muag hais tsis tau rau txhais tes tias : ‘Kuv tsis tas yuav siv koj !’ Lub taub hau hais tsis tau rau ob txhais taw tias : ‘Kuv tsis tas yuav siv neb !’
- 22 Tej yam hauv lub cev, uas peb saib zoo li tsis muaj zog, tab sis lawv yog qhov muaj nqi dua tej.
- 23 Muaj tej yam uas peb saib tsis muaj tsim dab tsi nyob hauv lub cev, mas yog tej yam uas peb muab siab rau vov zoo dua. Tej yam tsis muaj tsim, mas peb tseem txuag zoo dua tej.
- 24 Tej yam uas peb saib muaj tsim, mas peb tsis vov. TSWV NTUJ dhos tib neeg lub cev kom peb hwm tej yam tsis muaj tsim.
- 25 Li ntawd tsis muaj ib yam uas tsis sib puab nyob hauv lub cev. Tas txhua yam sib dhos zoo.
- 26 Yog ib sab ceg mob, mas tas nrho tej tes taw nrog nws mob. Yog ib txhais tes tau koob meej, mas txhua ces hauv lub cev nrog nws zoo siab.
- 27 Ntawm nej, mas nej yog Leej Plevv lub cev, nyias muaj nyias tug nyob hauv Leej Plevv.
- 28 Nyob hauv lub Koom Txoos, TSWV NTUJ tsa tej tus ua Hauv Paus Xa Lus, tej tus ua Yaj Saub, tej tus ua Xib Hwb. Tseem muaj cov ua hwj huam yees ntxwv, cov tau lub txiaj ntsim kho mob, cov tsob hwb luag, cov tuav kev tswj fwm, thiab cov paub ntau xeem lus.
- 29 Sawv daws puas yog Hauv Paus Xa Lus ? Sawv daws puas yog Yaj Saub, los Xib Hwb ? Sawv daws puas ua hwj huam yees ntxwv ?
- 30 Sawv daws puas txawj kho mob kom zoo ? Sawv daws puas paub ntau xeem lus ? Sawv daws puas txhais tau ntau xeem lus ?

Yog Tswv Ntuj Lo Lus

ZAJ NYEEM LUV LUV: 1 Kos Lis Nthos 12,12-14.27

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 12 Kwv tij sawv daws, ib yam li neeg lub cev : neeg muaj tib lub cev xwb : tab sis muaj tes, muaj taw, muaj ntau yam : txhua yam yog lub cev, txawm tias muaj ntau ces, los yeej yog tib lub cev xwb. Nyob hauv Leej Plevv kuj zoo li ntawd.

- 13 Vim tias peb sawv daws tau txais lub Cim Ntxuav nyob hauv LEEJ NTUJ PLIG leeg, thiab nyob hauv tib lub cev xwb. Tsis hais cov Yus Das los cov Hes Las, cov qhev los cov twj lij, peb sawv daws puav leej tau haus txaus siab ntawm LEEJ NTUJ PLIG tib leeg.
- 14 Lub cev tsis muaj ib txhais ceg xwb : lub cev muaj ntau txhais.
- 27 Ntawm nej, mas nej yog Leej Plevv lub cev, nyias muaj nyias tug nyob hauv Leej Plevv.

Yog Tswv Ntuj Lo Lus

NKAUJ CAV TXOG LUB MOO ZOO: Lk 4,18

As les lus yas. As les lus yas. HUAB TAIS xa kuv mus tshaj lub Moo Zoo rau cov pluag. Nws xa kuv mus ceeb toom rau cov nyob txim tias lawv yuav dim. As les lus yas.

NTAWV MOO ZOO: Lus Kas 1,1-4; 4,14-21

Nej Mloog Ib Zag Nyob Hauv Lus Kas Ntawv Moo Zoo

- 1,1 Tes Os Fis Los, tus zoo koob meej, muaj coob leej tau nqes tes sau ib zag piav txog cov xwm uas tshwm sim nyob hauv nruab nrab peb lawm.
- 2 Lawv tau sau raws li cov tau pom xyeem ntawm qhov muag qhia rau peb. Cov ntawd ua Lo Lus cov tub txib txij lub hauv paus los.
- 3 Kuv tau tshuaj xwm txog txhua yam meej txij thaum pib chiv lub keeb. Kuv thiaj txiav siab sau ib zag muaj hauv paus hauv ntsis rau koj,
- 4 kom koj paub meej tias cov lus qhia uas koj tau txais yog lus khov lus ruaj.
- 4,14 YES XUS rov mus Nkas Lis Lais, nws muaj LEEJ NTUJ PLIG lub zog puv hauv nws. Nws lub moo nto lug mus puv ib cheeb tsam cov zej zog.
- 15 Nws qhia tsoom sid hauv cov tsev txoos, tas sawv daws qhuas nws.
- 16 YES XUS los txog Nas Xas Les, yog lub zos uas nws hlob. Hnub Xas Npas Tos, nws mus hauv lub tsev txoos xws li nws ua kam, ces nws sawv mus nyeem ntawv.
- 17 Lawv cev tus Yaj Saub His Xais phau ntawv rau nws. Nws nthuav kauj ntawv, nws nrhiav tau nqe lus uas sau tias :

- 18 HUAB TAIS lub Tswv Yim nyob saum kuv, vim nws pleev roj los qee kuv.. Nws xa kuv mus tshaj lub Moo Zoo rau cov pluag. Nws xa kuv mus ceeb toom rau cov nyob txim tias lawv yuav dim, rau cov dig muag tias lawv yuav rov pom kev, rau cov raug luag yuam tias lawv yuav rov tau ua neeg twj lij,
- 19 kom kuv tshaj tias yog xyoo HUAB TAIS yuav pub txiaj ntsim.
- 20 YES XUS rov kauv phau ntawv, nws rov muab rau tus tub txib, ces nws zaum. Tas tsoom neeg uas nyob hauv lub tsev txoos ntsia ntsoov YES XUS.
- 21 Ces YES XUS hais rau lawv tias : “Hnub no, cov lus nyob hauv zaj Ntawv no tsheej xeeb raws li nej tau hnov.”

Yog Huab Tais Yes Xus Lub Moo Zoo

HNUB CHIV 4 NRUAB XYOO A CHÚA NHẬT 4 THƯỜNG NIÊN NĂM A

ZAJ NYEEM IB: Xos Fos Nias 2,3; 3,12-13

Cov lus nyob hauv ntawv Xos Fos Nias

- 2,3 Nej sawv daws uas nej yog tsoom me neeg txheej qis nyob tas ntiaj teb, yog cov neeg mloog cov lus qhia, nej nrhiav HUAB TAIS mas ! Nej nrhiav txoj kev ncaj, nej nrhiav txoj kev ua tus me. Ces thaum txog hnuv HUAB TAIS npau taws nyaj nej yuav tau chaw nkaum.
- 3,12 Cov neeg kuv yuav cia nyob hauv koj lub loog ntxiv yog ib haiv neeg tsis muab hlob, tsis khav theeb. Pab Seem His Xas Lais yuav nrhiav chaw vam khom nyob hauv HUAB TAIS lub npe.
- 13 Pab Seem His Xas Lais yuav tsis coj kev nkhaus ntxiv. Lawv yuav tsis hais lus dag lawm. Yuav tsis pom ib tug nplaig nkhaus nyob hauv lawv ntxiv. Lawv yuav tau kev nog zaub, tau kev so. Tsis muaj leej twg yuav ua ntxhov lawv siab.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 145,6b-10

Txais: Cov tau txoj hmoov zoo, yog cov pluag hauv nruab siab, vim Ntuj lub Ceeb Tsheej yog lawv li.

1. HUAB TAIS TSWV NTUJ nco ntsoov nws cov lus mus ib txhiab ib txhis. Nws tswj txoj kev ncaj rau cov neeg uas raug luag hiam. Nws pub rau cov neeg tshaib noj, nws tso cov neeg nyob txim. **Teb**
2. HUAB TAIS qhib cov neeg dig muag kom rov pom kev, nws tsa cov neeg qaug zog. HUAB TAIS nyiam cov neeg ua ncaj, nws pov hwm cov pej kum neeg. **Teb**
3. Nws txhawb cov pom ntsuam thiab cov ntsuag nos. Nws mooj cov siab phem kom lawv yuam kev. HUAB TAIS yog tus vaj nyob mus li. Xis Yoos, nws yog koj tus TSWV NTUJ mus tiam dhau tiam. **Teb**

ZAJ NYEEM OB: 1 Kos Lis Nthos 1,26-31

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 26 Kwv tij sawv daws, nej ntsia saib, Ntuj xaiv nej zoo li cas : nyob hauv nej, tsis muaj ntau leej thooob tsib, tsis muaj ntau leej muaj hwj chim, tsis muaj ntau leej yug los ua tub huab tais.
- 27 Cov neeg uas lub ntiaj teb saib lawv vwm, mas TSWV NTUJ xaiv lawv, kom cov neeg thooob tsib poob ntsej muag. Cov neeg uas lub ntiaj teb saib lawv tsis muaj zog, mas TSWV NTUJ xaiv lawv, kom cov muaj zog poob ntsej muag.
- 28 Cov neeg uas lub ntiaj teb thuum tias lawv yug los tsis nto npe, mas cov ntawd yog cov uas TSWV NTUJ xaiv. Cov neeg uas luag saib tsis muaj qab hau, mas TSWV NTUJ xaiv lawv kom cov muaj hwj huam poob ua neeg tsis muaj tsim.
- 29 Ua li mas tsis muaj ib tug neeg yuav khav tau tias nws muaj tsim nyob ntawm TSWV NTUJ xub ntiag.
- 30 Yog TSWV NTUJ tsa nej nyob hauv YES XUS PLEEV : YES XUS yog peb txoj kev thooob tsib, peb txoj kev ncaj, peb txoj kev ntshiab, peb txoj kev cawm.
- 31 Tej no muaj raws nraim li Ntawv hais tias : ‘Tus twg xav khav mas nws kawg yuav khav nyob hauv HUAB TAIS.’

Yog Tswv Ntuj Lo Lus

NKAUJ CAV TXOG LUB MOO ZOO: Mt 5,12a

As les lus yas. As les lus yas. Nej zoo siab thiab nej hom khaj mog, vim nej yuav tau txais koob haum loj nyob saum ntuj. As les lus yas.

NTAWV MOO ZOO: Mas Tais 5,1-12a

Nej Mloog Ib Zag Nyob Hauv Mas Tais Ntawv Moo Zoo

- 1 YES XUS pom neeg coob coob tuaj, nws nce mus saum lub roob. Nws zaum. Cov thwj tim txav los ze YES XUS.
- 2 Ces YES XUS tsa ncauj qhia lawv hais tias :
- 3 "Cov tau txoj hmoov zoo, yog cov pluag hauv nruab siab, vim Ntuj lub Ceeb Tsheej yog lawv li.
- 4 Cov tau txoj hmoov zoo, yog cov siab zoo, vim lawv yuav txais lub ntiaj teb los ua lawv tug.
- 5 Cov tau txoj hmoov zoo, yog cov quaj ntsuag, vim Ntuj yuav nplij lawv.

- 6 Cov tau txoj hmoov zoo, yog cov tshaib thiab nqhis txoj kev ncaj, vim Ntuj yuav daws lawv qhov nqhis.
- 7 Cov tau txoj hmoov zoo, yog cov hlub luag tej, vim Ntuj yuav hlub lawv.
- 8 Cov tau txoj hmoov zoo, yog cov siab huv, vim lawv yuav pom TSWV NTUJ.
- 9 Cov tau txoj hmoov zoo, yog cov tsim kev thaj yeeb, vim Ntuj yuav hu lawv ua TSWV NTUJ cov me nyuam.
- 10 Cov tau txoj hmoov zoo, yog cov raug luag hiam vim txoj kev ncaj, Ntuj lub Ceeb Tsheej yog lawv tug.
- 11 Thaum luag thuam nej, hiam nej, thiab liam ntau yam phem rau nej vim kuv, mas nej txoj hmoov zoo.
- 12a Nej zoo siab thiab nej hom khaj mog, vim nej yuav tau txais koob haum loj nyob saum ntuj.

Yog Huab Tais Yes Xus Lub Moo Zoo

HNUB CHIV 4 NRUAB XYOO B CHÚA NHẬT 4 THƯỜNG NIÊN NĂM B

ZAJ NYEEM IB: Txoj Caj Ob 18,15-20

Cov lus nyob hauv ntawv Txoj Cai Ob

- 15 Mais Xes hais rau cov His Xas Lais tias: “Koj tus HUAB TAIS TSWV NTUJ yuav tshoj ib tug neeg hauv nruab nrab nej, hauv koj tsoom kwv tij, kom nws sawv ua Yaj Saub zoo li kuv. Nej yuav mloog nws hais.
- 16 Qhov ntawd, yog qhov uas koj tau thov ntawm HUAB TAIS koj tus TSWV NTUJ thaum tsoom His Xas Lais ua lub txoos nyob saum roob Hos Les, koj hais tias : "Kuv tsis xav hnov HUAB TAIS, kuv tus TSWV NTUJ lub suab ntxiv, kuv tsis xav ntsia lub cub tawg loj loj ntawd ntxiv lawm, tsam kuv tuag."
- 17 HUAB TAIS thiaj hais rau kuv tias : "Lawv hais yog lawm.
- 18 Kuv yuav tsa ib tug Yaj Saub zoo li koj, hauv nruab nrab lawv tsoom kwv tij los. Kuv yuav muab kuv cov lus tso rau hauv nws lub ncauj, ces nws yuav hais tas puas tsav yam rau lawv raws li kuv qhia.
- 19 Yog leej twg tsis mloog kuv cov lus uas tus Yaj Saub hais, mas kuv yuav nug nws txog qhov ntawd.
- 20 Yog tus Yaj Saub twg muaj cuab kav tuav txog kuv lub npe hais tej lo lus kuv tsis tau qhia kom hais, los yog nws tuav txog lwm tus tswv ntuj lub npe los hais lus, mas tus Yaj Saub ntawd yuav tuag xwb.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 94,1-2.6-9

Txais: Hnub no yog nej hnov HUAB TAIS lub suab lawm, nej tsis txhob cia nej lub siab tawv li pob zeb.

1. Nej tuaj, peb sawv daws hu nkauj zoo siab cav txog HUAB TAIS! Peb qw suab zoo siab hawm lub tsua cawm peb. Peb txav los ntawm nws xub ntiag ua nws tsuag ! Peb npuaj teg hu nkauj cav txog nws. **Teb**
2. Nej chaws los, peb khoov cev, peb pe. Peb txhos caug hawm tus HUAB TAIS tsim peb los. Nws yog peb tus TSWV NTUJ, peb yog nws haiv neeg, yog pab yaj nws txhais tes hwj. **Teb**
3. Hnub no, nej cia li mloog HUAB TAIS lub suab. Nej tsis txhob cia nej lub siab tawv li pob zeb zoo li thaum nej nyob Mes Lis Npas thiab

nyob Mas Xas hauv teb chaws suab puam. Thaum ntawd, nej cov yawg koob twb pom kuv cov hauj lwm muaj hwj huam, tsis kav lawv tseem twv kuv thiab sim kuv. **Teb**

ZAJ NYEEM OB 1 Kos Lis Nthos 7,32-35

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 32 Kuv tij sawv daws, kuv xav pom nej ua ib co neeg tsis muaj chaw ntxhov siab. Tus txiv neej uas nws tsis muaj poj niam, nws muab siab rau leg HUAB TAIS cov hauj lwm, nws nrhiav txoj kev ua xis Huab Tais siab.
- 33 Tus yuav poj niam lawm, nws muab siab rau leg ntiaj teb cov hauj lwm, nws nrhiav txoj kev ua xis nws poj niam siab. Ces nws lub siab fab rau ob tog huv tib si.
- 34 Tus poj niam tsis muaj txiv, xws li tus nkauj xwb, nws kuj muab siab rau leg HUAB TAIS cov hauj lwm, nws nrhiav txoj kev ua kom nws lub cev thiab nws lub tswv yim ntshiab tuaj. Hos tus yuav txiv lawm, nws muab siab rau leg ntiaj teb cov hauj lwm, nws nrhiav kev kom ua xis nws tus txiv lub siab.
- 35 Kuv hais qhov ntawd, vim yog ib yam zoo rau nej ; tsis yog kuv xav cuab ntxiab rau nej. Kuv xav koj nej mus cuag tej yam tsim nyog, tej yam khi nej rau HUAB TAIS tib leeg.

Yog Tswv Ntuj Lo Lus

NKAUJ CAV TXOG LUB MOO ZOO: Mt 4,16

As les lus yas. As les lus yas. Haiv neeg nyob hauv kev tsaus ntuj pom ib qho pom kev cig loj loj kaj, cov neeg maub hauv tub tuag lub teb chaws tsaus ntuj, ib qho pom kev ci tawm tuaj lawm. As les lus yas.

NTAWV MOO ZOO: Mas Kos 1,21-28

Nej Mloog Ib Zag Nyob Hauv Mas Kos Ntawv Moo Zoo

- 21 YES XUS thiab cov thwj tim mus hauv Kas Fas Naus. Hnub Xas Npas Tos, YES XUS mus hauv lub tsev txoos, nws qhia sawv daws tam sim ntawd.
- 22 Zeej tsoom qhuas nws cov lus qhia, vim nws qhia lawv xws li neeg muaj peev xwm, tsis zoo li cov kws Ntawv Ntshiab.

- 23 Nyob hauv lawv lub tsev txoos, tam sim ntawd, muaj ib tug neeg raug ib tug dab tsis huv nthe nthe tias :
- 24 "YES XUS Nas Xas Les, koj xav ua dab tsis rau wb ? Puas yog koj tuaj rhuav wb ? Kuv paub koj yog leej twg: koj yog TSWV NTUJ tus Ntshiab."
- 25 YES XUS cem nws tias: "Ua twj ywm, koj cia li tawm hauv tus neeg no mus."
- 26 Dab tsis huv siv zog muab tus neeg ntawd co heev heev, nws nthe ib suab nrov nrov ces nws tawm hauv tus neeg mus.
- 27 Tas sawv daws ntshai, lawv sib nug zom zaws tias : qhov ntawd yog dab tsi ? Puas yog ib txog kev qhuab qhia tshiab muaj peev xwm ? Tab yog dab tsis huv, los nws tswj lawv, ces lawv mloog nws lus.
- 28 Ces ib sij huam, YES XUS lub moo nto lug rau txhua qhov, mus thoob ib cheeb tsam hauv xeev Nkas Lis Lais.

Yog Huab Tais Yes Xus Lub Moo Zoo

HNUB CHIV 4 NRUAB XYOO C CHÚA NHẬT 4 THƯỜNG NIÊN NĂM C

ZAJ NYEEM IB: Yes Les Mias 1,4-5.17-19

Cov lus nyob hauv ntawv Yes Les Mias

- 4 HUAB TAIS hais rau kuv li no:
- 5 "Thaum koj tseem tsis tau xeeb hauv koj niam plab, kuv twb paub koj lawm. Koj tseem tsis tau tawm hauv koj niam lub plab los, kuv twb xaiv koj, kuv twb tsa koj ua tus Yaj Saub qhia cov kuj cuab."
- 17 Koj sia koj duav khov. Koj sawv tsees mas ! Koj yuav hais txhua yam kuv qhia koj hais no rau lawv. Koj tsis txhob tshee nyob ntawm sawv daws xub ntiag. Yog koj tshee mas kuv yuav ua kom koj tshee nyob ntawm lawv xub ntiag.
- 18 Koj saib : hnuv no kuv muab koj los ua ib lub tsheej xov ntsa zeb, ua ib tug ncej hlau, ua ib lub phab ntsa tooj tiv tas lub teb chaws, tiv cov vaj Yus Das, tiv cov nom tswv nyob Yus Das teb, tiv cov Leej Choj thiab tiv tsoom pej xeeb huv tib si nyob hauv lub teb chaws.
- 19 Lawv yuav nrog koj sib ntaus roq, tab sis lawv yuav tsis yeej koj, vim kuv nrog koj nyob, kuv npo koj. Yog HUAB TAIS lo lus ceeb toom.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 70,1-4a.5-6ab.15ab.17

Txais: Huab Tais, cov zaj lus piav txog koj txoj kev cawm neeg niaj hnuv nyob hauv kuv lub ncauj.

1. HUAB TAIS, koj yog kuv qhov chaw nkaum, thov kom kuv tsis txhob poob ntsej muag ib zaug ntxiv. Koj siab ncaj, koj cawm kuv, koj npo kuv. Koj tig ntsej los mloog kuv, thov koj cawm kuv mas. **Teb**
2. Koj yog kuv lub tsua, yog lub yeej ntsa zeb thiav kuv. Kuv tus TSWV NTUJ, thov koj npo kuv dim ntawm tus neeg lim hiam txhais tes. **Teb**
3. HUAB TAIS TSWV NTUJ, koj yog kuv lub chaw tso siab. Txij thaum hluas los, kuv tso siab rau koj. Txij thaum kuv yug los, kuv khaub zig koj. Thaum kuv nyob nruab thiab, koj yeej yog kuv lub zog. **Teb**
4. Kuv lub ncauj yuav niaj hnuv cav txog koj txoj kev ncaj thiab kev cawm. TSWV NTUJ, koj tau qhuab qhia kuv txig thaum kuv yaus los txog niaj hnuv no. Kuv yuav cav lus zoo txog koj tej txiaj ntsim. **Teb**

ZAJ NYEEM OB: 1 Kos Lis Nthos 12,31 – 13,13

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 12,31 Kuv tij sawv daws, nej yuav nrhiav cov txiaj ntsim muaj nqis dua cov. Thiab kuv yuav qhia ib txog kev zoo tshaj cov txiaj ntsim ntawd tib si.
- 13,1 Yog kuv txawj hais ntau haiv neeg cov xeem lus, thiab txawj hais Ntuj cov Tshiab cov xeem lus huv tib si, tab sis kuv tsis muaj ib lub siab nyiam, mas kuv tsuas yog ib lub nruas tooj nrov dag, thiab ib lub nruas npuaj ncha ncha xwb.
- 2 Yog kuv txawj ua Yaj Saub, los kuv paub tas ib puas tsav yam lus tob, ib puas tsav yam txuj ci, thiab kuv lub siab ntseeg loj heev, txawm kuv lub siab ntseeg tshem tau tej lub roob rau lwm qhov, tab sis yog kuv tsis muaj ib lub siab nyiam, mas kuv tsis muaj nqis dab tsi.
- 3 Yog kuv muab kuv lub cuab tam tas huv tib si los faib rau cov neeg pluag, thiab kuv muab kuv lub cev hlawv, yog kuv tsis muaj ib lub siab nyiam, mas txhua yam ntawd tsis nqa ib qho dab tsi zoo los rau kuv.
- 4 Lub siab nyiam txawj ua siab ntev, ua siab sib, tsis txawj khib, tsis khav theeb, tsis muab hlob.
- 5 Lub siab nyiam tsis ua tub qaug luag, tsis nrhiav qhov zoo rau nws, tsis npau taws, tsis cib nyeej.
- 6 Lub siab nyiam tsis zoo siab pom luag tej ua tsis ncaj, nws xav pom luag tej nrhiav qhov tseeb.
- 7 Lub siab nyiam zam rau sawv daws, nws ntseeg sawv daws, nws tso siab rau sawv daws, nws ua siab ntev ris tas puas tsav yam nyuaj.
- 8 Txoj kev nyiam tsis txawj dua ib zaug. Txoj kev ua Yaj Saub yuav ploj. Muaj ib hnuv twg, cov neeg txawj txhais tej xeem lus txawv yuav nyob ntsiag to. Txoj kev txawj kev ntse kuj yuav dua.
- 9 Vim tias, txuj ci, peb tsuas paub ib feem xwb.
- 10 Thaum txoj kev zoo txhij zoo txhua los txog, mas tej yam uas neeg ua tau ib feem me me yuav ploj tas huv tib si.
- 11 Thaum kuv tseem yau, kuv hais lus me nyuam yaus, kuv xav tswv yim li me nyuam yaus, kuv txawj xaiv xws li ib tug me nyuam yaus. Thaum kuv hlob tiav lawm, kuv tso tej kev ua me nyuam yaus pov tseg.
- 12 Zaum no, peb pom tsis tseeb, peb tsuas pom zoo li nyob hauv ib daim tsom iav. Lwm tiam, peb yuav pom xyeem ntawm qhov muag. Nyem

no, kuv paub ib feem me me xwb. Fab lwm tiam, kuv yuav paub, ib yam li Ntuj paub kuv.

- 13 Nyem no, txoj kev ntseeg, txoj kev tso siab, thiab txoj kev nyiam tseem muaj nyob ua peb txog kev. Tiam sis, qhov loj tshaj mas yog txoj kev nyiam.

Yog Tswv Ntuj Lo Lus

NKAUJ CAV TXOG LUB MOO ZOO: Lk 4,18

As les lus yas. As les lus yas. HUAB TAIS xa kuv mus tshaj lub Moo Zoo rau cov pluag, ceeb toom rau cov nyob txim tias lawv yuav dim. As les lus yas.

NTAWV MOO ZOO: Lus Kas 4,21-30

Nej Mloog Ib Zag Nyob Hauv Lus Kas Ntawv Moo Zoo

- 21 Ces YES XUS hais rau lawv tias: "Hnub no, cov lus nyob hauv zaj Ntawv no tsheej xeeb raws li nej tau hnov."
- 22 Tas cov neeg ntawd zeem tseeb tias nws hais lus zoo, lawv qhuas cov lus muaj txiaj ntsim tawm hauv nws lub ncauj los. Lawv hais tias : "Tus ntawd, tsis yog Yos Xes tus tub lod ?"
- 23 Ces YES XUS hais rau lawv tias : "Paub ntsoov, nej yuav piv lus hais txog kuv tias : Kws kho mob, koj rov kho koj mas ! Tas txhua yam uas luag piav tias tshwm sim nyob Kas Fas Naus, mas koj kuj ua ib yam li ntawd nyob hauv lub zos koj hlob no thiab mas !"
- 24 YES XUS tseem hais ntxiv tias : "Kuv hais tseeb rau nej, tsis muaj ib tug yaj saub uas luag yuav txais nws zoo hauv lub zos nws hlob.
- 25 Kuv hais tseeb rau nej : lub caij Es Lias nyob, muaj coob tus poj ntsuam nyob His Xas Lais teb. Thaum ntuj kaw nag tau peb xyoos thiab rau hli, tas teb chaws tshaib plab loj kawg.
- 26 Tab sis Ntuj tsis xa Es Lias mus pab cov poj ntsuam His Xas Lais ib tug li. Ntuj xa Es Lias mus pab ib tug poj ntsuam nyob lub zos Xas Les Tas, nyob Xis Doos teb.
- 27 Lub caij tus yaj saub Es Lis Xais nyob, muaj coob tus mob ruas nyob His Xas Lais teb, tab sis tsis muaj ib tug mob ruas His Xas Lais rov huv, tsuas yog tus mob ruas Xis Lias hu ua Nas Maas thiaj rov huv."

- 28 Tas cov neeg hauv lub tsev txoos hnov cov lus ntawd, mas lawv npau taws kawg.
- 29 Lawv sawv tsees, lawv ntiab YES XUS tawm sab nroog nraud. Lawv coj YES XUS mus txog ntawm ib phab toj saum lub roob uas lawv txhim lub nroog, lawv yuav thawb YES XUS kom poob lawm hauv lub qab toj ntshab.
- 30 Tab sis YES XUS hla plaws hauv nruab nrab lawv, nws taug nws kev mus lawm.

Yog Huab Tais Yes Xus Lub Moo Zoo

HNUB CHIV 5 NRUAB XYOO A CHÚA NHẬT 5 THƯỜNG NIÊN NĂM A

ZAJ NYEEM IB: His Xais 58,7-10

Cov lus nyob hauv ntawv His Xais

- 7 Yog koj muab koj cov mov los faib rau tus neeg tshaib noj, yog koj cheem cov txom nyem tsis muaj chaw nkaum kom lawv nyob hauv koj tsev, yog koj muab ris tsho rau tus koj pom liab qab hnab, yog koj tsis tig nraub qaum rau tus muaj lub cev nqaij zoo li koj.
- 8 Yog koj ua li ntawd , mas qhov pom kev yuav txhawv xws li hnub tuaj. Koj lub qhov txhab yuav nqawm sai, koj txoj kev ncaj yuav mus ua koj ntej. HUAB TAIS lub hwj chim yuav hwj koj.
- 9 Yog koj hu mas HUAB TAIS yuav teb, yog koj qw tias : "Tsuag tsuag tuaj tsom kwm kuv." Nws yuav hais tias : "Kuv nyob ntawm no." Yog koj tshem rab quab ntawm koj tsev mus, yog koj tsis tsa tes hem luag, yog koj tsis hais cov lus phem.
- 10 Yog koj faib koj cov mov rau tus neeg tshaib noj, yog koj pub dej rau tus neeg nqhis haus, mas koj qhov pom kev yuav sawv nyob hauv qhov tsaus ntuj. Koj qhov tsaus ntuj yuav pom kev nrig li lub hnub thaum tav su.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 111,4-6.8a-9

Txais: Tus neeg siab ncaj yog lub teeb ci hauv qhov tsaus ntuj rau toom neeg siab ncaj.

1. Tus neeg ncaj ci hauv qhov tsaus ntuj rau cov neeg siab ncaj. Nws khuv leej luag, nws zam rau luag, nws ua txhaum yam ncaj ncees. Tus neeg txawj hlub luag thiab qiv rau luag mas nws txoj hmoov zoo. Nws tswj nws tej nyiaj txiag raws kev ncaj. **Teb**
2. Tus neeg ncaj yuav tsis ntog; sawv daws yuav nco ntsoov txog nws mus li. Nws yuav tsis ntshai cov lus luag liam rau nws. Nws lub siab ruaj khov, nws tso siab rau HUAB TAIS. **Teb**
3. Tus siab ncaj lub siab tawv, nws tsis txhawj. Nws siab day, nws pub ntau rau cov pluag. Nws txoj kev ncaj yuav nyob mus li. Nws yuav tsa taub hau txais koob meej. **Teb**

ZAJ NYEEM OB: 1 Kos Lis Nthos 2,1-5

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 1 Kuv tij sawv daws, ntawm kuv mas, thaum kuv tuaj tim nej, kuv tsis tau siv ib co lus muaj hwj chim thiab ib co lus thoob tsib los tshaj TSWV NTUJ lub txiaj ntsim rau nej.
- 2 Thaum kuv nrog nej nyob, kuv tsuas xav paub YES XUS PLEEV, paub tus YES XUS PLEEV tuag nyob saum ntoo cuam xwb.
- 3 Thaum kuv tuaj cuag nej, kuv yog tus tsis muaj zog, yog tus neeg txhawj tshee na.
- 4 Kuv tej lus, thiab lub Moo Zoo kuv xa tuaj, tsis zoo li kev Thoob Tsib cov lus txawj ntxias neeg. Kuv tej lus yog ib zag txuj tawm hauv Leej Tswv Yim thiab hauv lub Hwj Huam los,
- 5 kom nej txoj kev ntseeg txawb rau saum TSWV NTUJ lub hwj huam, tsis txhob txawb rau saum neeg kev thoob tsib.

Yog Tswv Ntuj Lo Lus

NKAUJ CAV TXOG LUB MOO ZOO: Zam 8,12

As les lus yas. As les lus yas. Huab Tais hais tias: "Kuv yog qhov pom kev kaj lub qab ntuj neeg. Leej twg lawv kuv qab, nws yuav tau qhov pom kev uas coj mus rau txoj sia." As les lus yas.

NTAWV MOO ZOO: Mas Tais 5,13-16

Nej Mloog Ib Zag Nyob Hauv Mas Tais Ntawv Moo Zoo

- 13 Yes Xus hais rau cov thwj tim tias: "Nej yog cov ntsev las lub ntiaj teb. Tab sis yog ntsev tsuag lawm, yuav muab dab tsi ua kom ntsev rov qab daw tuaj ? Ntsev tsuag tsis zoo ua dab tsi, tsuas kawg muab pov tseg nraum zoov rau neeg tsuj xwb.
- 14 "Nej yog lub teeb ci rau lub ntiaj teb. Ib lub nroog txhim rau saum ib lub ncov roob, yuav muab zais tsis tau.
- 15 Hos, luag kuj tsis taws teeb coj mus zais rau hauv qab txee, luag muab txawb saum tus ncej teeb, lub teeb ci rau tas cov neeg nyob hauv tsev pom kev.
- 16 Li ntawd, nej lub teeb yuav tsum ci nyob ntawm zeej tsoom xub ntiag, kom lawv pom nej cov dej num zoo, ces lawv yuav cav txog nej Txiv nyob saum ntuj.

Yog Huab Tais Yes Xus Lub Moo Zoo

HNUB CHIV 5 NRUAB XYOO B CHÚA NHẬT 5 THƯỜNG NIÊN NĂM B

ZAJ NYEEM IB: Yob 7,1-4.6-7

Cov lus nyob hauv ntawv Yob

- 1 "Ib tug neeg ua hauj lwm nyob ntiaj teb no, nws tsis zoo li ib tug tub txib xwb lod? Nws lub neej tsis zoo li ib tug neeg ntiav zog xwb lod?
- 2 Kuv zoo li ib tug qhev ntshaw mus so nyob hauv qhov ntxoov ntxoo. Kuv zoo li ib tug tub zog tos nws tus nqi zog.
- 3 Kuv tos ntev hli, kuv tsis tau raws li kuv tos. Kuv nyob ntau hmo hauv kev txom nyem.
- 4 Yog kuv pw saum kuv daim lev, kuv hais tias thaum twg thiaj yuav kaj ntug ? Kuv nyuam qhuav sawv, kuv hais tias : ceeb laj tos txog tsaus ntuj. Kuv lub tswv yim ntxhov, xav ub xav no mus txog thaum lub hnuv poob qho.
- 6 Kuv lub hnuv nyoog sai dhau tus nqos uas tabtom ntos ntaub, mas thaum kawg kuj tsis muaj chaw vam.
- 7 HUAB TAIS, thov koj nco tias kuv lub neej tsuas ntev li nqos ib pas cua xwb. Thov koj nco tias kuv yuav tsis tau rov pom txoj kev noj qab nyob zoo.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 146,1-6

Txais: Peb cav lus zoo txog HUAB TAIS vim nws nplij cov neeg ntxhov siab.

1. Peb cav lus zoo txog TSWV NTUJ vim nws siab zoo, tsim nyob peb hu nkauj cav txog HUAB TAIS cov txiaj ntsim. HUAB TAIS rov txhim Yes Lus Xas Les. Nws sau cov His Xas Lais nyob pej kum teb rov los. **Teb**
2. Nws nplij cov neeg siab ntuag, nws qhvw lawv tej qhov txhab. Nws txheeb tau cov hnuv qub, nws tis lawv npe. **Teb**
3. Peb tus HUAB TAIS loj, nws muaj hwj huam. Nws lub tswv yim thoob tsib, leej tib neeg ntsuas tsis tau. HUAB TAIS txheem cov neeg me, nws txo cov neeg lim hiam rau hauv av. **Teb**

ZAJ NYEEM OB: 1 Kos Lis Nthos 9,16-19.22-23

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 16 Kwv tij sawv daws, tsis yog vim kuv xav nto koob meej, kuv thiaj tshaj lub Moo Zoo. Tshaj lub Moo Zoo yog tes dej num kuv yuav tsum ua. Yog kuv tsis tshaj lub Moo Zoo, mas kuv txoj hmoov phem.
- 17 Yog kuv ua tus xaiv txoj hauj lwm tshaj lub Moo Zoo, mas kuv yuav muaj cai txais koob haum ; tab sis tsis yog kuv xaiv, yog txoj hauj lwm uas Ntuj muab rau kuv ua.
- 18 Li ntawd mas kuv yuav txais koob haum dab tsi ? Kuv cov koob haum yog pub lub Moo Zoo dawb rau luag txais, kuv tsis noj tej yam uas lub Moo Zoo pub rau kuv noj.
- 19 Kuv yog ib tug neeg twj lij, tsis zwm rau leej twg, tab sis kuv txhob txwm xaiv txoj kev ua sawv daws qhev, vim kuv xav yaum neeg coob coob.
- 22 Thaum kuv nrog cov neeg tsis muaj zog, kuv ua neeg tsis muaj zog, kom rub tau cov tsis muaj zog. Kuv npuab txhua leej txhua tus, vim kuv xav cawm kom tau ib txhia.
- 23 Kuv ua txhua yam rau lub Moo Zoo, kom kuv tau txais ib feem nyob hauv lub Moo Zoo cov txiaj ntsim.

Yog Tswv Ntuj Lo Lus

NKAUJ CAV TXOG LUB MOO ZOO: Mt 8,17

As les lus yas. As les lus yas. Leej Pleev tshem peb tej kev ceg tawv, nws cug nraub qaum ris peb tej kev mob kev ntsaj. As les lus yas.

NTAWV MOO ZOO: Mas Kos 1,29-39

Nej Mloog Ib Zag Nyob Hauv Mas Kos Ntawv Moo Zoo

- 29 Tam sim ntawd, YES XUS tawm hauv tsev txoos, nws nrog Yas Kos thiab Zam nkawd mus hauv Xis Moos thiab As Nres nkawd tsev.
- 30 Xis Moos niam tais mob kub cev, nws pw saum txaj. Tam sim ntawd, lawv tham txog tus niam tais rau YES XUS paub.
- 31 YES XUS txav los tuav niam tais txhais tes, tsa nws sawv. Tus mob kub cev cia li thim hlo. Ces nws tsob hwb lawv.

- 32 Yav tsaus ntuj, thaum lub hnub poob qho lawm, sawv daws coj tas nrho cov neeg mob thiab cov raug dab huv si tuaj rau YES XUS.
- 33 Tas lub nroog sau nthwv tuaj nyob ua ke ntawm nws qhov rooj.
- 34 YES XUS kho neeg coob coob, cov uas nyias raug nyias hom mob, thiab nws tseem ntiab ntau tus dab tawm. Nws tsis pub dab hais lus li, vim cov dab paub nws.
- 35 Thaum sawv ntxov, thaum tseem tsaus ntuj nti, YES XUS sawv, nws tawm mus rau ib qho chaw tsis muaj neeg, ces nws teev Ntuj nyob ntawd.
- 36 Xis Moos thiab nws cov npawg raws YES XUS qab.
- 37 Thaum lawv nrhiav tau YES XUS, lawv hais rau nws tias : "Sawv daws nrhiav koj."
- 38 YES XUS hais rau lawv tias : "Peb mus lwm qhov chaw, hauv cov zej zog nyob tsis deb ntawm no, kom kuv tau kev tshaj lus nyob ntawd thiab, yog vim li ntawd, kuv thiaj tawm tuaj".
- 39 Ces YES XUS mus thoob lub xeev Nkas Lis Lais, nws tshaj lus nyob hauv cov tsev txoos, thiab nws ntiab dab phem.

Yog Huab Tais Yes Xus Lub Moo Zoo

HNUB CHIV 5 NRUAB XYOO C CHÚA NHẬT 5 THƯỜNG NIÊN NĂM C

ZAJ NYEEM IB: His Xais 6,1-2a.3-8

Cov lus nyob hauv ntawv His Xais

- 1 Xyoo tus vaj Os Xias tuag, kuv pom HUAB TAIS zaum saum ib lub theej kiab siab siab. Nws tw tsho dauv mus puv nkaus lub Tuam Tsev tas huv tib si.
- 2a Nyob ntawm nws txheej saud, muaj ib co Tub Xo Xes Las Fis sawv ntsug.
- 3 Lawv ib leeg hu nkauj nrov nrov rau ib leeg tias : "Tsoom tub rog tus HUAB TAIS ntshiab, ntshiab, ntshiab. Nws lub koob meej nyob puv lub ntiaj teb."
- 4 Lub suab ntawd nrov ua cov taw ncej qhov rooj ua zog koog, pa taws ncho puv lub tsev.
- 5 Kuv hais tias : "Kuv hmoov phem ! Kuv yuav tuag ! Kuv yog ib tug neeg di ncauj tsis huv. Kuv nyob nruab nrab ib haiv neeg di ncauj tsis huv. Kuv qhov muag tau pom tus Vaj, tus HUAB TAIS kav tsoom tub rog !"
- 6 Ib tug Tub Xo Xes Las Fis ya ntxiag los txog ntawm kuv, nws txhais tes tuav ib lub pob zeb kub lug uas nws xuas ib rab ciaj tais ntawm lub thaj txi Ntuj los.
- 7 Nws koj lub pob zeb los so kuv di ncauj, nws hais tias : "Saib ! Qhov no twb chwv koj di ncauj lawm, nws tshem koj qhov yuam kev tas huv si. Nws them koj cov txhaum tas lawm."
- 8 Ces kuv hnov HUAB TAIS lub suab hais tias : "Kuv yuav xa leej twg mus ? Leej twg yuav sawv peb cev mus ?" Kuv teb tias : "Kuv nyob ntawm no. Koj xa kuv mus."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 137,1-5.7c-8

Txais: HUAB TAIS, kuv yuav hu nkauj cav txog koj nyob ntawm tsoom Tub Xo xub ntiag.

1. HUAB TAIS, kuv muab tas kuv siab ntsws los ua koj tsaug vim koj hnov cov lus tawm ntawm kuv lub ncauj los. Kuv hu nkauj cav txog koj nyob ntawm ib tsoom Tub Xo xub ntiag. Kuv yuav hawm koj nyob hauv koj lub tuam tsev ntshiab. **Teb**
2. Kuv ua tsaug rau koj lub npe vim koj hluv thiab pheej xeeb. Kuv hu txog koj, koj teb kuv, koj txhab zog rau kuv. **Teb**

3. HUAB TAIS, tas ib tsoom vaj nyob ntiaj teb yuav ua koj tsaug. Thaum lawv hnov cov lus uas koj lub ncauj tau cog, lawv yuav cav lus zoo txog HUAB TAIS, lawv hais tias, “HUAB TAIS lub koob meej loj tas nrho !” **Teb**
4. HUAB TAIS txhais tes xis cawm kuv. Koj yuav ua tas puas tsav yam rau kuv. Koj lub siab hlub nyob mus ib txhiab ib txhis. Koj txhob tso cov hauj lwm koj txhais tes tsim pov tseg. **Teb**

ZAJ NYEEM OB: 1 Kos Lis Nthos 15,1-11

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 1 Kwv tij sawv daws, kuv rov qab hais kom nej nco ntsoov txog lub Moo Zoo uas kuv tau tshaj rau nej. Nej tau txais, thiab nej nyob ruaj nreb hauv lub Moo Zoo ntawd.
- 2 Yog nej ntseeg raws nraim li kuv tau tshaj rau nej, mas nej yuav txais kev cawm nyob hauv lub Moo Zoo. Yog lub Moo Zoo cawm tsis tau nej, mas nej ntseeg dag xwb.
- 3 Qhov kuv tau qhia rau nej, mas yog qhov kuv xub tau txais : yam li YES XUS yeem tuag kom tau ntxuav peb cov txhaum pov tseg, raws li Ntawv Ntshiab xub hais.
- 4 Lawv muab nws zwm rau hauv ntxa, ces hnuv peb, nws sawv rov qab los, raws li Ntawv xub hais.
- 5 Nws yees tawm los rau Pob Zeb pom tas, ces nws rov tawm tuaj rau pab kaum ob leeg pom.
- 6 Tom qab no, YES XUS tseem yees tawm los rau ib pab kwv tij muaj tsib puas leej ib txhij pom. Cov ntawd, muaj qee leej twb tuag lawm, tiam sis cov coob tseem ua neej nyob txog tav no.
- 7 Tom qab no, YES XUS tseem tawm los rau Yas Kos pom, thiab muaj ib zaug rau tas nws cov Hauv Paus Xa Lus huv tib si pom.
- 8 Kuv yog tus puag tom tw, xws li ib tug me nyuam yug los tsis tau puv hli, tsis kav YES XUS kuj tawm tuaj rau kuv pom thiab.
- 9 Kuv yog ib tug Hauv Paus Xa Lus me tshaj cov. Kuv tsis tsim nyog hu ua Hauv Paus Xa Lus, vim kuv tau hiam TSWV NTUJ lub Koom Txoos.

- 10 Yog TSWV NTUJ lub txiaj ntsim ua kom kuv lub siab hloov los zoo li no. TSWV NTUJ lub txiaj ntsim nyob hauv kuv, nws tsis nyob dag. Kuv tau ua hauj lwm ntau tshaj sawv daws. Tab sis tsis yog kuv ua : yog TSWV NTUJ lub txiaj ntsim uas nrog kuv nyob, tau ua cov hauj lwm ntawd.
- 11 Txawm yog kuv los yog lawv, qhov peb tshaj tawm yog cov lus ntawd. Ces nej ntseeg.

Yog Tswv Ntuj Lo Lus

NKAUJ CAV TXOG LUB MOO ZOO: Mt 4,19

As les lus yas. As les lus yas. Huab Tais hais tias: “Neb raws kuv mus, kuv yuav tsa neb los ua ob tug tub puav neeg.” As les lus yas.

NTAWV MOO ZOO: Lus Kas 5,1-11

Nej Mloog Ib Zag Nyob Hauv Lus Kas Ntawv Moo Zoo

- 1 Muaj ib zaug, thaum YES XUS nyob ntawm ntug pas dej Nkes Nes Xas Les, ib pab neeg coob sib txiv mloog TSWV NTUJ Lo Lus ntawm nws.
- 2 YES XUS pom ob lub nkoj nres ntawm ntug dej. Cov tub puav ntses nqes nkoj tas lawm, lawv ntxuav lawv cov vas.
- 3 YES XUS nce mus hauv ib lub nkoj, yog Xis Moos lub, nws kom Xis Moos nquam nkoj mus deb ntawm ntug dej me ntsis. YES XUS zaum hauv nkoj qhia tsoom sid.
- 4 Thaum YES XUS hais lus tas, nws hais rau Xis Moos tias : "Koj nquam nkoj mus lawm tom qhov dej tob, nej tso nej cov vas nqes mus puav ntses."
- 5 Xis Moos teb tias : "Xib Hwb, peb twb khwb ib hmos tsis tau dab tsi. Tab sis yog vim koj hais, mas kuv yuav pov cov vas nqes mus."
- 6 Ces lawv pov vas. Lawv puav tau ntses ntau kawg ua lawv cov vas ntuag kiag.
- 7 Lawv co tes rau cov npawg nyob lwm lub nkoj kom tuaj pab. Cov npawg tuaj txog, sawv daws muab ntses ntim rau ob lub nkoj puv nkaus, ua nkoj yuav luag tog.

- 8 Xis Moos Pob Zeb pom li ntawd, nws txhos caug ntua pe YES XUS, nws hais tias "HUAB TAIS, koj txav mus deb kuv, vim kuv yog ib tug neeg txhaum."
- 9 Xis Moos ntshai kawg, cov nrog Xis Moos ua ke puav leej ntshai, vim lawv puav tau ntses ntau.
- 10 Yas Kos thiab Zam, uas yog Ntxes Npes Dais ob tug tub, thiab yog Xis Moos ob tug npawg, nkawd kuj ntshai kawg. YES XUS hais rau Xis Moos tias : "Koj txhob ntshai, txij no mus, koj yuav puav neeg."
- 11 Ces lawv nquam nkoj los rau tim ntug. Lawv tso tas ib puas tsav yam tseg, lawv raws YES XUS mus.

Yog Huab Tais Yes Xus Lub Moo Zoo

HNUB CHIV 6 NRUAB XYOO A CHÚA NHẬT 6 THƯỜNG NIÊN NĂM A

ZAJ NYEEM IB: Npes Xis Las 15,15-20

Cov lus nyob hauv ntawv Npes Xis Las

- 15 Yog koj xav mas koj yeej coj cov lus qhia tau. Koj yuav ua xis HUAB TAIS siab.
- 16 HUAB TAIS tso dej thiab hluav taws rau ntawm koj xub ntiag. Koj xyab tes mus kov dej los kov hluav taws tau raws li koj nyiam.
- 17 Txoj sia thiab txoj kev tuag nyob ntawm neeg xub ntiag. Ntuj pub txoj sia thiab txoj kev tuag rau neeg raws li neeg nyiam.
- 18 Txoj kev thoob tsib loj tas nrho, nws muaj zog, nws muaj hwj huam. Nws pom tas ib puas tsav yam.
- 19 HUAB TAIS ntsia ntsoov cov neeg hwm nws. Nws paub txhua yam neeg ua.
- 20 HUAB TAIS tsis tau kom leej twg mus taug txoj kev tsis hwm Ntuj, nws tsis tau tso lus rau leej twg ua txhaum.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 118,1-2.4-5.17-18.33-34

Txais: Cov tau txoj hmoov zoo yog cov ua raws HUAB TAIS txoj cai.

1. Cov tau txoj hmoov zoo yog cov neeg coj tus cwj pwm ncaj ncees, yog cov ua raws nraim HUAB TAIS txoj cai. Cov tau txoj hmoov zoo yog cov ua raws li HUAB TAIS lub siab xav, yog cov nrhiav nws tas siab tas ntsws. **Teb**
2. Koj tshaj cov lus qhuab qhia rau zeej tsoom kom muab khaws tseg. Thov kom kuv coj tau tus yeeb yam ruaj, kuv thiaj yuav ua tau raws koj cov cai. **Teb**
3. Thov koj ua zoo rau koj tus tub txib kom kuv muaj txoj sia nyob, kuv yuav khaws koj lo lus. Thov koj qhib kuv lub tswv yim kom kuv ras txog qhov tseeb nyob hauv koj txoj cai. **Teb**
4. HUAB TAIS, thov koj qhia koj cov cai lij choj rau kuv. Kuv yuav ua raws nraim koj txoj cai. Thov koj qhib kuv lub tswv yim kom kuv coj tau koj txoj cai. Kuv yuav muab koj txoj cai cog rau hauv kuv nruab siab. **Teb**

ZAJ NYEEM OB: 1 Kos Lis Nthos 2,6-10

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 6 Kuv tij sawv daws, peb hais txog kev Thoob Tsib rau cov neeg zoo txhij zoo txhua. Txoj kev thoob tsib no tsis yog ntiaj teb kev thoob tsib, thiab tsis yog ntiaj teb cov vaj tej kev thoob tsib uas yuav ploj.
- 7 Txoj kev thoob tsib uas peb hais txog, mas yog TSWV NTUJ txoj kev Thoob Tsib ; yog txoj kev Thoob Tsib uas neeg tsis to taub, thiab tseem nyob zais ntshis txog tav no ; yog kev Thoob Tsib uas TSWV NTUJ ib txwm tshwj zias rau peb txij lub hauv paus los, kom peb muaj hwj chim.
- 8 Yog txoj kev Thoob Tsib uas tsis muaj ib tug vaj nyob ntiaj teb no paub li : yog lawv paub, mas lawv tsis muab tus HUAB TAIS muaj hwj chim tua saum ntoo cuam.
- 9 Peb ua raws li cov lus sau tseg tias : “Peb tshaj tej yam qhov muag tsis tau pom dua, tej yam pob ntseg tsis tau hnov dua, tej yam tsis tau nce los txog neeg lub siab. Peb tshaj txhua yam uas TSWV NTUJ npaj tseg rau cov neeg nyiam nws.”
- 10 TSWV NTUJ qhia tej yam ntawd rau peb paub nyob hauv LEEJ NTUJ PLIG : vim LEEJ NTUJ PLIG tsom tau tas puas tsav yam, nws tsom tau tej yam tob nyob hauv TSWV NTUJ.

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 11,25

As les lus yas. As les lus yas. Txiv, kuv cav lus zoo txog koj, Huab Tais kav lub ntuj lub teb, vim koj qhib cov txuj zais tob Ntuj lub Ceeb Tsheej los rau cov me nyuam yaus. As les lus yas.

NTAWV MOO ZOO: Mas Tais 5,17-37

Nej Mloog Ib Zag Nyob Hauv Mas Tais Ntawv Moo Zoo

- 17 Yes Xus hais rau cov thwj tim tias: “Nej txhob xav tias kuv tuaj rhuav Txoj Cai thiab cov Yaj Saub : kuv tsis tuaj rhuav, kuv tuaj qhia ntxiv kom thoob.

- 18 Vim tias qhov kuv hais rau nej muaj tseeb : lub ntuj lub teb yuav dua, tab sis tsis muaj ib tug txwm ntawv, los ib lub cim ntawv me me hauv Txoj Cai yuav ploj. Tas ib puas tsav yam nyob hauv Txoj Cai yuav tsum tshwm sim tuaj tso.
- 19 Tus twg hla ib txog cai me, thiab nws qhia kom luag ua xws li nws, mas Ntuj yuav saib tus ntawd qis tshaj cov nyob hauv Ntuj lub Ceeb Tsheej. Hos tus ua raws Txoj Cai tas huv si, thiab nws qhia kom luag ua xws li nws, Ntuj yuav saib nws yog tus loj nyob hauv Ntuj lub Ceeb Tsheej.
- 20 "Kuv hais rau nej : yog nej tsis ua siab ncaj dua cov Kws Ntawv Ntshiab thiab cov Fas Lis Xais, mas nej yuav mus tsis tau hauv Ntuj lub Ceeb Tsheej.
- 21 "Nej hnov cov lus qhia rau tej laus thaud tias : "Koj tsis txhob tua neeg. Tus twg tua neeg, nws yuav raug luag txiav txim rau nws.
- 22 Hos kuv, mas kuv hais rau nej : Leej twg npau taws rau nws tus kwv, nws yuav raug txim ntawm tsev hais plaub. Yog nws hais rau nws tus kwv tias "Niag ruam !" mas nws yuav raug txim ntawm lub rooj txwj laus Xas Nes Nrees. Yog nws hais rau nws tus kwv tias : "Niag vwm", mas nws yuav raug txim nyob hauv dab phem cov hluav taws.
- 23 Thaum koj cev ib co txim rau saum lub thaj txi Ntuj, yog koj nco dheev tias koj tus kwv tau muaj lus rau koj lawm.
- 24 Mas koj cia li tso koj cov txim rau ntawm lub thaj txi Ntuj, koj mus nrog koj tus kwv hais kom haum tso, koj mam rov los cev koj cov txim.
- 25 Thaum koj nrog tus neeg ntxub koj tseem ua ke mus kev, koj kav tsij nrog nws hais kom haum, tsam nws coj koj mus kom rau tus txiav txim, ces tus txiav txim muab koj cob rau tub ceev xwm kom muab koj kaw hauv tsev loj faj.
- 26 Kuv hais tseeb rau koj, koj yuav tawm tsis tau hauv tsev loj faj, mus txog thaum koj rho nyiaj qab nas txog npib kawg nkaus los them.
- 27 Nej hnov tej lus qhia tias : Koj yuav tsis txhob deev luag txij luag nkawm.
- 28 Hos kuv, mas kuv hais rau nej: Leej twg ntsia ib tug poj niam vim ntshaw zes nws, tus ntawd twb deev tus poj niam ntawd hauv nruab siab lawm.
- 29 Yog koj sab qhov muag xis coj koj mus ua txhaum, mas kav tsij muab sab qhov muag ntawd kaus pov tseg deb koj : txhiaj khoov cia ib sab qhov muag puas zoo dua tas koj lub cev poob hauv dab phem teb.

- 30 Yog koj sab tes xis coj koj mus ua txhaum, kav tsij muab txiav pov tseg deb koj : txhiaj khoov cia tu ib sab tes zoo dua tas koj lub cev poob hauv dab phem teb.
- 31 Tseem muaj tej lus qhia tias : Leej twg nrauj nws poj niam, yuav tsum muab ib daim ntawv nrauj rau tus poj niam.
- 32 Tab sis, kuv hais rau nej : Tus txiv neej twg nrauj nws poj niam, tus ntawd tso nws poj niam rau luag deev. Qhov no tsis yog hais txog tus poj niam uas mus 'nrog lwm tus txiv neej ua dev ua npua.' Hos leej twg yuav ib tug poj nrauj, mas tus ntawd yog ib tug deev luag txij luag nkawm.
- 33 Nej tseem hnov cov lus qhia rau tej laus thaud tias : Koj tsis txhob twv ntuj, koj yuav ua raws li cov lus koj tau cog rau HUAB TAIS.
- 34 Tab sis kuv hais rau nej, nej tsis txhob twv ntuj ib zaug li. Txhob muab lub ntuj los ua tim khawv, vim ntuj yog TSWV NTUJ lub theej kiab ;
- 35 txhob muab lub ntiaj teb los ua tim khawv, vim lub ntiaj teb yog TSWV NTUJ lub rooj tiag taw ; txhob muab Yes Lus Xas Les los ua tim khawv, vim yog tus Tuam Vaj lub Nroog.
- 36 Txhob muab koj lub taub hau los ua tim khawv, vim koj ua tsis tau kom ib txog plaub hau dawb tuaj los dub tuaj.
- 37 Nej yuav hais li no : Muaj, ces hais tias muaj ; tsis muaj, ces hais tias tsis muaj. Cov lus hais tshaj, yog tuaj ntawm tus Phem tuaj.”

Yog Huab Tais Yes Xus Lub Moo Zoo

ZAJ NYEEM LUV LUV: Mt 5,20-22a.27-28.33-34a.37

Nej Mloog Ib Zag Nyob Hauv Mas Tais Ntawv Moo Zoo

- 20 Yes Xus hais rau cov thwj tim tias: “Kuv hais rau nej : yog nej tsis ua siab ncaj dua cov Kws Ntawv Ntshiab thiab cov Fas Lis Xais, mas nej yuav mus tsis tau hauv Ntuj lub Ceeb Tsheej.
- 21 "Nej hnov cov lus qhia rau tej laus thaud tias : "Koj tsis txhob tua neeg. Tus twg tua neeg, nws yuav raug luag txiav txim rau nws.
- 22a Hos kuv, mas kuv hais rau nej : Leej twg npau taws rau nws tus kwv, nws yuav raug txim ntawm tsev hais plaub.
- 27 Nej hnov tej lus qhia tias : Koj yuav tsis txhob deev luag txij luag nkawm.
- 28 Hos kuv, mas kuv hais rau nej : Leej twg ntsia ib tug poj niam vim ntshaw zes nws, tus ntawd twb deev tus poj niam ntawd hauv nruab siab lawm.

33 Nej tseem hnov cov lus qhia rau tej laus thaud tias : Koj tsis txhob twv ntuj, koj yuav ua raws li cov lus koj tau cog rau Huab Tais.

34a Tab sis kuv hais rau nej, nej tsis txhob twv ntuj ib zaug li.

37 Nej yuav hais li no : Muaj, ces hais tias muaj ; tsis muaj, ces hais tias tsis muaj. Cov lus hais tshaj, yog tuaj ntawm tus Phem tuaj.”

Yog Huab Tais Yes Xus Lub Moo Zoo

HNUB CHIV 6 NRUAB XYOO B CHÚA NHẬT 6 THƯỜNG NIÊN NĂM B

ZAJ NYEEM IB: Les Vis 13,1-2.44-46

Cov lus nyob hauv ntawv Les Vis

- 1 HUAB TAIS hais rau Mais Xes thiab As Loos nkawd tias :
- 2 "Yog ib tug neeg daim tawv xoo pob, voos kiav txhab, los tej tawv nqaij pheej txaij, mas yuav ceev faj tsam yog mob ruas.
- 44 Yog tus txiv neej mob ruas, nws tsis huv; tus pov thawj yuav tsum hais nws tsis huv; nws kab mob nyob ntawm nws taub hau.
- 45 Yog ib tug neeg mob ruas lawm, mas nws yuav tsum hnav tej ris tsho khaub hlab, cia plaub hau ntxhov, nws yuav npog nws sab di ncauj saud, thiab nws yuav qw tias : 'Tsis huv! Tsis huv!'
- 46 Nws mob ntev li cas, mas nws tsis huv ntev li ntawd, vim nws tsis huv, mas nws yuav nyob twm zeej, nws yuav tsum tawm mus nyob sab yeej nraud."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 31,1-2.5.11

Txais: HUAB TAIS, **thaum kuv raug xwv txheej, kuv tig los cuag koj, koj cawm kuv, koj ua kuv siab kaj lug.**

1. Tus tau txoj hmoov zoo yog tus uas Ntuj rhuav nws qhov txhaum pov tseg, yog tus uas Ntuj npog nws qhov txhaum. Tus tau txoj hmoov zoo yog tus uas HUAB TAIS tsis suav nws cov txhaum, yog tus uas nws lub tswv yim tsis dag tias nws tsis lo txhaum. **Teb**
2. Kuv qhia kuv cov txhaum rau koj, kuv tsis zais qhov kuv ua yuam kev. Kuv hais tias, "Kuv yuav lees kuv cov txhaum ntawm HUAB TAIS." Koj txo kuv nras txhaum. **Teb**
3. Tsoom neeg ncaj, nej hom khaj nyob hauv HUAB TAIS, nej zoo siab luag ntxhi. Tsoom neeg siab ncaj, nej qw suab zoo siab. **Teb**

ZAJ NYEEM OB: 1 Kos Lis Nthos 10,31 – 11,1

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 10,31 Kuv tij sawv daws, txawm yog nej noj, nej haus, los nej ua yam twg kuj xij, nej yuav ua los cav txog TSWV NTUJ lub koob meej.
- 32 Li ntawd, nej txhob ua kom cov Yus Das, cov Hes Las, los TSWV NTUJ lub Koom Txoos muaj chaw yuam kev.

- 33 Kuv los kuj ib yam li ntawd : kuv ua yam twg mas kuv muab siab rau ua kom haum sawv daws siab. Kuv tsis nrhiav yam zoo rau kuv. Kuv nrhiav yam zoo rau sawv daws, kom lawv tau txais kev cawm.
- 11,1 Nej yuav yoog raws li kuv tus lwj lwm, ib yam li kuv yoog raws li Leej Pleev tus lwj lwm.

Yog Tswv Ntuj Lo Lus

NKAUJ CAV TXOG LUB MOO ZOO: Lk 7,16

As les lus yas. As les lus yas. Ib tug Yaj Saub loj sawv nyob nruab nrab hauv peb sawv daws. TSWV NTUJ tuaj xyuas nws haiv neeg. As les lus yas.

NTAWV MOO ZOO: Mas Kos 1,40-45

Nej Mloog Ib Zag Nyob Hauv Mas Kos Ntawv Moo Zoo

- 40 Muaj ib tug neeg mob ruas tuaj cuag YES XUS, nws thov YES XUS, nws txhos caug tajj tias : "Yog koj xav, mas koj yeej ua tau kom kuv rov huv."
- 41 YES XUS hlub tus neeg ntawd, YES XUS cev tes tuav nws thiab hais rau nws tias : "Kuv xav. Koj rov huv mas."
- 42 Tam sim ntawd, tus mob ruas tso tus neeg ntawd tseg, nws cia li huv hlo.
- 43 YES XUS qhuab qhia nws nruj nruj thiab kom nws rov mus tam sis ntawd.
- 44 YES XUS hais rau nws tias : "Koj ua twj ywm, txhob qhia dab tsi rau leej twg li. Koj mus thws koj lub cev rau tus leej choj saib, thiab mus cev paj tshab ntxuav koj raws li Mais Xes qhia, ua puav pheej rau luag pom."
- 45 Tab sis tus neeg ntawd tawm plaws mus, nws pib tshaj tej ntawd thiab mus hais rau txhua qhov. Ces YES XUS tsis tau kev tab meeg mus hauv ib lub nroog li. Nws nyob sab nroog nraud, ntawm tej qhov chaw tsis muaj neeg. Neeg tseem tuaj tas qhov txhia chaw tuaj cuag nws.

Yog Huab Tais Yes Xus Lub Moo Zoo

HNUB CHIV 6 NRUAB XYOO C CHÚA NHẬT 6 THƯỜNG NIÊN NĂM C

ZAJ NYEEM IB: Yes Les Mias 17,5-8

Cov lus nyob hauv ntawv Yes Les Mias

- 5 HUAB TAIS hais li no : "Tus neeg uas tso siab rau lwm tus neeg mas nws txoj hmoov yuav phem. Nws muab lub cev nqaij los ua nws lub zog, hos nws lub siab txav mus nyob deb ntawm HUAB TAIS.
- 6 Nws zoo li ib tsob pos tuaj nyob hauv hav maj sab. Nws tsis pom txoj kev noj qab nyob zoo tuaj txog. Nws nyob hauv ib lub teb chaws suab puam qhuav, nyob hauv ib thaj av daw ntsev tsis muaj neeg nyob.
- 7 Hos tus neeg tso siab rau HUAB TAIS thiab npuab HUAB TAIS, mas nws txoj hmoov yuav zoo.
- 8 Nws zoo li ib tsob ntoo cog ze ntug dej. Nws nrhau cag mus txog tus dej. Thaum txog lub caij ntuj qhua nws tsis ntshai. Nws cov nplooj ntsuab mos nyoos mus li. Thaum txog lub xyoo ntuj qhuav qhawv nws tsis txhawj, nws txi txiv tsis tseg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 1,1-4.6

Txais: Cov tau txoj hmoov zoo yog cov tso siab rau TSWV NTUJ.

1. Tus tau txoj hmoov zoo yog tus tsis ua raws cov neeg phem zaj tswv yim. Nws tsis taug cov neeg txhaum txoj kev. Nws xib rau HUAB TAIS txoj cai. Nws tsis zaum ntawm cov neeg thum Ntuj lub rooj. Nruab hnuab, hmo ntuj, nws qog HUAB TAIS txoj cai. **Teb**
2. Nws zoo puav tam li tsob ntoo cog ze dej. Nws txi txiv raws caij, nws cov nplooj tsis ntsws. Nws ua yam twg tau yam ntawd raws siab xav. **Teb**
3. Cov neeg phem tsis hwm TSWV NTUJ txoj cai; lawv zoo li cov npluag nplej uas cua tshuab ya rau txhua qhov. HUAB TAIS zov cov saib ncaj txoj kev; cov neeg lim hiam txoj kev yuav ploj. **Teb**

ZAJ NYEEM OB: 1 Kos Lis Nthos 15,12.16-20

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 12 Kwv tij sawv daws, yog peb tshaj tias Leej Pleev sawv hauv cov tuag rov los lawm, vim li cas, nyem no, muaj tej tus hauv nej hais tias tsis muaj kev sawv hauv cov tuag los?
- 16 Yog cov tuag tsis sawv rov los, mas Leej Pleev kuj tsis tau sawv rov los tiag.
- 17 Yog Leej Pleev tsis sawv rov los, mas peb txoj kev ntseeg yog ib txoj kev cuav, hos nej, los nej tseem nyob hauv nej cov txhaum.
- 18 Thiab cov uas tau mus tsaug zog nyob hauv Leej Pleev, mas lawv ploj lawm tiag.
- 19 Peb cov uas tso siab rau Leej Pleev, yog peb tsuas muaj kev cia siab nyob hauv tiam neej no xwb, mas peb yog cov neeg txom nyem tshaj ib tsoom tib neeg huv si.
- 20 Tab sis tsis yog zoo li ntawd. Leej Pleev sawv hauv cov tuag rov los lawm tiag. Nyob hauv ib tsoom neeg uas mus tsaug zog lawm, mas Leej Pleev yog thawj tug uas tau sawv rov los.

Yog Tswv Ntuj Lo Lus

NKAUJ CAV TXOG LUB MOO ZOO: Lk 6,23ab

As les lus yas. As les lus yas. Huab Tais hais tias: “Nej yuav zoo siab, nej yuav dhia hom khaj, vim nej tau txais koob haum loj nyob saum ntuj.” As les lus yas.

NTAWV MOO ZOO: Lus Kas 6,17.20-26

Nej Mloog Ib Zag Nyob Hauv Lus Kas Ntawv Moo Zoo

- 17 YES XUS nrog cov Hauv Paus Xa Lus nqes los, nws sawv saum ib qho chaw tiaj. Muaj YES XUS ib tsoom thwj tim thiab ib pab neeg coob kawg tuaj ntawm xeev Yus Das, ntawm Yes Lus Xas Les, ntawm ntug dej ntuj Tws Los thiab Xis Doos tuaj.
- 20 YES XUS tsa muag ntsia nws cov thwj tim, nws hais tias : "Nej cov pluag, mas nej txoj hmoov zoo, vim TSWV NTUJ lub Ceeb Tsheej yog nej tug.

- 21 Nej cov uas nyem no nej tshaib, nej txoj hmoov zoo, vim nej yuav tau noj txaus siab. Nej cov uas nyem no nej quaj, nej txoj hmoov zoo, vim nej yuav luag.
- 22 Thaum muaj neeg ntxub nej, thaum luag ntiab nej, los luag cem nej, los xyav lus phem rau nej lub npe vim Neeg Leej Tub, mas nej txoj hmoov zoo.
- 23 Hnub ntawd, nej yuav zoo siab, nej yuav dhia hom khaj, vim nej tau txais koob haum loj nyob saum ntuj. Txheej thaud, lawv cov yawg koob kuj tau ua li ntawd rau cov Yaj Saub.”
- 24 “Hos nej cov nplua nuj, mas nej txoj hmoov phem, vim nej twb txais kev nplij nej lawm.
- 25 Nej cov uas nyem no tau noj tsau, nej txoj hmoov phem, vim nej yuav tshaib. Nej cov uas nyem no nej luag, nej txoj hmoov phem, vim nej yuav quaj thiab yuav ntsaj.
- 26 Thaum zeej tsoom cav lus zoo txog nej, mas nej txoj hmoov phem. Txheej thaud, lawv cov yawg koob kuj ua li ntawd rau cov yaj saub cuav.”

Yog Huab Tais Yes Xus Lub Moo Zoo

HNUB CHIV 7 NRUAB XYOO A CHÚA NHẬT 7 THƯỜNG NIÊN NĂM A

ZAJ NYEEM IB: Les Vis 19,1-2.17-18

Cov lus nyob hauv ntawv Les Vis

- 1 HUAB TAIS hais rau Mais Xes tias :
- 2 "Koj yuav hais rau tsoom tub ki His Xas Lais tias : Nej yuav ua neeg ntshiab, vim kuv yog nej tus HUAB TAIS, nej tus TSWV NTUJ, kuv yog Tus Ntshiab.
- 17 Koj yuav tsis txhob ntsub koj tus kwv tij nyob hauv koj nruab siab. Koj yuav qhuab qhia tus uas nrog koj ua ib haiv neeg, koj thiaj yuav tsis tau ris nws qhov txhaum.
- 18 Koj yuav tsis txhob rob caub thiab yuav tsis txhob chim ntev rau tus uas nws yog koj haiv neeg. Koj yuav nyiam tus nyob ze koj ib yam li koj nyiam koj. Vim kuv yog HUAB TAIS.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 102,1-4.8.10.12.13

Txais: HUAB TAIS hlub mos nyoos, nws khuv leej neeg.

1. Kuv tus plig, koj cav lus zoo txog HUAB TAIS. Kuv tej siab ntsws, nej cav lus zoo txog nws lub npe ntshiab. Kuv tus plig, koj cav lus zoo txog HUAB TAIS. Koj txhob mom nws txheej. Koj yuav nco ntsoov nws tej txiaj ntsim. **Teb**
2. Nws zam koj cov txhaum, nws kho koj tej mob nkeeg. Nws muab nws lub siab zoo thiab khuv leej neeg roos koj. Nws cawm koj txoj sia ntawm kev puas tsuaj. **Teb**
3. HUAB TAIS siab zoo, nws khuv leej neeg tas nrho. Nws hlub neeg mus li, nws tsis npau taws sia. Nws tsis nplua peb raws li peb cov txhaum. Nws tsis paj kev phem rau tej txhaum peb tau ua. **Teb**
4. Nws tshem peb cov txhaum mus deb peb npaum li sab hnuv tuaj nyob nrug deb sab hnuv poob. HUAB TAIS hlub cov neeg hwm nws zoo li leej txiv hlub nws tej tub ki. **Teb**

ZAJ NYEEM OB: 1 Kos Lis Nthos 3,16-23

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 16 Kwv tij sawv daws, nej puas paub tias nej yog TSWV NTUJ ib lub Tuam Tsev ? Nej puas paub tias TSWV NTUJ LEEJ NTUJ PLIG nyob txawm hauv nej ?
- 17 Yog muaj ib tug rhuav TSWV NTUJ lub Tuam Tsev, mas TSWV NTUJ yuav rhuav tus ntawd. Vim tias TSWV NTUJ lub Tuam Tsev yog ib yam ntshiab. Lub Tuam Tsev ntawd yog nej.
- 18 Nej txhob yuam kev. Nyob hauv nej, yog nej leej twg xav tias nws thoob tsib raws li ntiaj teb kev thoob tsib, mas nws yuav tsum ua neeg vwm, kom nws thoob tsib tuaj.
- 19 Vim nyob ntawm TSWV NTUJ xub ntiag, ntiaj teb txoj kev thoob tsib yog ib txog kev vwm. Muaj ib lo lus sau tseg tias : ‘Nws ua kom cov thoob tsib rov mag lawv kev ntse.’ Tseem muaj dua ib los sau tias :
- 20 “HUAB TAIS paub cov neeg thoob tsib xav dab tsi : nws paub tias lawv zaj tswv yim yog ib zaj cuav.”
- 21 Li ntawd, nej txhob muaj ib tug nrhiav koob meej nyob hauv neeg.
- 22 Vim tas txhia yam yog nej tug. Tsis hais Paj Lug, los As Pos Los, los Kes Fas, los lub ntiaj teb, los txoj sia, los txoj kev tuag, los lub zim txwv no, los yav tom ntej : tas txhua yam ntawd yog nej tug.
- 23 Tab sis nej yog Leej Plevv tug, Leej Plevv yog TSWV NTUJ tug.

Yog Tswv Ntuj Lo Lus

NKAUJ CAV TXOG LUB MOO ZOO: 1Zam 2,5

As les lus yas. As les lus yas. Hos tus coj Leej Plevv lo lus, mas txoj kev nyiam Tswv Ntuj hlob tiav nyob hauv nws. As les lus yas.

NTAWV MOO ZOO: Mas Tais 5,38-48

Nej Mloog Ib Zag Nyob Hauv Mas Tais Ntawv Moo Zoo

- 38 Yes Xus hais rau cov thwj tim tias: “Nej hnov tej lus qhia tias : Qhov muag paj qhov muag, kaus hniav paj kaus hniav.
- 39 Hos kuv hais rau nej : nej tsis txhob nrog tus neeg phem sib cav. Yuav ua li no : leej twg ib ncuav pias rau koj sab plhu xis, tig sab plhu laug rau nws thiab.
- 40 Leej twg xav ua plaub rau koj kom tau koj lub tsho, mas koj muab koj lub tsho tshaj sab ntxiv rau nws thiab.

- 41 Leej twg thov koj xa nws mus ib ncuas kev, mas koj nrog nws mus ob ncuas.
- 42 Leej twg thov koj, mas koj pub rau nws. Leej twg xav txais nyiaj ntawm koj, mas koj txhob tig nraub qaum rau nws.
- 43 "Nej hnov tej lus qhia tias : Koj yuav nyiam tus nyob ze koj, koj yuav ntxub koj tus yeeb ncuab.
- 44 Tab sis, kuv hais rau nej tias : nej yuav nyiam nej cov yeeb ncuab, nej yuav thov Ntuj rau cov tsim txom nej ;
- 45 nej thiaj yog nej Txiv nyob saum ntuj cov tub ; vim nej Txiv ua kom lub hnuv tuaj ziaj cov neeg phem thiab cov neeg zoo, nws ua kom nag los rau cov siab ncaj thiab cov siab nkhaus.
- 46 Yog nej nyiam cov neeg nyiam nej, mas nej yuav tau koob haum dab tsi ? Tab yog cov sau se, lawv kuj txawj nyiam li ntawd.
- 47 Yog nej tshwj zias nej cov lus foom zoo rau nej cov kwv tij xwb, mas nej tau ua dab tsi zoo tshaj luag ? Tab yog cov neeg teev pej kum dab, los lawv kuj txawj ua li ntawd.
- 48 Hos nej, mas nej yuav ua neeg zoo tshaj, vim nej Txiv nyob saum ntuj yog tus zoo tshaj.”

Yog Huab Tais Yes Xus Lub Moo Zoo

HNUB CHIV 7 NRUAB XYOO B CHÚA NHẬT 7 THƯỜNG NIÊN NĂM B

ZAJ NYEEM IB: His Xais 43,18-19.21-22.24b-25

Cov lus nyob hauv ntawv His Xais

- 18 Nej txhob nco txog thawj cov xwm, txhob xav tswv yim txog tej yam thaum ub tshwm sid.
- 19 Ntsia saib ! Kuv rov ua dua ib yam tshiab. Yam ntawd twb hlav kaus. Nej tsis pom lod ? Muaj tseeb ! Kuv yuav tho ib txog kev hauv teb chaws suab puam, kuv yuav ua kom tej tus dej txhawv hauv cov teb chaws maj sab.
- 21 Haiv neeg kuv tsim los yuav cav txog kuv lub koob meej mus li."
- 22 Yas Kos, tus uas koj tau hu txog tsis yog kuv. His Xas Lais, koj dhuav kuv lawm.
- 24b Koj tsuas tau muab kev txhaum los cev rau kuv xwb, koj ua tub qaug kuv.
- 25 Tus so koj cov txhaum pov tseg yog kuv, niaj zaus yog kuv, vim kuv siab ntev, kuv tsis nco txog koj cov txhaum.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 40,2-5.13-14

Txais: HUAB TAIS, thov koj hlub, koj kho kuv, vim kuv txhaum rau koj.

1. Tus txawj hlub tus neeg pluag txom nyem, nws txoj hmoov zoo. Thaum nws raug txom nyem, HUAB TAIS yuav npo nws. HUAB TAIS txuag nws txoj sia thiab pub txiaj ntsim rau nws nyob ntiaj teb. HUAB TAIS tsis tso nws rau cov yeeb ncuab txhais tes. **Teb**
2. Thaum nws mob qaug txaj, HUAB TAIS yuav nres nws. Kuv thiaj hais tias, "HUAB TAIS, thov koj hlub kuv. Koj kho kuv vim kuv tau ua txhaum rau koj." **Teb**
3. Koj tau txheem kuv, koj tsa kuv nyob ntawm koj xub ntiag tas ib sim neej. HUAB TAIS, His Xas Lais tus TSWV NTUJ nto moo lug mus tas ib txhiab ib txhis. Ua li ! **Teb**

ZAJ NYEEM OB: 2 Kos Lis Nthos 1,18-22

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 18 Kuv tij sawv daws, kuv tuav txog TSWV NTUJ lub npe, kuv hais tseeb tias, peb lub ncauj tsis ua ib txhij hais tias: ‘tau’ thiab ‘tsis tau.’
- 19 Vim TSWV NTUJ Leej Tub YES XUS PLEEV, uas Xis Vas Nus thiab Tis Mos Tes peb tshaj rau nej paub, mas nws tsis ib txhij hais ‘tau’ thiab ‘tsis tau.’ Nyob hauv YES XUS tsuas muaj lo lus tias: ‘tau.’
- 20 Tas cov lus uas TSWV NTUJ cog huv tib si tshwm sim nyob hauv YES XUS. Thiab yog vim YES XUS, peb thiaj hais tau lo lus tias ‘Ua li’ los xaus cov zaj cav txog TSWV NTUJ lub koob meej.
- 21 Tus ua kom peb nrog nej nyob ruaj nreb hauv Leej Pleev, thiab tus pleev peb, yog TSWV NTUJ.
- 22 TSWV NTUJ muab nws lub thwj los ntaus cim rau peb, nws muab LEEJ NTUJ PLIG lub txiaj ntsim los hom peb.

Yog Tswv Ntuj Lo Lus

NKAUJ CAV TXOG LUB MOO ZOO: Lk 4,18

As les lus yas. As les lus yas. HUAB TAIS xa kuv mus tshaj lub Moo Zoo rau cov pluag. Nws xa kuv mus ceeb toom rau cov nyob txim tias lawv yuav dim. As les lus yas.

NTAWV MOO ZOO: Mas Kos 2,1-12

Nej Mloog Ib Zag Nyob Hauv Mas Kos Ntawv Moo Zoo

- 1 Ob peb hnuv tom qab, YES XUS rov los hauv Kas Fas Naus, sawv daws paub tias YES XUS nyob hauv tsev.
- 2 Ces neeg tuaj sib sau coob coob ua ke, tsis tshuav chaw seem ntawm qhov rooj li. YES XUS qhia Lo Lus rau sawv daws.
- 3 Muaj plaub leeg nqa ib tug tuag ceg tuaj rau YES XUS.
- 4 Lawv tsis tau kev nqa tus tuag ceg los rau YES XUS vim neeg coob dhau, ces lawv yaws lub ruv tsev ncaj qhov chaw YES XUS nyob, lawv tho qhov saum ruv tsev, lawv dauv lub txaj uas tus tuag ceg pw nqes los.
- 5 YES XUS pom lawv lub siab ntseeg, nws hais rau tus tuag ceg tias: "Me kuv, koj cov txhaum daws tas lawm."

- 6 Muaj ib co kws Ntawv Ntshiab nrog tsoom neeg zaum nyob ntawd, lawv xav hauv nruab siab tias :
- 7 "Tus neeg ntawd hais dab tsi li ntawd ? Nws thum Ntuj ! Leej twg thiaj daws txhaum tau ? Tsuas kawg TSWV NTUJ tib leeg xwb."
- 8 Tab sis YES XUS lub tswv yim paub tam sis ntawd tias lawv xav qhov ntawd hauv siab, nws thiaj hais rau lawv tias : "Ua cas nej xav tej zaj zoo li no hauv nej siab ?
- 9 Lo lus twg yog lo hais yooj yim dua rau tus tuag ceg : Yog lo tias 'Koj cov txhaum daws tas', los yog lo tias : 'Koj sawv, nqa koj lub txaj, koj mus' ?
- 10 Ua li mas, nej yuav paub tias Neeg Leej Tub muaj hwj huam daws txhaum tau nyob ntiag teb no." Ces YES XUS hais rau tus tuag ceg tias :
- 11 "Kuv hais rau koj, koj sawv, nqa koj lub txaj, koj rov mus tsev."
- 12 Tus tuag ceg sawv tsees. Nws nqa hlo nws lub txaj tam sim ntawd, nws hla sawv daws xub ntiag tawm mus. Cov neeg nyob ntawd yoob tas, lawv cav txog TSWV NTUJ, thiab lawv hais tias : "Peb tsis tau pom dua ib yam zoo li ntawd ib zaug li."

Yog Huab Tais Yes Xus Lub Moo Zoo

HNUB CHIV 7 NRUAB XYOO C CHÚA NHẬT 7 THƯỜNG NIÊN NĂM C

ZAJ NYEEM IB: 1 Xas Muas 26,2.7-9.12-13.22-23

Cov lus nyob hauv ntawv Xas Muas phau ib

- 2 Xas Ws sawv kev mus nram lub hav suab puam Xis Fes. Peb txhiab leej tub rog His Xas Lais zoo tshaj nrog nws mus caum Das Vis nyob hauv lub hav suab puam Xis Fes.
- 7 Das Vis thiab As Npis Sais nkawd maub mus soj Xas Ws pw tsaug zog nyob hauv nws lub yeej, nws rab hmuv txhos hauv av ze ntawm nws. Cov tub rog pw ncig Xas Ws.
- 8 Ces As Npis Sais hais rau Das Vis tias : "Hnub no, HUAB TAIS tso koj tus yeeb ncuab rau hauv koj txhais tes. Koj cia kuv mus muab nws rab hmuv rov hno nws rau hauv av. Kuv nkaug ib teg xwb ces txaus lawm, tsis tas kuv yuav nkaug ob teg !"
- 9 Tab sis Das Vis hais rau As Npis Sais tias : "Koj tsis txhob tua nws ! Leej twg tua HUAB TAIS tus pleev, mas nws yuav nyob tsis raug txim puas tau ?"
- 12 Ces Das Vis mus ze ntawm Xas Ws taw, nws muab Xas Ws rab hmuv thiab lub plhuaj taub dej. Ces nkawd khiav lawm. Tsis muaj leej twg pom nkawd. Sawv daws tsaug zog tas. Tsis muaj tus hnov li.
- 13 Das Vis hla hav dej mus sab tim ub, nws mus saum lub ncov roob nrug deb ntawm Xas Ws.
- 22 Das Vis mam li hu Xas Ws nrov nrov tias : "Tus vaj rab hmuv nyob ntawm no ! Koj tso koj ib tug tub txib hla tuaj nqa mas !"
- 23 Cia HUAB TAIS txiav txim rau nyias raws li nyias lub siab ncaj siab nees. Hnub no HUAB TAIS muab koj rau hauv kuv tes, tab sis kuv tsis kam tsa tes tua koj, HUAB TAIS tus pleev !"

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 102,1-4.8.10.12.13

Txais: HUAB TAIS hluv mos nyoos, nws khuv leej neeg.

1. Kuv tus plig, koj cav lus zoo txog HUAB TAIS. Kuv tej siab ntsws, nej cav lus zoo txog nws lub npe ntshiab. Kuv tus plig, koj cav lus zoo txog HUAB TAIS. Koj txhob mom nws txheej. Koj yuav nco ntsoov nws tej txiaj ntsim. **Teb**

2. Nws zam koj cov txhaum, nws kho koj tej mob nkeeg. Nws muab nws lub siab zoo thiab khuv leej neeg roos koj. Nws cawm koj txoj sia ntawm kev puas tsuaj. **Teb**
3. HUAB TAIS siab zoo, nws khuv leej neeg tas nrho. Nws hlub neeg mus li, nws tsis npau taws sia. Nws tsis nplua peb raws li peb cov txhaum. Nws tsis pauj kev phem rau tej txhaum peb tau ua. **Teb**
4. Nws tshem peb cov txhaum mus deb peb npaum li sab hnuv tuaj nyob nrug deb sab hnuv poob. HUAB TAIS hlub cov neeg hwm nws zoo li leej txiv hlub nws tej tub ki. **Teb**

ZAJ NYEEM OB: 1 Kos Lis Nthos 15,45-49

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 45 Kwv tij sawv daws, muaj lus sau tseg tias : ‘Thawj tus neeg yog As Das. Thaum Ntuj tsim nws, ces nws yog ib tug plig ciaj sia. Hos tus As Das tshiab tom qab no, yog ib tug plig pub txoj sia.
- 46 Tab sis, tsis yog sab ntsuj plig xwb tawm los rau peb pom. Yog sab nqaij xub tawm los, ces sab ntsuj plig mam tawm los tom qab.
- 47 Thawj tus neeg uas nws tawm ntawm av los, nws yog ntiaj teb tug. Tus neeg tshiab tom qab no, tawm pem qaum ntuj los.
- 48 Tus neeg ntiaj teb zoo li cas, mas cov neeg ntiaj teb kuj zoo li ntawd tas huv tib si. Hos tus neeg qaum Ntuj zoo li cas, mas cov neeg qaum ntuj kuj zoo li ntawd tas huv tib si.
- 49 Peb xub hnav tus neeg ntiaj teb tus duab, ces peb mam li tau hnav tus neeg qaum ntuj tus duab.

Yog Tswv Ntuj Lo Lus

NKAUJ CAV TXOG LUB MOO ZOO: Zam 13,34

As les lus yas. As les lus yas. HUAB TAIS hais tias: “Kuv muab ib lo lus tshiab tso rau hauv nej. Nej yuav sib nyiam sib hlub li kuv nyiam thiab hlub nej ib yam li kuv tau nyiam nej.” As les lus yas.

NTAWV MOO ZOO: Lus Kas 6,27-38

Nej Mloog Ib Zag Nyob Hauv Lus Kas Ntawv Moo Zoo

- 27 Yes Xus hais rau cov thwj tim tias: “Hos kuv hais rau nej cov mloog kuv tias : Nej yuav nyiam nej cov yeeb ncuab, nej yuav ua zoo rau cov neeg ntxub nej,
- 28 nej foom lus zoo rau cov foom phem rau nej, nej thov Ntuj rau cov neeg xyav nej lub moo.
- 29 Leej twg ib ncuav pias rau koj sab plhu, koj tig sab tod rau nws ntaus thiab. Leej twg chua koj lub tsho tshaj sab, mas koj txhob nrog nws txeeb koj lub tsho hnav.
- 30 Leej twg thov koj, mas koj pub rau. Leej twg txeeb tau tej yam nyob hauv koj lub cuab tam, mas koj tsis txhob ntaim kom nws xa rov qab.
- 31 Nej xav kom luag tej ua li cas rau nej, mas nej yuav ua ib yam li ntawd rau luag tej thiab.
- 32 Yog nej nyiam cov neeg nyiam nej, mas lawv yuav nco nej txiaj ntsim li cas? Tab yog cov neeg txhaum, lawv kuj nyiam cov uas nyiam lawv.
- 33 Yog nej ua zoo rau cov neeg ua zoo rau nej, mas lawv yuav nco nej txiaj ntsim li cas ? Cov neeg txhaum kuj ua tau ib yam li ntawd thiab.
- 34 Yog nej txais nyiaj rau cov neeg uas nej paub tias nej yuav tau rov qab, mas lawv yuav nco nej txiaj ntsim li cas ? Cov neeg txhaum kuj txais nyiaj rau cov neeg txhaum kom lawv rov tau li qub.
- 35 Hos nej, mas nej yuav nyiam nej cov yeeb ncuab, nej yuav ua qhov zoo thiab nej yuav txais nyiaj tsis tos luag them rov rau nej. Ces nej tus nqe zog yuav loj, thiab nej yuav yog Tus Nyob Siab Tshaj cov tub, vim nws siab zoo, nws ua zoo rau cov neeg mom nws txiaj ntsim thiab rau cov neeg lim hiam.
- 36 Nej yuav hlub luag tej ib yam li nej Txiv hlub neeg.
- 37 Nej tsis txhob txiav txim, Ntuj thiaj yuav tsis txiav txim rau nej. Nej tsis txhob muab txim, Ntuj thiaj yuav tsis muab txim rau nej. Nej zam txhaum mog, Ntuj thiaj yuav zam rau nej.
- 38 Nej pub, Ntuj thiaj yuav pub rau nej. Ntuj yuav xuas ib lub tawb loj los luj, yuav muab tswm muab co kom ceev thiab ntim nco lug ces Ntuj yuav muab hliv rau hauv nej nqaws tsho. Vim Ntuj yuav xuas lub tawb uas nej luj rov los luj rau nej.”

Yog Huab Tais Yes Xus Lub Moo Zoo

HNUB CHIV 8 NRUAB XYOO A CHÚA NHẬT 8 THƯỜNG NIÊN NĂM A

ZAJ NYEEM IB: His Xais 49,14-15

Cov lus nyob hauv ntawv His Xais

- 14 Yav nram ntej ub, Xis Yoos hais tias : "HUAB TAIS tso kuv pov tseg ! HUAB TAIS hnov qab kuv lawm !"
- 15 Ib tug poj niam puas hnov qab tus me nyuam noj nws mis ? Nws yuav tsis hlub tus uas tawm hauv nws lub cev los lod ? Tab txawm tej niam ntawd hnov qab lawv cov me nyuam, mas kuv yuav tsis hnov qab Xis Yoos ib zaug li !

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 61,2-3.6-9ab

Txais: Kuv tus plig, koj so nyob hauv TSWV NTUJ tib leeg.

1. Kuv tus plig nyob tiaj tus hauv TSWV NTUJ xub ntiag. Txoj kev cawm kuv tuaj ntawm nws tuaj. Nws yog kuv lub tsua, yog tus cawm kuv, yog kuv lub yeej ntsa zeb, kuv yuav tsis vau. **Teb**
2. Kuv tus plig so nyob hauv TSWV NTUJ tib leeg. Nws yog kuv qhov chaw tso siab. Nws yog kuv lub tsua, yog tus cawm kuv, yog kuv lub yeej ntsa zeb, kuv yuav tsis vau. **Teb**
3. Kuv txais kev cawm thiab lub koob meej nyob hauv TSWV NTUJ. Nws yog kuv lub tsua, yog kuv chaw vam khom. Nej yog nws haiv neeg, nej tso siab rau nws. Nej qhib nej lub siab rau nws. **Teb**

ZAJ NYEEM OB: 1 Kos Lis Nthos 4,1-5

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 1 Kwv tij sawv daws, peb xav kom sawv daws saib peb yog YES XUS PLEEV cov tub txib, zoo li cov neeg faib TSWV NTUJ cov txiaj ntsim rau tsoom sid.
- 2 Sawv daws tos dab tsi ntawm cov neeg yuav faib Ntuj cov txiaj ntsim ? Sawv daws xav kom lawv ua ib co neeg tsim nyog tso siab rau.
- 3 Nej yuav txiav txim rau kuv, los ib pab txwj laus yuav txiav txim rau kuv, kuj tau ! Kuv tsis txiav txim rau kuv thiab.

- 4 Kuv tsis pom tias kuv muaj txim. Tsis kav kuv tsis hais tias kuv tsis muaj txim. Tus txiav txim rau kuv yog HUAB TAIS.
- 5 Li ntawd mas nej tsis txhob maj txiav txim rau luag. Cia HUAB TAIS los txog tso : nws yuav ziab tas txhua yam tsaus ntuj kom pom kev tuaj. Nws yuav ua kom sawv daws pom yam npog nyob hauv neeg lub siab. Ces nyias yuav txais TSWV NTUJ lo lus cav txog nyias.

Yog Tswv Ntuj Lo Lus

NKAUJ CAV TXOG LUB MOO ZOO: Hes Nplaws 4,12

As les lus yas. As les lus yas. Tswv Ntuj lo lus muaj txoj sia. Tswv Ntuj lo lus ua tau hauj lwm. Tswv Ntuj lo lus txawj txiav txim rau lub siab ntshaw, thiab rau tej zaj tswv yim nyob hauv nruab siab. As les lus yas.

NTAWV MOO ZOO: Mas Tais 6,24-34

Nej Mloog Ib Zag Nyob Hauv Mas Tais Ntawv Moo Zoo

- 24 Yes Xus hais rau cov thwj tim tias: “Tsis muaj leej twg tsoob hwb ob tug tswv tau : nws yuav ntxub ib tug, nyiam lwm tus, nws yuav npuab ib tug, thuum lwm tus. Nej ib txhij tsoob hwb TSWV NTUJ thiab nyiaj xtiag tsis tau.
- 25 Yog vim li ntawd, kuv thiaj hais rau nej tias : Nej txhob txhawj txog nej txoj sia tias yuav muab dab tsi los noj, txhob txhawj txog nej lub cev tias yuav muab dab tsi los hnav. Nej txoj sia tsis muaj nqi dua txhiam xws noj lod? Nej lub cev tsis muaj nqi dua tej tsoos hnav lod ?
- 26 Nej ntsia cov noog saum ntuj saib : lawv tsis tseb nplej, tsis hlais nplej, tsis sau qoob rau hauv txhab, nej Txiv nyob saum ntuj pub rau lawv noj. Nej tsis muaj nqi dua cov noog ntawd lod ?
- 27 Nej leej twg txhawj txhawj, nws puas rub tau txoj sia kom ntev ib tshim ntxiv ?
- 28 Hais txog tej tsoos tsho, nej yuav txhawj dab tsi ? Nej ntsia cov paj ntoos nyob tom tej nras saib, lawv cia li hlob xwb ! Lawv tsis khwv, tsis ua maj ua ntuag.
- 29 Kuv hais rau nej, tab yog Xas Los Moos, thaum nws muaj koob meej nto moo lug, tsis kav nws tsis tau hnav zoo npaum li ib lub paj ntoos.
- 30 Tej nroj nruab nrag, hnub no ciaj, tag kis luag twb yuav muab pov hlawv hauv qhov txos, tsis kav TSWV NTUJ tseem muab zam zoo rau

lawv hnav. Neeg ntseeg tsis ti txha, TSWV NTUJ tseem yuav tsis ua zoo tshaj rau nej lod ?

- 31 Nej txhob ua siab fab tias : 'Peb yuav muab dab tsi los noj ? Yuav muab dab tsi los haus ? Yuav muab dab tsi los hnav ?'
- 32 Tej ntawd, yog tas puas tsav yam uas cov neeg teev pej kum dab nrhiav. Hos nej Txiv nyob saum ntuj paub tias nej yuav tsum muaj tej ntawd huv si.
- 33 Nej xub nrhiav nej Txiv lub Ceeb Tsheej thiab nws txoj kev ncaj tso, ces Ntuj yuav pub tas puav tsav yam ntawd tib si ntxiv rau nej.
- 34 Nej txhob ua siab fab txog tag kis : tag kis mam li txhawj rau tag kis. Vim niaj hnuv twb muaj kev iab kev khwv txaus ris thawm hnuv lawm.

Yog Huab Tais Yes Xus Lub Moo Zoo

HNUB CHIV 8 NRUAB XYOO B CHÚA NHẬT 8 THƯỜNG NIÊN NĂM B

ZAJ NYEEM IB: Os Xes 2,16b.17b.21-22

Cov lus nyob hauv ntawv Os Xes

- 16b Huab Tais hais tias: “Kuv yuav koj nws mus hauv teb chaws suab puam, kuv yuav hais lus rau nws lub siab mloog.
- 17b Nyob ntawd, nws yuav teb kuv zoo li thaum nws tseem hluas zoo li thaum nws tawm hauv Hais Nkws Tos teb los.”
- 21 Kuv yuav qhaib koj rau kuv tas ib sid. Kuv yuav qhaib koj nyob hauv txoj kev ncaj, txoj kev sib nyiam sib hlub.
- 22 Kuv yuav qhaib koj nyob hauv txoj kev npuab kuv, ces koj yuav paub HUAB TAIS.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 102,1-4.8.10.12-13

Txais: HUAB TAIS hlub mos nyoos, nws khuv leej neeg.

1. Kuv tus plig, koj cav lus zoo txog HUAB TAIS. Kuv tej siab ntsws, nej cav lus zoo txog nws lub npe ntshiab. Kuv tus plig, koj cav lus zoo txog HUAB TAIS. Koj txhob mom nws txheej. Koj yuav nco ntsoov nws tej txiaj ntsim. **Teb**
2. Nws zam koj cov txhaum, nws kho koj tej mob nkeeg. Nws muab nws lub siab zoo thiab khuv leej neeg roos koj. Nws cawm koj txoj sia ntawm kev puas tsuaj. **Teb**
3. HUAB TAIS siab zoo, nws khuv leej neeg tas nrho. Nws hlub neeg mus li, nws tsis npau taws sai. Nws tsis nplua peb raws li peb cov txhaum. Nws tsis pauj kev phem rau tej txhaum peb tau ua. **Teb**
4. Nws tshem peb cov txhaum mus deb peb npaum li sab hnuv tuaj nyob nrug deb sab hnuv poob. HUAB TAIS hlub cov neeg hwm nws zoo li leej txiv hlub nws tej tub ki. **Teb**

ZAJ NYEEM OB: 2 Kos Lis Nthos 3,1b-6

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 1b Kwv tij sawv daws, los peb yuav ua xws li qee leej uas lawv xub cev daim ntawv qhuas txog lawv ua ntej, los lawv taj kom nej xub hais ib lo lus qhuas txog lawv tso ?
- 2 Tsab ntawv qhuas txog peb, yog nej : nej yog tsab ntawv sau rau hauv peb nruab siab. Tas sawv daws paub thiab tau nyeem tsab ntawv ntawd.
- 3 Nej yog Leej Pleev tsab ntawv uas peb npaj ; tsis yog xuas kua mem sau ; yog xuas tus TSWV NTUJ muaj txoj sia LEEJ NTUJ PLIG los sau. Tsis yog ib tsab ntawv txaug rau saum ib daig txiag zeb ; yog ib tsab ntawv sau rau hauv daim txiag nqaij uas yog nej nplooj siab.
- 4 Peb ntseeg khov ntseeg ruaj li ntawd, nyob ntawm TSWV NTUJ xub ntiag, vim Leej Pleev.
- 5 Peb tsis muaj cai khav tias peb ua tau tej yam zoo hauv peb los. Peb muaj peev xwm ua yam twg, los yog tuaj ntawm Tswv Ntuj tuaj.
- 6 Tswv Ntuj pub kom peb muaj peev xwm lis txoj kab xwm saib kev cog lus tshiab : uas tsis yog ib txog kev cog lus nyob hauv ntawv ; yog ib txog kev cog lus nyob hauv LEEJ NTUJ PLIG. Vim ntawv txawj tua neeg, hos LEEJ NTUJ PLIG pub txoj sia rau neeg.

Yog Tswv Ntuj Lo Lus

NKAUJ CAV TXOG LUB MOO ZOO: Yas Kos 1,18

As les lus yas. As les lus yas. Leej Txiv pom zoo hais ib lo lus tseeb yug peb, kom peb ua thawj cov txiv txi hauv txhua yam uas nws tsim los. As les lus yas.

NTAWV MOO ZOO: Mas Kos 2,18-22

Nej Mloog Ib Zag Nyob Hauv Mas Kos Ntawv Moo Zoo

- 18 Thaum Zam cov thwj tim thiab cov Fas Lis Xais tab tom yoo mov, muaj neeg tuaj hais rau YES XUS tias : "Vim li cas Zam cov thwj tim thiab cov Fas Lis Xais cov thwj tim yoo mov, hos koj cov thwj tim tsis yoo ?"

- 19 YES XUS hais rau lawv tias : "Thaum nraug vauv tseem nrog nws cov kwv luag nyob, lawv puas yoo mov tau ? Tas lub caij uas nraug vauv nrog lawv nyob, lawv yoo mov tsis tau.
- 20 Tab sis, muaj ib hnuv luag yuav coj nraug vauv mus deb lawv, ces hnuv ntawd lawv yuav yoo mov.
- 21 Tsis muaj leej twg ntxiv ib daim ntaub tshiab rau lub khaub tsho tshaj sab, vim daim ntaub ntxiv yuav rub lub tsho, daim tshiab rub daim qub, ces haj yam ntuag loj.
- 22 Kuj tsis muaj leej twg ntim cawv tshiab rau hauv ib co hnab tawv qub ; vim cov cawv yuav ua cov hnab tawv qub tawg, ces cawv yuav txeej tas, hos cov hnab tawv los kuj yuav puas tas. Vim li ntawd luag thiaj muab cawv tshiab ntim rau hauv cov hnab tawv tshiab.

Yog Huab Tais Yes Xus Lub Moo Zoo

HNUB CHIV 8 NRUAB XYOO C CHÚA NHẬT 8 THƯỜNG NIÊN NĂM C

ZAJ NYEEM IB: Npes Xis Las 27,4-7

Cov lus nyob hauv ntawv Npes Xis Las

- 4 Thaum yus xuas vab tshaus los tshau, mas tshuav tej yam tsis huv nyob hauv lub vab. Yog yus tshau neeg cov lus, yus kuj pom muaj tej yam tsis zoo.
- 5 Tus puab lauj kaub thiaj sim nws cov lauj kaub nyob hauv qhov txos. Luag kuj tsom tau tib neeg lub siab nyob hauv tib neeg cov lus tham.
- 6 Ib tsob ntoo cov txiv qhia yus kom paub tias lub vaj puas yog ib lub vaj zoo los tsis zoo. Tib neeg cov lus kuj qhia tias tib neeg lub siab puas zoo los tsis zoo.
- 7 Tus neeg twg tseem tsis tau hais lus mas koj txhob cav lus zoo txog nws, vim lub chaw tsom tib neeg yog nws cov lus.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 91,2-3.13-16

Txais: HUAB TAIS, tsim nyog peb yuav ua koj tsaug mus li !

1. Tsim nyog peb yuav ua HUAB TAIS tsaug ! TSWV NTUJ Nyob Siab, tsim nyog yuav hu nkauj cav txog koj lub npe. Sawv ntxov tsees, tsim nyog yuav tshaj koj txoj kev hlob. Hmo ntuj, tsim nyog yuav cav txog koj lub siab pheej xeeb. **Teb**
2. Tus siab ncaj yuav hlob zoo li tsob ntoo kuj yem. Nws tshoom siab li tsob ntoo ciab nyob Lis Npas. Lawv nrhau cag ruaj rau hauv HUAB TAIS tsev. Lawv hlob nyob hauv peb tus TSWV NTUJ cov tshav loog. **Teb**
3. Tab yog lawv laus lawm, lawv tseem txi txiv vim muaj dej yug lawv tus txha. Lawv cov nplooj ntsuab mos nyoos. Lawv tshaj tias HUAB TAIS yog tus ncaj. Lawv hais tias: “HUAB TAIS yog kuv phab tsua, tsis muaj ib yam nkhaus nyob hauv nws.” **Teb**

ZAJ NYEEM OB: 1 Kos Lis Nthos 15,54-58

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 54 Kuv tij sawv daws, thaum lub cev txawj lwj no plhis tau rau lub tsis txawj lwj lawm, thaum lub cev txawj tuag no plhis tau ua lub tsis txawj tuag lawm, mas yuav muaj raws li lo lus nyob hauv Ntawv hais tias : “Txoj kev yeej rhuav txoj kev tuag tog rau hauv qab thu lawm.
- 55 Kev tuag, koj txoj kev yeej nyob qhov twg ? Kev tuag, koj rab hmuv nyob qhov twg?”
- 56 Kev tuag rab hmuv yog kev txhaum. Kev txhaum lub zog yog Txoj Cai.
- 57 Peb ua TSWV NTUJ tsaug, vim nws pub kev yeej rau peb, nyob hauv peb tus HUAB TAIS YES XUS PLEEV.
- 58 Kuv cov kuv tij zoo nyiam, nej ua siab khov siab ruaj mog, kom nej tsuas muaj zoo zuj zus nyob hauv HUAB TAIS lub luag hauj lwm, vim nej paub tias nej tsis nkim zog dag ua hauj lwm nyob hauv HUAB TAIS.

Yog Tswv Ntuj Lo Lus

NKAUJ CAV TXOG LUB MOO ZOO: Fis Lis Pos 2,15d.16a

As les lus yas. As les lus yas. Nej yuav ci ntsa iab li cov hnuv qub pom kev kaj lug, kaj rau lub ntiaj teb neeg. Nej yuav cev lo lus pub txoj sia rau ntiaj teb neeg mog. As les lus yas.

NTAWV MOO ZOO: Lus Kas 6,39-45

Nej Mloog Ib Zag Nyob Hauv Lus Kas Ntawv Moo Zoo

- 39 YES XUS hais dua ib zag paj lug li no : "Ib tug dig muag puas coj tau lwm tus dig muag kev ? Nkawd ob leeg yuav tsis ua ke mus poob qhov lod ?
- 40 Tus thwj tim tsis loj dua nws tus xib hwb. Tus thwj tim uas kawm tiav tas, nws tsuas kawg luaj nws tus xib hwb.
- 41 Vim li cas koj ntsia tus quav nplej uas nyob hauv koj tus kuv lub qhov muag ? Hos tus nqaj uas nyob hauv koj lub qhov muag, koj ho tsis pom !

- 42 Ua cas koj thiaj hais rau koj tus kwv tias : ‘Kwv ntxawg, koj cia kuv rho tus quav nplej hauv koj qhov muag pov tseg’, hos koj twb tsis pom tus nqaj hauv koj qhov muag. Neeg zoo nraum daim tawv, koj rho tus nqaj hauv koj qhov muag pov tseg tso ; koj thiaj yuav pom kev dig tus quav nplej hauv koj tus kwv lub qhov muag.
- 43 "Tsis muaj ib tsob ntoo zoo nkauj yuav txi ib co txiv lwj, tsis muaj ib tsob ntoo lwj yuav txi ib co txiv zoo nkauj.
- 44 Xav paub tsob ntoo, mas yuav ntsia nws lub txiv : luag tsis de txiv ncuav pias saum tej pos kaus ntsaj, luag tsis de txiv cawv saum ib tsob txiv pos tshauv.
- 45 Tus neeg zoo, rho tej yam zoo tawm hauv nws lub siab los. Tus neeg phem rho tej yam phem tawm hauv nws lub siab los. Vim tias yam uas lub ncauj hais tawm, yog phwj hauv lub siab tuaj.

Yog Huab Tais Yes Xus Lub Moo Zoo

HNUB CHIV 9 NRUAB XYOO A CHÚA NHẬT 9 THƯỜNG NIÊN NĂM A

ZAJ NYEEM IB: Txoj Cai Ob 11,18.26-28.32

Cov lus nyob hauv ntawv Txoj Cai Ob

- 18 Mais Xes hais rau cov His Xas Lais : “Nej cim ntsoov kuv cov lus no hauv nej nruab siab thiab ntawm nej ntsuj plig thiab nej muab khi ua cim ntawm nej tes, ua cim ntawm nej qhov muag.
- 26 Hnub no, kuv tso ntawm nej xub ntiag koob hmoov thiab lus tsawm.
- 27 Koob hmoov, yog nej mloog HUAB TAIS nej tus TSWV NTUJ cov lus qhia kuv tau kom rau nej hnub no.
- 28 Lus tsawm, yog nej tsis mloog HUAB TAIS nej tus TSWV NTUJ cov lus qhia thiab nej thim ntawm txoj kev kuv tau kom rau nej hnub no, mus taug thiab lawv lwm cov tswv ntuj nej tsis paub qub qab.
- 32 Nej yuav tsum ua kom tag cov lus tau kom thiab cov txhooj kuv tso ntawm nej xub ntiag hnub no.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 30,2-4.17.25

Txais: HUAB TAIS, koj yog lub tsua thaiv kuv.

1. HUAB TAIS, kuv muab koj los ua kuv lub chaw nkaum, thov kom kuv txhob poob ntsej muag ib zaug li. Koj npo kuv vim koj siab ncaj. Koj tig ntsej los mloog kuv, koj tsuag tsuag tuaj npo kuv mas ! **Teb**
2. Koj yog kuv lub tsua, yog lub tuam loog cawm kuv. Koj yog kuv lub tsua, yog kuv lub yeej ntsa zeb. Koj tuav kuv tes, coj kuv kev kom koj lub npe nto koob meej. **Teb**
3. Koj ua koj lub ntsej muag ci tuaj rau koj tus tub txib mas ! Koj cawm kuv vim koj hlub kuv. Tas nej ib tsoom neeg uas tso siab rau HUAB TAIS, nej ua siab loj siab tawv mog ! **Teb**

ZAJ NYEEM OB: Los Mas 3,21-25a.28

Cov lus Paj Lug sau tuaj rau cov ntseeg nyob Los Mas

- 21 Kwv tij sawv daws, nyem no, TSWV NTUJ txoj kev ncaj tsis tas vam txog Txoj Cai ; TSWV NTUJ txoj kev ncaj tawm tuaj rau neeg pom

xyeem. TSWV NTUJ txoj kev ncaj yog qhov uas Txoj Cai thiab cov Yaj Saub tau zeem tseeb txog.

- 22 Kev ntseeg txog YES XUS PLEEV pub TSWV NTUJ txoj kev ncaj rau tas txhua leej uas ntseeg.
- 23 Vim tsis muaj ib co neeg txawv lwm cov : sawv daws ua txhaum tas huv tib si, yeej tsis muaj ib tug tau TSWV NTUJ lub hwj chim li.
- 24 Yog lub txiaj ntsim ua kom sawv daws ncaj tuaj, vim YES XUS PLEEV tau txhiv sawv daws.
- 25a TSWV NTUJ tso YES XUS tuaj muab nws cov ntshav los them cov neeg ntseeg lub txim.
- 28 Vim peb pom tias neeg txawj ncaj tuaj vim nws ntseeg, tsis yog vim nws coj tau txoj cai.

Yog Tswv Ntuj Lo Lus

NKAUJ CAV TXOG LUB MOO ZOO: Zam 15,5

As les lus yas. As les lus yas. Huab Tais hais tias: "Kuv yog tsob txiv cawv, nej yog cov ceg. Tus uas nyob hauv kuv thiab kuv nyob hauv nws, mas nws txi txiv ncw." As les lus yas.

NTAWV MOO ZOO: Mas Tais 7,21-27

Nej Mloog Ib Zag Nyob Hauv Mas Tais Ntawv Moo Zoo

- 21 Yes Xus hais rau cov thwj tim tias: "Tsis yog cov uas hu kuv ua: "HUAB TAIS, HUAB TAIS," yuav tau mus hauv Ntuj lub Ceeb Tsheej. Yog cov ua raws li kuv Txiv nyob saum ntuj lub siab nyiam.
- 22 Hnub ntawd, yuav muaj coob leej hais rau kuv tias : "HUAB TAIS, HUAB TAIS, thaud, tsis yog peb tuav koj lub npe ua yaj saub lod? Tsis yog peb tuav koj lub npe ntiab dab lod ? Peb ua hwj huam yees ntxwv ntau zaus, tsis yog peb tuav koj lub npe los ua lod ?"
- 23 Ces kuv yuav ncaj qha teb rau lawv tias : "Kuv tsis paub nej ! Nej cov tau ua phem, nej txav mus deb kuv."
- 24 Leej twg mloog cov lus uas kuv nyuam qhuav hais, thiab nws ua raws li cov lus no, mas tus neeg ntawd piv tau rau ib tug neeg xyuam xim uas nws txhim tsev rau saum tsua.

- 25 Thaum los nag hlob, dej sab siv huam, cua tshuab ntsawj lub tsev, tab sis tsev tsis vau, vim lub tsev cog rau saum tsua.
- 26 Hos leej twg hnov cov lus kuv nyuam qhuav hais, tab sis nws tsis ua raws li cov lus ntawd, tus neeg ntawd piv tau rau ib tug neeg ruam txhim tsev rau saum tej av suab puam.
- 27 Thaum los nag hlob, dej sab siv huam, cua tshuab ntsawj lub tsev, ces lub tsev vau. Nws raug xwv txheej loj.”

Yog Huab Tais Yes Xus Lub Moo Zoo

HNUB CHIV 9 NRUAB XYOO B CHÚA NHẬT 9 THƯỜNG NIÊN NĂM B

ZAJ NYEEM IB: Txoj Cai Ob 5,12-15

Cov lus nyob hauv ntawv Txoj Cai Ob

- 12 "Koj cia hnuv Xas Npas Tos ua hnuv ntshiab, koj yuav caiv raws li HUAB TAIS, koj tus TSWV NTUJ tau qhia.
- 13 koj yuav ua hauj lwm rau hnuv, koj yuav lis txhua yam dej num kom tas.
- 14 Tab sis hnuv xya, yog koj tus HUAB TAIS TSWV NTUJ Hnuv Xas Npas Tos. Hnuv ntawd, koj yuav tsis txhob ua ib yam hauj lwm li, koj tsis ua, koj tus tub koj tus ntshais, koj tus tub txib, thiab ntshais txib, koj tus nyuj, koj tus luj, thiab tas koj cov tsiaj huv tib si, tus qhua uas tuaj nyob hauv koj tsev, nej sawv daws yuav tsis txhob ua ib txoj hauj lwm li. Li no, ces koj tus tub txib thiab tus ntshais txib thiaj yuav tau so ib yam li koj.
- 15 Koj yuav nco ntsoov tias koj tau ua luag qhev nyob Hais Nkws Tos teb, tiam sis koj tus HUAB TAIS TSWV NTUJ siv nws txhais tes muaj zog, thiab xyab nws txhais npab mus rub koj tawm los. Vim li ntawd, koj tus HUAB TAIS TSWV NTUJ thiaj qhia koj kom caiv Hnuv Xas Npas Tos."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 80,4-8.10.11ab

Txais: Nej hu nkauj zoo siab cav txog TSWV NTUJ vim nws pab pab.

1. Nej qhib suab paj nruag, nej ntaus nruas nrov ncha ntws nrog suab thaj cheej ntxuag nkauj nog ncas. Nej tshuab kub nyuj thaum lub hli xiab, nqam paj nqam nruas thaum lub hli nra. **Teb**
2. Yog His Xas Lais txoj cai lij choj, yog Yas Kos tus TSWV TNUJ txiav txoj cai no, yog txoj cai HUAB TAIS muab rau Yos Xes, thaum lawv tawm ntawm Hais Nkws Tos teb los. **Teb**
3. Kuv hnov ib lub suab uas kuv tsis tau paub dua hais rau kuv tias, "Kuv txo lub nra saum koj xub pwg, koj ob txhais tes dim ntawm lub nra hnyav. Thaum koj txom nyem, koj hu txog kuv, kuv npo koj dim. **Teb**

4. Koj tsis txhob cia pej kum neeg cov dab qhuas nrog koj nyob. Koj tsis txhob pe hawm lawv cov dab qhuas. Kuv yog koj tus HUAB TAIS TSWV NTUJ, yog tus coj koj tawm hauv Hais Nkws Tos teb los.” **Teb**

ZAJ NYEEM OB: 2 Kos Lis Nthos 4,6-11

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 6 Kwv tij sawv daws, TSWV NTUJ yog tus tau hais tias: ‘Kom qhov pom kev ci hauv qhov tsaus ntuj tuaj.’ Yog tus TSWV NTUJ ntawd ci hauv peb nruab siab tuaj, kom txoj kev paub TSWV NTUJ lub hwj chim uas nyob hauv Leej Pleev lub ntsej muag ci tawm tuaj.
- 7 Peb tuav ib txog kab xwm muaj nqis loj, tab sis peb nqa txoj kab xwm no rau hauv tej lub hub av, kom sawv daws pom tseeb tias, lub hwj huam loj ntawd yog TSWV NTUJ tug, tsis yog tawm hauv peb los.
- 8 Luag txiv peb qhov txhia chaw tuaj, tab sis peb tsis raug luag tsuj. Peb tsis pom qab tso siab rau leej twg, tab sis peb txoj kev cia siab tsis muaj chaw tas.
- 9 Peb raug luag hiam, tab sis Ntuj tsis tso peb pov tseg. Peb raug luag thawb rau hauv pem teb, tab sis peb tsis raug luag rhuav.
- 10 Peb mus txog qhov twg, peb ris YES XUS txoj kev txom nyem thiab kev tuag nyob hauv peb lub cev, kom YES XUS txoj sia tawm tuaj rau sawv daws pom xyeem nyob hauv peb lub cev.
- 11 Txawm tias peb tseem muaj txoj sia, los niaj hnuv luag yuav muab peb tua vim YES XUS, kom xwv YES XUS txoj sia tawm los rau sawv daws pom xyeem nyob hauv peb lub cev txawj tuag.

Yog Tswv Ntuj Lo Lus

NKAUJ CAV TXOG LUB MOO ZOO: s. Zam 17,17

As les lus yas. As les lus yas. HUAB TAIS, koj lo lus yog lus tseeb. Koj tau xaiv peb los nyob hauv koj txoj kev tseeb. As les lus yas.

NTAWV MOO ZOO: Mas Kos 2,23 – 3,6

Nej Mloog Ib Zag Nyob Hauv Mas Kos Ntawv Moo Zoo

- 2,23 Muaj ib zaug, yog hnuv Xas Npas Tos, Yes Xus hla ib thaj nplej, cov thwj tim taug kev, lawv pib de tej hnav nplej.
- 24 Cov Fas Lis Xais hais rau YES XUS tias : "Saib ! Vim li cas lawv ua tej yam txwv tsis pub ua hnuv Xas Npas Tos ?"

- 25 YES XUS hais rau lawv tias : "Nej tsis tau nyeem ib zaug txog qhov Das Vis ua thaum nws tsis muaj dab tsi noj, ces nws thiab nws cov kwv luag tshaib plab lod ?
- 26 Nws mus hauv TSWV NTUJ lub tsev li cas, thiab noj cov ncuav mov txi Ntuj uas kawg yog cov leej choj thiaj noj tau xwb, nws tseem muab rau nws cov kwv luag noj thiab. Thaum ntawd yog lub caij As Npias Thas ua tuam leej choj".
- 27 Ces YES XUS hais rau lawv tias : "Ntuj tsim hnuv Xas Npas Tos rau neeg, tsis yog tsim neeg rau hnuv Xas Npas Tos,
- 28 Neeg Leej Tub kuj yog tus tswv kav hnuv Xas Npas Tos thiab."
- 3,1 Yes Xus rov mus hauv ib lub tsev txoos dua. Nyob ntawd, muaj ib tug neeg uas ib sab tes qhuav.
- 2 Ces lawv nvas ntshis ntsia saib YES XUS puas yuav kho tus neeg qhuav tes ntawd hnuv Xas Npas Tos, kom lawv tau kev liam rau YES XUS.
- 3 YES XUS hais rau tus neeg qhuav tes tias : "Koj los sawv hauv nruab nrab."
- 4 Thiab YES XUS hais rau lawv tias : "Hnuv Xas Npas Tos, puas kheev kom ua qhov zoo los cia ua qhov phem, cawm ib txog sia los txo ib txog sia ?" Sawv daws nyob ntsiag to.
- 5 YES XUS ntsia lawv ib muag npau taws vog, nws tu siab vim lawv lub siab txhav, ces nws hais rau tus neeg qhuav tes tias : "Koj xyab tes." Ces nws xyab, nws txhais tes rov zoo hlo.
- 6 Thaum cov Fas Lis Xais tawm mus, lawv nrog cov Hes Los Dias sab laj saib yuav ua li cas thiaj tau kev muab YES XUS tua.

Yog Huab Tais Yes Xus Lub Moo Zoo

HNUB CHIV 9 NRUAB XYOO C CHÚA NHẬT 9 THƯỜNG NIÊN NĂM C

ZAJ NYEEM IB: 1 Vaj 8,41-43

Cov lus nyob hauv ntawv Vaj phau ib

- 41 Xas Los Moos tsa tes rau saum Ntuj hais tais : “TSWV NTUJ, yog muaj ib tug neeg pej kum teb, tsis yog koj haiv neeg, los tsuav yog nws tuaj teev koj nyob hauv lub tsev no, mas thov koj uas koj nyob txawm saum ntuj, koj mloog nws cov lus thov mas !
- 42 TSWV NTUJ, tas ntiaj teb yuav hnov koj lub npe nto moo, yuav hnov cav txog koj txhais tes muaj muaj zog.
- 43 TSWV NTUJ uas nyob txawm saum ntuj, koj mloog tus pej kum neeg cov lus thov tas tib si, kom cov haiv neeg nyob tas ntiaj teb paub koj lub npe thiab hwm koj zoo li koj haiv His Xas Lais, thiab kom lawv paub tias qhov chaw zoo hwm koj lub npe yog nyob hauv lub Tuam Tsev uas kuv tau txhim no.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 116,1-2

Txais: Nej mus thoob qab ntuj, nej tshaj kuv lub moo zoo rau txhua leej txhua tus.

1. Tas txhua haiv neeg, nej cav lus zoo txog HUAB TAIS. Tas ib tsoom neeg, nej cav tog nws lub koob meej. **Teb**
2. HUAB TAIS lub siab hluv muaj zog tas nrho. Nws lub siab pheej xeeb mus ib txhiab ib txhis. **Teb**

ZAJ NYEEM OB: Nkas Las Tias 1,1-2.6-10

Cov lus nyob hauv Paj Lug tsab ntawv xa rau cov ntseeg nyob Nkas Las Tias

- 1 Kuv tij sawv daws, kuv yog Paj Lug, tus Hauv Paus Xa Lus, uas tsis yog ib pab neeg xa tuaj, tsis yog ib tug neeg tsa ; tus tsa kuv yog YES XUS PLEEV, thiab Leej Txiv TSWV NTUJ uas nws tsa YES XUS sawv hauv cov tuag rov los.
- 2 Tas cov kuv tij uas nrog kuv nyob, peb sau ntawv tuaj rau cov Koom Txoos nyob Nkas Las Tias teb

- 6 Kuv siab poob nthav, rau qhov tias nej tso tus hu nej los nyob hauv Leej Plev lub txiaj ntsim pov tseg sai tas npaud, nej cia li hloov mus rau lwm lub moo zoo.
- 7 Vim tias, tsis muaj ob lub moo zoo. Tsuas muaj ib co neeg ua ntxhov quav niab nyob hauv nej xwb : lawv xav muab Leej Plev lub Moo Zoo ntseev.
- 8 Nej yuav paub tias, tab yog Ntuj ib tug Tub Xo nqes saum ntuj los qhia ib lub moo zoo txawv lub peb tshaj rau nej, mas peb thov kom tus Tub Xo ntawd raug foom lus phem.
- 9 Peb twb tau hais rau nej lawm, hnuv no, kuv rov hais dua tias : yog muaj neeg xa ib lub moo zoo txawv lub nej tau txais, mas kuv thov kom tus ntawd raug Ntuj lo lus tsawm foom.
- 10 Nyem no, kuv puas nrhiav kom neeg nyiam kuv, los kom TSWV NTUJ nyiam kuv ? Kuv puas nrhiav ua xis neeg siab ? Yog kuv xav ua xis neeg siab, mas kuv tsis yog Leej Plev tus tub txib ntxiv.

Yog Tswv Ntuj Lo Lus

NKAUJ CAV TXOG LUB MOO ZOO: Zam 3,16

As les lus yas. As les lus yas. Tswv Ntuj nyiam lub qab ntuj neeg npaum no : Nws thiaj muab Nws Leej Tub twm zeej rau, kom xwv tus ntseeg txog Leej Tub, kom nws muaj txoj sia nyob mus li. As les lus yas.

NTAWV MOO ZOO: Lus Kas 7,1-10

Nej Mloog Ib Zag Nyob Hauv Lus Kas Ntawv Moo Zoo

- 1 Thaum YES XUS hais nws cov lus rau tsoom sid mloog tas, nws mus hauv Kas Fas Naus.
- 2 Ib tug xab txheeb muaj ib tug tub txib uas nws nyiam kawg tab tom mob hnyav, yuav tuag.
- 3 Thaum tus xab txheeb hnov hais txog YES XUS, nws xa ob peb tug laus neeg Yus Das tuaj thov YES XUS kom mus cawm nws tus tub txib.
- 4 Thaum cov laus neeg tuaj txog ntawm YES XUS, lawv thov YES XUS tas zog rau tus xab txheeb tias : "Tsim nyog koj yuav ua qhov ntawd rau nws,
- 5 nws nyiam peb haiv neeg, thiab nws yog tus tau txhim lub tsev txoos rau peb."

- 6 YES XUS nrog lawv taug kev mus. Thaum lawv tuaj yuav txog lub tsev, ces tus xab txheeb xa ib pab phooj ywg tuaj hais rau YES XUS tias : "HUAB TAIS, txhob ua nyuaj koj, vim kuv tsis tsim nyog koj chaws los hauv kuv tsev,
- 7 thiab kuv saib kuv tsis tsim nyog tuaj cuag koj. Tab sis koj hais ib lo lus kom kuv tus tub txib zoo hlo.
- 8 Vim tias, txawm kuv yog ib tug neeg zwm rau ib tug loj, kuj muaj ib co tub rog uas kuv tswj lawv, yog kuv hais rau ib tug tias 'Mus!' ces nws cia li mus ; hos kuv hais rau lwm tus tias : 'Los !', mas nws cia li los. Kuv hais rau kuv tus tub txib tias 'Ua qhov no !' ces nws cia li ua".
- 9 YES XUS hnov cov lus no, nws qhuas tus xab txheeb. YES XUS tig ntsia tom qab, nws hais rau cov neeg lawv nws qab hais tias : "Kuv hais rau nej, nyob hauv tsoom His Xas Lais, kuv tsis tau pom ib lub siab ntseeg npaum li no."
- 10 Thaum cov neeg uas tuaj tos YES XUS rov mus txog tsev, lawv pom tus tub txib twb zoo neej lawm.

Yog Huab Tais Yes Xus Lub Moo Zoo

HNUB CHIV 10 NRUAB XYOO A CHÚA NHẬT 10 THƯỜNG NIÊN NĂM A

ZAJ NYEEM IB: Os Xes 6,3-6

Cov lus nyob hauv ntawv Os Xes

- 3 Peb kav tsij nrhiav kom paub HUAB TAIS. Nws yeej yuav tuaj tiag tiag, ib yam li lub hnub tawm thaum sawv ntxov. Nws yuav tuaj xws li cov kob nag, xws li cov nag poob los ywg av lub caij ntuj tshiab."
- 4 HUAB TAIS hais tias : "Kuv yuav ua dab tsi rau koj, Es Fais ? Kuv yuav ua dab tsi rau koj, Yus Das ? Nej txoj kev nyiam kuv yog zoo li cov huab thaum sawv ntxov, zoo li cov lwg uas qhuav sai sai.
- 5 Yog vim li ntawd kuv thiaj kom cov Yaj Saub faib lawv ua ntau pawg, kuv lub ncauj hais cov lus muab lawv tua, kuv kev txiav txim tawm plaws xws li qhov pom kev.
- 6 Vim yog kev nyiam thiaj xis kuv siab. Cov thaj txi Ntuj tsis xis kuv siab. Kev paub TSWV NTUJ xis kuv siab dua cov thaj hlawv tsiaj."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 49,1.3.12-15

Txais: Kuv yuav qhia tus neeg siab ncaj kom nws paub TSWV NTUJ txoj kev cawm neeg.

1. TSWV NTUJ hu tas ntiag teb neeg txij toob fab txog xib fab tuaj sib txoos. Nws hais tias: "Kuv cem koj, tsis yog tim cov txim uas koj txi rau kuv vim cov tsiaj koj hlawv txi rau kuv nyob ntawm kuv xub ntiag tsis tseg. **Teb**
2. Yog kuv tshaib plab, tsis tas kuv yuav hais qhia nej vim lub qab ntuj khwb thiab txhua tsav txhua yam nyob hauv ntiag teb yog kuv tug. Nej puas xav tias kuv yuav noj nqaij nyug los haus ntshav tshis ? **Teb**
3. Nej muab lo lus cav zoo los txi rau Ntuj. Nej ua raws li cov lus nej cog rau tus TSWV NTUJ Nyob Siab. Thaum nej raug kev txhawj xeeb, nej hu txog kuv, kuv yuav npo nej ces nej yuav cav txog kuv lub koob meej. **Teb**

ZAJ NYEEM OB: Los Mas 4,18-25

Cov lus nyob hauv Paj Lug tsab ntawv xa rau cov ntseeg nyob Los Mas

- 18 Kwv tij sawv daws, tab yog Has Nplas Has tsis pom muaj chaw tso siab, tsis kav nws tseem tso siab, nws ntseeg, ces nws tau ua ntau haiv

neeg txiv, raws nraim li TSWV NTUJ lo lus hais tias : ‘koj tsoom xeeb ntxwv yuav coob npaum no.’

- 19 Thaum ntawd Has Nplaw Has muaj ib puas xyoo lawm nws pom nws lub cev twb tuag lawm, thiab Xas Las lub xub ntiag kuj tuag lawm. Tsis kav nws ntseeg, nws tsis ua xyem xyav.
- 20 Thaum nws hnov TSWV NTUJ cog lus, kev tsis ntseeg tsis tuaj nphav nws, nws tsis ua xyem xyav ; nws txoj kev ntseeg ua kom nws muaj hwj huam puv nws lub cev, ces nws ua TSWV NTUJ tsaug.
- 21 Nws ntseeg khov ntseeg ruaj tias thaum TSWV NTUJ cog lus ib zaug, mas TSWV NTUJ muaj hwj huam txaus ua raws li lo lus nws cog.
- 22 Yog vim qhov ntawd TSWV NTUJ thiaj saib Has Nplaw Has yog tus ncaj.
- 23 Ntawv hais tias Has Nplaw Has kev ntseeg ua kom TSWV NTUJ saib Has Nplaw Has yog tus ncaj, tab sis tsis yog hais txog Has Nplaw Has tib leeg xwb.
- 24 Lo lus ntawd kuj hais txog peb sawv daws huv tib si : kev ntseeg ua kom TSWV NTUJ saib peb yog neeg ncaj ; vim peb ntseeg txog tus tau tsa peb tus HUAB TAIS YES XUS sawv hauv cov tub tuag rov los,
- 25 tsa tus uas raug luag muab muag vim peb cov txhaum, thiab nws sawv rov los kom peb ncaj tuaj.

Yog Tswv Ntuj Lo Lus

NKAUJ CAV TXOG LUB MOO ZOO: Lk 4,18

As les lus yas. As les lus yas. HUAB TAIS xa kuv mus tshaj lub Moo Zoo rau cov pluag. Nws xa kuv mus ceeb toom rau cov nyob txim tias lawv yuav dim. As les lus yas.

NTAWV MOO ZOO: Mas Tais 9,9-13

Nej Mloog Ib Zag Nyob Hauv Mas Tais Ntawv Moo Zoo

- 9 YES XUS tawm mus nraum zoov. Thaum nws tab tom mus kev, nws pom ib tug neeg zaum ntawm lub rooj sau se. Tus ntawd hu ua Mas

Tais. YES XUS hais rau nws tias : "Koj raws kuv mus !" Ces tus neeg ntawd sawv tsees raws YES XUS mus.

- 10 Thaum YES XUS zaum noj mov hauv (Mas Tais) tsev, muaj ib co neeg sau se thiab ib co neeg txhaum coob tuaj nrog YES XUS thiab cov thwj tim noj mov.
- 11 Cov Fas Lis Xais pom li ntawd, ces lawv hais rau cov thwj tim tias : "Vim li cas nej tus Xib Hwb nrog cov sau se thiab cov neeg txhaum noj mov ?"
- 12 Tab sis YES XUS twb hnov qhov lawv hais, nws thiaj teb tias : "Tsis yog cov neeg noj qab nyob zoo yuav vam txog kws kho mob, tsuas yog cov neeg mob thiaj vam txog.
- 13 Nej yuav kawm lo lus no lub ntsiab cia : 'Qhov kuv xav yuav yog txoj kev khuv leej, tsis yog thaj txi Ntuj.' Vim kuv tsis tuaj hu cov neeg ncaj, kuv tuaj hu cov neeg txhaum."

Yog Huab Tais Yes Xus Lub Moo Zoo

HNUB CHIV 10 NRUAB XYOO B CHÚA NHẬT 10 THƯỜNG NIÊN NĂM B

ZAJ NYEEM IB: Hauv Paus 3,9-15

Cov lus nyob hauv ntawv Hauv Paus

- 9 HUAB TAIS TSWV NTUJ hu tus txiv neej hais tias: "Koj nyob qhov twg?"
- 10 Tus txiv neej teb tias : "Kuv hnov koj rhais ruam hauv lub vaj. Kuv ntshai vim kuv liab qab, kuv thiaj khiav tsiv nraim."
- 11 TSWV NTUJ rov hais ntxiv tias: "Leej twg qhia koj tias koj liab qab? Yog koj noj lub txiv uas kuv txwv tsis pub noj lawm puas yog?"
- 12 Tus txiv neej teb tias : "Yog tus poj niam uas koj tso nyob ze kuv, muab lub txiv rau kuv, ces kuv thiaj noj !"
- 13 HUAB TAIS TSWV NTUJ hais rau tus poj niam tias : "Koj ua dab tsi li ntawd ?" Tus poj niam teb tias : "Yog niag nab ntxias kuv, kuv thiaj noj."
- 14 Ces HUAB TAIS TSWV NTUJ hais rau tus nab hais tias : "Vim koj tau ua li ntawd, koj txoj hmoov yuav phem tshaj ib tsoom tsiaj nyeg thiab tsiaj qus. Koj yuav xuas koj lub plab mus kev, thiab koj yuav niaj hnuv noj av tas koj sim neej.
- 15 Kuv yuav ua kom muaj kev ciaj caub ntawm koj thiab tus poj niam, ntawm koj caj ces thiab nws caj ces. Nws yuav tsuj koj taub hau, koj yuav tom nws luj taws."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 129,1-8

Txais: Nyob hauv HUAB TAIS muaj lub txiaj ntsim thiab txoj kev cawm neeg.

1. Kuv nyob hauv qab tiv txwv, HUAB TAIS, kuv hu txog koj, HUAB TAIS, thov koj mloog kuv lub suab. Koj tig ntsej los mloog kuv lub suab taij. **Teb**
2. HUAB TAIS, yog koj nco ntsoov peb cov txhaum mas tsis muaj leej twg yuav nyob taus. Nyob hauv koj muaj txoj kev zam ces sawv daws hwm koj. **Teb**

3. Kuv tos txog HUAB TAIS, kuv tos nws tas siab tas ntsws. Kuv tso siab rau nws lo lus. Kuv tus plig tos HUAB TAIS heev dua tus zov keeb tos txog lub caij kaj ntug. **Teb**
4. His Xas Lais, koj tso siab rau HUAB TAIS mog vim nyob hauv HUAB TAIS muaj lub txiaj ntsim thiab txoj kev cawm neeg. Nws yog tus yauv txhiv His Xas Lais dim ntawm lub txim txhaum. **Teb**

ZAJ NYEEM OB: 2 Kos Lis Nthos 4,13 – 5,1

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 4,13 Kwv tij sawv daws, peb tau tib lub tswv yim ntseeg, raws li Ntawv sau tseg tias : ‘Kuv ntseeg, kuv thiaj hais lus.’ Ntawm peb, mas peb ntseeg : peb thiaj hais lus.
- 14 Peb paub tseeb tias, tus tsa HUAB TAIS YES XUS sawv rov los, nws kuj yuav tsa peb nrog YES XUS sawv thiab. Nws yuav coj peb mus nrog nej nyob ze YES XUS.
- 15 Tej yam hais saum no, yog tshwm sim los pab nej, kom nej tau txais txiaj ntsim ntau, ces yuav muaj neeg coob ua Ntuj tsaug, kom TSWV NTUJ muaj koob meej.
- 16 Vim li no peb thiaj tsis ntaus siab me. Peb lub cev sab nraud puas zuj zus, tab sis peb tus neeg sab hauv niaj hnuv rov tshiab tuaj.
- 17 Txoj kev txom nyem sib sib uas tuaj raug peb ib ntus, npaj ib lub koob meej loj tas nrho rau peb, yog lub koob meej nyob mus li uas peb luj tsis tau.
- 18 Li ntawd, peb tsis ntsia yam qhov muag pom tau, peb ntsia yam qhov muag pom tsis tau. Ib puas tsav yam uas qhov muag pom tau, tsuas nyob ib ntus xwb ; hos ib puas tsav yam uas qhov muag pom tsis tau, yuav nyob mus li.
- 5,1 Vim peb paub tias, yog lub tsev tsam phooj hauv ntiaj teb, uas peb txoj sia ciaj nyob hauv, raug luag rhuav pob lawm, los peb muaj ib lub tsev nyob mus li, yog lub uas TSWV NTUJ txhais tes txhim, tsis yog neeg txhais tes txhim.

Yog Tswv Ntuj Lo Lus

NKAUJ CAV TXOG LUB MOO ZOO: Zam 12,31b-32

As les lus yas. As les lus yas. HUAB TAIS hais tias: “Yog lub caij txiav txim rau lub ntiaj teb neeg. Ntawm kuv mas, thaum luag muab kuv tsa siab

rau saum lub ntiaj teb, kuv yuav rub tas ib tsoom haiv neeg kom los cuag kuv. As les lus yas.

NTAWV MOO ZOO: Mas Kos 3,20-35

Nej Mloog Ib Zag Nyob Hauv Mas Kos Ntawv Moo Zoo

- 20 YES XUS los tsev, ces rov muaj neeg coob tuaj sib sau, YES XUS lawv tsis xyeej noj mov li.
- 21 YES XUS cov neeg hnov li ntawd, lawv tawm tuaj ntes nws, vim lawv hais tias : "Nws tsis meej pem lawm."
- 22 Cov thoob xwm tuaj pem Yes Lus Xas Les tuaj hais tias : "Nws raug dab Npes Ntxes Npus." Lawv tseem hais tias : "Nws hu txog tus tuam thawj dab los ntiab dab tawm."
- 23 YES XUS hu lawv los ntawm nws, ces nws ua paj lug hais rau lawv tias : "Xas Tas yuav ua cas ntiab tau Xas Tas ?
- 24 Yog ib lub teb chaws rov ua kom nws sib tawg, mas lub teb chaws ntawd nyob tsis ruaj.
- 25 Yog ib tse neeg rov ua kom nws sib tawg, mas lub tsev ntawd yuav nyob tsis tau.
- 26 Ua li yog Xas Tas rov sawv tiv Xas Tas, mas nws tawg, ces nws yuav nyob tsis tau, nws kawg yuav piam sij tas.
- 27 Tsis muaj leej twg nkag tau mus hauv tus neeg muaj zog tsev, mus lwg nws lub cuab tam, yog tsis xub muab tus muaj zog khi tso, mas nws yuav lwg tsis tau tus muaj zog lub tsev.
- 28 Kuv hais tseeb rau nej, Ntuj yuav zam ib puas tsav yam txhaum rau neeg tej tub ki, tsis hais tej txhaum los tej lus thuam Ntuj lawv tau tsawm.
- 29 Tab sis tus twg thuam LEEJ NTUJ PLIG NTSHIAB, mas Ntuj yuav tsis zam rau nws ib zaug li : nws ua ib qho txhaum nyob mus li."
- 30 Vim lawv hais tias : "YES XUS raug ib tug dab tsis huv."
- 31 YES XUS niam thiab nws cov kwv tij tuaj txog, lawv nyob nraum zoov, lawv kom luag mus hu YES XUS.

- 32 Muaj ib pab neeg zaum ncig YES XUS, lawv hais rau nws tias : "Koj niam nrog koj cov kwv thiab cov muam tuaj nyob nraud, lawv nrhiav koj."
- 33 YES XUS teb rau lawv tias : "Leej twg yog kuv niam ? Leej twg yog kuv kwv tij ?"
- 34 YES XUS ntsia cov neeg zaum ncig nws, nws hais tias : "Kuv niam thiab kuv cov kwv tij nyob ntawm no."
- 35 Leej twg ua raws li TSWV NTUJ lub siab, tus ntawd yog kuv ib leeg kwv, ib leeg muam thiab ib leeg niam."

Yog Huab Tais Yes Xus Lub Moo Zoo

HNUB CHIV 10 NRUAB XYOO C CHÚA NHẬT 10 THƯỜNG NIÊN NĂM C

ZAJ NYEEM IB: 1Vaj 17,17-24

Cov lus nyob hauv ntawv Vaj phau ib

- 17 Dua tej xwm ntawd tas, thaum Es Lias tseem nyob hauv lub zos Xas Les Tas, tus niam tsev uas Es Lias mus so hauv, nws tus tub mob heev, ces nws tus tub tuag lawm.
- 18 Tus niam tsev hais rau Es Lias tias : "TSWV NTUJ tus neeg, puas yog vim koj nyob hauv kuv tsev, ces Ntuj thiaj pom kuv tej txhaum, kuv tus tub thiaj tuag lawd?"
- 19 Es Lias hais rau tus poj ntsuam ntawd tias : "Koj muab koj tus tub rau kuv saib." Ces Es Lias txais tus tub hauv nws niam xub ntiag los, nws puag tus tub mus rau hauv lub paim uas nws pw nyob txheej tsev saud. Nws tso tus me nyuam rau saum txaj.
- 20 Nws hu txog HUAB TAIS tias : "Kuv tus HUAB TAIS, tus poj ntsuam ntawd txais kuv nyob hauv nws tsev, puas phim yuav cia nws tus tub tuag li ntawd ? Puas yuav cia nws raug txom nyem ?"
- 21 Ces Es Lias tso cev pw peb zaug rau saum tus me nyuam thiab nws thov HUAB TAIS tias : "HUAB TAIS, kuv tus TSWV NTUJ, kuv thov koj kom tus me nyuam no tus plig rov los nyob hauv nws mas !"
- 22 HUAB TAIS mloog Es Lias hu txog nws, ces tus me nyuam tus plig rov los nyob hauv tus me nyuam, tus me nyuam ciaj rov los.
- 23 Es Lias nqa tus me nyuam, nws nqes los, nws muab tus me nyuam rau nws niam, nws hais tias : "Koj ntsia, koj tus tub ciaj lawm."
- 24 Tus poj niam teb tias : "Nyem no, kuv paub tseeb tias koj yog TSWV NTUJ tus neeg tiag. Cov lus tawm hauv koj lub ncauj los yog HUAB TAIS cov lus, yog lus tseeb."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 29,2.4-6.11.12a.13b

Txais: HUAB TAIS, kuv yuav cav txog koj vim koj tau cawm kuv.

1. HUAB TAIS, kuv yuav cav txog koj vim koj tau rub kuv tawm hauv lub qhov ntuj los. Koj tsis cia kuv ua yeeb neuab qhov chaw zoo siab. HUAB TAIS, koj rub kuv tus plig tawm hauv ntuj txias teb tsaus los. Koj tsis pub kuv mus hauv lub qhov ntxa. **Teb**
2. Cov ntseeg HUAB TAIS, nej hu nkauj cav txog nws. Nej nqaum paj nqaum nruas cav txog nws lub npe ntshiab. Nws npau taws, tsuas npau

ib pliag. Nws hlub neeg, nws hlub tas ib sid. Hmo ntuj, kuv kua muag poob tsis tu, tab sis kaj ntuj txoog, kuv rov zoo siab. **Teb**

3. HUAB TAIS, koj mloog mas ! Thov koj hlub, thov koj pab kuv. Koj muab kuv txoj kev quaj nyiav los hloov ua kev lom zem. HUAB TAIS, kuv tus TSWV NTUJ, kuv yuav ua koj tsaug mus li. **Teb**

ZAJ NYEEM OB: Nkas Las Tias 1,11-19

Cov lus nyob hauv Paj Lug tsab ntawv xa rau cov ntseeg nyob Nkas Las Tias

- 11 Kuv tij sawv daws, nej yuav paub tias, lub Moo Zoo uas kuv xa tuaj rau nej, mas neeg lub tswv yim duav tsis tau.
- 12 Kuv tsis tau txais thiab tsis tau kawm lub Moo Zoo ntawm neeg los : yog YES XUS PLEEV yees tawm los qhia kuv.
- 13 Nej yeej tau hnov tias, thaum kuv coj cov Yus Das kev cai, kuv tau ua dab tsi. Nej yeej hnov tias kuv hiam TSWV NTUJ lub Koom Txoos tsis tseg, kuv ua xwv txheej loj kawg rau lawv.
- 14 Kuv kub siab coj cov kev cai Yus Das. Nyob hauv kuv phaum neeg, kuv nyiam peb cov yawg koob Txoj Cai tshaj cov nrog kuv ua ib haiv neeg.
- 15 Tiam sis, thaum kuv tseem nyob hauv kuv niam plab, tus uas muab kuv qee rau ib cag, nws lub txiaj ntsim hu kuv.
- 16 Nws qhib nws Leej Tub tawm los rau kuv paub, kom kuv tshaj nws Leej Tub rau cov pej kum neeg.
- 17 Tam sim ntawd, kuv tsis mloog kuv lub cev thiab kuv tej roj ntsha, kuv tsis mus cuag cov xub ua Hauv Paus Xa Lus nyob Yes Lus Xas Les ; kuv ncaj qha mus As Las Npias teb tau ib ntus, kuv mam rov los nyob Das Mas.
- 18 Peb xyoos tom qab, kuv thiaj mus pem Yes Lus Xas Les, mus cuag Pob Zeb. Kuv nrog nws nyob kaum tsib hnuv :
- 19 kuv tsis tau ntsib lwm tus Hauv Paus Xa Lus, kuv tsuas tau ntsib Yas Kos, uas yog HUAB TAIS tus kwv.

Yog Tswv Ntuj Lo Lus

NKAUJ CAV TXOG LUB MOO ZOO: Lk 7,16

As les lus yas. As les lus yas. Ib tug Yaj Saub loj sawv nyob nruab nrab hauv peb sawv daws. TSWV NTUJ tuaj xyuas nws haiv neeg. As les lus yas.

NTAWV MOO ZOO: Lus Kas 7,11-17

Nej Mloog Ib Zag Nyob Hauv Lus Kas Ntawv Moo Zoo

- 11 Dua li ntawd, YES XUS mus hauv ib lub nroog hu ua Nas Ees. YES XUS cov thwj tim thiab ib pab neeg coob nrog YES XUS ua ke mus.
- 12 Thaum YES XUS tuaj yuav txog lub qhov rooj loog nkag hauv lub nroog, luag tab tom kwv ib tug tuag tawm tuaj txog ntawd. Yog ib leeg tub twm zeej, hos leej niam yog ib tug poj ntsuam. Ib pab neeg coob hauv nroog nrog leej niam tawm tuaj.
- 13 HUAB TAIS pom tus poj ntsuam, HUAB TAIS khuv leej nws. HUAB TAIS hais rau nws tias : "Koj txhob quaj."
- 14 YES XUS txav los tuav lub hleb, cov kwv hleb nres. Ces YES XUS hais tias: "Tus hluas, kuv hais koj : Koj sawv !"
- 15 Ces tus tuag sawv zaum, thiab nws pib hais lus. YES XUS muab tus tub hluas ntawd cob rau nws niam.
- 16 Tas sawv daws ntshai tas nrho. Lawv cav txog TSWV NTU tias : "Ib tug yaj saub loj sawv los nyob hauv peb, TSWV NTUJ tuaj xyuas nws haiv neeg."
- 17 Cov lus hais txog tus hluas ntawd ncha mus thoob tas xeev Yus Das thiab ib ncig lub teb chaws ntawd.

Yog Huab Tais Yes Xus Lub Moo Zoo

HNUB CHIV 11 NRUAB XYOO A CHÚA NHẬT 11 THƯỜNG NIÊN NĂM A

ZAJ NYEEM IB: Kev Tsiv 19,2-6a

Cov lus nyob hauv ntawv Kev Tsiv

- 2 Cov His Xas Lais sawv kev Les Fis Dis los, lawv los txog lub hav suab puam Xis Nais, ces lawv tsa tsev nyob hauv lub hav suab puam, cov His Xas Lais tsa tsev ncaj ntawm lub roob Xis Nais sab tid.
- 3 Ces Mais Xes nce mus ntsib TSWV NTUJ saum lub roob. HUAB TAIS hu saum roob tuaj rau Mais Xes tias : "Koj yuav hais li no rau Yas Kos tsev neeg, koj yuav tshaj rau cov His Xas Lais tias :
- 4 Nej tau pom ntawm nej qhov muag tias kuv tau ua li cas rau cov Hais Nkws Tos, thiab kuv tau coj nej tawm xws li yog ya saum dav ob phab tis, kuv tau coj nej los cuag kuv.
- 5 Txij no mus, yog nej mloog kuv lus thiab nej khaws nraim kuv lo lus kuv cog rau nej, mas kuv yuav saib nej yog kuv tug nyob hauv tas txhua haiv neeg, vim lub ntiaj teb yog kuv li tas huv si.
- 6a Kuv yuav saib nej yog ib haiv neeg ua leej choj thiab yog ib haiv neeg qee rau Ntuj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 99,1-3.5

Txais: TSWV NTUJ yog tus tsim peb los, peb yog nws haiv neeg, nws pab yaj.

1. Tas lub ntiaj teb, nej qw suab zoo siab cav txog HUAB TAIS ! Nej xyiv fab hlo tsob hwb HUAB TAIS ! Nej luag ntxhi chaws los ntawm nws xub ntiag ! **Teb**
2. Nej yuav paub tias HUAB TAIS yog TSWV NTUJ. Nws tsim peb los, peb yog nws tug, yog nws haiv neeg, yog pab yaj nws zov. **Teb**
3. HUAB TAIS siab zoo, nws hlub peb mus li. Nws npuab peb txheej dhau txheej. **Teb**

ZAJ NYEEM OB: Los Mas 5,6-11

Cov lus nyob hauv Paj Lug tsab ntawv xa rau cov ntseeg nyob Los Mas

- 6 Kwv tij sawv daws, vim li ntawd, lub sij hawm peb tsis muaj zog, thaum txog lub hnuv nyoog teem, Leej Pleev thiaj raug luag tua kom tau pab cov neeg tsis hwm Ntuj.
- 7 Yus yuav luag tsis kam tuag kom tau pab ib tug neeg ncaj ; nyaj tej zaus yus yuav muaj peev xwm tuag kom tau pab ib tug neeg siab zoo.
- 8 Yam uas zeem tseeb tias TSWV NTUJ nyiam peb yog qhov tias thaum peb tseem yog neeg txhaum, Leej Pleev tuag kom tau pab peb.
- 9 Nyem no peb twb ncaj tuaj nyob hauv Leej Pleev cov roj ntsha lawm, mas nws haj yam yuav cawm peb ntawm kev npau taws.
- 10 Thaum peb tseem ua yeeb ncuab rau TSWV NTUJ, nws Leej Tub kev tuag ua kom peb nrog TSWV NTUJ rov sib haum xeeb ; nyem no peb nrog TSWV NTUJ rov sib haum xeeb lawm, mas TSWV NTUJ Leej Tub txoj sia haj yam cawm peb.
- 11 Peb qhuas tau tias tam sim no, peb tau kev rov sib haum xeeb nyob hauv TSWV NTUJ, vim peb tus HUAB TAIS YES XUS PLEEV.

Yog Tswv Ntuj Lo Lus

NKAUJ CAV TXOG LUB MOO ZOO: Mk 1,15

As les lus yas. As les lus yas. Huab Tais hais tias: “TSWV NTUJ lub Ceeb Tsheej los txog ze lawm, nej hloov siab mog, nej ntseeg txog lub Moo Zoo. As les lus yas.

NTAWV MOO ZOO: Mas Tais 9,36 – 10,8

Nej Mloog Ib Zag Nyob Hauv Mas Tais Ntawv Moo Zoo

- 9,36 YES XUS pom tsoom pej xeem, nws hlub lawv, vim lawv sawv daws sab thiab qaug zog zoo li ib co yaj tsis muaj tsw zov.
- 37 YES XUS thiaj hais rau nws cov thwj tim tias : "Qoob loo ntau kawg, tab sis cov tub zog tsawg.
- 38 Nej thov tus Tswv qoob kom nws xa ib co tub zog tuaj sau nws cov qoob."
- 10,1 YES XUS hu nws kaum ob leeg thwj tim los cuag nws. Nws muab hwj huam kom lawv ntiab tau dab tawm, thiab kho tau tej txiab xeeb thiab tej mob nkeeg kom thim.
- 2 Kaum ob leeg Hauv Paus Xa Lus muaj npe li no :

- 3 thawj tug, yog Xis Moos uas sawv daws hu nws ua Pob Zeb, As Nres, Xis Moos tus kwv, Yas Kos, yog Ntxes Npes Dais tus tub, Zam, Yas Kos tus kwv, Fis Lis Pos, thiab Npas Tos Los Mas Yos, Tos Mas, thiab Mas Tais, tus sau se. Yas Kos, uas yog As Fas Yos tub, Thas Dais Yos,
- 4 Xis Moos, tus Ntxes Los, Yus Das Kas Lis Yaus, tus muab YES XUS muag rau luag.
- 5 YES XUS xa kaum ob leeg no mus tshaj lub Moo Zoo, nws qhia lawv tias : “Nej tsis txhob mus cuag cov neeg teev dab, txhob mus hauv ib lub nroog Xas Mas Lias li.
- 6 Nej xub mus cuag cov yaj ploj hauv haiv His Xas Lais.
- 7 Thaum nej mus kev, nej ceeb toom tias Ntuj lub Ceeb Tsheej tuaj txog ze lawm.
- 8 Nej kho cov mob kom zoo, nej tsa cov tuag kom cياج rov los, nej kho cov mob ruas kom huv, nej ntiab dab kom khiav. Nej tau txais dawb, nej rov pub dawb.

Yog Huab Tais Yes Xus Lub Moo Zoo

HNUB CHIV 11 NRUAB XYOO B CHÚA NHẬT 11 THƯỜNG NIÊN NĂM B

ZAJ NYEEM IB: Es Xes Kias 17,22-24

Cov lus nyob hauv ntawv Es Xes Kias

- 22 HUAB TAIS TSWV NTUJ hais zoo li no : "Kuv yuav nrhiav tus ntoo faj khaum loj dua cov, nyob saum nws lub ntsis kuv yuav de tus ceg siab dua cov, kuv yuav coj mus cog nyob saum ib lub ncov roob siab tshaj.
- 23 Kuv yuav cog tus ceg ntawd nyob saum lub roob His Xas Lais siab siab. Nws yuav ncau ceg thiab txi txiv. Nws yuav hlob mus ua ib tug ntoo faj khaum zoo saib. Tas txhia tsav noog yuav tuaj nkaum hauv nws. Lawv yuav tuaj so hauv nws tej qab ceg qhov ntxoov.
- 24 Tas txhia yam ntoo tuaj nyob nruab liaj nruab teb yuav paub tias tus ua kom cov ntoo siab qis tuaj thiab ua kom cov ntoo qis siab tuaj yog kuv, HUAB TAIS. Sawv daws yuav paub tias tus ua kom tus ntoo ntsuab qhuav tuaj thiab ua kom tus ntoo qhuav rov ntsuab tuaj yog kuv. Kuv yog HUAB TAIS, kuv hais yam twg kuv yuav ua yam twg."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 91,2-3.13-16

Txais: HUAB TAIS, tsim nyog peb yuav ua koj tsaug mus li !

1. Tsim nyog peb yuav ua HUAB TAIS tsaug ! TSWV NTUJ Nyob Siab, tsim nyog yuav hu nkauj cav txog koj lub npe. Sawv ntxov tsees, tsim nyog yuav tshai koj txoj kev hlob. Hmo ntuj, tsim nyog yuav cav tog koj lub siab pheed xeeb. **Teb**
2. Tus siab ncaj yuav hlob zoo tsob ntoo kuj yem. Nws tshoom siab li tsob ntoo ciab nyob Lis Npas. Lawv nrhau cag ruaj rau hauv HUAB TAIS tsev. Lawv hlob nyob hauv peb tus TSWV NTUJ cov tshav loog. **Teb**
3. Tab yog lawv laus lawm, lawv tseem txi txiv vim muaj dej yug lawv tus txha. Lawv cov nplooj ntsuab mos nyoos. Lawv tshaj tias HUAB TAIS yog tus ncaj. Lawv hais tias HUAB TAIS yog peb phab tsua, tsis muaj ib yam nkhaus nyob hauv nws. **Teb**

ZAJ NYEEM OB: 2 Kos Lis Nthos 5,6-10

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 6 Kwv tij sawv daws, vim li ntawd, peb lub siab thiaj ruaj nreb. Peb paub tias, thaum peb lub cev tseem ua neej nyob, mas peb khuam nyob deb ntawm HUAB TAIS.
- 7 Peb lub siab ntseeg coj peb mus kev, tsis yog peb ob lub qhov muag pom kev coj peb.
- 8 Peb lub siab thiaj ruaj nreb. Peb zoo siab tso lub cev no tseg, kom peb tau mus nyob ze HUAB TAIS.
- 9 Tab yog peb nyob hauv lub cev no, los peb tso lub cev no tseg, mas peb yuav nrhiav txoj kev ua xis HUAB TAIS siab.
- 10 Vim peb yuav tsum mus sawv ntawm Leej Plev lub rooj txiaj txim, yuav tsis muaj dab tsi thaiv peb, ces nyias yuav pom txhua yam uas thaum nyias nyob hauv nyias lub cev, nyias tau ua zoo los tau ua phem.

Yog Tswv Ntuj Lo Lus

NKAUJ CAV TXOG LUB MOO ZOO

As les lus yas. As les lus yas. Leej Plev yog tus uas tuaj tseb TSWV NTUJ lo lus. Cov tuaj cuag nws yuav tau txoj sia tshiab. As les lus yas.

NTAWV MOO ZOO: Mas Kos 4,26-34

Nej Mloog Ib Zag Nyob Hauv Mas Kos Ntawv Moo Zoo

- 26 YES XUS hais tias : TSWV NTUJ lub Ceeb Tsheej zoo xws li ib tug neeg pov ib co noob rau nruab av :
- 27 Nws txawm pw los nws sawv, hmo ntuj los nruab hnuv, lub noob tuaj kaus thiab hlob, nws tsis paub tias lub noob hlob zoo li cas.
- 28 Av xwb tim txawj xeeb kom hloov : xub ua yub tas, ua plab nab, ces nplej txhawv puv hnab.
- 29 Thaum nplej siav, tus neeg ntawd xuas liag hlais tam sis ntawd, vim qoob siav lawm."
- 30 YES XUS hais tias : "Peb yuav muab TSWV NTUJ lub Ceeb Tsheej piv rau dab tsi ? Thiab peb yuav ua paj lug qhia txog TSWV NTUJ lub Ceeb Tsheej zoo li cas ?
- 31 TSWV NTUJ lub Ceeb Tsheej yog zoo li ib lub noob zaub roj, uas thaum luag muab tseb rau hauv av, mas lub noob ntawd me tshaj lwm cov noob nyob ntiaj teb no.

- 32 Tab sis thaum tseb tas lawd, lub noob hlob, nws siab dua lwm cov zaub huv si ; nws ncau ceg deb, ces tej noog ya saum ntuj tau kev los nkaum hauv nws qhov ntxoov."
- 33 YES XUS siv ntau hom paj lug zoo li no los qhia Lo Lus rau lawv, raws li lawv mloog tau.
- 34 Tsis muaj ib yam uas nws tsis ua paj lug hais. Thaum tshuav cov thwj tim nrog nws nyob xwb, nws txhais txhua yam huv tib si rau lawv.

Yog Huab Tais Yes Xus Lub Moo Zoo

HNUB CHIV 11 NRUAB XYOO C CHÚA NHẬT 11 THƯỜNG NIÊN NĂM C

ZAJ NYEEM IB: 2 Xas Muas 12,7-10.13

Cov lus nyob hauv ntawv Xas Muas phau ob

- 7 Nas Taas hais rau Das Vis tias : "Tus neeg ntawd yog koj ! HUAB TAIS TSWV NTUJ hais li no : Kuv pleev koj. Kuv tsa koj ua His Xas Lais tus vaj. Kuv cawm koj dim ntawm Xas Ws tes.
- 8 Kuv tau muab koj tus vaj tsev neeg rau hauv koj txhais tes. Kuv tau pub tsoom His Xas Lais thiab tsoom Yus Das rau koj. Yog tseem tsis tau txaus koj siab mas tab yog yam twg los kuv tseem zoo siab muab rau koj tib si.
- 9 Tab sis vim li cas koj thiab li ua qhov uas HUAB TAIS tsis nyiam? Koj xuas ntaj tua Us Lis, koj yuav nws poj niam los ua koj poj niam, koj txhob txwm ua kom cov As Mos rab ntaj tua Us Lis.
- 10 Ua li mas txij no mus, hniav ntaj yuav tsis zam koj tsev neeg ntxiv lawm, vim koj tsis nco txog kuv. Koj coj tus His Tis Us Lis poj niam los ua koj poj niam.
- 13 Ces Das Vis hais rau Nas Taas tias : "Kuv ua txhaum rau HUAB TAIS lawm !" Nas Taas hais rau Das Vis tias : "HUAB TAIS zam rau koj, koj yuav tsis tuag.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 31,1-2.5.7.11

Txais: HUAB TAIS, thov koj zam tej yam kuv ua yuam kev.

1. Tus tau txoj hmoov zoo yog tus uas Ntuj rhuav nws qhov txhaum pov tseg, yog tus uas Ntuj npog nws qhov txhaum. Tus tau txoj hmoov zoo yog tus uas HUAB TAIS tsis suav nws cov txhaum, yog tus uas nws lub tswv yim tsis dag tias nws tsis lo txhaum. **Teb**
2. Kuv qhia kuv cov txhaum rau koj, kuv tsis zais qhov kuv ua yam kev. Kuv hais tias, "Kuv yuav lees kuv cov txhaum ntawm HUAB TAIS." Koj txo kuv nras txhaum. **Teb**

3. Koj yog kuv qhov chaw nkaum. Koj txuag kuv ntawm txoj kev txhawj xeeb. Koj ua kom sawv daws hu nkauj ncig kuv, cav txog kuv txoj kev dim. **Teb**
4. Tsoom neeg ncaj, nej hom khaj nyob hauv HUAB TAIS. Nej zoo siab luag txhi. Tsoom neeg siab ncaj, nej qw suab zoo siab. **Teb**

ZAJ NYEEM OB: Nkas Las Tias 2,16.19-21

Cov lus nyob hauv Paj Lug tsab ntawv xa rau cov ntseeg nyob Nkas Las Tias

- 16 Kuv tij sawv daws, tsis kav, peb paub tias, neeg tsis ntshiab tuaj vim nws coj Txoj Cai ; neeg ntshiab tuaj vim nws ntseeg txog YES XUS PLEEV. Vim li ntawd, peb ntshiab tuaj vim peb ntseeg txog Leej Plev, tsis yog vim peb coj Txoj Cai. Kev coj Txoj Cai ua tsis tau kom leej twg ntshiab tuaj.
- 19 Vim Txoj Cai, mas kuv thiaj tuag rau Txoj Cai, kom kuv cial nyob hauv TSWV NTUJ.
- 20 Kuv nrog Leej Plev dai saum ntoo cuam. Tsis yog kuv muaj txoj sia ntxiv lawm, yog Leej Plev txoj sia cial nyob hauv kuv. Kuv muaj txoj sia nyob hauv kuv lub cev, tab sis kuv ua neej nyob hauv txoj kev ntseeg txog TSWV NTUJ Leej Tub, uas nws nyiam kuv, ces nws rov muab nws rau luag, kom nws pab tau kuv.
- 21 Kuv tsis rhuav TSWV NTUJ lub txiaj ntsim. Yog tias, txoj kev ntshiab tawm ntawm Txoj Cai los, mas Leej Plev tuag tsis muaj nqis dab tsi.

Yog Tswv Ntuj Lo Lus

NKAUJ CAV TXOG LUB MOO ZOO: 1 Zam 4,10b

As les lus yas. As les lus yas. TSWV NTUJ tau nyiam peb thiab hlub peb, nws thiaj xa nws Leej Tub tuaj txhiv peb ntawm kev txhaum. As les lus yas.

NTAWV MOO ZOO: Lus Kas 7,36 – 8,3

Nej Mloog Ib Zag Nyob Hauv Lus Kas Ntawv Moo Zoo

- 7,36 Muaj ib tug Fas Lis Xais caw YES XUS mus nrog nws noj mov. YES XUS chaws mus hauv tus Fas Lis Xais tsev, nws zaum ntawm rooj mov.
- 37 Muaj ib tug poj niam nyob hauv lub nroog ntawd, yog ib tug neeg txhaum, nws hnov tias YES XUS noj mov hauv tus Fas Lis Xais ntawd tsev, ces nws nqa ib hwj tshuaj tsw qab tuaj.
- 38 Nws tuaj nyob ntawm YES XUS nraub qaum, nram YES XUS ko taw, nws quaj, nws ua kua muag poob los ywg YES XUS ko taw, ces nws muab nws cov plaub hau los so YES XUS ko taw, nws nwj YES XUS ko taw tsis tseg, thiab muab tshuaj tsw qab los pleev YES XUS ko taw.
- 39 Tus Fas Lis Xais uas caw YES XUS, pom li ntawd, nws xav hauv siab tias : "Yog tias tus neeg no yog ib tug yaj saub, mas phim nws yuav paub tias tus poj niam uas kov nws yog leej twg. Tus poj niam ntawd yog ib tug neeg txhaum !"
- 40 Tab sis YES XUS tsa ncauj hais rau tus Fas Lis Xais tias : "Xis Moos, kuv muaj ib lo lus xav hais rau koj." Tus Fas Lis Xais teb tias : "Xib Hwb, koj hais mas !"
- 41 "Muaj ib tug neeg qiv nyiaj rau ob tug neeg. Thawj tug tshuav nuj nqis txog tsib puas lub txiaj nyiaj ; lwm tus tshuav nqi txog tsib caug lub txiaj nyiaj.
- 42 Nkawd ob leeg tsis muaj dab tsi them rov qab, tus tswv nyiaj cia li zam rau nkawd ob leeg. Ob tug neeg ntawd, tus twg yuav nyiam tus tswv nyiaj dua ?"
- 43 Xis Moos teb tias : "Kuv xav mas yog tus uas tus tswv nyiaj zam nuj nqis ntau dua rau." YES XUS hais rau Xis Moos tias : "Koj txiav raug lawm."
- 44 YES XUS tig mus ntsia tus poj niam, nws hais rau Xis Moos tias : "Koj puas pom tus poj niam no ? Kuv los hauv koj tsev, koj tsis tau hliv dej los yang kuv ko taw. Hos, tus poj niam no, nws muab kua muag los ywg kuv ko taw, thiab nws muab plaub hau los so kuv ko taw.
- 45 Koj tsis nwj kuv, hos tus poj niam no, txij thaum nws chaws los hauv no, mas nws nwj kuv ko taw tsis tseg.
- 46 Koj tsis tau hliv roj saum kuv taub hau, hos tus poj niam no hliv tshuaj tsw qab ywg kuv ko taw.

- 47 Yog vim qhov ntawd, mas kuv hais rau koj : tus poj niam no muaj txhaum, nws tau ua txhaum ntau, tab sis Ntuj daws tas lawm, vim nws nyiam kawg. Tus uas luag zam rau nws tsawg, mas nws nyiam tsawg."
- 48 Ces YES XUS hais rau tus poj niam tias : "Koj cov txhaum daws tas lawm."
- 49 Cov neeg nrog YES XUS koom rooj mov, nyias xav nyias tias : "Tus ntawd yog leej twg, ua cas nws yuav daws txhaum tau ?"
- 50 YES XUS hais rau tus poj niam tias : "Koj lub siab ntseeg cawm koj lawm. Koj rov mus nyob kaj siab lug mog."
- 8,1 YES XUS taug kev hla nroog thiab hla zos. Nws qhia thiab tshaj lub Moo Zoo txog TSWV NTUJ lub Ceeb Tsheej. Pab Kaum Ob leeg nrog YES XUS mus.
- 2 Tseem muaj ib co poj niam uas YES XUS tau kho lawv dim ntawm dab phem thiab dim ntawm lawv tus mob. Cov ntawd muaj Mab Liab uas luag hu ua Mas Ntas Las, yog tus uas YES XUS ntiab xya tus dab phem tawm hauv nws.
- 3 Muaj Zag, uas yog Sus Ntxas poj niam, Sus Ntxas yog Hes Los tus tim xyoob. Muaj Xus Xas Nas thiab coob leej ntxiv. Lawv muab lawv lub cuab tam los tsob hwb YES XUS thiab cov thwj tim.

Yog Huab Tais Yes Xus Lub Moo Zoo

HNUB CHIV 12 NRUAB XYOO A CHÚA NHẬT 12 THƯỜNG NIÊN NĂM A

ZAJ NYEEM IB: Yes Les Mias 20,10-13

Cov lus nyob hauv ntawv Yes Les Mias

- 10 Kuv hnov ntau leej hais tej yam ntais ntuj txog kuv tias : "Peb kav tsij tso hem thawj rau nws tsis tseg mas ! Peb mus kom nws rau cov nom !" Cov uas thaud lawv yog kuv cov phooj ywg, lawv nyas saib kuv puas yuav ntog. Lawv hais tias : "Nyaj tej zaus, nws yuav mloog cov neeg ntxias. Ces peb yuav yeej nws, peb yuav tau kev rob caub."
- 11 Tab sis HUAB TAIS tsa kuv cai, HUAB TAIS yog zoo li ib tug peeb zeej zog nchav. Kuv cov yeeb ncuab yuav ntog, lawv yuav tsis yeej. Lawv yuav nco ntsoov ib txhiab ib txhis txog hnub lawv poob ntsej muag.
- 12 HUAB TAIS, koj yog tus kav tsoom tub rog, koj tsoom tau tus neeg siab ncaj, koj pom nyob hauv neeg nruab siab. Kuv vam tias kuv yuav pom koj rob caub rau lawv, vim kuv tso kuv rooj plaub rau hauv koj tes.
- 13 Nej hu nkauj rau HUAB TAIS, nej cav lus zoo txog HUAB TAIS, vim nws npo tus neeg pluag tus plig ntawm cov neeg phem txhais tes los.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 68,8-10.14.17.33-35

Txais: HUAB TAIS, koj txoj kev hlub loj tas nrho, thov koj teb kuv.

1. HUAB TAIS, yog vim koj, kuv thiaj raug luag tsawm. Yog vim koj, kuv thiaj tau kev txaj muag. Kuv cov kwv tij nrauj kuv pov tseg. Kuv niam cov tub saib kuv zoo li tus qhua vim kuv lub siab kub lug rau koj lub tuam tsev. Lawv tsawm koj, lawv cov lus tsawm poob los rau saum kuv. **Teb**
2. HUAB TAIS, kuv hu txog koj, thov koj teb kuv vim koj yog tus cawm kuv. HUAB TAIS, thov koj teb kuv vim koj yog kuv tus Tswv. Koj tig los ntsia kuv, thov koj khuv leej kuv. **Teb**
3. Cov neeg me, nej tig ntsia, nej zoo siab hlo. Nej cov uas nrhiav TSWV NTUJ, nej ua siab loj mog ! HUAB TAIS hnov cov pluag lo lus thov. Thaum nws cov neeg raug luag ntes, nws tsis tso lawv pov tseg. Lub ntuj, lub ntiaj teb, dej ntuj thiab tej tsiaj txhu hauv hiav txwv cav txog TSWV NTUJ. **Teb**

ZAJ NYEEM OB: Los Mas 5,12-15

Cov lus nyob hauv Paj Lug tsab ntawv xa rau cov ntseeg nyob Los Mas

- 12 Kwv tij sawv daws, yog vim tib tug neeg xwb, mas kev txhaum tau tshwm los nyob hauv lub ntiaj teb, ces kev txhaum coj kev tuag los. Txoj kev tuag thiaj raug tas zeej tsoom, vim sawv daws ua txhaum.
- 13 Kev txhaum xub tshwm los nyob ntiaj teb ua ntej Txoj Cai, tab sis thaum tsis muaj Txoj Cai, mas yus tsis ris lub txim txhaum. Txij As Das los txog Mais Xes, kev tuag ua vaj kav sawv daws :
- 14 tab yog cov neeg tsis tau ua tej yam txhaum zoo nkaus li As Das mas lawv kuj zwm rau kev tuag, vim As Das yog tus duab qhia txog tus yuav tuaj.
- 15 Tab sis lub txiaj ntsim tsis zoo li kev txhaum. Vim ib tug xwb ua txhaum mas tas zeej tsoom tuag. Nyem no TSWV NTUJ lub txiaj ntsim thiab cov paj tshab uas Ntuj pub nyob hauv YES XUS PLEEV haj yam ntws los ntau rau zeej tsoom.

Yog Tswv Ntuj Lo Lus

NKAUJ CAV TXOG LUB MOO ZOO: s. Zam 15,26b.27a

As les lus yas. As les lus yas. HUAB TAIS hais tias: “LEEJ NTUJ PLIG NTSIAB yuav ua tim khawv txog kuv. Nej kuj yuav ua tib yam txog kuv. As les lus yas.

NTAWV MOO ZOO: Mas Tais 10,26-33

Nej Mloog Ib Zag Nyob Hauv Mas Tais Ntawv Moo Zoo

- 26 Yes Xus hais rau cov thwj tim tias: “Nej txhob ntshai luag hem ! Vim tsis muaj ib yam npog rawv uas yuav tsis qhib tawm, tsis muaj ib yam zais ntshis uas yuav tsis tawm los rau sawv daws paub.
- 27 Tej yam uas kuv hais rau nej hauv qhov tsaus ntuaj, nej yuav hais tawm nruab hnuv nrig. Hos yam nej hnov ntxhi rau hauv nej pob ntseg, mas nej yuav nce mus tshaj saum ruv tsev.

- 28 "Nej txhob ntshai cov neeg tua nej lub cev, tab sis lawv tua tsis tau nej tus plig. Nej yuav ntshai tus muaj peev xwm rhuav nej lub cev thiab tus plig hauv hav hluav taws.
- 29 Ob tug noog tsig txhuv, luag tsuas muag tau ib npib xwb. Tsis kav, tsis muaj ib tug poob hauv av tau, yog nej Txiv tsis tso lus.
- 30 Nej kuj ib yam li ntawd, tab yog nej cov plaub hau, nej Txiv yeej suav tas huv si lawm.
- 31 Nej tsis txhob ntshai dab tsi mog, nej muaj nqis tshaj tej pab tsig txhuv coob coob ua ke.
- 32 "Leej twg lees rau sawv daws tias nws paub kuv, mas kuv kuj lees rau kuv Txiv nyob saum Ntuj tias kuv paub nws.
- 33 Hos tus tsis lees rau sawv daws tias nws paub kuv, kuv kuj yuav tsis lees rau kuv Txiv nyob saum ntuj tias kuv paub nws."

Yog Huab Tais Yes Xus Lub Moo Zoo

HNUB CHIV 12 NRUAB XYOO B CHÚA NHẬT 12 THƯỜNG NIÊN NĂM B

ZAJ NYEEM IB: Yob 38,1.8-11

Cov lus nyob hauv ntawv Yob

- 1 HUAB TAIS nyob hauv nag xob nag cua teb rau Yob tias :
- 8 "Thaum cov dej hiav txwv txhawv hauv tiv txwv nroo ntws tawm los, yog leej twg muab cov dej hiav txwv kaw thiab xov? Puas yog koj?
- 9 Thaum kuv tso ib co huab dawb los ua tsho vov lub hiav txwv, koj nyob qhov twg ? Thaum kuv tau ua tej twv huab dub los npog lub hiav txwv, koj ua dab tsi ?
- 10 Thaum kuv tu ciam teb rau dej kom txhob hla, thiab kuv tsa ntsa zeb ntsa tsua xov lub hiav txwv, koj nyob qhov twg ?
- 11 Thaum kuv tau hais rau cov hiav txwv tias : koj yuav tsis txhob mus dhau qhov no. Koj cov dej nphau muaj hwj chim ntxiag, yuav tsum nyob twj ywm ntawm no, mas thaum ntawd koj nyob qhov twg ?

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 106.23-26.28-31

Txais: **Peb ua Ntuj tsaug vim HUAB TAIS hlub peb. Nws txoj kev hlub yuav nyob mus li.**

1. Cov neeg caij nkoj mus hauv hiav txwv cov mus ua qav ua num hauv dej loj, lawv tau pom HUAB TAIS cov hauj lwm thiab nws cov hwj huam yees ntxwv hauv plawv hiav txwv. **Teb**
2. HUAB TAIS lo lus ua kom cua daj cua dub tshuab nplaim dej nphau nphwv rau saum ntuj. Cov nplaim dej poob nthav rau hauv qab thu, lawv xeev siab fo. **Teb**
3. Thaum lawv txom nyem, lawv quaj hu txog HUAB TAIS. Nws cawm lawv ntawm kev txhawj kev ntshai. Nws ua kom cua daj cua dub tu nrho, cov dej nphau nphwv rov nyob tus yees. **Teb**
4. Thaum lawv pom dej thiab cua tu nrho, lawv zoo siab. TSWV NTUJ coj lawv mus txog qhov chaw uas lawv nrhiav. Lawv cav txog HUAB TAIS txoj kev hlub thiab cov hwj huam yees ntxwv nws tau ua. **Teb**

ZAJ NYEEM OB: 2 Kos Lis Nthos 5,14-17

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 14 Kwv tij sawv daws, Leej Pleev txoj kev nyiam taij peb tas zog, vim peb nco ntsoov tias, peb muaj ib tug sawv peb sawv daws chaw tuag, mas sawv daws nrog nws tuag.
- 15 Leej Pleev sawv peb sawv daws chaw tuag, kom cov neeg ciaj txhob nco txog lawv xwb, lawv yuav tsum nco txog tus sawv lawv chaw tuag uas tau sawv rov los.
- 16 Li ntawd, nyem no, peb yuav tsis saib neeg raws li peb pom lawv lub cev sab nraud lawm. Tab yog peb tau pom Leej Pleev lub cev, mas nyem no, peb pom nws tsis zoo li tus qub lawm.
- 17 Nyem no, yog leej twg los nyob hauv Leej Pleev, mas nws yog tus uas Ntuj xeem tsim dua tshiab : tus qub neeg dua lawm, ib tug neeg tshiab sawv los nyob.

Yog Tswv Ntuj Lo Lus

NKAUJ CAV TXOG LUB MOO ZOO: Lk 7,16

As les lus yas. As les lus yas. Ib tug Yaj Saub loj sawv nyob nruab nrab hauv peb sawv daws. TSWV NTUJ tuaj xyuas nws haiv neeg. As les lus yas.

NTAWV MOO ZOO: Mas Kos 4,35-41

Nej Mloog Ib Zag Nyob Hauv Mas Kos Ntawv Moo Zoo

- 35 Hnub ntawd, thaum tsaus ntuj zuag, YES XUS hais rau lawv tias : "Peb hla mus sab ntug dej tid."
- 36 Ces lawv tso tsoom sid tseg. Lawv coj YES XUS mus, nws cia li mus zoo li ntawd rau hauv nkoj. Muaj ib co nkoj nrog nws mus thiab.
- 37 Muaj ib nthwv khaub zeeg cua loj kawg sawv tuaj. Dej nphau nphwv los rau hauv nkoj, ces lub nkoj twb puv dej tas lawm.
- 38 YES XUS nyob tom tw nkoj, nws tsaug zog saum lub hauv ncoo. Lawv tsa YES XUS, lawv hais rau nws tias : "Xib Hwb, peb yuav tuag, koj tsis quav ntsej lod ?"
- 39 YES XUS tsim dheev, nws txwv cua, nws hais rau dej ntuj tias: "Tswm seeb! Koj nyob twj ywm!" Ces cua tu nrho, dej ntuj rov tus yees.
- 40 YES XUS hais rau lawv tias : "Ua cas nej ntshai ua luaj ? Nej tseem tsis tau ntseeg lod ?"

41 Lawv ntshai kawg, lawv sib tham hais tias : "Tus ntawd yog leej twg ?
Txawm tias yog cua thiab dej ntuj los yeej mloog nws lus?"

Yog Huab Tais Yes Xus Lub Moo Zoo

HNUB CHIV 12 NRUAB XYOO C
CHÚA NHẬT 12 THƯỜNG NIÊN NĂM C

ZAJ NYEEM IB: Ntxas Kas Lias 12,10-11; 13,1

Cov lus nyob hauv ntawv Ntxas Kas Lias

12,10 Kuv yuav ua kom txoj pa txiaj ntsim thiab kev pe hawm nyab yees rau saum Das Vis tsev thiab saum tus nyob Yes Lus Xas Les, lawv yuav tsa muag ntsia kuv, tus lawv nkaug, lawv yuav nyiaiv nws li nyiaiv tib leeg kheej, lawv yuav nco nws npaum nkaus nco thawj tug me nyuam.

11 Hnub ntawd, Yes Lus Xas Les yuav nyiaiv laws npaum Has Das Li Moos suab nyiaiv hauv tiaj nras Maws Nkis Dos.

13,1 Hnub ntawd, dej yuav ntwis nto rau Das Vis tsev neeg thiab cov nyob Yes Lus Xes Les rau lawv tej txhaum thiab kev luab tsuab.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 62,2-6.8.9

Txais: Tswv Ntuj, koj yog kuv tus Tswv Ntuj ! Kuv tus plig nqhis koj.

1. TSWV NTUJ, koj yog tus kuv nrhiav ! Kuv lub cev seev yees txoj koj. Kuv tus plig nqhis txoj koj, puav tam li av qhuav tsis tau dej yug. **Teb**
2. Kuv mus ntsia koj nyob hauv lub tuam tsev ntshiab. Kuv pom koj lub zog thiab lub hwj chim. Koj txoj kev hlub muaj nqis dua txoj sia. Kuv lub ncauj yuav cav txog koj lub koob meej. **Teb**
3. Kuv yuav cav txog koj tas kuv sim neej. Kuv yuav tsa tes hawm koj thiab hu txog koj lub npe. Kuv tus plig zoo siab puav tam li tus tau noj ib roog qav. Kuv di ncauj hom khaj, kuv lub ncauj yuav cav txoj koj. **Teb**
4. Koj tau pab kuv, kuv nqua suab hu nkauj nyob hauv koj phab tis qhov ntxoov. Kuv tus plig nyob ruaj nreb hauv koj, koj phab xis hwj kuv. **Teb**

ZAJ NYEEM OB: Nkas Las Tias 3,26-29

Cov lus Paj Lug sau tuaj rau cov ntseeg nyob Nkas Las Tias

26 Kwv tij sawv daws, vim nej sawv daws puav leej yog TSWV NTUJ cov tub huv tib si nyob hauv txoj kev ntseeg txog YES XUS PLEEV.

27 Nej sawv daws tau txais lub cim ntxuav nyob hauv Leej Pleev, mas nej hnav Leej Pleev lawm.

28 Tsis muaj Yus Das los Hes Las, tsis muaj tus qhev los tus twj lij, tsis muaj txiv neej los poj niam. Vim nej sawv daws koom ua tib leeg nyob hauv YES XUS PLEEV.

29 Vim nej yog Leej Pleev tug, mas nej kuj yog Has Nplav Has cov xeeb ntxwv, ces nej yog cov txais lub txiaj ntsim raws li Ntuj cog lus yuav pub.

Yog Tswv Ntuj Lo Lus

NKAUJ CAV TXOG LUB MOO ZOO: Zam 10,27

As les lus yas. As les lus yas. Huab Tais hais tias: "Kuv cov yaj mloog kuv lo lus. Kuv paub kuv cov yaj, lawv raws li nraim kuv mus." As les lus yas.

NTAWV MOO ZOO: Lus Kas 9,18-24

Nej Mloog Ib Zag Nyob Hauv Lus Kas Ntawv Moo Zoo

18 Muaj ib zaug, YES XUS teev Ntuj ib leeg, cov thwj tim nrog nws nyob, YES XUS nug lawv tias: "Tsoom sid hais tias kuv yog leej twg?"

19 Cov thwj tim teb tias : "Ib txhia hais tias koj yog Zam Ntxuav Plig, ib txhia hais tias koj yog Es Lias, tseem muaj lwm cov hais tias koj yog ib tug yaj saub thaum ub sawv rov los."

20 YES XUS hais rau lawv tias : "Hos nej, mas nej hais tias kuv yog leej twg?" Pob Zeb teb tias : "Koj yog TSWV NTUJ Leej Pleev."

21 Ces YES XUS cheem thiab txwv lawv kom txhob hais qhov ntawd rau leej twg.

22 YES XUS tseem hais tias : "Neeg Leej Tub yuav tsum raug txom nyem loj. Cov txwj laus, cov Thawj Leej Choj, thiab cov Kws Ntawv Ntshiab yuav muab nws xyeeb pov tseg. Nws yuav raug luag tua, tab sis hnuv peb nws yuav sawv rov los."

23 YES XUS hais rau sawv daws tias : "Leej twg xav los raws kuv, nws yuav tsis txhob nco txog nws, nws yuav niaj hnuv kwv nws tus ntoo cuam, ces nws yuav lawv kuv qab.

24 Vim tias tus xav cawm nws txoj sia, mas nws yuav ua nws txoj sia ploj. Hos tus twg ua nws txoj sia ploj vim kuv, mas tus ntawd cawm nws txoj sia.

Yog Huab Tais Yes Xus Lub Moo Zoo

HNUB CHIV 13 NRUAB XYOO A CHÚA NHẬT 13 THƯỜNG NIÊN NĂM A

ZAJ NYEEM IB: 2 Vaj 4,8-11.14-16a

Cov lus nyob hauv ntawv Vaj phau ob

- 8 Muaj ib hnuv, Es Lis Xais mus so nyob Xws Nes. Muaj ib tug poj niam nyob txawm ntawd tuaj hu Es Lis Xais mus noj mov. Txij hnuv ntawd los, thaum twg Es Lis Xais hla lub zos ntawd mas nws mus so noj mov hauv tus poj niam ntawd lub tsev.
- 9 Tus poj niam hais rau nws tus txiv tias : "Koj ntsia saib, tam li kuv xav mas tus niaj zaus tuaj so hauv wb tsev, nws yeej yog TSWV NTUJ ib tug neeg siab ntshiab xwb.
- 10 Cia wb ua ib kem tsev me me nyob saum ru tsev rau nws tau so. Wb muab ib lub txaj, ib lub rooj ua hauj lwm, ib lub rooj zaum thiab ib lub teeb rau hauv kem tsev ntawd. Thaum twg nws tuaj ces cia nws so nyob hauv kem tsev ntawd."
- 11 Muaj ib hnuv, Es Lis Xais rov tuaj so ntawd, nws thiaj mus pw nyob saum kem tsev siab.
- 14 Es Lis Xais pom tus poj niam ua zoo rau nws, nws tso nws tus tub txib mus nug tus poj niam Xws Nes tias : "Kuv yuav pab dab tsi rau koj ?" Tus tub txib Zes Has Xis coj tus poj niam lo lus teb los hais tias: "Nws tsis muaj tub ki, thiab nws tus txiv twb laus lawm."
- 15 Es Lis Xais hais tias : "Koj mus hu nws los saib !" Tus tub txib mus hu tus poj niam los sawv ntawm qhov rooj. Es Lis Xais hais rau nws tias : "Lwm xyoo rov txog lub caij no mas koj yuav tau ib tug tub los puag." Tus poj niam teb tias : "TSWV NTUJ tus neeg, koj txhob tso dag rau koj tus ntxhais txib mas !"
- 16a Xyoo ntawd tus poj niam xeeb tub, rov txog lub caij uas Es Lis Xais hais mas nws yug tau ib tug tub.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 88,2-3.16-19

Txais: Kuv yuav hu nkauj cav txog HUAB TAIS txoj kev hlub txheej dhau txheej.

1. Kuv yuav hu nkauj cav txog HUAB TAIS txoj kev cog lus mus li! Kuv lub ncauj yuav tshaj rau sawv daws paub tias: "Koj lub siab ncaj txheej

dhau txheej.” HUAB TAIS hais tias, “Kuv txoj kev hlub nyob ruaj nreb mus li.” Nyob saum ntuj, TSWV NTUJ txoj kev ncaj nyob ruaj nreb mus li. **Teb**

2. Haiv neeg uas paub cav txog TSWV NTUJ mas lawv txoj hmoov zoo. Koj lub ntsej muag ci ntsa iab kaj lawv txoj kev. Niaj hnuv, lawv hom khaj nyob hauv koj lub npe. Koj txoj kev haum pheej coj lawv ua neej. **Teb**
3. Koj yog lawv lub zog, koj lub txiaj ntsim tsa lawv hauv pliaj siab. Peb daim leem phiaj tuaj ntawm HUAB TAIS tuaj. Peb tus vaj yog His Xas Lais tus Ntshiab. **Teb**

ZAJ NYEEM OB: Los Mas 6,3-4.8-11

Cov lus nyob hauv Paj Lug tsab ntawv xa rau cov ntseeg nyob Los Mas

- 3 Kuv tij sawv daws, peb cov uas tau txais lub Cim Ntxuav nyob hauv YES XUS PLEEV, mas yog peb txais lub Cim Ntxuav nyob hauv YES XUS txoj kev tuag.
- 4 Thaum peb txais lub Cim Ntxuav peb nrog YES XUS tuag, peb nrog nws mus hauv nws lub ntxa.
- 8 Tab sis, yog peb nrog Leej Pleev tuag mas peb ntseeg tias peb yuav nrog nws muaj txoj sia.
- 9 Peb paub tias Leej Pleev sawv hauv qhov tuag los lawm, nws yuav tsis rov tuag dua, txoj kev tuag tsis muaj cuab kav tuaj raug nws ib zaug ntxiv.
- 10 Nws tuag ib zaug kom txoj kev txhaum tuag. Nyem no, nws ciaj rov los nws npuab TSWV NTUJ mus li.
- 11 Nej, mas nej kuj zoo li ntawd thiab: nej yuav saib tias nej tus neeg txhaum tuag lawm, tshuav nej tus neeg tshiab npuab TSWV NTUJ uas muaj txoj sia nyob hauv HUAB TAIS YES XUS PLEEV mus li.

Yog Tswv Ntuj Lo Lus

NKAUJ CAV TXOG LUB MOO ZOO: 1 Pob Zeb 2,9

As les lus yas. As les lus yas. Nej yog tsav neeg Ntuj xaiv, yog tsoom Leej Choj ua vaj, yog haiv neeg ntshiab, yog tsoom pej xeev Ntuj txhiv, kom nej tau tshaj lus txog tus hu nej ntawm qhov tsaus ntuj los nyob hauv nws qhov pom kev zoo nkauj. As les lus yas.

NTAWV MOO ZOO: Mas Tais 10,37-42

Nej Mloog Ib Zag Nyob Hauv Mas Tais Ntawv Moo Zoo

- 37 Yes Xus hais rau cov thwj tim tias: “Tus nyiam nws niam nws txiv dua kuv, nws tsis tsim nyog nrog kuv. Tus nyiam nws tej tub tej ntxhais dua kuv, mas nws tsis tsim nyog nrog kuv.
- 38 Tus tsis kwv nws tus ntoo cuam thiab tsis raws kuv qab, mas nws tsis tsim nyog nrog kuv.
- 39 Tus nrhiav nws txoj sia, nws ua nws txoj sia ploj, hos tus ua nws txoj sia ploj vim kuv, mas nws nrhiav tau nws txoj sia lawm.
- 40 Tus txais nej, mas yog nws kuj txais kuv. Tus txais kuv, mas yog nws txais Tus xa kuv tuaj.
- 41 Tus txais ib tug yaj saub, vim tus ntawd yog yaj saub, nws yuav txais koob haum phim tus yaj saub. Tus txais ib tug neeg ncaj, vim tus ntawd yog neeg ncaj, mas nws yuav txais koob haum phim tus neeg ncaj.
- 42 Kuv hais tseeb rau nej, leej twg pub dej rau ib tug neeg me me no haus, vim tus no yog ib tug thwj tim, tab yog ib khob dej txiag xwb, tsis kav, nws yuav tau txais koob haum.”

Yog Huab Tais Yes Xus Lub Moo Zoo

**HNUB CHIV 13 NRUAB XYOO B
CHÚA NHẬT 13 THƯỜNG NIÊN NĂM B**

ZAJ NYEEM IB: Thoob Tsib 1,13-15; 2,23-24

Cov lus nyob hauv ntawv Thoob Tsib

- 1,13 TSWV NTUJ tsis tau ua kev ploj tuag, nws tsis qab siab rau cov ciaj sia puas ntsoog.
- 14 Nws tsim puas tsav yam kom nyob txawm thiab txhua tsav hauv lub sim ceeb zoo khuv leej thiab tsis muaj ib yam yuav nkim hauv lawv, kev puas ntsoog kav tsis tau daim av.
- 15 Txoj kev ncaj ncees tsis txawj tuag.
- 2,23 TSWV NTUJ tsim tib neeg txhob txhawj po thiab nws ua kom tus ntsuj nyob ib txhis li nws,
- 24 Vim dab phem kev khib kev ploj tuag txawm nkag los hauv ntiaj teb, cov qaag rau nws yuav khaws nkaus tau.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 29,2.4-6.11.12a.13b

Txais: HUAB TAIS, kuv yuav cav txog koj vim koj tau cawm kuv.

1. HUAB TAIS, kuv yuav cav txog koj vim koj tau rub kuv tawm hauv lub qhov ntuj los. Koj tsis cia kuv ua yeeb ncuab qhov chaw zoo siab. HUAB TAIS, koj rub kuv tus plig tawm hauv ntuj txias teb tsaus los. Koj tsis pub kuv mus hauv lub qhov ntxa. **Teb**
2. Cov ntseeg HUAB TAIS, nej hu nkauj cav txog nws. Nej nqaum paj nqaum nruas cav txog nws lub npe ntshiab. Nws npau taws, tsuas npau ib pliag. Nws hlub neeg, nws hlub tas ib sid. Hmo ntuj, kuv kua muag poob tsis tu, tab sis kaj ntug txoog, kuv rov zoo siab. **Teb**
3. HUAB TAIS, koj mloog mas ! Thov koj hlub, thov koj pab kuv. Koj muab kuv txoj kev quaj nyiav los hloov ua kev lom zem. HUAB TAIS, kuv tus TSWV NTUJ, kuv yuav ua koj tsaug mus li. **Teb**

ZAJ NYEEM OB: 2 Kos Lis Nthos 8,7.9.13-15

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 7 Kwv tij sawv daws, nej ua yam twg, los nej yeej txawj ua zoo heev: tsis hais kev ntseeg, los kev hais lus, los kev kawm txuj, los kev xyiv fab pab sawv daws, los txoj kev nyiam uas nej txais ntawm peb los, mas nej yeej ua zoo tas huv tib si lawm. Ua li mas, nej kuj yuav tsum ua zoo tshaj nyob hauv txoj kev pub paj tshab thiab.
- 9 Nej paub tias peb tus HUAB TAIS YES XUS PLEEV lub siab dav : Nws yog tus nplua nuj, tab sis nws ua kom nws pluag, kom xwv nws lub neej pluag ua nej nplua nuj tuaj.
- 13 Kuv tsis hais tias, tab yog koj txom nyem, tsis kav koj tseem yuav tsum pub rau luag tej. Qhov uas peb yuav tsum ua yog kom sawv daws tau sib npaug.
- 14 Nyem no, nej muab nej qhov seem los pab lawv txoj kev txom nyem kom lwm hnub, lawv ho muab lawv qhov seem tuaj pab nej.
- 15 Li ntawd sawv daws thiaj yuav tau sib npaug raws li Ntawv hais tias: ‘Tus khaws tau ntau, nws tsis tau tshaj luag ; tus khaws tau tsawg, nws kuj tsis tshaib.’

Yog Tswv Ntuj Lo Lus

NKAUJ CAV TXOG LUB MOO ZOO: s. 2 Tes Xas Los Nis 1,10

As les lus yas. As les lus yas. Peb tus Cawm Seej YES XUS PLEEV rhuav txoj kev tuag lawm. Nws Lub Moo Zoo koj txoj sia tshiab tuaj rau sawv daws. As les lus yas.

NTAWV MOO ZOO: Mas Kos 5,21-43

Nej Mloog Ib Zag Nyob Hauv Mas Kos Ntawv Moo Zoo

- 21 Thaum YES XUS caij nkoj rov los txog sab ntug dej tim no, ib pab neeg coob tuaj sib sau ntsauv nws. Thaum ntawd, YES XUS tseem nyob ntawm ntug dej ntuj.
- 22 Muaj ib tug hauv cov tswj tsev txoos hu ua Yais Los tuaj txog. Thaum nws pom dheev YES XUS, nws txhos caug ntua ntawm YES XUS ko taw.
- 23 Nws thov YES XUS tias : "Kuv tus me ntxhais txoj sia yuav tu, thov koj tuaj tsa tes cawm nws kom nws ciaj."
- 24 YES XUS nrog Yais Los mus. Ib pab neeg coob raws YES XUS mus thiab, lawv sawv daws txiv YES XUS.

- 25 Muaj ib tug poj niam tsob ntshav tau kaum ob xyoos los lawm.
- 26 Ntau tus kws tshuaj tau ua kom nws txom nyem kawg. Nws siv tas nws lub cuab tam los kho tsis tau nws zoo. Nws mob heev zuj zus ntxiv.
- 27 Nws hnov luag hais txog YES XUS, ces nws nrog tsoom sid sib txiv tom YES XUS nraub qaum. Nws kov YES XUS lub tsho.
- 28 Vim nws xav hauv siab tias : "Tsuav yog kuv tau kov nws lub tsho xwb, mas kuv yeej yuav dim."
- 29 Ces tam sis ntawd, nws qhov tsob ntshav tu nrho, nws hnov nws lub cev zoo hlo ntawm tus mob.
- 30 Tam sim ntawd, YES XUS kuj hnov ib lub zog tawm hauv nws mus; ces YES XUS tig los nug pab neeg ntawd tias : "Leej twg kov kuv lub tsho ?"
- 31 Cov thwj tim hais rau nws tias : "Koj ntsia saib, tas tsoom sid txiv koj txhua sab tuaj, koj tseem hais tias : "Leej twg kov kuv?"
- 32 YES XUS ntsia ib ncig kom pom tus neeg uas tau kov nws.
- 33 Ces tus poj niam ntshai, nws tshee tshee, vim nws paub qhov uas nyuam qhuav tshwm sim hauv nws. Nws los txhos caug ntawm YES XUS taw thiab qhia qhov tseeb rau YES XUS.
- 34 YES XUS hais rau tus poj niam tias : "Phauj, koj lub siab ntseeg cawm koj lawm. Koj rov mus kaj siab lug, koj tus mob zoo lawm."
- 35 Thaum YES XUS tseem tab tom hais lus, ib co neeg tuaj ntawm tus tswj tsev txoos lub tsev tuaj hais tias : "Koj tus ntxhais twb tuag lawm, koj tseem yuav txob Xib Hwb ua dab tsi ?"
- 36 Tab sis YES XUS twb hnov lo lus lawv nyuam qhuav hais, nws hais rau tus tswj tsev txoos tias : "Koj txhob ntshai, tsuav koj ntseeg xwb."
- 37 YES XUS tsis kheev leej twg nrog nws mus li. Nws tsuas cia Pob Zeb, Yas Kos thiab Yas Kos tus kwv Zam nrog nws mus xwb.
- 38 Lawv tuaj txog tus tswj tsev txoos lub tsev, YES XUS pom sawv daws ua ntxhov hnyo : ib txhia quaj, ib txhia qw nrov nrov.
- 39 YES XUS los hauv tsev, nws hais tias : "Ua cas sawv daws ua ntxhov hnyo thiab quaj zom zaws ? Tus me ntxhais tsis tuag, nws tsaug zog xwb."
- 40 Ces lawv luag YES XUS. Tab sis YES XUS ntiab sawv daws tawm mus nraum zoov, nws tsuas kheev tus me nyuam niam thiab txiv, thiab

cov nrog nws tuaj, nyob xwb. Nws chaws mus hauv kem uas tus me nyuam nyob.

- 41 YES XUS tuav tus me nyuam txhais tes, nws hais rau tus me nyuad tias: "Tas lis tas kus," txhais tias: "Me ntxhais, kuv hais koj, koj sawv!"
- 42 Tus me ntxhais sawv tsees tam sis ntawd, nws mus kev, vim nws twb muaj kaum ob xyoos lawm. Tam sim ntawd, sawv daws ntshai kawg.
- 43 YES XUS txwv lawv heev kom txhob qhia leej twg paub. Ces nws kom lawv muab mov rau tus me ntxhais noj.

Yog Huab Tais Yes Xus Lub Moo Zoo

ZAJ NYEEM LUV LUV: Mas Tais 5,21-24.35b-43

Nej Mloog Ib Zag Nyob Hauv Mas Kos Ntawv Moo Zoo

- 21 Thaum YES XUS caij nkoj rov los txog sab ntug dej tim no, ib pab neeg coob tuaj sib sau ntsauv nws. Thaum ntawd, YES XUS tseem nyob ntawm ntug dej ntuj.
- 22 Muaj ib tug hauv cov tswj tsev txoos hu ua Yais Los tuaj txog. Thaum nws pom dheev YES XUS, nws txhos caug ntua ntawm YES XUS ko taw.
- 23 Nws thov YES XUS tias : "Kuv tus me ntxhais txoj sia yuav tu, thov koj tuaj tsa tes cawm nws kom nws ciaj."
- 24 YES XUS nrog Yais Los mus. Ib pab neeg coob raws YES XUS mus thiab, lawv sawv daws txiv YES XUS.
- 35b Ib co neeg tuaj ntawm tus tswj tsev txoos lub tsev tuaj hais tias : "Koj tus ntxhais twb tuag lawm, koj tseem yuav txob Xib Hwb ua dab tsi ?"
- 36 Tab sis YES XUS twb hnov lo lus lawv nyuam qhuav hais, nws hais rau tus tswj tsev txoos tias : "Koj txhob ntshai, tsuav koj ntseeg xwb."
- 37 YES XUS tsis kheev leej twg nrog nws mus li. Nws tsuas cia Pob Zeb, Yas Kos thiab Yas Kos tus kwv Zam nrog nws mus xwb.
- 38 Lawv tuaj txog tus tswj tsev txoos lub tsev, YES XUS pom sawv daws ua ntxhov hnyo : ib txhia quaj, ib txhia qw nrov nrov.
- 39 YES XUS los hauv tsev, nws hais tias : "Ua cas sawv daws ua ntxhov hnyo thiab quaj zom zaws ? Tus me ntxhais tsis tuag, nws tsaug zog xwb."

- 40 Ces lawv luag YES XUS. Tab sis YES XUS ntiab sawv daws tawm mus nraum zoov, nws tsuas kheev tus me nyuam niam thiab txiv, thiab cov nrog nws tuaj, nyob xwb. Nws chaws mus hauv kem uas tus me nyuam nyob.
- 41 YES XUS tuav tus me nyuam txhais tes, nws hais rau tus me nyuad tias : "Tas lis tas kus," txhais tias : "Me ntxhais, kuv hais koj, koj sawv !"
- 42 Tus me ntxhais sawv tsees tam sis ntawd, nws mus kev, vim nws twb muaj kaum ob xyoos lawm. Tam sim ntawd, sawv daws ntshai kawg.
- 43 YES XUS txwv lawv heev kom txhob qhia leej twg paub. Ces nws kom lawv muab mov rau tus me ntxhais noj.

Yog Huab Tais Yes Xus Lub Moo Zoo

HNUB CHIV 13 NRUAB XYOO C CHÚA NHẬT 13 THƯỜNG NIÊN NĂM C

ZAJ NYEEM IB: 1 Vaj 19,16b.19-21

Cov lus nyob hauv ntawv Vaj phau ib

- 16b Huab Tais hais rau Es Lias: “Koj tsa Yes Hus ua vaj kav His Xas Lais thiab koj pleev Es Lis Xais ua Yaj Saub hloov koj.”
- 19 Ces Es Lias sawv kev mus. Nws mus nrhiav tau Es Lis Xais uas yog Xas Fas tus tub. Es Lis Xais tab tom laij ib thaj teb uas muaj kaum ob plag. Nws tab tom laij plas kawg. Es Lias hla mus ze ntawm Es Lis Xais, nws pov rhee nws lub tsho tshaj sab rau saum Es Lis Xais xub pwg.
- 20 Ces Es Lis Xais tso plhuav nws cov nyuj tseg, nws khiav khiav mus caum Es Lias. Nws hais tias : "Koj cia kuv mus hais ob peb lo lus nplij kuv niam thiab kuv txiv tso, ces kuv yuav nrog koj mus." Es Lias teb tias: "Koj rov mus. Kuv tau ua dab tsi rau koj?"
- 21 Es Lis Xais thiaj rov mus, nws muab nws nkawm nyuj tua. Nws muab rab voom los rauv hau nqaij kom siav, ces nws muab faib rau cov neeg nrog nws ua hauj lwm noj, ces nws sawv mus nrog Es Lias, nws ua Es Lias tus tub txib.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 15,1-2a.5.7-11

Txais: HUAB TAIS, koj yog lub cuab tam kuv txais ntawm kuv cov yawg koob los.

1. TSWV NTUJ, thov koj txuag kuv vim kuv tuaj khaub zig koj. Kuv hais rau HUAB TAIS hais tias, “Koj yog kuv tus HUAB TAIS.” HUAB TAIS koj yog lub cuab tam kuv tau txais los, yog lub ntim tuav kuv txoj hmoov. **Teb**
2. Kuv cav lus zoo txog tus HUAB TAIS uas qhia kuv xav tswv yim, tab yog hmo ntuj los kuv siab ntsws tseem qhia kuv. Kuv cia HUAB TAIS nyob ntawm kuv xub ntiag mus li vim nws nyob ntawm kuv sab xis, kuv tsis qaij tsis qaug. **Teb**

3. Kuv lub siab luag ntshi, kuv tus plig hom khaj. Kuv cev nqaij nyob nyab xeeb vim koj tsis tso kuv pov tseg rau ntuj txias teb tsaus. Koj tsis kheev tus ntseeg koj poob rau hauv kev tuag. **Teb**
4. Koj qhia txoj kev muaj txoj sia rau kuv. Kev zoo siab txhawv ntawm koj lub ntsej muag los. Nyob ntawm koj sab xis, muaj kev nplij siab mus ib sid. **Teb**

ZAJ NYEEM OB: Nkas Las Tias 5,1.13-18

Cov lus nyob hauv Paj Lug tsab ntawv xa rau cov ntseeg nyob Nkas Las Tias

- 1 Kuv tij sawv daws, Leej Pleev cawm peb dim, kom peb twj lij mus li. Li ntawd, mas nej nyob ruaj nreb mog. Nej tsis txhob rov mus nkag rau hauv rab quab ua qhev.
- 13 Kuv cov kuv tij, Ntuj hu nej mus taug txoj kev twj lij. Tab sis, yuav tsis txhob cia txoj kev twj lij no ntseeg mus mloog lub cev nqaij. Nej yuav cia txoj kev nyiam coj, kom nej ib leeg tsob hwb ib leeg.
- 14 Vim muaj ib lo lus qhia ntim tau Txoj Cai tas huv si, yog lo lus no: ‘Koj yuav nyiam cov neeg nyob ze koj, ib yam li koj nyiam koj.’
- 15 Tab sis, yog nej sib tog thiab nej ib leeg ntxo ib leeg, mas nej ceev faj, vim nej rov rhuav nej pov tseg tas huv tib si.
- 16 Kuv hais rau nej tias : nej cia LEEJ NTUJ PLIG coj nej lub neej, ces nej yuav tsis mloog nej lub cev ntshaw.
- 17 Vim qhov uas lub cev ntshaw tsis yog qhov uas lub tswv yim ntshaw. Hos qhov uas lub tswv yim ntshaw, kuj tsis yog qhov uas lub cev ntshaw. Lub cev thiab lub tswv yim tsis sib haum, vim li ntawd, muaj ntau zaus, nej thiaj tsis ua qhov uas nej lub siab xav ua.
- 18 Yog nej cia LEEJ NTUJ PLIG coj nej, mas nws tsis zwm rau Txoj Cai.

Yog Tswv Ntuj Lo Lus

NKAUJ CAV TXOG LUB MOO ZOO: 1 Xas Muas 3,9; Zam 6,68c

As les lus yas. As les lus yas. HUAB TAIS, koj hais mas! Koj tus tub txib yuav mloog koj. Koj yog tus muaj cov lus pub txoj sia nyob mus li. As les lus yas.

NTAWV MOO ZOO: Lus Kas 9,51-62

Nej Mloog Ib Zag Nyob Hauv Lus Kas Ntawv Moo Zoo

- 51 Lub sij hawm uas YES XUS yuav ncaim lub ntiaj teb, los yuav txog, ces nws ua siab tawv qhawv mus pem Yes Lus Xas Les.
- 52 YES XUS xa ib co ua ntej mus fi xov. Cov neeg fi xov sawv kev mus, lawv mus hauv ib lub zos Xas Mas Lias kom tau npaj txhua yam rau YES XUS.
- 53 Tab sis cov Xas Mas Lias tsis txais YES XUS, vim YES XUS mus pem Yes Lus Xas Les.
- 54 Ob tug thwj tim Yas Kos thiab Zam nkawd pom li ntawd, nkawd hais tias : "HUAB TAIS, koj puas xav kom peb hu ib co hluav taws nqes saum ntuj los hlawv lawv?"
- 55 Tab sis YES XUS tig los cem nkawd.
- 56 Ces lawv mus ntxiv rau lwm lub zos.
- 57 Thaum YES XUS lawv mus, nyob ntawm kev, muaj ib tug neeg hais rau YES XUS tias : "Koj mus qhov twg los kuv yuav raws koj mus."
- 58 YES XUS hais rau nws tias : "Hma muaj hma lub qhov nkaum, hos tej noog ya saum ntuj los lawv muaj lawv lub zes. Tab sis Neeg Leej Tub tsis muaj chaw rau ncoo."
- 59 YES XUS tseem hais rau lwm tus neeg tias : "Koj raws kuv mus." Tus ntawd hais tias : "Thov koj cia kuv mus faus kuv txiv tso."
- 60 Tab sis YES XUS hais rau nws tias : "Koj cia cov tuag faus lawv cov neeg tuag, hos koj, mas koj mus tshaj TSWV NTUJ lub Ceeb Tsheej."
- 61 Tseem muaj ib tug hais tias : "HUAB TAIS, kuv yuav raws koj mus, tab sis thov koj cia kuv rov mus hais ib lo lus ncaim tseg rau kuv tsev neeg tso."
- 62 YES XUS hais rau nws tias : "Leej twg tuav rab khais lawm, nws tseem tig ntsia rov tom qab, mas nws tsis phim TSWV NTUJ lub Ceeb Tsheej."

Yog Huab Tais Yes Xus Lub Moo Zoo

HNUB CHIV 14 NRUAB XYOO A CHÚA NHẬT 14 THƯỜNG NIÊN NĂM A

ZAJ NYEEM IB: Ntxas Kas Lias 9,9-10

Cov lus nyob hauv ntawv Ntxas Kas Lias

- 9 Leej ntxhais Xis Yoos, koj kav tsij dhia hom khaj mog ! Leej ntxhais Yes Lus Xas Les, koj kav tsij qw suab zoo siab mas ! Ntsia saib : koj tus vaj tuaj cuag koj. Nws siab ncaj, nws yeej luag. Nws nyiam ua neeg me, nws caij ib tug luj, nws caij ib tug me nyuam luj uas yog tus maum luj xya.
- 10 Nws yuav xyeeb Es Fais cov tsheb rog pov tseg, nws yuav xyeeb Yes Lus Xas Les cov nees ntaus rog pov tseg. Nws yuav xyeeb cov hneev ntaus rog pov tseg. Nws ceeb toom tias txhua lub kuj cuab yuav nyob thaj yeeb. Nws lub tuam teb yuav ri txij ib lub hiav txwv mus dhau lwm lub hiav txwv, txij tus niam dej mus txog npoo ntiaj teb kawg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 144,1-2.8-11.13cd-14

Txais: Kuv tus Tswv Ntuj, kuv tus vaj, kuv yuav foom koob meej rau koj lub npe mus ib txhiab ib txhis.

1. Kuv tus TSWV NTUJ, kuv cav lus zoo txog koj. Kuv yuav cav txog koj lub npe mus ib txhiab ib txhis. Kuv yuav niaj hnuv cav txog koj lub npe mus ib txhiab ib txhis. **Teb**
2. HUAB TAIS siab zoo, nws khuv leej neeg, nws tsis npau taws sai. HUAB TAIS ua zoo rau txhua leej txhua tus. Nws hluv thiab txuag nws tej dej num. **Teb**
3. HUAB TAIS, koj cov hauj lwm yuav cav txog koj. Cov ntseeg txog koj yuav cav lus zoo rau koj. Lawv yuav cav txog koj lub Ceeb Tsheej nto koob meej. Lawv yuav tshaj txog koj cov hauj lwm muaj hwj xyeej. **Teb**
4. TSWV NTUJ cov lus muaj tseeb thiab nws cov hauj lwm ntshiab huv tas nrho. HUAB TAIS tsa cov neeg poob tsag, nws tsa cov neeg raug luag hiam sawv. **Teb**

ZAJ NYEEM OB: Los Mas 8,9.11-13

Cov lus nyob hauv Paj Lug tsab ntawv xa rau cov ntseeg nyob Los Mas

- 9 Kwv tij sawv daws, ntawm nej, mas nej tsis zwm rau lub cev, nej zwm rau lub tswv yim, vim TSWV NTUJ Leej Tswv Yim nyob txawm hauv nej. Tus twg tsis muaj Leej Pleev lub tswv yim nyob hauv nws mas nws tsis yog Leej Pleev tug.
- 11 Yog tus tau tsa YES XUS tuag sawv rov los, nws lub tswv yim nyob txawm hauv nej, mas nws yuav pub txoj sia rau nej lub cev tuag, vim LEEJ NTUJ PLIG nyob txawm hauv nej.
- 12 Kuv cov kwv tij, yog li ntawd mas peb tshuav luag nuj nqis, tab sis peb tsis tshuav lub cev nuj nqis. Tsis tas peb yuav ua neej mloog lub cev.
- 13 Yog nej ua neej mloog lub cev mas nej yuav tuag. Tab sis yog nej cia LEEJ NTUJ PLIG muab lub cev cov hauj lwm tua pov tseg, mas nej yuav muaj txoj sia.

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 11,25

As les lus yas. As les lus yas. Txiv, kuv cav lus zoo txog koj, Huab Tais kav lub ntuj lub teb, vim koj qhib cov txuj zais tob Ntuj lub Ceeb Tsheej los rau cov me nyuam yaus. As les lus yas.

NTAWV MOO ZOO: Mas Tais 11,25-30

Nej Mloog Ib Zag Nyob Hauv Mas Tais Ntawv Moo Zoo

- 25 Lub caij ntawd, YES XUS hais tias : "Txiv, kuv cav lus zoo txog koj, HUAB TAIS kav lub ntuj lub teb, vim koj zais tej yam ntawd rau cov neeg thoob tsib thiab cov neeg ntse, koj ho qhib rau cov me nyuam yaus.
- 26 Muaj tseeb tiag, Txiv, koj lub siab nyiam li ntawd.
- 27 Kuv Txiv muab tas ib puas tsav yam rau kuv. Tsis muaj leej twg paub Leej Tub, tsuas kawg Leej Txiv thiaj paub. Kuj tsis muaj leej twg paub Leej Txiv, tsuas kawg Leej Tub thiaj paub, thiab tus uas Leej Tub pom zoo qhia rau kom paub.
- 28 Tas nej sawv daws uas nej khwv, thiab ris nra hnyav, nej tuaj cuag kuv mog ! Kuv yuav cia nej so los siav.

29 Nej txais kuv tus quab. Nej kawm ntawm kuv mog, vim kuv siab zoo, kuv tsis muab hlob, nej tus plig yuav nrhiav tau chaw so los siav.

30 Vim kuv tus quab kwv yooj yim, thiab kuv lub nra sib.”

Yog Huab Tais Yes Xus Lub Moo Zoo

HNUB CHIV 14 NRUAB XYOO B CHÚA NHẬT 14 THƯỜNG NIÊN NĂM B

ZAJ NYEEM IB: Es Xes Kias 2,2-5

Cov lus nyob hauv ntawv Es Xes Kias

- 2 Nws hais rau kuv, ib nthwv pa ntsawv tuaj hauv kuv, nws ua kuv sawv saum kuv ob txhais taw, kuv hnov tus hais rau kuv,
- 3 Nws hais rau kuv : “Neeg leej tub, kuv xa koj mus rau His Xais Lais cov tub ki mus rau cov teb chaws cav ncauj, lawv cav kuv, lawv cov txiv cav kuv txog ntua hnub no,
- 4 Kuv xa koj mus rau lawv, koj hais tias HUAB TAIS TSWV NTUJ hais li no : Cov tub ntsej muag tawv thiab siab qig lus,
- 5 Saib lawv yuav mloog los lawv yuav kwv hlo vim lawv yog ib tse neeg cam thawj, lawv yuav paub tias ib tug saub nyob nruab nrab hauv lawv.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 122,1-4

Txais: **Peb tsa muag ntsia HUAB TAIS, thov nws khuv leej peb.**

1. Kuv tsa muag ntsia txog koj uas yog tus zaum lub theej kiab nyob txheej ntuj saud, zoo puav tam li cov tub txib ntsia lawv tus tswv txhais tes. **Teb**
2. Peb ntsia ntsoov txog hnub uas peb tus HUAB TAIS TSWV NTUJ yuav pab peb, zoo puav tam li tus txhais txib ntsia nws tus niam tsev txhais tes. **Teb**
3. HUAB TAIS, thov koj hlub, thov koj khuv leej peb mas ! Vim luag thuam peb, dhuav peb siab tas nrho. Peb tus plig ntim tsis taus cov neeg muab hlob tej tus thuam. **Teb**

ZAJ NYEEM OB: 2 Kos Lis Nthos 12,7-10

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 7 Kwv tij sawv daws, ntuj qhib tej yam zoo tas nrho los qhia kuv, tiam sis Ntuj tsis xav kom kuv muab hlob, ces Ntuj tso ib tug saus los chob kuv cov nqaij. Ntuj tso Xas Tas ib tug dab tuaj ntaus kuv tej tawg ncuav, kom kuv tsis txhob muab hlob.
- 8 Kuv thov HUAB TAIS peb zaug, kom Xas Tas tus dab ntawd txav mus deb kuv. Tiam sis HUAB TAIS teb rau kuv tias :
- 9 ‘Kuv lub txiaj ntsim txaus pab koj lawm, vim lub hwj huam muaj zog nyob hauv tus tsis muaj zog.’ Yog vim qhov ntawd, mas kuv thiaj khav

txog kuv txoj kev tsis muaj zog, kom Leej Pleev lub hwj huam los nyob hauv kuv.

- 10 Yog tim qhov ntawd mas kuv thiaj zoo siab txais kuv txoj kev raug luag thum, kev txhawj xeeb, kev raug luag hiam, thiab tej kev ntshai, vim Leej Pleev. Vim tias, yog thaum kuv tsis muaj zog, mas kuv thiaj muaj zog.

Yog Tswv Ntuj Lo Lus

NKAUJ CAV TXOG LUB MOO ZOO: s. Lk 4,18

As les lus yas. As les lus yas. HUAB TAIS lub tswv yim nyob saum kuv, nws xa kuv mus tshaj lub Moo Zoo rau cov pluag txom nyem. As les lus yas.

NTAWV MOO ZOO: Mas Kos 6,1-6

Nej Mloog Ib Zag Nyob Hauv Mas Kos Ntawv Moo Zoo

- 1 YES XUS tawm hauv qhov chaw ntawd mus, nws rov mus lub zos nws nyob hlob, cov thwj tim kuj nrog nws mus thiab.
- 2 Hnub Xas Npas Tos, YES XUS qhia hauv tsev txoos. Muaj neeg coob tuaj mloog, lawv hnov nws cov lus, lawv qhuas, lawv hais tias: "Nws tau tej ntawd qhov twg los? Lub siab thoob tsib thiab cov hwj huam yees ntxwv loj uas nws ob txhais tes ua, yog leej twg pub rau nws?"
- 3 Tus ntawd tsis yog tus kws ntoo, Mab Liab tus tub lod ? Nws tsis yog Yas Kos, Yos Xes, Yus Das thiab Xis Moos lawv kwv tij lod? Hos nws cov muam, tsis yog cov nrog peb nyob ua ke lod ? YES XUS ua lawv poob siab.
- 4 Ces YES XUS hais rau lawv tias : "Ib tug Yaj Saub, tsuas yog nyob hauv lub zos nws hlob, hauv nws cov txheeb ze thiab nws tsev neeg, mas luag thiaj saib nws tsis muaj nqis."
- 5 Vim li ntawd, YES XUS ua tsis tau ib yam hwj huam yees ntxwv nyob ntawd li, nws tsuas tsa tes rau tus puav tuag ceg los tuag tes kom zoo.
- 6 Nws xav tsis thoob txog qhov lawv tsis ntseeg. Ces nws txawm mus qhuab qhia thoob plaws tej zej zog ib ncig.

Yog Huab Tais Yes Xus Lub Moo Zoo

HNUB CHIV 14 NRUAB XYOO C CHÚA NHẬT 14 THƯỜNG NIÊN NĂM C

ZAJ NYEEM IB: His Xais 66,10-14c

Cov lus nyob hauv ntawv His Xais

- 10 Nej kav tsij nrog Yes Lus Xas Les zoo siab mog ! Nej sawv daws uas nyiam Yes Lus Xas Les, nej dhia hom khaj rau nws mas ! Nej sawv daws uas nej tau ntoo xyom vim Yes Lus Xas Les, mas nyem no nej kav tsij dhia zoo siab hom khaj !
- 11 Nej thiaj yuav tau mis noj tsau npo, nej yuav tau ntxais nws lub mis nplij neeg nyob ntawm nws lub xub ntiag muaj hwj chim.
- 12 Vim HUAB TAIS hais li no: "Ntsia saib ! Kuv coj kev vam meej mus cuag Yes Lus Xas Les zoo li ib tug niam dej, kuv coj tsoom kuj cuab kev nplua nuj mus cuag Yes Lus Xas Les xws li ib tug dej phwj. Lawv ris Yes Lus Xas Les cov mos liab ntawm duav, lawv plhws cov mos liab saum hauv caug.
- 13 Kuv yuav nplij nej xws li ib tug niam nplij nws tus me nyuam. Nyob hauv Yes Lus Xas Les kuj yuav muaj tus nplij nej.
- 14c Nej pom muaj li ntawd, nej yuav zoo siab dhia hom khaj, nej cov pob txha yuav tawg paj xws li nroj. HUAB TAIS cov tub txib yuav paub HUAB TAIS txhais tes.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 65,1-3a.4-7a.16.20

Txais: Tas ntiaj teb, nej qw cav txog Tswv Ntuj.

1. Tas lub ntiaj teb, nej qw suab zoo siab cav txog TSWV NTUJ. Nej hu nkauj cav txog nws lub npe muaj koob meej ! Nej seev lus paj huam cav txog nws. Nej hais rau TSWV NTUJ hais tias, “Koj tej hauj lwm muaj hwj xyeej tas nrho ! **Teb**
2. Tas lub ntiaj teb txhos caug pe koj, ntiaj teb neeg hu nkauj cav txog koj lub npe.” Nej tuaj, nej yuav pom TSWV NTUJ cov hauj lwm. Nws cov hauj lwm muaj hwj xyeej nyob hauv As Das tsoom tub ki. **Teb**
3. Nws ua kom dej ntuj hloov ua av qhuav. Lawv hla dej, dej tsis ntub lawv taw. Peb nqaum paj nqaum nruas cav txog TSWV NTUJ. Nws lub hwj huam yuav kav txheej dhau txheej. **Teb**
4. Tas ib tsoom neeg hwm Ntuj, nej mloog mas ! Nej thiaj yuav paub qhov uas TSWV NTUJ ua rau kuv. Nws tsis xyeeb kuv cov lus thov. Nws tsis tshem nws txoj kev hlub mus deb kuv. **Teb**

ZAJ NYEEM OB: Nkas Las Tias 6,14-18

Cov lus nyob hauv Paj Lug tsab ntawv xa rau cov ntseeg nyob Nkas Las Tias

- 14 Kwv tij sawv daws, ntawm kuv, mas yog kuv xav tau ntsej muag, mas kuv kawg xav kom tau nyob hauv peb tus HUAB TAIS YES XUS PLEEV tus ntoo cuam xwb. Nws muab lub ntiaj teb neeg dai saum ntoo cuam rau kuv, thiab nws muab kuv dai saum ntoo cuam rau lub ntiaj teb neeg.
- 15 Ua lub cim txiav tsis muaj dab tsi zoo, hos tsis ua lub cim txiav kuj tsis muaj dab tsi txawv: qhov tseeb yog yuav tsum ua tus neeg tshiab.
- 16 Thov kom tas toom neeg taug txoj kev no, thiab TSWV NTUJ toom His Xas Lais, sawv daws tau nyob kaj siab lug, thiab tau Ntuj txoj kev hlub.
- 17 Txij no mus, txhob muaj neeg tsim kev ntxhov rau kuv ntxiv : kuv ris YES XUS cov caus pliav puv kuv lub cev.
- 18 Kwv tij sawv daws, peb tus HUAB TAIS YES XUS PLEEV lub txiaj ntsim nrog nej lub tswv yim nyob. Ua li.

Yog Tswv Ntuj Lo Lus

NKAUJ CAV TXOG LUB MOO ZOO: Kos Los Xais 3,15a.16a

As les lus yas. As les lus yas. Thov kom Leej Pleev txoj kev thaj yeeb tuaj kav nej lub siab : Thov kom Leej Pleev Lo Lus nyob txawm hauv nej ntau ntau. As les lus yas.

NTAWV MOO ZOO: Lus Kas 10,1-12.17-20

Nej Mloog Ib Zag Nyob Hauv Lus Kas Ntawv Moo Zoo

- 1 Dhau qhov ntawd lawm, HUAB TAIS tseem xaiv xya caum ob leeg, nws xa lawv mus tej pab ob leeg, ua nws ntej mus rau hauv cov nroog thiab tej qhov chaw uas nws yuav mus.
- 2 Nws hais rau lawv tias : "Qoob loo zoo sau muaj ntau kawg, tab sis cov tub zog muaj tsawg. Nej thov tus Tswv qoob kom nws xa ib co tub zog tuaj sau nws cov qoob.
- 3 Nej saib! Kuv xa nej zoo li ib co yaj mus nyob nruab nrab ib cov hma.
- 4 Nej tsis txhob nqa nas nyiaj, txhob ris hnab, txhob rau khau, txhob hais lus hawm leej twg ntawm kev.

- 5 Nej chaws mus hauv lub tsev twg, nej xub hais tias : "Lub tsev no nyob kaj lug !"
- 6 Yog muaj txoj kev kaj lug ib leeg tub nyob ntawd, mas nej txoj kev kaj lug yuav roos nws. Yog tsis muaj, mas nej txoj kev kaj lug yuav rov los rau nej.
- 7 Nej nyob hauv lub tsev ntawd, nej noj nej haus tej yam uas lawv muaj hauv tsev, vim tus tub zog tsim nyog txais nqi zog. Nej txhob tawm hauv ib lub tsev mus nyob dua lwm lub.
- 8 Nej mus hauv lub nroog twg, yog luag txais nej, nej noj tej yam uas luag muab rau nej.
- 9 Nej kho cov neeg mob hauv lub nroog ntawd kom zoo, thiab nej hais rau lawv tias: "TSWV NTUJ lub Ceeb Tsheej tuaj txog ze nej lawm."
- 10 Tab sis yog nej mus hauv lub nroog twg, luag tsis txais nej, nej tawm mus nraum tej tshav puam nej hais tias :
- 11 "Tab yog tej plua av uas lo peb ko taw hauv nej lub nroog no, peb muab so tseg rau nej huv si. Tab sis, nej yuav tsum paub tias TSWV NTUJ lub Ceeb Tsheej tuaj txog ze lawm."
- 12 Kuv hais rau nej, Hnub ntawd, lub nroog Xos Dos Mas yuav raug txim sib dua lub nroog ntawd
- 17 Pab xya caum ob leeg rov qab los txog, lawv zoo siab, lawv hais tias: "HUAB TAIS, tab yog cov dab phem, tsis kav lawv zwm rau peb, vim koj lub npe."
- 18 YES XUS hais rau lawv tias : "Kuv twb ntsia Xas Tas poob saum ntuj los zoo li ib kab xob laim !
- 19 Nej saib ! Kuv pub hwj huam rau nej kom nej ko taw tsuj tau nab, tsuj kab lij tshooj, tsuj Yeeb Ncuab lub hwj huam tib si, tsis muaj dab tsi ua xwv txheej tau rau nej.
- 20 Nej tsis txhob zoo siab vim dab zwm rau nej. Nej yuav zoo siab vim nej lub npe muab sau cia saum ntuj lawm."

Yog Huab Tais Yes Xus Lub Moo Zoo

HNUB CHIV 15 NRUAB XYOO A CHÚA NHẬT 15 THƯỜNG NIÊN NĂM A

ZAJ NYEEM IB: His Xais 55,10-11

Cov lus nyob hauv ntawv His Xais

- 10 Cov nag, cov daus uas poob saum ntuj los, yog lawv tsis tau pub dej rau ntiaj teb haus, mas lawv tsis rov mus saum ntuj. Cov nag thiab cov daus ua kom cov noob lwj thiab nthaw kaus, ua kom lub ntiaj teb txi txiv rau tus tseb, pub mov rau neeg noj, ces cov nag mam rov mus lawm saum ntuj.
- 11 Cov lus tawm ntawm kuv lub ncauj los kuj zoo li ntawd thiab. Nws tsis tau ua hauj lwm, mas nws tsis rov los cuag kuv. Kuv lo lus tsis tau leg qhov kuv xav, mas nws tsis rov los cuag kuv. Kuv lo lus tsis tau ua tiav qhov kuv xa nws mus ua, mas nws tsis rov los cuag kuv."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 64,10-14

Txais: Muaj ib co noob poob rau hauv thaj av zoo, cov yub nplej hlob, cov nplej txi txiv txog pua lub.

1. Koj tau tuaj xyuas lub ntiaj teb, koj ywg dej rau. Koj ua kom lub ntiaj teb nplua nuj tuaj. Dej puv TSWV NTUJ cov ciav dej nyob txheej ntuj saud. Koj npaj noob qoob noob loo rau ntiaj teb. **Teb**
2. Koj ua kom muaj dej ntws puv kwj liag. Koj laij av kom tiaj. Koj tso nag los ywg kom av phom. Koj foom hmoov zoo rau tej noob kom tuaj kaus. **Teb**
3. Koj pub txiaj ntsha txiaj ntsim thawm niaj thawm xyoo. Dej txhawv hauv teb chaws suab puam los ywg tej tshav zaub. **Teb**
4. Nplooj hlav ntsuab xiab hauv tej taw roob. Nplooj hlav ntxhee yees hauv tej vos hav. Tej tsiaj txhu nog zaub puv tshav. Tej qoob loo siav daj vog hauv nras liaj nras teb. Txhua yam qw suab zoo siab. Txhua tsav seev suab hu nkauj ntsuag qees. **Teb**

ZAJ NYEEM OB: Los Mas 8,18-23

Cov lus Paj Lug sau tuaj rau cov ntseeg nyob Los Mas

- 18 Kwv tij sawv daws, kuv pom tias txoj kev txom nyem uas peb ris lub caij no, yuav muab los piv tsis tau rau lub hwj chim uas yuav tawm tuaj rau luag pom xyeem nyob hauv peb.
- 19 Tas puas tsav yam uas Ntuj tsim los tos ntshis txog lub caij TSWV NTUJ cov me nyuam yuav tawm los rau sawv daws pom xyeem.

- 20 Tas puas tsav yam Ntuj tsim los puav leej zwm rau kev cuav : tsis yog vim lawv txhob txwm xav zwm rau kev cuav ; yog vim muaj ib tug coj lawv mus zwm rau kev cuav.
- 21 Tas puas tsav yam Ntuj tsim los, tso siab tias lawv kuj yuav dim ntawm txoj kev ua qhev thiab txoj kev ploj: lawv tso siab tias lawv yuav tau kev twj lij mus hauv TSWV NTUJ tsoom tub ki lub hwj chim.
- 22 Peb paub tias, los txog tav no, tas puas tsav yam ntuj tsim los ntsaj xws li ib tug poj niam daws cev.
- 23 Tsis yog tas puas tsav yam ntsaj xwb ; tab txawm peb twb tau txais LEEJ NTUJ PLIG cov txiaj ntsim los ua peb tug, tsis kav peb tseem ntsaj nyob hauv nruab siab thiab, vim peb tos lub caij txhiv peb lub cev.

Yog Tswv Ntuj Lo Lus

NKAUJ CAV TXOG LUB MOO ZOO:

As les lus yas. As les lus yas. Leej Plevv yog tus uas tuaj tseb TSWV NTUJ lo lus. Cov tuaj cuag nws yuav tau txoj sia tshiab. As les lus yas.

NTAWV MOO ZOO: Mas Tais 13,1-23

Nej Mloog Ib Zag Nyob Hauv Mas Tais Ntawv Moo Zoo

- 1 Muaj ib hnuv, YES XUS tawm hauv tsev mus zaum ntawm ntug dej ntuj.
- 2 Tej pab neeg coob tuaj ntsauv nws, ces nws nce mus zaum hauv ib lub nkoj, hos tas tsoom neeg nyob ntawm ntug dej.
- 3 YES XUS ua paj lug qhia lawv txog ntau yam. YES XUS hais li no : "Tus tseb nplej tawm mus tseb.
- 4 Thaum nws tseb, muaj ib co noob poob ntawm ntug kev, noog ya tuaj noj tas huv si lawm.
- 5 Ib co noob poob rau hauv cov av pob zeb, nyob ntawd tsis muaj av ntau, ces noob tuaj kaus sai, vim av tsis tob.
- 6 Thaum hnuv tuaj, tshav ziab, cov yub nkig, vim tsis muaj cag ces cov yub qhuav tas.
- 7 Tseem muaj ib co noob poob hauv cov pos. Pos hlob tuaj laum cov yub.
- 8 Hos muaj ib co noob poob rau hauv thaj av zoo, cov noob ntawd txhawv hnab, tej lub noob txi ib puas lub, tej lub txi rau caum lub, tej lub txi peb caug lub.
- 9 Leej twg muaj pob ntseg, cia nws mloog."

- 10 Cov thwj tim txav los ze YES XUS, lawv hais rau nws tias : "Vim li cas koj ua paj lug hais rau lawv ?"
- 11 YES XUS teb rau lawv tias: "Vim Ntuj pub kom nej paub tej yam tob hauv Ntuj lub Ceeb Tsheej, tab sis Ntuj tsis tau pub rau cov ntawd.
- 12 Tus uas twb muaj lawm, mas Ntuj yuav pub rau nws kom nws muaj ntau tshaj. Hos ntawm tus tsis muaj, ces Ntuj tseem yuav thau qhov nws muaj tawm mus.
- 13 Vim li ntawd, kuv thiaj ua paj lug hais rau lawv : vim tias lawv ntsia, los lawv tsis pom, lawv mloog, los lawv tsis hnov, thiab tsis to taub.
- 14 Li ntawd, thiaj muaj raws li cov lus uas Yaj Saub His Xais xub hais tseg tias : Nej pob ntseg hnov, los nej yuav tsis to taub ; nej ntsia, tab sis nej yuav tsis pom.
- 15 Yog vim haiv neeg no lub siab qhwm lawm : lawv pos pob ntseg, lawv qi qhov muag, lawv ntshai tsam lawv qhov muag pom, tsam lawv pob ntseg hnov, ces lawv lub siab to taub tsam lawv yuav tsum hloov siab, thiab kuv yuav kho tau lawv zoo.
- 16 Hos nej, mas nej qhov muag tau txoj hmoov zoo, vim nej qhov muag pom kev. Nej pob ntseg tau txoj hmoov zoo, vim nej pob ntseg hnov lus.
- 17 Kuv hais tseeb rau nej, cov yaj saub thiab cov neeg siab ncav thaud coob leej ntshaw pom yam uas nej pom, tab sis lawv tsis tau pom, ntshaw hnov yam uas nej hnov, tab sis lawv tsis tau hnov !
- 18 Nej mloog zaj paj lug hais txog tus tseb nplej lub ntsiab.
- 19 Tus neeg uas tau hnov Lo Lus qhia txog Ntuj lub Ceeb Tsheej, nws tsis to taub, tus Phem tuaj txog, nws txeeb yam uas Ntuj tseb hauv tus ntawd lub siab : tus ntawd yog tus txais cov noob poob ntawm ntug kev.
- 20 Cov noob poob rau hauv cov av pob zeb, yog tus neeg uas thaum nws hnov Ntuj Lo Lus, nws zoo siab txais.
- 21 Tab sis nws tsis muaj cag nyob hauv nws, vim nws yog neeg tsis ruaj : thaum muaj kev txom nyem, los muaj kev raug luag hiam vim Lo Lus, ces nws ntog tam sis ntawd.
- 22 Cov noob uas poob rau hauv cov pos, yog tus uas hnov Lo Lus, tab sis ntiaj teb kev txob xeeb, nyiaj txiag tej kev ntxias laum Lo Lus, ces Lo Lus txi tsis taus txiv.

23 Cov noob uas poob rau hauv cov av zoo, yog tus uas hnov Lo Lus, nws to taub Lo Lus ntawd, ces nws txi txiv. Ib tug txi ib puas lub, ib tug txi rau caum lub, hos lwm tus txi peb caug lub.

Yog Huab Tais Yes Xus Lub Moo Zoo

ZAJ NYEEM LUV LUV: Mt 13,1-9

Nej Mloog Ib Zag Nyob Hauv Mas Tais Ntawv Moo Zoo

- 1 Muaj ib hnuv, YES XUS tawm hauv tsev mus zaum ntawm ntug dej ntuj.
- 2 Tej pab neeg coob tuaj ntsauv nws, ces nws nce mus zaum hauv ib lub nkoj, hos tas tsoom neeg nyob ntawm ntug dej.
- 3 YES XUS ua paj lug qhia lawv txog ntau yam. YES XUS hais li no : "Tus tseb nplej tawm mus tseb.
- 4 Thaum nws tseb, muaj ib co noob poob ntawm ntug kev, noog ya tuaj noj tas huv si lawm.
- 5 Ib co noob poob rau hauv cov av pob zeb, nyob ntawd tsis muaj av ntau, ces noob tuaj kaus sai, vim av tsis tob.
- 6 Thaum hnuv tuaj, tshav ziab, cov yub nkig, vim tsis muaj cag ces cov yub qhuav tas.
- 7 Tseem muaj ib co noob poob hauv cov pos. Pos hlob tuaj laum cov yub.
- 8 Hos muaj ib co noob poob rau hauv thaj av zoo, cov noob ntawd txhawv hnab, tej lub noob txi ib puas lub, tej lub txi rau caum lub, tej lub txi peb caug lub.
- 9 Leej twg muaj pob ntseg, cia nws mloog."

Yog Huab Tais Yes Xus Lub Moo Zoo

HNUB CHIV 15 NRUAB XYOO B CHÚA NHẬT 15 THƯỜNG NIÊN NĂM B

ZAJ NYEEM IB: As Mos 7,12-15

Cov lus nyob hauv ntawv As Mos

- 12 Leej choj As Mas Xias hais rau yaj saub As Mos tias : cia li khiav ntawm no koj tej lus mus, khiav mus lawm Yus Das teb. Koj thiaj yuav ua saub koob koj ncauj nyob nrad.
- 13 Tseg txhob ua saub nyob ntawm Npe Thes ntawm no. Yog vaj ntxwv lub chaw ntshiab, vaj ntxwv lub tsev txoos.
- 14 As Mos teb rau As Mas Xias tias : kuv cav tsis yog saub, tsis yog noob saub yug, kuv nrhiav noj cog ntoo.
- 15 Kuv tsuas saib tsiaj lawv tsiaj qab, tiam sis HUAB TAIS xaiv raug kuv, nws yog tus hais rau kuv : mus, koj mus ua saub rau kuv haiv His Xais Lais.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 84,9ab.10-14

Txais: HUAB TAIS, koj ua kom peb pom koj hlub peb mas ! Koj pub koj txoj kev cawm rau peb !

1. Kuv mloog saib TSWV NTUJ hais dab tsi. HUAB TAIS hais rau nws haiv neeg tias, “Nej nyob kaj lug !” HUAB TAIS txoj kev cawm los nyob ze cov neeg hwm nws. Nws lub koob meej nqes los nyob hauv peb lub teb chaws. **Teb**
2. Txoj kev cawm thiab kev tseeb los sib cuag. Kev thaj yeeb thiab kev haum pheej los sib koom. Txoj kev tseeb hlaw ib tug txoov kaus nyob hauv ntiaj teb, kev haum pheej nqes saum ntuj los. **Teb**
3. HUAB TAIS pub txiaj ntsim, peb cov av pub qoob loo. Kev haum pheej mus ua HUAB TAIS ntej, nws npaj txoj kev thaj yeeb rau peb taug. **Teb**

ZAJ NYEEM OB: Es Fes Xos 1,3-14

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 3 Kwv tij sawv daws, kuv cav lus zoo txog TSWV NTUJ, peb tus HUAB TAIS YES XUS PLEEV Leej Txiv, vim nws foom hmoov zoo rau peb, thiab pub txiaj ntsim yug peb tus ntsuj plig, nws tau pub txhij pub txhua, nyob saum cov txheej ntuj, hauv Leej Pleev.
- 4 Thaum tseem tsis tau tsim lub ntuj lub teb, TSWV NTUJ twb xaiv peb nyob hauv Leej Pleev, kom peb ntshiab huv, tsis lo txhaum rau ntawm nws xub ntiag, thiab kom peb tau los nyob hauv txoj kev nyiam.
- 5 Nws ib txwm xaiv peb ua nws cov tub ki tshiab, nyob hauv YES XUS PLEEV. Nws lub tswv yim pom zoo ua li ntawd,
- 6 kom peb cav txog nws lub hwj chim thiab nws lub txiaj ntsim, vim nws pub txiaj ntsim dawb rau peb nyob hauv tus Zoo Nyiam.
- 7 Nyob hauv Tus Zoo Nyiam, peb tau txais kev txhiv peb ntawm nws cov roj ntsha.
- 8 Peb tau kev daws peb cov txhaum ntawm lub txiaj ntsim nplua nuj uas Leej Txiv pub dawb rau peb. Leej Txiv lub tswv yim thoob tsib thiab ntse
- 9 qhia yam zais puag hauv nws lub siab xav rau peb paub, thiab qhia nws tus nru lus xav ua zoo uas nws ib txwm npaj rau peb paub.
- 10 Thaum txog lub caij teem, nws ua kom zaj nru lus zoo no tsheej xeeb : nws yuav coj txhua tsav txhua yam thiab coj txhua leej txhua tus nyob saum ntuj thiab nyob ntiaj teb rov los zwm rau Leej Pleev.
- 11 Ntuj xaiv peb thiab qee peb nyob hauv Leej Pleev, raws li TSWV NTUJ tus txheej txheem uas nws ib txwm tsa los coj txhua tsav txhua yam kom haum nws lub siab xav.
- 12 Ntuj qee peb los ua pab neeg xub tso siab rau Leej Pleev, thiab xub cav txog TSWV NTUJ lub koob meej.
- 13 Nyob hauv Leej Pleev, nej hnov Lo Lus tseeb, uas yog lub Moo Zoo cawm nej, ces nej ntseeg lub Moo Zoo. LEEJ NTUJ PLIG NTSHIAB uas Ntuj cog lus pub, thiaj muab ib lub thwj ntaus cim rau nej.
- 14 LEEJ NTUJ PLIG NTSHIAB yog thawj feem hauv lub cuab tam uas peb yuav txais. Nws npaj txoj kev txhiv txhua haiv neeg uas TSWV NTUJ muas los ua nws tug thiab los cav txog TSWV NTUJ lub koob meej.

Yog Tswv Ntuj Lo Lus

NKAUJ CAV TXOG LUB MOO ZOO: s. Es Fes Xos 1,17-18

As les lus yas. As les lus yas. Thov kom peb tus HUAB TAIS YES XUS Leej Txiv tso qhov pom kev tuaj kaj peb siab kom peb tso siab lug taug txoj kev uas Ntuj hu peb vim Ntuj muaj hwj huam loj. As les lus yas.

NTAWV MOO ZOO: Mas Kos 6,7-13

Nej Mloog Ib Zag Nyob Hauv Mas Kos Ntawv Moo Zoo

- 7 Nws hu Pab Kaum Ob los cuag nws, ces nws xa lawv ua tej pab ob leeg mus. Nws pub hwj huam ntiab dab tsis huv rau lawv.
- 8 YES XUS qhia lawv kom txhob nqa dab tsi taug kev li, tsuas nqa tib rab pas nrig xwb. Txhob ntim mov, txhob nqa hnab ruas, txhob ntim xim nyiaj rau hauv duav siv.
- 9 Nws hais tias : "Nej rau khau khiab xwb, txhob hnav ob lub tsho."
- 10 YES XUS tseem hais rau lawv tias : "Nej chaws mus hauv lub tsev twg, nej yuav nyob hauv lub tsev ntawd mus txog hnuv nej rov qab.
- 11 Yog qhov chaw twg tsis txais nej, thiab luag tsis mloog nej, nej tso qhov chaw ntawd tseg, nej nchos cov plua av lo nej qab xib taws pov tseg, cia ua tim khawv txiav txim rau lawv."
- 12 Cov thwj tim tawm mus, lawv tshaj kom tsoom sid tig los hloov siab tshiab.
- 13 Lawv ntiab ntau tus dab phem, thiab lawv muab roj pleev ntau leej tuag tes tuag taw, thiab kho ntau tus neeg mob zoo.

Yog Huab Tais Yes Xus Lub Moo Zoo

HNUB CHIV 15 NRUAB XYOO C CHÚA NHẬT 15 THƯỜNG NIÊN NĂM C

ZAJ NYEEM IB: Txoj Cai Ob 30,10-14 (30,9.11-14)

Cov lus nyob hauv ntawv Txoj Cai Ob

- 9 Mais Xes hais rau cov His Xas Lais tias: “Yog koj mloog koj tus Huab Tais Tswv Ntuj Lo Lus, koj koj nws tej txoj cai lij choj uas nyob hauv Ntawv ntim txoj Cai no, yog koj rov los cuag koj tus Tswv Ntuj tas siab tas ntsws.
- 11 Txoj cai uas hnub no kuv qhia koj, tsis yog ib txog cai nruj rau koj, uas koj yuav koj tsis taus.
- 12 Tsis yog ib txog cai nyob puag qaum ntuj, koj yuav hais tsis tau tias: "Leej twg yuav sawv peb chaw mus nrhiav txoj cai qaum ntuj los qhia peb, peb thiaj koj tau?"
- 13 Kuv txoj cai kuj tsis yog nyob puag ntug hiav txwv sab tim ub, koj yuav hais tsis tau tias: "Leej twg yuav sawv peb cev mus nrhiav txoj cai sab ntug hiav txwv puag tim ub los qhia peb, peb thiaj koj tau?"
- 14 Vim tias lo lus nyob ze koj. Lo lus xeeb txawm rau hauv koj lub ncauj, thiab hauv koj nruab siab. Koj yuav koj tau lo lus ntawd.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 68,14.17.30.31.36ab.37

Txais: Cov me neeg pom li ntawd, lawv zoo siab: Nej cov uas nrhiav Tswv Ntuj.

1. HUAB TAIS, kuv hu txoj koj, thov koj teb kuv vim koj yog tus cawm kuv. HUAB TAIS, thov koj teb kuv vim koj hlub thiab koj siab zoo. Koj tig los ntsia kuv, thov koj zam rau kuv. **Teb**
2. Kuv poob ntsej muag, kuv lub siab mob. TSWV NTUJ, thov koj pab thiab txuag kuv. Kuv yuav hu ib zag nkauj cav txog TSWV NTUJ lub npe. Kuv yuav ua nws tsaug thiab cav txog nws lub koob meej. **Teb**
3. Cov neeg me, nej tig ntsia, nej zoo siab hlo. Nej cov uas nrhiav TSWV NTUJ, nej rov ua siab loj mog ! HUAB TAIS hnov cov puag lo lus thov. Thaum nws cov neeg raug luag ntes, nws tsis tso lawv pov tseg. **Teb**
4. TSWV NTUJ yuav cawm Xis Yoos, nws yuav rov txhim cov tsheej hauv Yus Das teb. TSWV NTUJ cov tub txib tej xeeb ntxwv yuav txais

cov tsheej ntawd los ua lawv lub cuab tam. Cov neeg nyiam TSWV NTUJ lub npe yuav txhim vaj tse nyob hauv cov tsheej ntawd. **Teb**

ZAJ NYEEM OB: Kos Los Xais 1,15-20

Cov lus nyob hauv Paj Lug tsab ntawv xa rau cov ntseeg nyob Kos Los Xais

- 15 Kwv tij sawv daws, YES XUS yog tus TSWV NTUJ uas qhov muag pom tsis tau tus duab. Nws yog tus xub yug ntawm txhua tsav txhua yam uas Ntuj tsim los.
- 16 Nyob hauv Leej Pleev, Ntuj tsim txhua yam nyob saum ntuj thiab nyob ntiaj teb no, tsim txhua yam pom tau thiab pom tsis tau, tsim txhua tus Tub Xo zaum saum theej kiab, thiab txhua tus Tub Xo ua HUAB TAIS, ua Vaj Txheeb, thiab muaj hwj huam. Ntuj tsim tas puas tsav yam nyob hauv Leej Pleev, kom lawv tsob hwb Leej Pleev.
- 17 Leej Pleev xub nyob dua txhua tsav txhua yam. Tas puas tsav yam muaj txoj sia nyob hauv Leej Pleev.
- 18 Leej Pleev yog lub Taub Hau nyob saum lub Cev : lub Cev yog lub Koom Txoos. Leej Pleev yog lub Hauv Paus, nws yog tus xub yug hauv cov tub tuag los.
- 19 TSWV NTUJ muab txhua yam uas zoo tshaj, koj los nyob hauv Leej Pleev.
- 20 Nyob hauv Leej Pleev, TSWV NTUJ xyiv fab hlo rov nrog tas txhua tsav txhua yam sib haum xeeb. Vim Leej Pleev, mas txhua tsav txhua yam nyob ntiaj teb thiab nyob saum ntuj rov tau nyob thaj yeeb hauv Leej Pleev cov ntshav uas ntws saum ntoo cuam.

Yog Tswv Ntuj Lo Lus

NKAUJ CAV TXOG LUB MOO ZOO: s. Zam 6,63c.68c

As les lus yas. As les lus yas. HUAB TAIS, koj cov lus yog hwj huam, yog txoj sia thiab ntsuj plig. Koj muaj cov lus pub txoj sia rau lub ntiaj teb neeg. As les lus yas.

NTAWV MOO ZOO: Lus Kas 10,25-37

Nej Mloog Ib Zag Nyob Hauv Lus Kas Ntawv Moo Zoo

- 25 Lub sij hawm ntawd, ib tug Kws Lij Choj sawv, nws xav sim YES XUS ces nws nug tias : "Xib Hwb, kuv yuav ua dab tsi thiaj tau txais txoj sia nyob mus li los ua kuv lub cuab tam ?"
- 26 YES XUS hais rau nws tias : "Nyob hauv Txoj Cai muaj dab tsi sau tseg ? Koj nyeem dab tsi ?"
- 27 Tus Kws Lij Choj teb tias : "Koj yuav nyiam HUAB TAIS, koj tus TSWV NTUJ, tas koj siab ntsws, tas koj tus ntsuj plig, tas koj lub zog, tas koj lub tswv yim, thiab koj yuav nyiam tus nyob ze koj ib yam li koj nyiam koj."
- 28 YES XUS hais rau tus Kws Lij Choj tias : "Koj teb raug lawm. Koj ua li ntawd, koj yuav muaj txoj sia."
- 29 Tab sis tus Kws Lij Choj xav cav tias nws hais yog lawm, ces nws hais rau YES XUS tias : "Leej twg yog tus nyob ze kuv ?"
- 30 YES XUS thiaj hais ntxiv tias : "Muaj ib tug neeg nqes ntawm Yes Lus Xas Les mus rau nram Yes Lis Kos. Nws ntsib ib pab tub sab, lawv muab nws tej ris tsho hle, muab nws ntaus to tas, ces lawv mus lawv lawm, tso nws tseg, tshuav txoj sia xwb."
- 31 Muaj ib tug Leej Choj taug txoj kev ntawd nqes tuaj tom thawj, nws pom tus raug mob, nws lug kev hla mus."
- 32 Muaj ib tug Les Vis ho tuaj txog ntawd, nws pom tus raug mob, nws kuj lug kev hla mus."
- 33 Tab sis ib tug Xas Mas Lias mus tawm rooj tuaj txog ze tus raug mob, nws pom tus neeg raug mob, nws hlub."
- 34 Nws txav los ntawm tus raug mob, nws hliv roj thiab hliv cawv rau cov qhov txhab, nws muab qhwv. Nws tsaws tus raug mob caij nws tus luj, ces nws coj tus raug mob mus txog lub tsev txais qhua, nws tu tus raug mob ntawd."
- 35 Hnub tom qab, nws rho tau ob lub txiaj nyiag rau tus tswv tsev txais qhua, nws hais tias : "Koj tu tus neeg mob no, yog koj siv tshaj lawd, thaum kuv rov qab los, kuv yuav them rov rau koj."

- 36 Raws li koj xav, lawv peb leeg no, leej twg ua tus nyob ze tus neeg uas poob rau hauv tub sab txhais tes ?"
- 37 Tus Kws Lij Choj hais tias : "Yog tus uas tau khuv leej tus raug mob." Ces YES XUS hais rau nws tias : "Koj mus, koj ua zoo li ntawd thiab mog."

Yog Huab Tais Yes Xus Lub Moo Zoo

HNUB CHIV 16 NRUAB XYOO A CHÚA NHẬT 16 THƯỜNG NIÊN NĂM A

ZAJ NYEEM IB: Thoob Tsib 12,13,16-19

Cov lus nyob hauv ntawv Thoob Tsib

- 13 Dua ntawm koj, tsis muaj lwm tus TSWV NTUJ yuav txhawj xeeb sawv daws, kom koj qhia tau rau nws tias koj txiav txim tsis ncaj ncees.
- 16 Qhov tseem ceeb ntawm koj lub zog yog kev ncaj ncees, tswj tas txhua yam, koj thiaj txuag puas tsav yam.
- 17 Koj pub rau cov tsis lees koj lub hwj huam pom koj lub zog, hauv cov paub koj, koj nplua tus muab hlob.
- 18 Koj li, zog loj zog heev, koj maj mam txiav txim thiab tswj hwm saib taus neeg, tsuav thaum twg koj xav xwb koj hwj huam twb tshwm los,
- 19 Ua li koj ua, yog qhia rau koj haiv neeg tias tus neeg ncaj yuav ua tas tib neeg phooj ywg ; koj pub koj cov tub ki muaj chaw vam txawm muaj txhaum koj zam tau kom lawv hloov siab tshiab.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 85,5-6.9-10.15-16a

Txais: HUAB TAIS, koj lub siab zoo, koj zam rau peb.

1. HUAB TAIS, koj lub siab zoo, koj zam rau peb. Koj ua siab ntev hlub cov neeg hu txoj koj. Koj tig ntsej los mloog kuv lo lus thov, thov koj ua siab ntev mloog kuv lub suab taj. **Teb**
2. HUAB TAIS, tas ib tsoom haiv neeg koj tsim los tuaj hawm koj. Lawv yuav cav txog koj lub npe. TSWV NTUJ, koj tib leeg yog tus loj, koj tsim tau txhua yam zoo nkauj zoo saib. Koj tib leeg yog TSWV NTUJ. **Teb**
3. HUAB TAIS, koj yog tus TSWV NTUJ siab zoo thiab khuv leej neeg, yog tus tsis npau taws sai, yog tus hlub neeg thiab ua ncaj. Thov koj tig los ntsia kuv, thov koj khuv leej kuv. Koj pub koj lub zog rau koj tus tub txib. **Teb**

ZAJ NYEEM OB: Los Mas 8,26-27

Cov lus nyob hauv Paj Lug tsab ntawv xa rau cov ntseeg nyob Los Mas

- 26 Kwv tij sawv daws, LEEJ NTUJ PLIG tuaj nres peb cov neeg tsis muaj zog. Peb tsis paub thov dab tsi kom peb txoj kev teev Ntuj ntxim TSWV NTUJ siab. Tab sis LEEJ NTUJ PLIG sawv peb chaw thov Ntuj rau peb : nws hais cov lus uas neeg piav tsis tau.
- 27 Tus TSWV NTUJ uas tsum hauv neeg nruab siab, nws paub tias LEEJ NTUJ PLIG xav kom tau dab tsi : vim li no, LEEJ NTUJ PLIG sawv cov ntshiab chaw thov Ntuj raws nraim li TSWV NTUJ lub siab xav.

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 11,25

As les lus yas. As les lus yas. Txiv, kuv cav lus zoo txog koj, Huab Tais kav lub ntuj lub teb, vim koj qhib cov txuj zais tob Ntuj lub Ceeb Tsheej los rau cov me nyuam yaus. As les lus yas.

NTAWV MOO ZOO: Mas Tais 13,24-43

Nej Mloog Ib Zag Nyob Hauv Mas Tais Ntawv Moo Zoo

- 24 YES XUS tseem hais dua ib zag paj lug tias : "Ntuj lub Ceeb Tsheej zoo li ib tug neeg tseb ib co noob zoo rau hauv nws daim teb.
- 25 Thaum sawv daws tsaug zog tas, nws tus yeeb ncuab tuaj tseb ib co noob nroj rau hauv cov nplej tas ces nws rov qab mus.
- 26 Txij thaum nplej hlob txog nplej txhawv, nroj kuj tawm tuaj thiab.
- 27 Cov tub txib tuaj hais rau tus tswv qoob tias : "HUAB TAIS, koj tau tseb ib co noob qoob zoo rau hauv koj daim teb los tsis sub ? Vim li cas thiaj muaj nroj ?"
- 28 Tus tswv qoob teb rau lawv tias : "Yog ib tug yeeb ncuab ua qhov ntawd." Cov tub txib hais rau tus tswv tias : "Koj puas xav kom peb mus sau cov nroj pov tseg ?" Tus tswv teb tias :
- 29 Kuv tsis xav ! Tsam thaum nej sau nroj, nej rho tau nplej nrog thiab.
- 30 Nej cia nroj nrog nplej hlob ua ke mus txog lub caij sau nplej. Thaum txog caij sau qoob, kuv mam hais rau cov sau nplej tias : Nej xub sau nroj pav ua tej teg cia hlawv, hos nej sau cov nplej rau hauv kuv lub txhab."
- 31 YES XUS tseem hais ib zag paj lug li no : "Ntuj lub Ceeb Tsheej zoo li ib lub noob zaub roj uas ib tug neeg nqa mus tseb hauv nws daim teb.

- 32 Lub noob ntawd me tshaj txhua hom noob, tab sis thaum nws hlob, nws siab dua lwm cov zaub huv tib si. Nws loj luaj li ib tsoob ntoo. Ces tej noog ya saum ntuj los nkaum hauv nws cov ceg."
- 33 YES XUS tseem hais ib zag paj lug tias: "Ntuj lub Ceeb Tsheej zoo li ib co poov xab uas ib tug poj niam muab tso rau hauv peb kawg hmoov nplej mus txog thaum uas tas cov hmoov ntawd su tuaj.
- 34 YES XUS qhia ib puas tsav yam ntawd rau zeej tsoom, mas nws ua paj lug hais. Tsis muaj ib yam uas nws tsis ua paj lug hais.
- 35 Li ntawd, mas muaj raws li tus yaj saub cov lus tias : Kuv yuav qhib ncauj hais ib co paj lug. Tej yam zais txij thaum ntuj tsim teb raug los, kuv yuav muab tshaj tawm.
- 36 YES XUS tso tsoom sid tseg, nws rov los tsev. Cov thwj tim txav los hais rau nws tias : "Koj txhais zaj paj lug hais txog nroj tuaj hauv daim teb rau peb saib."
- 37 YES XUS teb rau lawv tias : "Tus tseb cov noob zoo, yog Neeg Leej Tub.
- 38 Daim teb, yog lub qab ntuj neeg. Cov noob zoo, yog cov tub hauv lub Ceeb Tsheej. Cov nroj, yog tus Phem cov tub.
- 39 Tus yeeb ncuab uas tseb cov noob nroj, yog Dab Phem. Lub caij sau nplej, yog lub zim txwv kawg. Cov tub sau nplej, yog cov Tub Xo.
- 40 Lawv yuav sau cov nroj los hlawv. Lub zim txwv kawg, yuav zoo ib yam li ntawd :
- 41 Neeg Leej Tub yuav xa nws cov Tub Xo, lawv yuav thau tej kev ntxias ua txhaum thiab cov neeg ua phem tas huv si tawm hauv nws lub Ceeb Tsheej.
- 42 Cov Tub Xo yuav muab lawv pov rau hauv lub qhov hluav taws. Nyob hauv, sawv daws yuav quaj tom hniav nkawv.
- 43 Ces cov neeg siab ncaj yuav ci ntsa iab zoo li lub hnuv nyob hauv lawv Txiv lub Ceeb Tsheej. Leej twg muaj pob ntseg, cia nws mloog.

Yog Huab Tais Yes Xus Lub Moo Zoo

ZAJ LUV LUV: Mt 13,24-30

Nej Mloog Ib Zag Nyob Hauv Mas Tais Ntawv Moo Zoo

- 24 YES XUS tseem hais dua ib zag paj lug tias : "Ntuj lub Ceeb Tsheej zoo li ib tug neeg tseb ib co noob zoo rau hauv nws daim teb.

- 25 Thaum sawv daws tsaug zog tas, nws tus yeeb ncuab tuaj tseb ib co noob nroj rau hauv cov nplej tas ces nws rov qab mus.
- 26 Txij thaum nplej hlob txog nplej txhawv, nroj kuj tawm tuaj thiab.
- 27 Cov tub txib tuaj hais rau tus tswv qoob tias : "HUAB TAIS, koj tau tseb ib co noob qoob zoo rau hauv koj daim teb los tsis sub ? Vim li cas thiaj muaj nroj ?"
- 28 Tus tswv qoob teb rau lawv tias : "Yog ib tug yeeb ncuab ua qhov ntawd." Cov tub txib hais rau tus tswv tias : "Koj puas xav kom peb mus sau cov nroj pov tseg ?" Tus tswv teb tias :
- 29 "Kuv tsis xav! Tsam thaum nej sau nroj, nej rho tau nplej nrog thiab.
- 30 Nej cia nroj nrog nplej hlob ua ke mus txog lub caij sau nplej. Thaum txog caij sau qoob, kuv mam hais rau cov sau nplej tias: Nej xub sau nroj pav ua tej teg cia hlawv, hos nej sau cov nplej rau hauv kuv lub txhab."

Yog Huab Tais Yes Xus Lub Moo Zoo

HNUB CHIV 16 NRUAB XYOO B CHÚA NHẬT 16 THƯỜNG NIÊN NĂM B

ZAJ NYEEM IB: Yes Les Mias 23,1-6

Cov lus nyob hauv ntawv Yes Les Mias

- 1 HUAB TAIS, cov lus ceeb toom hais li no. Cov tswv zov yaj ua kom pab yaj tuag, thiab lawv ua kom pab yaj tawg ua lwj ua liam nyob hauv kuv lub tshav zaub. Mas lawv txoj hmoov yuav phem.
- 2 Vim li ntawd, tsoom His Xas Lais tus HUAB TAIS TSWV NTUJ cem cov tswv zov nws haiv neeg nog zaub tias : "Nej tau ua kom kuv cov yaj tawg, nej caum lawv, nej tsis liam fab saib kuv cov yaj. Nyem no kuv yuav tuaj xyuas nej, vim nej cov hauj lwm lim hiam. Yog HUAB TAIS lo lus.
- 3 Kuv yuav mus sau kuv cov yaj uas tseem nyob txhua lub teb chaws, kuv caum lawv mus. Kuv yuav coj lawv rov los nyob ua ke hauv lawv tej tshav zaub, lawv yuav txi txiv, lawv yuav huam vam.
- 4 Kuv yuav ua kom ib co tswv zov yaj sawv los ua hau coj lawv mus nog zaub, lawv yuav tsis ntshai tsis txhawj ntxiv, lawv yuav tsis muaj ib tug ploj.
- 5 HUAB TAIS ceeb toom li no : "Nej ntsia saib ! Twb txog lub caij uas kuv yuav tsa ib tug kaus siab ncaj hauv Das Vis tsev neeg. Tus kaus ntawd yuav ua vaj nws yuav xyuam xim, nws yuav ua raws kev ncaj kev ncees nyob hauv lub teb chaws no.
- 6 Lub caij nws ua vaj mas Yus Das teb yuav txais txoj kev cawm, His Xas Lais yuav tau nyob nyab xeeb. Lub npe uas luag yuav tis rau nws yog : "HUAB TAIS, peb txoj kev ncaj."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 22,1-6

Txais: HUAB TAIS yog kuv tus tswv zov yaj, kuv tsis ntshaw dab tsi.

1. HUAB TAIS yog kuv tus tswv zov yaj, kuv tsis ntshaw dab tsi. Nws tso kuv nyob hauv tej tshav zaub mos. Nws coj kuv mus so nyob ze dej, nws rov ntxiv zog rau kuv tus plig. **Teb**

2. Nws coj kuv mus taug txoj kev ncaj kom nws lub npe nto koob meej. Tab yog kuv taug kev mus hauv lub kwj ha tsaus ntuj nti, kuv tsis ntshai vim koj nrog kuv, koj rab pas nrig yog kuv chaw tso siab. **Teb**
3. Cov neeg ntxub kuv, lawv hnyos kuv. Koj npaj ib roog qav rau ntawm kuv xub ntiag. Koj pleev roj tsw qab rau saum kuv taub hau. Koj hliv cawv puv lub ntim rau kuv haus. **Teb**
4. Tas kuv sim neej, kev kaj siab thiab kev hlub nrog nraim kuv. Tas kuv sim neej, kuv yuav nyob hauv HUAB TAIS tsev. **Teb**

ZAJ NYEEM OB: Es Fes Xos 2,13-18

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 13 Kwv tij sawv daws, hos nyem no, nej nyob hauv Leej Pleev. Thaud, nej nyob deb, nyem no, Leej Pleev cov roj ntsha coj nej los nyob ze lawm.
- 14 Leej Pleev yog peb txoj kev thaj yeeb. Nws muab ob haiv neeg los ua ib haiv rau hauv nws lub cev, nws rhuav lub laj kab cais ob haiv neeg, nws lub cev rhuav kev ntxub pov tseg.
- 15 Leej Pleev rhuav Txoj Cai, thiab cov lus qhia, nws muab ob hom neeg los tsim Tus Neeg Tshiab nyob hauv nws, kom tsa tau kev thaj yeeb.
- 16 Nws tus Ntoo Cuam sau ob hom neeg rov los nrog TSWV NTUJ sib haum xeeb, nyob hauv tib lub Cev xwb : nws lub Cev muab txoj kev ntxub rhuav pov tseg.
- 17 Nws tuaj tshaj txoj kev thaj yeeb : tshaj txoj kev thaj yeeb rau nej cov nyob deb, thiab tshaj txoj kev thaj yeeb rau lawv cov nyob ze.
- 18 Vim Leej Pleev, mas peb ob hom neeg no koom ib lub Tswv Yim, ces peb tau kev mus cuag Leej Txiv.

Yog Tswv Ntuj Lo Lus

NKAUJ CAV TXOG LUB MOO ZOO: Zam 10,27

As les lus yas. Huab Tais hais tias: “Kuv cov yaj mloog kuv lub suab. Kuv paub kuv cov yaj, lawv raws li nraim kuv mus.” As les lus yas.

NTAWV MOO ZOO: Mas Kos 6,30-34

Nej Mloog Ib Zag Nyob Hauv Mas Kos Ntawv Moo Zoo

- 30 Cov Hauv Paus Xa Lus los sib sau ncig YES XUS, lawv piav tas puas tsav yam uas lawv tau ua thiab tau qhia.
- 31 Ces YES XUS hais rau lawv tias : "Nej los rau ib qho chaw xu kev tsis muaj neeg, nej so me ntsis." Vim cov neeg tuaj thiab cov rov mus coob, ces cov Hauv Paus Xa Lus tsis xyeej noj mov.
- 32 Lawv thiaj caij nkoj mus rau ib qho chaw xu ke, tsis muaj neeg.
- 33 Tsoom sid pom cov Hauv Paus Xa Lus caij nkoj mus, coob leej twb mem tau lawm. Ces sawv daws khiav ko taw hauv cov nroog tuaj mus. Lawv xub mus txog chaw.
- 34 Thaum YES XUS nqes nkoj, nws pom ib pab neeg coob, nws hlub lawv, vim lawv zoo li cov yaj uas tsis muaj tswv zov. Ces YES XUS qhia lawv ntev loo.

Yog Huab Tais Yes Xus Lub Moo Zoo

HNUB CHIV 16 NRUAB XYOO C CHÚA NHẬT 16 THƯỜNG NIÊN NĂM C

ZAJ NYEEM IB: Havv Paus 18,1-10a

Cov lus nyob hauv ntawv Havv Paus

- 1 HUAB TAIS yeess tawm los rau Has Nplav Has pom nyob hauv tsoob qab ntoo qhib ntawm Maas Les, thaum nws tab tom zaum ntawm nws lub qhov rooj tsev ntaub, yog lub sij hawm uas sov tshaj thaum nruab hnuv nrig.
- 2 Nws tsa muag saib, nws pom peb tug txiv neej tuaj sawv ze ntawm nws. Nws pom dheev lawv, nws cia li sawv tsees ntawm nws lub qhov rooj tsev ntaub mus txais lawv, nws khoov hauv av pe lawv.
- 3 Nws hais tias : "HUAB TAIS, yog koj saib kuv muaj nqis no thov koj tsis txhob hla ntawm koj tus tub txib tsis nres xyuas kuv li.
- 4 Kuv mam li kom lawv nqa me ntsis dej los rau nej ntxuav ko taw, ces nej thiaj zoo so hauv tsoob qab ntoo no.
- 5 Thiab kuv yuav nrhiav ib qho mov rau nej noj kom nej lub siab muaj zog ces nej mam li mus ntxiv, vim twb yog li no, nej thiaj hla ntawm kuv puas yog ?" Ces lawv teb nws tias : "Ua li koj hais."
- 6 Has Nplav Has thiaj maj nrawm nroos mus hauv nws lub tsev ntaub mus cuag Xas Las thiab hais rau nws tias: "Koj tsuag tsuag mus luj peb taig hmoov nplej, cov hmoov nplej uas qab qab, koj muab do, muab puab ua ib co ncuav mov."
- 7 Has Nplav Has tso sas ntwis mus xyuas nws pab tsiaj, nws ntes kiag ib tug xyuas nyuj mos tab tom qab, nws muab cob kiag rau nws tus tub txib koj mus ua kom siav sai sai.
- 8 Ces Has Nplav Has nqa mis nyuj khov thiab mis nyuj haus thiab tus nyuj mos uas twb ua siav lawm koj los rau rau ntawm lawv xub ntiag. Nws sawv ntsug ze lawv nyob ntawm tsoob qab ntoo, cia lawv noj mov.
- 9 Lawv nug nws tias : "Koj poj niam Xas Las mus qhov twg lawm?" Has Nplav Has teb tias : "Nws nyob hauv tsev tsam phooj."
- 10a Ib tug thiaj hais tias : "Lwm xyoo tav lub zim txwv no, mas kuv yuav rov tuaj xyuas koj dua, thaum ntawd koj poj niam Xas Las yuav yug tau ib tug tub."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 14,2-5

Txais: HUAB TAIS leej twg yuav tau mus nyob hauv koj lub tsev tsam phooj?

1. Tus neeg koj tus yeeb yam tsis muaj chaw xyeej, yog tus ua ncaj rau luag, tus xav qhov tseeb tuaj nruab siab, nws tsis cia nws tus nplaig hais lus dag. **Teb**
2. Tus tsis ua phem rau luag, tus tsis ua tub qaug cov neeg nyob ze nws, tus ntsub qhov phem thiab hwm cov neeg hwm Ntuj. **Teb**
3. Tus qiv nyiaj txiag rau luag, nws tsis tsub paj. Nws tsis txais luag nqi xiab kom muab txim rau tus tsis txhaum. Tus twg ua li no, nws yuav nyob ruaj nreb. **Teb**

ZAJ NYEEM OB: Kos Los Xais 1,24-28

Cov lus nyob hauv Paj Lug tsab ntawv xa rau cov ntseeg nyob Kos Los Xais

- 24 Kuv tij sawv daws, nyem no, kuv ntsib kev kaj siab nyob hauv txoj kev txom nyem. Kuv zoo siab ris kev txom nyem kom pab tau nej. Kuv yeem txais kev txom nyem nyob hauv kuv lub cev, vim kuv xav kom kuv txoj kev txom nyem ntxiv rau Leej Pleev txoj kev txom nyem pab lub Koom Txoos, uas yog Leej Pleev lub Cev.
- 25 Kuv tsob hwb lub Koom Txoos, vim TSWV NTUJ pub txoj hauj lwm ntawd rau kuv ua : kuv yuav ua kom TSWV NTUJ lo lus tawm los rau sawv daws pom xyeeem nyob tim nej.
- 26 TSWV NTUJ Lo Lus, yog ib yam txuj ci tob tob zais tau ntau txhiab tiam los lawm. Nyem no, nws Lo Lus nyuam qhuav tawm los rau nws cov ntshiab pom xyeeem.
- 27 TSWV NTUJ zoo siab ua kom tsoom ntshiab pom tias, Ntuj Lo Lus muaj hwj chim nyob nruab nrab hauv cov neeg teev pej kum dab, yog Leej Pleev nyob hauv nruab nrab nej ; yog txoj kev tso siab tias, yuav tau txais hwj chim.
- 28 Leej Pleev yog tus peb tshaj nws rau nej. Peb ntuas, peb qhia txhua leej txhua tus, raws li txoj kev thoob tsib. Peb xav ua kom neeg zoo tiav nyob hauv Leej Pleev.

Yog Tswv Ntuj Lo Lus

NKAUJ CAV TXOG LUB MOO ZOO: s. Lk 8,15

As les lus yas. As les lus yas. Cov tau txoj hmoov zoo yog cov tau hnov TSWV NTUJ lo lus. Lawv khaws lo lus rau nruab siab. Lawv txi txiv vim lawv lub siab ruaj nreb nyob hauv TSWV NTUJ. As les lus yas.

NTAWV MOO ZOO: Lus Kas 10,38-42

Nej Mloog Ib Zag Nyob Hauv Lus Kas Ntawv Moo Zoo

- 38 Thaum YES XUS lawv taug kev, lawv mus txog hauv ib lub zos. Ib tug poj niam hu ua Mas Tas txais YES XUS los hauv nws tsev.
- 39 Tus poj niam ntawd muaj ib tug niam hluas hu ua Mab Liab. Mab Liab zaum ntawm HUAB TAIS ko taw, nws mloog HUAB TAIS hais lus.
- 40 Hos Mas Tas rau siab ntso lis ntau yam qav num. Ces Mas Tas los hais rau YES XUS tias : "HUAB TAIS, koj tsis quav ntsej tias kuv tus niam hluas cia kuv tib leeg lis qav lis num xwb lod? Koj hais kom nws pab kuv thiab mas !"
- 41 Tab sis HUAB TAIS teb rau Mas Tas tias : "Mas Tas, Mas Tas, koj txhawj thiab ua siab fab lis ntau yam,
- 42 tab sis yuav tsum muaj tsawg, tsuas yuav tib yam xwb. Mab Liab xaiv tau qhov zoo tshaj, yuav tsis txhob muab tshem ntawm nws."

Yog Huab Tais Yes Xus Lub Moo Zoo

HNUB CHIV 17 NRUAB XYOO A CHÚA NHẬT 17 THƯỜNG NIÊN NĂM A

ZAJ NYEEM IB: 1Vaj 3,5.7-12

Cov lus nyob hauv ntawv Vaj phau ib

- 5 Nyob Nkas Npas Oos, hmo ntuj Xas Los Moos ua npau suav pom HUAB TAIS tawm tuaj rau nws pom xyeem thiab hais tias : "Koj thov qhov koj xav kom kuv muab rau koj."
- 7 HUAB TAIS, nyem no koj tau tsa koj tus tub txib ua vaj hloov nws txiv Das Vis chaw. Kuv yog ib tug me nyuam tub hluas xwb, kuv tsis txawj ntaus thawj.
- 8 Koj tus tub txib nyob nruab nrab haiv neeg uas koj tau xaiv, yog ib haiv neeg coob tas nrho suav tsis txheeb tshuaj tsis txhua.
- 9 Thov koj pub ib lub siab thoob tsib txawj xav tom ntej tom qab zoo rau koj tus tub txib kom nws txawj pom tias qhov twg yog zoo, qhov twg yog phem. Vim tias leej twg thiaj yuav txawj koj koj haiv neeg coob tas npaud ?"
- 10 Xas Los Moos thov li ntawd mas xis HUAB TAIS siab.
- 11 HUAB TAIS hais rau Xas Los Moos tias : "Koj tau thov li ntawd, koj tsis thov kom koj tau ua neej laus nkoos, tsis tau thov kom muaj nyiaj muaj kub, tsis thov kom tau rhuav koj cov yeeb ncuab txoj sia. Koj tau thov ib lub tswv yim thoob tsib txawj xav tom ntej tom qab zoo.
- 12 Li ntawd, mas kuv yuav ua raws li koj thov. Kuv pub ib lub siab ntse thiab thoob tsib rau koj. Yav tas los lawm tsis tau muaj leej twg muaj ib lub siab zoo li ntawd, thiab yav tom ntej kuj tsis muaj leej twg yuav tau lub siab zoo npaum no.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 118,57,72.76.77.127-130

Txais: HUAB TAIS, kuv nyiam koj txoj cai tas nrho.

1. HUAB TAIS, kuv hais tias, "Kuv txoj hauj lwj yog ua raws li koj cov lus." Txoj cai tawm hauv koj lub ncauj los muaj nqis dua ib txhab nyiaj ib txhab kub. **Teb**

2. Thov koj txoj kev hlub nplij kuv raws li koj tau cog lus rau koj tus tub txib. Thov koj lo lus nqes los nyob hauv kuv ces kuv yuav muaj txoj sia vim kuv lub siab xib rau koj txoj cai. **Teb**
3. Kuv nyiam koj cov lus qhia dua tas txhua yam, kuv nyiam koj txoj cai dua ib co tseem kub zoo nkauj. Li ntawd, kuv thiaj taug koj txoj kev ncaj ncees, kuv ntxub txhua txoj kev dag. **Teb**
4. Koj tej kev tswj zoo tas nrho. Vim li ntawd, kuv thiaj mloog koj txoj cai. Thaum kuv nrhiav tau koj cov lus, kuv pom kev tuaj ! Koj cov lus ua kom cov neeg me txawj xav tom ntej tom qab. **Teb**

ZAJ NYEEM OB: Los Mas 8,28-30

Cov lus nyob hauv Paj Lug tsab ntawv xa rau cov ntseeg nyob Los Mas

- 28 Kwv tij sawv daws, peb paub tias TSWV NTUJ nres cov neeg nyiam nws, nws nrog cov uas mloog nws lub suab hu ua hauj lwm, kom lawv tau qhov zoo, raws li tus nru lus uas nws npaj.
- 29 Cov neeg uas TSWV NTUJ xub hu, nws faib txoj hmoov rau lawv kom nws Leej Tub tus duab tshwm los nyob hauv lawv. Leej Tub thiaj ua tij coj ib tsoom kwv coob coob.
- 30 Cov uas TSWV NTUJ hu lawv, mas nws faib txoj hmoov rau lawv. Cov uas TSWV NTUJ hu lawv, mas nws ua kom lawv ncaj tuaj. Cov uas TSWV NTUJ ua kom lawv ncaj tuaj, mas nws kuj ua kom lawv muaj hwj chim.

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 11,25

As les lus yas. As les lus yas. Txiv, kuv cav lus zoo txog koj, Huab Tais kav lub ntuj lub teb, vim koj qhib cov txuj zais tob Ntuj lub Ceeb Tsheej los rau cov me nyuam yaus. As les lus yas.

NTAWV MOO ZOO: Mas Tais 13,44-52

Nej Mloog Ib Zag Nyob Hauv Mas Tais Ntawv Moo Zoo

- 44 Yes Xus tseem hais cov zag paj lug tias: “Ntuj lub Ceeb Tsheej zoo li ib hub nyiaj faus rau hauv ib daim teb. Muaj ib tug neeg mus nrhiav tau. Nws rov muab zais, nws zoo siab, nws muag nws lub cuab tam, ces nws mus muas daim teb ntawd.
- 45 Ntuj lub Ceeb Tsheej tseem zoo li ib tug tub luam nrhiav cov hlaws npliag deg zoo nkauj.
- 46 Thaum nws nrhiav tau ib lub hlaws nphiag deg muaj nqi loj, nws mus muag nws lub cuab tam tas huv si, ces nws mus muas lub hlaws npliag deg ntawd.
- 47 Ntuj lub Ceeb Tsheej tseem zoo li ib lub vas uas luag pov rau hauv dej ntuj. Lub vas puav tau ntau tsav ntau hom ntses.
- 48 Thaum lub vas puv lawd, cov tub puav ntses rub lub vas los tim ntug nqhuab, lawv zaum, lawv mam li xaiv cov zoo rau hauv tawb, hos muab cov tsis zoo pov tseg.
- 49 Thaum lub zim txwv kawg, kuj yuav zoo ib yam li ntawd thiab : cov Tub Xo tuaj txog, lawv yuav cais cov neeg phem ntawm cov neeg ncaj.
- 50 Lawv yuav muab cov neeg phem pov tseg rau hauv lub qhov hluav taws: nyob hauv, sawv daws yuav quaj tom hniav nkawv.”
- 51 Nej puas to taub tas ib puas tsav yam ntawd ?" Lawv teb rau YES XUS tias : "Peb to taub."
- 52 YES XUS hais rau lawv tias : “Ua li mas, thaum ib tug Kws Ntawv Ntshiab los ua thwj tim hauv Ntuj lub Ceeb Tsheej, nws zoo li ib tug tswv tsev uas rho tau tej yam qub thiab tej yam tshiab hauv nws lub cuab tam los.”

Yog Huab Tais Yes Xus Lub Moo Zoo

HNUB CHIV 17 NRUAB XYOO B CHÚA NHẬT 17 THƯỜNG NIÊN NĂM B

ZAJ NYEEM IB: 2Vaj 4,42-44

Cov lus nyob hauv ntawv Vaj phau ob

- 42 Muaj ib tug neeg tuaj ntawm Npas Sas Lis Sas tuaj. Nws nqa ib co mov nplej tshiab tuaj rau tus Yaj Saub Es Lis Xais, yam li nws nqa nees nkaum lub ncuav mov thiab tej tes nplej. Es Lis Xais hais rau nws tus tub txib tias : "Koj muab cov mov no pub rau cov neeg nyob ntawm no noj."
- 43 Tab sis tus tub txib teb tias : "Kuv yuav ua zoo li cas faib cov mov no rau ib puas leej neeg noj ?" Es Lis Xais hais tias : "Koj cev rau tsoom neeg ntawd noj mas ! Vim HUAB TAIS tau hais tias sawv daws yuav noj thiab tseem yuav tshuav ib co mov seem."
- 44 Tus tub txib cev rau sawv daws noj tsau tas tseem tshuav ib co mov seem, raws li HUAB TAIS hais.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 144,10-11.15-18

Txais: Huab Tais qhib koj txhais tes, koj pub kom txhua tus muaj sia tau noj tsau.

1. HUAB TAIS, koj cov hauj lwm yuav cav txoj koj. Cov ntseeg txog koj yuav cav lus zoo txoj koj. Lawv yuav cav txog koj lub Ceeb Tsheej nto koob meej. Lawv yuav tshaj txoj koj cov hauj lwm muaj hwj xyeej. **Teb**
2. Sawv daws ntsia ntsoov koj, txhua tus vam txog koj. Koj pub txhiam laj txhem xws rau lawv raws caij raws nyoog. Koj nthuav koj txhais tes, koj pub kom txhua tus muaj txoj sia tau noj tsau npo. **Teb**
3. HUAB TAIS ua yam twg, nws ua ncaj. Nws lim xeeb ua txhua txoj hauj lwm raws txoj kev ntshiab. HUAB TAIS nyob ze cov neeg tuav txog nws lub npe, Nws nyob ze cov neeg uas muab tas nrho lawv lub siab lub ntsws hu txog nws. **Teb**
4. Tas kuv sim neej, kev kaj siab thiab kev hlub nrog nraim kuv. Tas kuv sim neej, kuv yuav nyob hauv HUAB TAIS tsev. **Teb**

ZAJ NYEEM OB: Es Fes Xos 4,1-6

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 1 Kwv tij sawv daws, kuv yog tus raug txim hauv HUAB TAIS, kuv thov nej, kom nej coj ib lub neej phim txoj kev uas Ntuj hu nej los taug.
- 2 Nej yuav ua neeg tsis muab hlob ; nej yuav ua neeg siab mos siab zoo. Nej yuav ua siab ntev. Nej yuav ua siab ntev ib leeg txhawb ib leeg nyob hauv txoj kev nyiam.
- 3 Nej yuav siv zog txuag kev thaj yeeb kom sawv daws koom ua ib pab, nyob hauv ib lub tswv yim.
- 4 Tsuas muaj tib lub cev thiab tib lub tswv yim xwb, vim Ntuj hu nej los taug tib txoj kev tso siab.
- 5 Tsuas muaj tib tug HUAB TAIS, tib txoj kev ntseeg, tib lub cim ntxuav.
- 6 Tsuas muaj tib tug TSWV NTUJ ua sawv daws Txiv. Nws nyob siab dua sawv daws, nws sau sawv daws, nws nyob hauv sawv daws.

Yog Tswv Ntuj Lo Lus

NKAUJ CAV TXOG LUB MOO ZOO: Lk 7,16

As les lus yas. As les lus yas. Ib tug Yaj Saub loj sawv nyob nruab nrab hauv peb sawv daws. TSWV NTUJ tuaj xyuas nws haiv neeg. As les lus yas.

NTAWV MOO ZOO: Zam 6,1-15

Nej Mloog Ib Zag Nyob Hauv Zam Ntawv Moo Zoo

- 1 YES XUS mus rau sab dej ntuj Nkas Lis Lais tim ub, uas tseem hu ua Dej Ntuj Tis Npes Lias.
- 2 Ib pab neeg coob raws nws mus, vim lawv tau pom cov cim nws ua kho neeg mob.
- 3 YES XUS nce saum lub roob, nws nrog nws cov thwj tim zaum nyob saud.
- 4 Yuav txog lub Ntees Hla uas yog cov Yus Das lub ntees nqaum paj nqaum nruas.
- 5 YES XUS tsa muag ntsia pom ib pab neeg coob tuaj cuag nws, nws hais rau Fis Lis Pos tias : "Peb yuav ua li cas muas ncuav mov txaus cov neeg ntawd noj ?"
- 6 YES XUS hais li ntawd sim Fis Lis Pos, tab sis YES XUS yeej paub tias nws yuav ua dab tsi.

- 7 Fis Lis Pos teb rau YES XUS tias : "Muab ob puas lub txiaj nyiag muas mov los tseem yuav tsis txaus kom ib leeg tau ib qho me me."
- 8 YES XUS ib tug thwj tim hu ua As Nres, yog Xis Moos Pob Zeb tus kwv, hais rau YES XUS tias :
- 9 "Ib tug me tub nyob ntawm no muaj tsib lub ncuav mov qib thiab ob tug ntses me me, tab sis qhov ntawd yuav ua cas txaus rau npaum no leej neeg noj ?"
- 10 YES XUS hais tias : "Nej kom cov neeg zaum." Nyob ntawm qhov chaw ntawd muaj nroj ntau. Ces cov neeg zaum, kwv yees muaj tsib txhiab leej neeg.
- 11 YES XUS tuav cov ncuav mov, nws ua ntuj tsaug tas, nws muab faib rau cov neeg uas zaum ntawd. Nws kuj ua ib yam li ntawd rau cov ntses me me kom txaus lawv noj thiab.
- 12 Thaum lawv noj tsau tas, YES XUS hais rau nws cov thwj tim tias: "Nej khaws cov sab mov seem kom txhob sem ib qho li."
- 13 Thaum lawv noj tsau tas, lawv thiaj khaws cov mov seem uas ntsu ntawm tsib lub ncuav mov qib los, lawv ntim puv kaum ob tawb.
- 14 Tsoom sid pom lub cim YES XUS ua, ces lawv hais tias : "Tus no yog tus Yaj Saub uas yuav tuaj nyob hauv lub qab ntuj neeg tiag."
- 15 YES XUS to taub hais tias lawv yuav tuaj ntes nws mus tsa ua vaj, ces nws mus nws tib leeg twj ywm rau pem roob.

Yog Huab Tais Yes Xus Lub Moo Zoo

HNUB CHIV 17 NRUAB XYOO C CHÚA NHẬT 17 THƯỜNG NIÊN NĂM C

ZAJ NYEEM IB: Hauv Paus 18,20-32

Cov lus nyob hauv ntawv Hauv Paus

- 20 Ces HUAB TAIS hais tias : "Muaj ib lub suab cem Xos Dos Mas thiab Nkos Mos Las nrov kawg tuaj txog kuv vim lawv niaj hnuab ua txhaum loj.
- 21 Yog li kuv yuav nqes mus xyuas saib lawv puas tau ua phem npaum li lub suab nrov tuaj los tsis tau, ces kuv thiaj paub."
- 22 Ob tug txiv neej sawv kev mus rau Xos Dos Mas lawm. Tshuav HUAB TAIS tseem nrog Has Nplav Has nyob.
- 23 Has Nplav Has txav zog los ze, nws nug tias : "Koj puas yuav txo cov neeg ncaj nrog cov neeg txhaum ?
- 24 Tej zaum yuav muaj li tsib caug leej neeg ncaj nyob hauv lub nroog, koj puas yuav muab lawv rhuav, tsis zam rau lub nroog tab yog muaj lawv nyob hauv ?
- 25 Thov kom zaj tswv yim uas rhuav tus siab ncaj nrog tus txhaum ntawd nyob deb koj. Koj txhob cia tus siab ncaj nrog tus neeg txhaum tuag. Thov kom lub tswv yim ntawd nyob deb koj. Tus txiav txim rau lub ntiav teb, nws yuav tsis txiav txim ncaj lod ?"
- 26 HUAB TAIS teb tias: "Yog kuv nrhiav tau tsib caug leej neeg ncaj nyob hauv lub nroog Xos Dos Mas, kuv yuav zam rau lub nroog tas huv si vim lawv."
- 27 Has Nplav Has rov hais tias : "Kuv yog plua av xwb, tsis kav kuv tseem muaj cuab kav nrog kuv tus HUAB TAIS hais.
- 28 Vim tias, tej zaum tsis muaj txog tsib caug leej neeg ncaj, yog tsawg tsib leeg, koj puas yuav rhuav lub nroog tas huv si vim tsawg tsib leeg ntawd ?" HUAB TAIS teb tias : "Kuv yuav tsis rhuav, yog tias kuv nrhiav tau plaub caug tsib leeg ncaj."
- 29 Has Nplav Has rov hais dua tias: "Tej zaum muaj plaub caug leej?" HUAB TAIS teb tias: "Kuv yuav tsis rhuav, vim plaub caug leej ntawd."
- 30 Has Nplav Has hais tias : "Thov kom kuv tus HUAB TAIS txhob npau taws thiab cia kuv hais lus. Tej zaum muaj peb caug leej xwb?" HUAB TAIS teb tias : "Kuv yuav tsis rhuav, yog kuv nrhiav tau peb caug leej."
- 31 Has Nplav Has hais tias : "Kuv ua neeg muaj cuab kav tas zog, kuv thiaj nrog kuv tus HUAB TAIS hais ntxiv : Tej zaum nrhiav tau nees

nkaum leej xwb ?" HUAB TAIS teb tias : "Kuv yuav tsis rhuav, vim nees nkaum leej ntawd."

- 32 Has Nplaw Has hais tias: "Thov kom kuv tus HUAB TAIS tsis txhob npau taws, kuv tseem yuav hais ib zaug ntxiv yog zaum kawg : Tej zaum yuav nrhiav tau kaum leej xwb ?" HUAB TAIS teb tias : "Kuv yuav tsis rhuav, vim kaum leej ntawd."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 137,1-3.6-8

Txais: HUAB TAIS, thaum kuv hu txoj koj, koj teb kuv.

1. HUAB TAIS, kuv muab tas kuv siab ntsws los ua koj tsaug vim koj hnov cov lus tawm ntawm kuv lub ncauj los. Kuv hu nkauj cav txog koj nyob ntawm ib tsoom tshiab xub ntiag. Kuv yuav hawm koj nyob hauv koj lub tuam tsev ntshiab. **Teb**
2. Kuv ua tsaug rau koj lub npe vim koj hlub thiab pheej xeeb. Kuv hu txoj koj, koj teb kuv, koj txhab zog rau kuv. **Teb**
3. HUAB TAIS nyob siab, nws txheem tus neeg me, Nws nyob deb zeem tau tus muab hlob. Txawm kuv nyob nruab nrab hauv txoj kev ntxhov, koj nres kuv txoj sia, koj tsa tes rau kuv cov yeeb ncuab. **Teb**
4. HUAB TAIS txhais tes xis cawm kuv. Koj yuav ua tas puas tsav yam rau kuv. Koj lub siab hlub nyob mus ib txhiab ib txhis. Koj txhob tso cov hauj lwm koj txhais tes tsim pov tseg. **Teb**

ZAJ NYEEM OB: Kos Los Xais 2,12-14

Cov lus nyob hauv Paj Lug tsab ntawv xa rau cov ntseeg nyob Kos Los Xais

- 12 Kwv tij sawv daws, hnub nej txais lub Cim Ntxuav, nej nrog Leej Plev nqes hauv nws lub ntxa, thiab nrog nws sawv rov qab los, vim nej ntseeg txog TSWV NTUJ lub zog tsa Leej Plev sawv hauv cov tub tuag rov los.
- 13 Nej tuag, vim nej cov txhaum, thiab vim nej lub cev tsis txais lub cim txiav ; tab sis TSWV NTUJ zam txhaum rau peb tas huv tib si, ces nws ua kom nej nrog Leej Plev rov muaj txoj sia.

- 14 Raws li Txoj Cai thiab cov lus qhia, mas peb muaj txim ; tab sis Leej Pleev muab so pov tseg, nws muab rhuav, nws muab ntsia rau saum ntoo cuam.

Yog Tswv Ntuj Lo Lus

NKAUJ CAV TXOG LUB MOO ZOO: s. Los Mas 8,15bc

As les lus yas. As les lus yas. Nej tau txais lub Tswv Yim los ua ib co tub ki tshiab mas nej hu HUAB TAIS TSWV NTUJ ua “As Npas, peb Txiv !” As les lus yas.

NTAWV MOO ZOO: Lus Kas 11,1-13

Nej Mloog Ib Zag Nyob Hauv Lus Kas Ntawv Moo Zoo

- 1 Muaj ib zaug, YES XUS teev Ntuj nyob ib qho chaw. Thaum nws teev Ntuj tas lawd, nws ib tug thwj tim hais rau nws tias : "HUAB TAIS, koj qhia peb teev Ntuj xws li Zam qhia nws cov thwj tim saib."
- 2 YES XUS hais rau lawv tias : "Thaum nej teev Ntuj, nej hais li no: Txiv, kom koj lub Npe ntshiab,
- 3 kom koj lub Ceeb Tsheej los txog ! Thov koj niaj hnuv pub mov rau peb noj txwm hnuv.
- 4 Thov koj zam txhaum rau peb vim peb zam rau cov tshuav nqi ntawm peb. Koj txhob cia peb poob rau hauv txoj kev ntxias.
- 5 YES XUS hais rau lawv tias : "Yog nej muaj ib tug phooj ywg tuaj cuag nej thaum ib tag hmo, thiab nws hais rau nej tias : 'Phooj ywg, koj txais peb lub ncuav mov rau kuv,
- 6 vim kuv ib tug npawg mus tawm rooj los so hauv kuv tsev, kuv tsis muaj dab tsi rau nws noj.'
- 7 Hos tus nyob hauv tsev teb tias : 'Txhob txob kuv, lub qhov rooj twb xauv lawm, kuv cov me nyuam peb pw tas lawm, kuv sawv tsis tau los muab dab tsi rau koj li.'
- 8 Kuv hais rau nej tias, tab yog nws tsis sawv los muab vim tus ntawd yog nws phooj ywg, tsis kav nws yeej yuav sawv los muab rau tus ntawd raws li nws thov, vim nws tajj tsis tseg."
- 9 "Li ntawd, kuv hais rau nej : Nej thov, Ntuj yuav pub rau nej. Nej nrhiav, ces nej yuav ntsib. Nej khob qhov rooj, Ntuj yuav qhib rau nej.

- 10 Vim tias leej twg thov, nws yuav tau txais, leej twg nrhiav, nws yuav ntsib, hos leej twg khob qhov rooj, luag yuav qhib rau nws.
- 11 Nyob hauv nej, leej txiv twg, yog nws tus tub taij ib tug ntses, nws tsis muab ntses, nws puas muab ib tug nab rau ?
- 12 Los leej txiv twg, yog nws tus tub taij ib lub qe, nws yuav muab ib tug kab lij tshooj rau ?
- 13 Txawm tias nej yog neeg phem, tsis kav, nej tseem txawj pub tej yam zoo rau nej cov me nyuam. Ua li mas Leej Txiv nyob saum ntuj haj yam txawj pub LEEJ NTUJ PLIG NTSIAB rau cov uas thov nws !"

Yog Huab Tais Yes Xus Lub Moo Zoo

HNUB CHIV 18 NRUAB XYOO A CHÚA NHẬT 18 THƯỜNG NIÊN NĂM A

ZAJ NYEEM IB: His Xais 55,1-3

Cov lus nyob hauv ntawv His Xais

- 1 Nej sawv daws uas nej nqhis dej, nej tuaj cuag lub qhov dej. Nej cov uas tsis muaj nyiaj txiag, nej tuaj mas ! Nej muas nplej los ua ncuav mov ! Nej noj, tsis tas yuav them nyiaj. Nej muas cawv txiv ntoo muas mis nyuj, tsis tas yuav them dab tsi.
- 2 Ua cas nej yuav siv nyiaj los muas tej yam tsis yog mov noj ? Ua cas nej siv cov nyiaj nqe zog los muas tej yam tsis ua kom nej tsau plab ? Nej mloog kuv mas ! Ces nej yuav tau noj tej yam qab, nej yuav tau tej yam txhiam xws qab xis nej lub ncauj. 3a Nej tig ntsej los mloog kuv mog ! Nej mloog kuv, ces nej tus plig yuav muaj txoj sia nyob.
- 3 Nej tig ntsej los mloog kuv mog ! Nej mloog kuv, ces nej tus plig yuav muaj txoj sia nyob. Kuv yuav nrog nej cog ib lo lus nyob mus ib txhiab ib txhis, raws li cov txiaj ntsim kuv hais ruaj tias kuv yuav muab rau Das Vis.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 144,8-9.15-18

Txais: Koj qhib koj txhais tes, koj pub kom txhua tus muaj sia tau noj tsau.

1. HUAB TAIS siab zoo, nws khuv leej neeg, nws tsis npau taws sai. HUAB TAIS ua zoo rau txhua leej txhua tus. Nws hlub thiab txuag nws dej num. **Teb**
2. Sawv daws ntsia ntsoov koj, txhua tus vam txog koj. Koj pub txhiam laj txhiam xws rau lawv raws caij raws nyoog. Koj nthuav koj txhais tes, koj pub kom txhua tus muaj txoj sia tau noj tsau npo. **Teb**
3. HUAB TAIS ua yam twg, nws ua ncaj. Nws li xeeb ua txhua txoj hauj lwm raws txoj kev ntshiab. HUAB TAIS nyob ze cov neeg tuav txog nws lub npe; nws nyob ze cov neeg uas muab tas nrho lawv lub siab lub ntsws hu txog nws. **Teb**

ZAJ NYEEM OB: Los Mas 8,35.37-39

Cov lus nyob hauv Paj Lug tsab ntawv xa rau cov ntseeg nyob Los Mas

- 35 Kwv tij sawv daws, leej twg yuav cais tau kom peb ncaim ntawm Leej Pleev uas nyiam peb ? Puas yog kev raug xwv txheej ? Puas yog kev txhawj xeeb ? Puas yog kev tshaib kev nqhis ? Puas yog kev pluag ? Puas yog kev poob tsag ? Puas yog kev raug luag hiam ? Puas yog txoj kev tuag ?
- 37 Tab yog peb raug tej yam li ntawd, mas peb kuj yeej sawv daws, vim YES XUS nyiam peb.
- 38 Kuv paub tseeb tias tsis muaj dab tsi yuav cais tau peb ntawm TSWV NTUJ txoj kev nyiam. Txawm yog txoj kev tuag los txoj sia, yim phiaj cuaj phiaj Tshiab, txhua yam uas nyem no ua neej nyob thiab txhua yam uas tseem yuav xeeb los nyob rau yav tom ntej,
- 39 tas txhua yam nyob saum ntuj thiab nyob nruab yeeb, txhua yam uas Ntuj tsim los : yeej tsis muaj ib yam yuav cais tau peb ntawm tus TSWV NTUJ uas nyiam peb nyob hauv peb tus HUAB TAIS YES XUS PLEEV.

Yog Tswv Ntuj Lo Lus

NKAUJ CAV TXOG LUB MOO ZOO: Mt 4,4b

As les lus yas. As les lus yas. Neeg tsis kawg muab mov los yug siav, neeg tseem yuav cov lo lus tawm ntawm TSWV NTUJ lub ncauj los yug siav thiab. As les lus yas.

NTAWV MOO ZOO: Mas Tais 14,13-21

Nej Mloog Ib Zag Nyob Hauv Mas Tais Ntawv Moo Zoo

- 13 YES XUS hnov Zam Ntxuav Plig tua, nws caij nkoj mus rau ib qhov chaw xu kev, tsis muaj neeg. Zeej tsoom hnov, lawv tawm hauv tej nroog, mus ko taw raws nws qab.
- 14 Thaum YES XUS nqes nkoj, nws pom ib pab neeg coob, ces nws hlub lawv ; nws kho lawv cov neeg uas muaj mob muaj nkeeg.
- 15 Yuav tsaus ntuj, cov thwj tim txav los hais rau nws tias : "Thaj tsam no, tsis muaj neeg nyob, thiab lig lawm ; koj tso tsoom neeg rov mus hauv tej zos kom lawv tau kev mus muas mov noj."
- 16 YES XUS teb rau lawv tias : "Tsis tas lawv yuav mus qhov twg li: yog nej yuav muab rau lawv noj."
- 17 Cov thwj tim hais rau YES XUS tias : "Ntawm no, peb tsuas muaj tsib lub ncauv mov thiab ob tug ntses xwb." YES XUS hais tias :

- 18 "Nej nqa los rau kuv."
- 19 YES XUS kom cov thwj tim hais sawv daws zaum saum tej nroj tsuag. Ces YES XUS tuav tsib lub ncuav mov thiab ob tug ntse, nws tsa muag ntsia saum ntuj, nws hais zaj foom hmoov zoo, nws muab cov ncuav mov ntais. Nws cev rau cov thwj tim, kom lawv muab rau sawv daws.
- 20 Sawv daws noj tsau tas, lawv khaws tej sab mov seem puv kaum ob tawb !
- 21 Cov neeg noj mov ntawd muaj ze ntawm tsib txhiab leej txiv neej, tsis xam poj niam me nyuam.

Yog Huab Tais Yes Xus Lub Moo Zoo

HNUB CHIV 18 NRUAB XYOO B CHÚA NHẬT 18 THƯỜNG NIÊN NĂM B

ZAJ NYEEM IB: Kev Tsiv 16,2-4.12-15

Cov lus nyob hauv ntawv Kev Tsiv

- 2 Tas tsoom tub ki His Xas Lais cem cem yws yws rau Mais Xes thiab As Loos nkawd nyob hauv teb chaws suab puam.
- 3 Cov His Xas Lais hais rau nkawd tias : "Kheev lam HUAB TAIS txhais tes tua kom peb tuag tas nyob Hais Nkws Tos teb, thaum peb zaum ncig tej niag lauj kaub nqaij thiab peb muaj mov noj tsau plab npo mas! Peb paub tseeb tias neb coj peb los nyob hauv lub hav suab puam no kom peb sawv daws tuag tshaib tas xwb!"
- 4 Ces HUAB TAIS hais rau Mais Xes tias : "Kuv yuav ua kom mov poob saum txheej ntuj saud los rau nej noj. Cov neeg yuav niaj tag kis tawm mus khaws kom tsaus rau lawv noj hnuab ntawd xwb, kuv xav sim lawv, kuv thiaj paub tias lawv puas mloog kuv txoj cai los tsis mloog.
- 12 "Kuv tau hnov cov His Xas Lais tej lus yws lus cem lawm. Koj hais cov lus no rau lawv : Thaum yuav tsaus ntuj, nej yuav tau nqaij noj, thaum kaj ntug, nej yuav tau mov noj kom tsau plab. Ces nej yuav paub tias kuv yog HUAB TAIS nej tus TSWV NTUJ tiag."
- 13 Thaum tsaus ntuj, muaj ib co yij ya tuaj tsaws puv thaj chaw lawv nyob, hos thaum sawv ntxov, muaj ib txheej lwg dawb paug puv ib ncig thaj tsam lawv nyob.
- 14 Thaum cov lwg ntawd qhuav tas, ces txawm pom ib co hmoov mos mos, ua tsig daws, zoo li ib co te, nyob saum npoo av suab puam.
- 15 Thaum cov His Xas Lais pom li ntawd, lawv sib nug zom zaws tias : "Cov ntawd yog dab tsi ?" Vim lawv yeej tsis paub tias yog dab tsi tiag. Mais Xes hais rau lawv tias : "Cov ntawd, yog cov mov uas HUAB TAIS muab pub rau nej noj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 77,3-4bc.23-25.54

Txais: HUAB TAIS tso mov poob saum ntuj los yug lawv.

1. Tej yam peb hnov thiab peb paub, yog tej uas peb phaj txiv thiab phaj yawg tau qhis. Peb yuav tsis zais rau peb cov xeeb ntxwv. Peb yuav qhia TSWV NTUJ lub hwj huam thiab nws cov hauj lwm muaj hwj chim rau tsoom tub ki tom ntej paub. **Teb**
2. Nws txib cov huab nyob txheej saud, nws qhib roog ntug. Nws ua kom cov mov Mas Nas poob li dej nag los yug lawv txoj sia. **Teb**

3. Neeg tau noj Ntuj tsoom Tshiab cov mov. HUAB TAIS xa txhiam laj txhiam xws rau lawv noj seem noj so. HUAB TAIS coj lawv los txog nws thaj chaw ntshiab, txog lub roob uas nws txhais tes xis txeeb los ua nws tug. **Teb**

ZAJ NYEEM OB: Es Fes Xos 4,17.20-24

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 17 Kwv tij sawv daws, kuv xav hais rau nej, kuv xav taj nej nyob hauv HUAB TAIS, kom nej txhob coj ib tug yam ntxwv xws li cov neeg teev dab. Cov teev dab, lawv nyob hauv zaj tswv yim tsis muaj qab hau.
- 20 Nej, mas nej tsis tau kawm tias YES XUS zoo li ntawd.
- 21 Nej tau txais ib txoj kev, thiab ib co lus qhia raws nraim li qhov tseeb nyob hauv YES XUS.
- 22 Yam li, nej yuav tso nej tus yam ntxwv thaud tseg, nej yuav hle nej tus qub neeg uas lwj zuj zus pov tseg, vim tus qub neeg ntshaw ntau yam tsis muaj nqis.
- 23 Nej tso nej lub siab qub pov tseg, nej cia zaj tswv yim tshiab los nyob hauv nruab siab.
- 24 Nej yuav hnav tus neeg tshiab : Ntuj tsim tus neeg tshiab ntawd raws li HUAB TAIS tus duab. Ntuj tsim nws nyob hauv txoj kev ncaj, kev ntshiab, thiab kev tseeb.

Yog Tswv Ntuj Lo Lus

NKAUJ CAV TXOG LUB MOO ZOO: Mt 4,4b

As les lus yas. As les lus yas. Neeg tsis kawg muab mov los yug siav, neeg tseem yuav cov lo lus tawm ntawm TSWV NTUJ lub ncauj los yug siav thiab. As les lus yas.

NTAWV MOO ZOO: Zam 6,24-35

Nej Mloog Ib Zag Nyob Hauv Zam Ntawv Moo Zoo

- 24 Tab sis tsoom neeg pom tias YES XUS tsis nyob ntawd lawm, nws cov thwj tim kuj tsis nyob lawm thiab, ces lawv nce mus hauv cov nkoj ntawd, lawv mus nrhiav YES XUS tim Kas Fas Naus.

- 25 Lawv tuaj nrhiav tau YES XUS rau sab ntug dej tid, lawv hais rau nws tias : "Las Npis, thaum twg koj tuaj ntawm no lawm ?"
- 26 YES XUS teb rau lawv tias: "Kuv hais qhov tseeb tiag rau nej : Nej nrhiav kuv, tsis yog vim nej tau pom ib co cim, yog vim nej tau noj cov nuav mov tsau nej plab.
- 27 Nej txhob ua hauj lwm nrhiav cov txhiam xws txawj ploj. Nej ua hauj lwm nrhiav cov txhiam xws pub txoj sia nyob mus li. Cov txhiam xws ntawd yog cov uas Neeg Leej Tub yuav pub rau nej. Vim nws yog tus uas Leej Txiv Tswv Ntuj ntaus thwj rau."
- 28 Lawv hais rau YES XUS tias : "Peb yuav ua dab tsi, peb thiaj ua tau TSWV NTUJ cov hauj lwm ?"
- 29 YES XUS teb rau lawv hais tias : "TSWV NTUJ txoj hauj lwm yog zoo li no : Kom nej ntseeg txog tus nws xa tuaj."
- 30 Lawv hais rau YES XUS tias : "Koj yuav ua lub cim dab tsi rau peb pom, kom peb ntseeg koj ? Koj ua hauj lwm dab tsi ?"
- 31 Peb cov yawg koob noj cov mov mas nas nyob teb chaws suab puam, raws li cov lus sau cia hais tias : "Nws pub cov mov tuaj saum ntuj tuaj rau lawv noj."
- 32 YES XUS thiaj hais rau lawv tias : "Kuv hais qhov tseeb tiag rau nej: Tsis yog Mais Xes pub cov mov tuaj saum ntuj tuaj rau nej, yog kuv Txiv pub rau nej. Cov mov tuaj saum ntuj tuaj yog tseem mov.
- 33 Vim TSWV NTUJ cov mov yog cov mov nqes saum ntuj los, yog cov mov pub txoj sia rau lub qab ntuj neeg."
- 34 Lawv thiaj hais rau YES XUS tias : "HUAB TAIS, thov koj pub cov mov ntawd rau peb noj mus li."
- 35 YES XUS hais rau lawv tias : "Kuv yog cov mov muaj txoj sia. Tus tuaj cuag kuv nws yuav tsis tshaib, tus ntseeg txog kuv nws yuav tsis nqhis ib zaug li.

Yog Huab Tais Yes Xus Lub Moo Zoo

HNUB CHIV 18 NRUAB XYOO C CHÚA NHẬT 18 THƯỜNG NIÊN NĂM C

ZAJ NYEEM IB: Kos Es Les 1,2; 2,21-23

Cov lus nyob hauv Ntawv Kos Es Les

- 1,2 Kos Es Les hais tias : "Txhua yam txawj yaj ntshis, yog zoo li ib co pa yuav yaj mus."
- 2,21 Ntsia tus neeg no : nws tau khwv ua hauj lwm, nws thoob tsib thiab paub txuj, tab sis nws yuav tsum tso tej yam ntawd tseg rau lwm tus khaws xyeem yuav. Li ntawd nws cov hauj lwm kuj txawj yaj ntshis, yog ib yam xwv txheej loj.
- 22 Tib neeg tau ua hauj lwm hnyav hnyav, nws lub siab siv zog nrhiav ub nrhiav no, nws txoj kev khwv nyob hauv lub qab hnuv, tau tus qab hau dab tsi ?
- 23 Nws niaj hnuv txom nyem, nws niaj hmo tu siab, nws lub siab tsis tau kev so. Tej ntawd kuj yog yaj ntshis thiab.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 89,3-6.12-14.17

Txais: HUAB TAIS, koj yog peb qhov chaw vam khom, tiam dhau tiam los txog tav no.

1. HUAB TAIS, koj ua kom neeg rov mus ua av luaj. Koj hais tias, "As Das tsoom tub ki, nej rov mus ua plua av !" Koj saib ib txhiab xyoo zoo li ib hnuv. Koj saib ib hmos zoo li ib teev. **Teb**
2. Koj rho neeg txoj sia thaum lawv tsaug zog nruab dab ntub. Lawv ploj ntais zoo li nroj tsuag tawg paj yav sawv ntxov, tab tis yav tsaus ntuj, lub paj qhuav tas. **Teb**
3. Thov koj qhia kom peb paub suav peb lub hnuv nyoog ua neej, peb thiaj yuav tau ib lub siab thoob tsib. HUAB TAIS, thov koj rov qab los. Thov koj hlub koj cov tub txib mas ! **Teb**
4. Sawv ntxov tsees, thov koj pub koj txoj kev hlub rau peb, peb yuav qw suab zoo siab tas peb sim neej. Thov HUAB TAIS lub siab hlub nqes los roos peb kom cov hauj lwm peb txhais tes khwv vam meej. **Teb**

ZAJ NYEEM OB: Kos Los Xais 3,1-5.9-11

Cov lus nyob hauv Paj Lug tsab ntawv xa rau cov ntseeg nyob Kos Los Xais

- 1 Kwv tij sawv daws, nej pom xeeb nrog Leej Pleev sawv rov los lawm, mas nej nrhiav tej yam nyob txheej saud, vim txheej saud yog Leej Pleev qhov chaw nyob, nws zaum ntawm TSWV NTUJ phab xis.
- 2 Nej lub siab yuav dai dhuam rau tej yam nyob txheej saud, txhob dai rau tej yam nyob ntiaj teb no.
- 3 Vim tias, nej tuag lawm, hos nej txoj sia nrog Leej Pleev tsiv nraim hauv TSWV NTUJ.
- 4 Leej Pleev yog nej txoj sia : thaum nws yuav tawm los rau pom xyeem, mas nej kuj yuav nrog nws tawm los muaj hwj chim.
- 5 Nej yuam nej tej tes taw, uas nyiam lub ntiaj teb.
- 9 Nej txhob ib leeg dag ib leeg.
- 10 Nej twb hle tus qub neeg thiab nws cov hauj lwm pov tseg lawm, nej hnav tus neeg tshiab, uas yog tus neeg mus taug txoj kev paub zaj txuj tseeb, vim tus neeg ntawd rov tshiab tuaj, raws li Tus Tsim neeg tus duab.
- 11 Nyob hauv txoj kev ua tus neeg tshiab, mas tsis muaj tus Hes Las los Yus Das, tsis muaj tus txais lub cim txiav, los tus tsis txais lub cim txiav, tsis muaj tus neeg qus, tus Xis Kus Thees, tus qhev, los tus twj lij : tsuas muaj Leej Pleev xwb, vim Leej Pleev yog txhua tsav txhua yam, thiab nws nyob hauv txhua tsav txhua yam.

Yog Tswv Ntuj Lo Lus

NKAUJ CAV TXOG LUB MOO ZOO: Mt 5,3

As les lus yas. As les lus yas. Cov tau hmoov zoo yog cov pluag hauv nruab siab, Ntuj Lub Ceeb Tsheej yuav yog lawv tug. As les lus yas.

NTAWV MOO ZOO: Lus Kas 12,13-21

Nej Mloog Ib Zag Nyob Hauv Lus Kas Ntawv Moo Zoo

- 13 Muaj ib tug neeg hauv tsoom sid hais rau YES XUS tias: "Xib Hwb, koj hais kom kuv tij laug faib peb lub cuab tam rau kuv thiab."

- 14 YES XUS hais rau nws tias : "Npawg, leej twg tsa kuv ua tus txiav txim los tus faib cuab tam rau neb ?"
- 15 YES XUS hais rau lawv tias : "Nej ceev faj, nej yuav txuag kom nej txhob ntshaw, vim tias neeg txawm nplua nuj npaum twg, los nws txoj sia tsis nyob hauv nws lub cuab tam."
- 16 YES XUS hais zaj paj lug no rau lawv : "Muaj ib tug neeg nplua nuj, nws cov teb ntsu qoob loo kawg."
- 17 Nws xav tias : 'Kuv yuav ua li cas, vim kuv tsis muaj chaw rau kuv cov qoob ?'
- 18 Ces nws hais tias : 'Kuv yuav ua li no : kuv yuav rhuav kuv cov txhab, yuav rov ua ib co txhab loj dua, kuv yuav sau kuv cov nplej thiab kuv tej cuab yeej cuab tam huv si los tso rau hauv.'
- 19 Ces kuv yuav hais rau kuv tus plig tias : 'Me ntsuj plig, koj muaj qoob loo cuab tam ntau kav koj ntev niaj ntau xyoo : koj so mog, koj noj, koj haus, koj ua si.'
- 20 Tab sis TSWV NTUJ hais rau nws tias: 'Neeg ruam ! Hmo no kiag, Ntuj yuav coj koj tus ntsuj plig rov qab. Tej yam uas koj npaj tau, yuav yog leej twg tug ?'
- 21 Tus uas khaws nyiaj txiag tseg rau nws tib leeg kheej, yuav zoo li ntawd, vim nws tsis nrhiav kev nplua nuj nyob hauv TSWV NTUJ."

Yog Huab Tais Yes Xus Lub Moo Zoo

HNUB CHIV 19 NRUAB XYOO A CHÚA NHẬT 19 THƯỜNG NIÊN NĂM A

ZAJ NYEEM IB: 1 Vaj 19,9a.11-13a

Cov lus nyob hauv ntawv Vaj phau ib

- 9a Thaum Es Lias mus txog ntawm TSWV NTUJ lub roob, nws chaws mus hauv lub qhov tsua. Nws pw nyob ntawd.
- 11 Muaj ib lub suab hais rau nws tias : "Koj tawm mus saum lub roob, koj tos HUAB TAIS." Ces HUAB TAIS tuaj. Muaj ib nthwv cua ua HUAB TAIS ntej. Yog ib nthwv cua hlob tas nrho phua cov roob thiab ua cov pob tsuas tawg tas. Tab sis HUAB TAIS tsis nyob hauv nthwv cua. Dua li ntawd mas ntiaj teb qeeg tas, tab sis HUAB TAIS tsis nyob hauv qhov qeeg ntawd thiab.
- 12 Thaum ntiaj teb qeeg dua lawm, muaj ib co hluav taws hla ze ntawd, tab sis HUAB TAIS tsis nyob hauv cov hluav taws. Cov hluav taws dua tas, muaj ib nthwv cua tuaj ntxuj ntxiag.
- 13a Thaum Es Lias hnov cov cua ntawd mas tam sim ntawd nws muab nws lub tsho tshaj sab los thaiv nws ntsej muag. Ces Es Lias tawm los nyob ntawm rooj tsuas.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 84,9ab-14

Txais: HUAB TAIS, thov cia peb pom koj lub siab zoo, thov pub koj txoj kev cawm neeg rau peb.

1. Kuv mloog saib TSWV NTUJ hais dab tsi. HUAB TAIS hais rau nws haiv neeg tias, "Nej nyob kaj lug !" HUAB TAIS txoj kev cawm los nyob ze cov neeg hwm nws. Nws lub koob meej nqes los nyob hauv peb lub teb chaws. **Teb**
2. Txoj kev cawm thiab kev tseeb los sib cuag. Kev thaj yeeb thiab kev haum pheej los sib koom. Txoj kev tseeb hlav ib tug txoov kaus nyob hauv ntiaj teb, kev haum pheej nqes saum ntuj los. **Teb**
3. HUAB TAIS pub txiaj ntsim, peb cov av pub qoob loo. Kev haum pheej mus ua HUAB TAIS ntej, nws npaj txoj kev thaj yeeb rau peb taug. **Teb**

ZAJ NYEEM OB: Los Mas 9,1-5

Cov lus nyob hauv Paj Lug tsab ntawv xa rau cov ntseeg nyob Los Mas

- 1 Kuv tij sawv daws, kuv hais qhov tseeb nyob hauv Leej Pleev, kuv tsis dag : kuv lub siab qhia kuv tseeb nyob hauv LEEJ NTUJ PLIG NTSHIAB zoo li no :
- 2 Kuv tu siab thiab chim siab tas nrho.
- 3 Kuv tuaj yeem cia luag tsawm kuv, los cia luag muab kuv cais ntawm Leej Pleev, tsuav yog kuv tau pab kuv tsoom kuv tij, pab haiv neeg uas muaj ib hom ntshav xws li kuv :
- 4 haiv neeg ntawd yog cov His Xas Lais, lawv twb yog cov yuav txais txoj hmoov ua TSWV NTUJ tub ki, lawv yog cov yuav txais lub hwj chim, txais cov lus Ntuj cog, txais Txoj Cai, txais txoj kev teev Ntuj, txais Ntuj cov lus ruaj,
- 5 vim lawv muaj cov yawg koob yawg suab, muaj Leej Pleev uas yog tus nyob siab dua txhua leej, thiab yog tus TSWV NTUJ muaj koob meej mus li : nws lub cev yug hauv lawv haiv neeg los. Ua li.

Yog Tswv Ntuj Lo Lus

NKAUJ CAV TXOG LUB MOO ZOO: NPN 129,5

As les lus yas. As les lus yas. Kuv tos HUAB TAIS ! kuv tos nws tas siab tas ntsws. Kuv tus ntsuj plig tos txog nws lo lus. As les lus yas.

NTAWV MOO ZOO: Mas Tais 14,22-33

Nej Mloog Ib Zag Nyob Hauv Mas Tais Ntawv Moo Zoo

- 22 Thaum YES XUS ua kom mov ntau tuaj tas, YES XUS txhib cov thwj tim kom nce nkoj ua nws ntej mus lawm sab ntug dej tim ub, hos nws nyob xa tsoom sid rov qab.
- 23 Thaum YES XUS xa zeej tsoom rov qab mus tas lawd, nws nce mus saum roob, rau ib qho chaw xu kev, ces nws teev Ntuj. Thaum tsaus ntuj, tshuav nws tib leeg xwb.
- 24 Lub nkoj twb mus deb ntawm ntug nqhuab lawm ntau ntsua muag. Dej nphau nphwv tuaj nplawm lub nkoj, vim cua tshuab tom hauv ntej tuaj.
- 25 Thaum yuav kaj ntug, YES XUS mus ko taw saum nplaim dej, nws tuaj caum cov thwj tim.

- 26 Lawv pom YES XUS mus ko taw saum dej ntuj, lawv ib ce xob: lawv hais tias: "Yog poj ntxoog". Lawv ntshai kawg, ces lawv qw qw.
- 27 Tam sis ntawd YES XUS hais rau lawv tias : "Nej tso siab mas ! Yog kuv ! Txhob ntshai."
- 28 Pob Zeb teb rau YES XUS tias : "HUAB TAIS, yog koj tiag no, koj kheev kom kuv tsuj nplaim dej tuaj cuag koj."
- 29 YES XUS teb tias : "Tuaj mas !" Ces Pob Zeb nqes nkoj tso ko taw tsuj saum nplaim dej mus cuag YES XUS.
- 30 Tab sis nws pom cua hlob, nws ntshai, ces nws pib tog hauv dej, nws qw tias : "HUAB TAIS, cawm kuv mas !"
- 31 YES XUS cev tes tam sis ntawd tuav Pob Zeb, nws hais rau Pob Zeb tias : "Neeg ntseeg tsawg, ua cas koj ua xyem xyav ?"
- 32 Thaum YES XUS nkawd nce hlo rau hauv nkoj, ces cua tu nrho.
- 33 Cov nyob hauv nkoj pe YES XUS, lawv hais tias : "Koj yog TSWV NTUJ Leej Tub tiag !"

Yog Huab Tais Yes Xus Lub Moo Zoo

HNUB CHIV 19 NRUAB XYOO B
CHÚA NHẬT 19 THƯỜNG NIÊN NĂM B

ZAJ NYEEM IB: 1Vaj 19,4-8

Cov lus nyob hauv ntawv Vaj phau ib

- 4 Es Lias mus ib hnub ke nyob hauv teb chaws suab puam ntxiv. Nws thiaj mus so hauv ib tsob qab ntoo. Nws xav tuag, nws hais tias: "HUAB TAIS, kuv txom nyem txaus lawm! Thov koj thau kuv txoj sia rov qab mas! Vim kuv kuj tsis zoo dua kuv cov yawg koob!"
- 5 Es Lias cia li tso cev pw pem teb ces nws tsaug zog. Tab sis ib tug Tub Xo los tsa nws thiab hais rau nws tias : "Sawv los noj mov."
- 6 Es Lias rua muag ntsia, nws pom ib lub ncuav mov nyob saum cov pob zeb thiab pom ib plhuaj taub dej. Nws noj lub ncuav mov thiab haus dej tas ces nws rov qab pw dua.
- 7 Tab sis HUAB TAIS tus Tub Xo rov qab los tsa nws tias : "Sawv los noj mov ! Koj tseem tshuav ib ntus kev deb kawg."
- 8 Es Lias thiaj sawv tsees los noj mov thiab haus dej tas ces nws rov muaj zog tuaj. Nws thiaj mus kev plaub caug hnub thiab plaub caug hmo, ces nws mus txog TSWV NTUJ lub roob Hos Les.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 33,2-9

Txais: Nej saj ces nej yuav pom HUAB TAIS lub siab zoo.

1. Kuv cav lus zoo txog HUAB TAIS txhua niaj txhua hnub. Kuv lub ncauj yuav cav lus zoo txog nws. Kuv tus ntsuj plig yuav muaj ntsej muag nyob hauv HUAB TAIS. Cov neeg me hnov kuv cov lus, lawv yuav zoo siab. **Teb**
2. Nej nrog kuv cav txog HUAB TAIS, peb ua ke tshaj nws lub npe. Kuv nrhiav HUAB TAIS, nws teb kuv. Nws pab kuv dim ntawm txhua yam uas kuv ntshai. **Teb**
3. Cov neeg nrhiav HUAB TAIS, lawv yuav muaj ntsej muag luag ntshi nyob hauv kev hom khaj. Lawv yuav tsis poob ntsej muag. Thaum cov txom nyem hu txog HUAB TAIS, nws mloog lawv. Nws cawm lawv ntawm kev txhawj xeeb. **Teb**
4. HUAB TAIS tus Tub Xo tsa tsev tsam phooj ncig cov neeg hwm HUAB TAIS, nws npo lawv. Nej ntsia thiab nej saj saib HUAB TAIS lub siab zoo npaum li cas. Tus tau txoj hmoov zoo yog tus tuaj nkaum nyob hauv HUAB TAIS. **Teb**

ZAJ NYEEM OB: Es Fes Xos 4,30 – 5,2

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 4,30 Kuv tij sawv daws, nej txhob ua kom TSWV NTUJ LEEJ NTUJ PLIG NTSHIAB tu siab : vim nws muab nws lub thwj los ntaus cim rau nej, nws hom nej cia hnuv uas Ntuj txhiv neeg.
- 31 Tej kev hais lus iab siab, kev tsiv tsaim, kev npau taws, kev nthe, kev hais tub qaug : mas nej yuav muab rho pov tseg tas huv tib si, nej yuav dawj tas puas tsav yam nkhaus pov tseg.
- 32 Nej sawv daws yuav rov sib ua zoo, sib hlub, nej yuav ib leeg zam rau ib leeg, ib yam li TSWV NTUJ zam rau nej nyob hauv Leej Pleev.
- 5,1 Nej yuav yoog raws li HUAB TAIS, xws li cov me nyuam zoo nyiam.
- 2 Nej yuav taug txoj kev nyiam, raws li Leej Pleev tus lwj lwm, uas nws nyiam peb, nws siv nws txoj sia los pab peb ; nws rov muab nws cev xws li ib tug tsiaj hlawv txi Ntuj tsw qab mus rau TSWV NTUJ.

Yog Tswv Ntuj Lo Lus

NKAUJ CAV TXOG LUB MOO ZOO: Zam 6,51

As les lus yas. As les lus yas. Huab Tais hais tias: “Kuv yog cov mov muaj txoj sia nqes saum ntuj los. Leej twg noj cov mov no, nws yuav cial nyob mus li.” As les lus yas.

NTAWV MOO ZOO: Zam 6,41-51

Nej Mloog Ib Zag Nyob Hauv Zam Ntawv Moo Zoo

- 41 Cov Yus Das yws yws txog YES XUS, vim nws hais tias : "Kuv yog cov mov nqes saum ntuj los."
- 42 Lawv tseem hais tias : "Nws tsis yog YES XUS, Yos Xes tus tub lod? Peb tsis paub nws niam nws txiv lod ? Ua cas zaum no nws hais tias : Kuv nqes saum ntuj los ?"
- 43 YES XUS teb rau lawv tias: “Nej txhob ua ke yws yws.”
- 44 Tsis muaj leej twg tuaj cuag kuv tau, yog Leej Txiv uas xa kuv tuaj tsis rub nws los. Hos kuv, mas Hnuv Kawg, kuv yuav tsa nws sawv rov qab los.

- 45 Cov Yaj Saub Phau Ntawv sau hais tias: "TSWV NTUJ yuav qhia sawv daws huv tib si." Tus twg hnov Leej Txiv lub suab thiab txais nws lo lus qhia, mas tus ntawd tuaj cuag kuv.
- 46 Tsis muaj leej twg tau pom Leej Txiv. Tsuas yog tus tuaj ntawm TSWV NTUJ tuaj thiaj tau pom Leej Txiv.
- 47 Kuv hais qhov muaj tseeb tiag rau nej : Tus ntseeg, nws muaj txoj sia nyob mus li.
- 48 "Kuv yog cov mov muaj txoj sia.
- 49 Nej cov yawg koob tau noj cov mov mas nas hauv teb chaws suab puam, tab sis lawv tuag tas lawm.
- 50 Cov mov nqes saum ntuj los yog zoo li no : tus noj cov mov no, nws tsis tuag.
- 51 Kuv yog cov mov muaj txoj sia nqes saum ntuj los. Leej twg noj cov mov no, nws yuav ciaj nyob mus li. Cov mov uas kuv yuav muab pub rau lub qab ntuj neeg noj kom lawv muaj txoj sia, yog kuv lub cev nqaij."

Yog Huab Tais Yes Xus Lub Moo Zoo

HNUB CHIV 19 NRUAB XYOO C CHÚA NHẬT 19 THƯỜNG NIÊN NĂM C

ZAJ NYEEM IB: Thoob Tsib 18,6-9

Cov lus nyob hauv ntawv Thoob Tsib

- 6 Peb cov yawg koob twb ntxov paub hmo ntawd, lawv ntseeg tej lus cog cia muaj tseeb tiag ua rau lawv zoo siab heev.
- 7 Koj haiv neeg tos nws ntshis li kev cawm rau cov ncaj ncees hos kev puas tsuaj rau cov yeeb ncuab.
- 8 Yam koj pauj rau cov yeeb ncuab koj tsa peb tau ntsej muag.
- 9 Cov neeg zoo tej tub ki mloog lus nyiag txi ntuj lawv sib koom ua ke tuav qaum ntuj cai, cov neeg ntshiab txais nkaus yam zoo li yam phem, seev yees cov yawg koob tej nkauj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 32,1.12.18-20.22

Txais: **Haiv neeg Ntuj xaiv los ua HUAB TAIS lub cuab tam, lawv txoj hmoov zoo !**

1. Cov neeg siab ncaj, nej hu nkauj ntsuag qees cav txog HUAB TAIS. Nej cov lus cav ntxim TSWV NTUJ siab. Co tau txoj hmoov zoo yog haiv neeg uas tau HUAB TAIS los ua lawv tus TSWV NTUJ thiab yog haiv neeg Ntuj xaiv los ua HUAB TAIS lub cuab tam. **Teb**
2. HUAB TAIS zov cov neeg hwm nws. Nws zov cov neeg tso siab rau nws lub siab zoo. Nws npo lawv dim ntawm kev tuag. Nws txuag lawv txoj sia thaum lub teb chaws raug kev tshaib kev nqhis. **Teb**
3. Peb tus ntsuj plig tos ntsoov HUAB TAIS. Nws yog tus pab peb, nws yog peb daim leem phiaj. HUAB TAIS, thov kom koj lub siab hlub roos peb. Peb chaw tso siab yog nyob hauv koj. **Teb**

ZAJ NYEEM OB: Hes Nplaws 11,1-2.8-19

Cov lus nyob hauv tsab ntawv xa rau cov ntseeg Hes Nplaws

- 1 Kwv tij sawv daws, txoj kev ntseeg yog txoj kev zeem tau meej tias peb yuav txais yam uas peb cia siab tos. Kev ntseeg ua puav pheej tias yam uas peb tsis pom, yeej muaj tseeb tiag.
- 2 Yog txoj kev ntseeg ua kom cov poj yawm txwv koob nto moo zoo.

- 8 Yog vim Has Nplas Has ntseeg, mas nws thiaj mloog Ntuj hu nws kom sawv kev mus ib lub teb chaws uas nws yuav txais los ua nws lub cuab tam. Ces nws sawv kev, nws tsis paub tias nws yuav mus txog qhov twg.
- 9 Yog vim Has Nplas Has ntseeg, mas nws thiaj tsiv mus nyob hauv thaj av uas yog pej kum neeg av, yog thaj av uas Ntuj cog lus tias yuav pub rau nws. Has Nplas Has ua neej nyob hauv tsev tsam phooj xws li Is Xas Has thiab Yas Kos. Nkawd nrog Has Nplas Has txais TSWV NTUJ lo lus cog.
- 10 Has Nplas Has tos txog lub tsheej muaj taw ntsa uas TSWV NTUJ yuav txhim thiab yuav tsa.
- 11 Yog vim Xas Las ntseeg, mas tab nws txawm laus heev lawm, nws muaj peev xwm xeeb tub. Xas Las ntseeg tias tus tau cog lus rau nws, yuav tsis fav xeeb.
- 12 Vim li ntawd, tus neeg uas twb yuav txog nws lub caij tuag tseem yug tau ib co xeeb ntxwv coob npaum li cov hnuv qub nyob saum ntuj thiab cov suab zeb nyob ntawm ntug hiav txwv uas suav tsis txheeb.
- 13 Cov neeg ntawd, thaum lawv tuag, lawv tseem tsis tau txais txhua yam uas TSWV NTUJ cog lus tias nws yuav pub. Tab sis yog vim lawv ntseeg, mas lawv nyob deb pom thiab tshua txog txhua yam ntawd, thiab lawv zeem tseeb tias lawv tsuas yog ib co pej kum neeg tuaj hla lub ntiaj teb no xwb.
- 14 Lawv qhia li no kom pom tias lawv nrhiav ib lub teb chaws nyob.
- 15 Yog lawv nco txog lub teb chaws uas lawv yug los, mas lawv tseem muaj caij rov mus nyob lawv qub teb qub chaw.
- 16 Tab sis lawv tos txog ib lub teb chaws zoo dua, yog lub nyob saum ntuj. Vim li ntawd TSWV NTUJ tsis txaj muag cia lawv hu nws ua lawv tus TSWV NTUJ, ces nws npaj ib lub tsheej rau lawv tiag.
- 17 Yog vim Has Nplas Has ntseeg, mas thaum TSWV NTUJ sim nws, nws cia li muab Is Xas Has txi rau Ntuj, txawm tias Is Xas Has yog nws tib leeg tub twm zeej.
- 18 Is Xa Has twb yog tus yuav txais tej yam uas TSWV NTUJ cog lus tias yuav pub. TSWV NTUJ twb hais txog Is Xas Has tias : ‘koj yuav muaj ib co xeeb ntxwv tawm ntawm Is Xas Has.’

- 19 Has Npllas Has xav tias TSWV NTUJ tsa tau cov neeg tuag kom cial rov los. Ces Has Npllas Has rov qab tau nws tus tub. Zaj hais txog Is Xas Has no yog ib zag paj lug.

Yog Tswv Ntuj Lo Lus

NKAUJ CAV TXOG LUB MOO ZOO: Mt 24,42a.44

As les lus yas. As les lus yas. Nej zov hmo mog, nej txhob tsaug zog vim nej tsis paub hnuv twg HUAB TAIS yuav rov qab los. As les lus yas.

NTAWV MOO ZOO: Lus Kas 12,32-48

Nej Mloog Ib Zag Nyob Hauv Lus Kas Ntawv Moo Zoo

- 32 Yes Xus hais rau cov thwj tim tias: "Pab me yaj, nej txhob ntshai mog, vim nej Txiv zoo siab muab lub Ceeb Tsheej rau nej."
- 33 "Muab nej lub cuab tam muag, nej muab pub rau cov pluag. Nej tsim tej nas nyiaj tsis txawj qub, tsim ib txhab kub uas tsis txawj nqig rau saum ntuj. Nyob saud, tsis muaj tub sab tuaj ze, tsis muaj kab rws xwv.
- 34 Vim tias nej txhab kub nyob qhov twg, nej lub siab kuj yuav nyob qhov ntawd."
- 35 "Nej sia siv thiab taws teeb,
- 36 zoo li ib co tub txib uas tos lawv tus tswv mus ua tshoob rov los. Thaum tus tswv rov los txog, nws yuav khob qhov rooj, ces lawv yuav qhib rau nws tam sis ntawd.
- 37 Cov tub txib uas thaum tus tswv los txog, nws pom lawv tseem zov hmo, mas lawv txoj hmoov zoo. Kuv hais tseeb rau nej, tus tswv yuav sia siv, yuav kom cov tub txib ntawd zaum ntawm rooj mov, nws yuav rau mov rau lawv noj.
- 38 Txawm tias, tus tswv los txog thaum ib tag hmo los thaum qaib qua, yog nws pom zov hmo zoo li ntawd, mas cov tub txib txoj hmoov zoo !
- 39 Nej to taub qhov no zoo mog ! Yog tias tus tswv tsev paub lub sij hawm twg tub sab yuav tuaj, nws yuav tsis cia tub sab tho qhov tsev.
- 40 Nej kuj ib yam thiab, nej yuav npaj kom txhij, vim yog lub sij hawm uas nej tsis nco faj, mas Neeg Leej Tub thiaj yuav tuaj ."
- 41 Ces Pob Zeb hais tias : "HUAB TAIS, koj hais zaj paj lug no, puas yog koj hais rau peb, los hais rau sawv daws ?"

- 42 HUAB TAIS teb hais tias : "Leej twg yog tus tub txib pheej xeeb thiab xyuam xim, uas tus tswv tsev yuav tsa nws saib tus tswv cov tub zog, kom thaum txog caij nws faib hmoov nplej rau lawv ?
- 43 Yog thaum tus tswv rov los txog, nws pom tus tub txib tab tom lis nws tej num, mas tus tub txib no txoj hmoov yuav zoo.
- 44 Kuv hais tseeb rau nej, tus tswv yuav tsa nws saib tus tswv lub cuab tam tas huv si.
- 45 Tab sis yog tus tub txib ntawd xav hauv siab tias 'kuv tus Tswv yuav los lig,' ces nws muab tus tswv tej tub txib ntxhais txib ntaus, nws noj nws haus kom qaug.
- 46 Tus tub txib no tus tswv yuav los txog hnuv uas nws tsis nco faj, thiab lub sij hawm uas nws tsis paub. Tus tswv yuav ntiab tus tub txib mus nrog cov tsis hwm Ntuj nyob.
- 47 Tus tub txib uas nws yeej paub qhov uas tus tswv xav kom ua, tab sis nws tsis npaj dab tsi li, thiab tsis tau ua raws li qhov tus tswv xav kom ua, mas tus tub txib ntawd yuav mag tus tswv rab nplawm ntau teg.
- 48 Hos tus tub txib uas yeej tsis paub qhov uas tus tswv xav kom ua, thiab nws kuj tau ua tej yam tsim nyog ntaus, mas nws yuav mag tus tswv nplawm sib me ntsis. Tus uas Ntuj tau pub ntau rau, Ntuj yuav tajj ntau rov qab. Tus uas Ntuj tso ntau yam rau nws ceev, mas Ntuj yuav kom nws xa ntau dua rov qab."

Yog Huab Tais Yes Xus Lub Moo Zoo

ZAJ NYEEM LUV LUV: Lk 12,35-40

NTAWV MOO ZOO: Lus Kas 12,35-40

Nej Mloog Ib Zag Nyob Hauv Lus Kas Ntawv Moo Zoo

- 35 Yes Xus hais rau cov thwj tim tias: "Nej sia siv thiab taws teeb,
- 36 zoo li ib co tub txib uas tos lawv tus tswv mus ua tshoob rov los. Thaum tus tswv rov los txog, nws yuav khob qhov rooj, ces lawv yuav qhib rau nws tam sis ntawd.
- 37 Cov tub txib uas thaum tus tswv los txog, nws pom lawv tseem zov hmo, mas lawv txoj hmoov zoo. Kuv hais tseeb rau nej, tus tswv yuav sia siv, yuav kom cov tub txib ntawd zaum ntawm rooj mov, nws yuav rau mov rau lawv noj.

- 38 Txawm tias, tus tswv los txog thaum ib tag hmo los thaum qaib qua, yog nws pom zov hmo zoo li ntawd, mas cov tub txib txoj hmoov zoo !
- 39 Nej to taub qhov no zoo mog ! Yog tias tus tswv tsev paub lub sij hawm twg tub sab yuav tuaj, nws yuav tsis cia tub sab tho qhov tsev.
- 40 Nej kuj ib yam thiab, nej yuav npaj kom txhij, vim yog lub sij hawm uas nej tsis nco faj, mas Neeg Leej Tub thiaj yuav tuaj."

Yog Huab Tais Yes Xus Lub Moo Zoo

HNUB CHIV 20 NRUAB XYOO A CHÚA NHẬT 20 THƯỜNG NIÊN NĂM A

ZAJ NYEEM IB: His Xais 56,1.6-7

Cov lus nyob hauv ntawv His Xais

- 1 HUAB TAIS hais li no : "Nej mloog kev kawm Txoj Cai, nej coj kev haum pheet mog ! Kuv txoj kev cawm neeg tuaj yuav txog, kuv txoj kev yeej yuav tawm tuaj rau nej pom xyeem.
- 6 Cov pej kum neeg tuaj cuag HUAB TAIS, kom lawv tsob hwb HUAB TAIS, kom lawv nyiam HUAB TAIS lub npe, lawv ciaj ua HUAB TAIS cov tub txib. Vim lawv caiv hnuv Xas Npas Tos, thiab lawv nyob khov kho hauv txoj kev nrog kuv cog lus.
- 7 Kuv yuav coj lawv mus saum kuv lub roob Ntshiab. Kuv yuav ua kom lawv zoo siab nyob hauv kuv lub tsev teev Ntuj. Kuv yuav zoo siab txais cov thaj hlawv tsiaj thiab txi Ntuj nyob saum kuv lub thaj txi Ntuj. Vim kuv lub tsev yuav hu ua txhua haiv neeg lub tsev teev Ntuj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 66,2-3.5-6.8

Txais: Kom tsoom haiv neeg ua koj tsaug, Tswv Ntuj ! Kom tas txhia haiv neeg ua koj tsaug !

1. Thov kom TSWV NTUJ hluv peb thiab foom hmoov zoo rau peb. Thov koj ua koj lub ntsej muag ci tuaj rau peb. Lub ntiaj teb thiaj yuav paub koj txoj kev. Tas txhua haiv neeg yuav paub koj txoj kev cawm. **Teb**
2. Tas ib tsoom neeg yuav zoo siab dhia hom khaj vim koj txiav txim rau cov neeg raws kev ncaj. Koj tswj cov haiv neeg nyob hauv txoj kev haum pheet. **Teb**
3. Tas ib tsoom neeg cav txog TSWV NTUJ, tsoom laj mej pej xeeb ua koj tsaug. Thov kom TSWV NTUJ foom hmoov zoo rau peb, kom npoo ntuj npoo ntiaj teb hwm TSWV NTUJ. **Teb**

ZAJ NYEEM OB: Los Mas 11,13-15.29-32

Cov lus nyob hauv Paj Lug tsab ntawv xa rau cov ntseeg nyob Los Mas

- 13 Kuv tij sawv daws, kuv hais rau nej cov neeg teev pej kum dab hais tias : kuv yog tus Hauv Paus Xa Lus rau cov neeg teev pej kum dab tiag. Kuv saib kuv txoj hauj lwm muaj nqi.
- 14 Tab sis, kuv ua kom cov uas nrog kuv koom ib hom roj ntsha khib, vim kuv xav cawm lawv ib txhia.
- 15 Yog lub sij hawm uas Ntuj tshem lawv rau ib cag, ces lub qab ntuj neeg rov sib haum xeeb, yog li, thaum Ntuj txais lawv rov los, mas lawv yuav zoo cuag li txoj kev sawv hauv cov tuag rov los.
- 29 Vim tias thaum TSWV NTUJ tau pub txiaj ntsim thiab hu nws haiv neeg, mas nws tsis thim nws lo lus.
- 30 Thaum ub, nej tsis tau mloog TSWV NTUJ lus, tsis kav, nyem no TSWV NTUJ zam rau nej, vim cov His Xas Lais tsis mloog lus.
- 31 Nyem no, cov His Xas Lais tsis mloog Ntuj lus, tab sis muaj ib hnuv TSWV NTUJ yuav zam rau lawv, vim nws twb zam rau nej.
- 32 TSWV NTUJ cia ib tsoom neeg kaw rau hauv txoj kev tsis mloog lus, kom nws tau kev zam rau ib tsoom.

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 4,23

As les lus yas. As les lus yas. YES XUS tshaj Lub Moo Zoo hais txog HUAB TAIS Ntuj Lub Ceeb Tsheej. Nws kho cov neeg tuaj cuag nws, lawv tej mob zoo hlo. As les lus yas.

NTAWV MOO ZOO: Mas Tais 15,21-28

Nej Mloog Ib Zag Nyob Hauv Mas Tais Ntawv Moo Zoo

- 21 YES XUS tawm ntawm qhov chaw ntawd, nws mus rau Tws Los thiab Xis Doos teb.
- 22 Muaj ib tug poj niam Kas Nas Has nyob hauv teb chaws ntawd tuaj. Nws hu nrov tias : "HUAB TAIS, Das Vis Leej Tub, thov koj khuv leej kuv : kuv tus ntxhais raug ib tug dab phem tsiv kawg."
- 23 YES XUS tsis teb ib los li. Cov thwj tim txav los thov tias : "Koj ua rau nws, vim nws pheej hu nrov nrov lawv peb qab."
- 24 YES XUS teb rau lawv tias : "Ntuj xa kuv tuaj cawm cov yaj ploj hauv His Xas Lais tsev neeg xwb."

- 25 Tab sis tus poj niam twb tuaj txog ze lawm, nws txhos caug ntawm YES XUS xub ntiag, nws thov tias : "HUAB TAIS, thov koj pab kuv !"
- 26 YES XUS teb rau nws tias : "Tsis phim muab me nyuam tej mov pov rau me nyuam dev."
- 27 Tus poj niam teb tias : "HUAB TAIS, yog li koj hais. Tab sis cov me nyuam dev tsuas noj tej tsig mov txej ntawm lawv tus tswv lub rooj los xwb !"
- 28 Ces YES XUS teb rau nws tias : "Niam phauj, koj lub siab ntseeg loj kawg. Kom koj tau raws li koj lub siab xav." Ces nws tus ntxhais zoo hlo tam sis ntawd.

Yog Huab Tais Yes Xus Lub Moo Zoo

HNUB CHIV 20 NRUAB XYOO B CHÚA NHẬT 20 THƯỜNG NIÊN NĂM B

ZAJ NYEEM IB: Cov Paj Lug 9,1-6

Cov lus nyob hauv ntawv Cov Paj Lug

- 1 Txoj kev thoob tsib txhim tau nws lub tsev lawm. Nws tsa xya tus ncej.
- 2 Nws muab tej tsiaj tua, nws npaj cawv, npaj rooj mov tas.
- 3 Kev thoob tsib tso nws cov ntxhais txib mus tshaj saum tej tshav suab puam siab, hauv tej tsheej tias :
- 4 "Cov neeg siab ncaj, nej tuaj ntawm no mas!"
- 5 Nws hais rau cov neeg ruam tias : "Nej tuaj noj kuv rooj mov, nej haus cov cawv kuv npaj.
- 6 Nej tso kev ruam tseg, nej thiaj yuav muaj txoj sia. Nej mus taug txoj kev ncaj kev muaj tswv yim."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 32,2-3.10-15

Txais: Nej saj ces nej yuav pom HUAB TAIS lub siab zoo.

1. Kuv cav lus zoo txog HUAB TAIS txhua niaj txhua hnuv. Kuv lub ncauj yuav cav lus zoo txog nws. Kuv tus ntsuj plig yuav muaj ntsej muag nyob hauv HUAB TAIS. Cov neeg me hnov kuv cov lus, lawv yuav zoo siab. **Teb**
2. Nej nrog kuv cav txog HUAB TAIS, peb ua ke tshaj nws lub npe. Kuv nrhiav HUAB TAIS, nws teb kuv. Nws pab kuv dim ntawm txhua yam uas kuv ntshai. **Teb**
3. Cov neeg nrhiav HUAB TAIS, lawv yuav muaj ntsej muag luag ntshi nyob hauv kev hom khaj. Lawv yuav tsis poob ntsej muag. Thaum cov txom nyem hu txog HUAB TAIS, nws mloog lawv. Nws cawm lawv ntawm kev txhawj xeeb. **Teb**

ZAJ NYEEM OB: Es Fes Xos 5,15-20

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 15 Kwv tij sawv daws, ua li mas nej ceev faj rau nej tus yam ntxwv kom txhob ua neeg tsis muaj tswv yim, tsuas ua neeg thoob tsib xwb.
- 16 Nyem no, nej kav tsij rau siab leg cov hauj lwm zoo, vim lub zim txwv no phem heev.
- 17 Nej txhob ua neeg tsis paub tab. Nej nrhiav kom pom saib, HUAB TAIS xav kom nej ua dab tsi.
- 18 Nej tsis txhob haus cawv kom qaug, kev haus dej haus cawv kom qaug kawg coj nej mus rau kev tsis tsim txiaj. Nej cia LEEJ NTUJ PLIG los nyob puv hauv nej.
- 19 Nej ua ke hais tej zaj nkauj paj nruag, tej zaj hu nkauj, tej zaj paj huam seev uas LEEJ NTUJ PLIG tshoj. Nej muab tas nej lub siab los hu nkauj, thiab cav lus zoo txog HUAB TAIS.
- 20 Nej tuav txog peb tus HUAB TAIS YES XUS PLEEV lub npe txhua lub sij hawm, nej ua LEEJ TXIV TSWV NTUJ tsaug tsis muaj caij so, tas mus li.

Yog Tswv Ntuj Lo Lus

NKAUJ CAV TXOG LUB MOO ZOO: Zam 6,56

As les lus yas. As les lus yas. HUAB TAIS hais tias: “Yog leej twg tau noj kuv lub cev thiab leej twg haus kuv cov ntshav mas nws yuav nyob hauv kuv thiab kuv yuav nyob txawm hauv nws. As les lus yas.

NTAWV MOO ZOO: Zam 6,51-58

Nej Mloog Ib Zag Nyob Hauv Zam Ntawv Moo Zoo

- 51 Yes Xus hais rau cov Yus Das tias: “Kuv yog cov mov muaj txoj sia nqes saum ntuj los. Leej twg noj cov mov no, nws yuav cial nyob mus li. Cov mov uas kuv yuav muab pub rau lub qab ntuj neeg noj kom lawv muaj txoj sia, yog kuv lub cev nqaij.”
- 52 Ces cov Yus Das sib cav zom zaws tias : "Tus neeg ntawd yuav ua li cas muab tau nws cev nqaij los rau peb noj ?"
- 53 YES XUS thiaj hais rau lawv tias : "Kuv hais qhov tseeb tiag rau nej: Yog nej tsis noj Neeg Leej Tub lub cev nqaij thiab tsis haus nws cov ntshav, mas nej yuav tsis muaj txoj sia nyob hauv nej.

- 54 Hos tus noj kuv lub cev nqaij thiab haus kuv cov ntshav, nws muaj txoj sia nyob mus li. Hnub kawg, kuv yuav tsa nws sawv rov qab los.
- 55 Vim kuv lub cev nqaij yog ib co tseem txhiam xws noj, thiab kuv cov ntshav yog ib yam zoo haus.
- 56 Tus noj kuv cev nqaij thiab haus kuv cov ntshav, nws nyob hauv kuv thiab kuv nyob hauv nws.
- 57 Leej Txiv uas nws muaj txoj sia, nws xa kuv tuaj, ces kuv muaj txoj sia vim Leej Txiv. Li ntawd, tus noj kuv, nws kuj yuav muaj txoj sia, vim kuv.
- 58 Cov mov nqes saum ntuj los yog zoo li ntawd. Cov mov no tsis zoo li cov uas cov yawg koob tau noj, tab sis lawv tuag tas lawm. Hos tus noj cov mov no, mas nws yuav ciao nyob mus li."

Yog Huab Tais Yes Xus Lub Moo Zoo

HNUB CHIV 20 NRUAB XYOO C CHÚA NHẬT 20 THƯỜNG NIÊN NĂM C

ZAJ NYEEM IB: Yes Les Mias 38,4-6.8-10

Cov lus nyob hauv ntawv Yes Les Mias

- 4 Cov nom tswv hais rau tus vaj tias : "Yes Les Mias, tus neeg phem ntawd, koj muab nws tua mas ! Vim nws hais ib co lus tsis zoo ua kom cov tub rog zov lub nroog thiab cov pej xeem ntaus siab me. Tus ntawd tsis xav nrhiav kev cawm tsoom pej xeem, nws coj lawv mus raug txom nyem."
- 5 Tus vaj Xes Des Xis teb tias : "Nej ntsia, nws nyob ntawm no. Nws nyob hauv nej tes. Tus vaj ua tsis tau dab tsi los tiv nej !"
- 6 Lawv ntes Yes Les Mias, lawv muab nws pov rau hauv vaj tus tub hu ua Mas Kis Yas Hus lub qhov tim thaj uas nyob hauv lub tshav zov keeb. Lawv muab hlua tso nws nqes mus hauv lub qhov tim thaj. Nyob hauv lub qhov tim thaj tsis muaj dej, tab sis muaj av nkos, ces Yes Les Mias zom rau hauv cov av nkos.
- 8 Es Npes Mes Les, yog ib tug neeg sam ua kab xwm hauv tus vaj tsev. Nws tawm hauv vaj ntxwv lub loog tuaj hais rau tus vaj tias :
- 9 "Huab tais vaj ntxwv, cov neeg ntawd ua tsis zoo rau tus Yaj Saub Yes Les Mias, lawv muab nws pov rau hauv lub qhov tim thaj mas nws kawg yuav tuag nyob hauv xwb."
- 10 Ces tus vaj hais rau Es Npes Mes Les tias: "Koj coj peb tug neeg nyob ntawm no nrog koj, nej mus thau tus Yaj Saub Yes Les Mias tawm los cheem nws tseem muaj txoj sia."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 39,2-4.18

Txais: HUAB TAIS, thov koj tuaj pab kuv.

1. Kuv tos ntsoov HUAB TAIS, nws khoov los ze kuv. **Teb**
2. HUAB TAIS hnov kuv lub suab quaj. Nws rub kuv tawm ntawm txoj kev piam sij thiab kev tsaus ntuj. Thaum kuv tshais ruam, nws hwj kuv. **Teb**

3. Nws tso ib zaj nkauj tshiab rau hauv kuv lub ncauj, yog zaj nkauj cav txog peb tus TSWV NTUJ. Coob leej pom, lawv yuav hwm HUAB TAIS, lawv tso siab rau nws. **Teb**
4. Kuv pluag, kuv txom nyem, HUAB TAIS nco txog kuv. Koj yog tus pab kuv thiab npo kuv. HUAB TAIS, koj txhob ua siab hnyav! **Teb**

ZAJ NYEEM OB: Hes Nplaws 12,1-4

Cov lus nyob hauv tsab ntawv xa rau cov ntseeg Hes Nplaws

- 1 Kwv tij sawv daws, li ntawd, muaj tim khawv coob kawg nyob ncig peb, mas peb yuav muab txhua lub nra txo pov tseg, thiab muab tej kev txhaum uas thaiv peb kev xyeeb hlo pov tseg. Peb kav tsij tso sas ntws mus txais txoj kev sim siab uas Ntuj npaj rau peb.
- 2 Peb yuav ntsia ntsoov YES XUS uas yog tus ntaus thawj coj cov ntseeg. Nws pab peb ntseeg kom tom thawj. YES XUS tsis kam taug txoj kev lom zem uas luag cev rau nws, nws yeem kwv ntoo cuam, nws tsis ntshai luag thuam, tsis ntshai poob ntsej muag. Nyem no nws zaum ntawm TSWV NTUJ lub theej kiab sab xis.
- 3 Nej nco ntsoov txog YES XUS uas raug cov neeg txhaum tiv nws, nej thiaj yuav tsis ntaus siab me.
- 4 Nej tseem tsis tau tawm tsam tiv kev txhaum txog thaum nqaij ntuag ntshav nrog.

Yog Tswv Ntuj Lo Lus

NKAUJ CAV TXOG LUB MOO ZOO: Zam 10,27

As les lus yas. As les lus yas. Huab Tais hais tias: “Kuv cov yaj mloog kuv lub suab. Kuv paub kuv cov yaj, lawv raws li nraim kuv mus.” As les lus yas !

NTAWV MOO ZOO: Lus Kas 12,49-53

Nej Mloog Ib Zag Nyob Hauv Lus Kas Ntawv Moo Zoo

- 49 Yes Xus hais rau cov thwj tim tias: “Kuv coj ib co hluav taws tuaj rau lub ntiaj teb, kuv yeej xav kom cov hluav taws ntawd twb cig lawm.

- 50 Kuv yuav tsum txais ib co kab ke ntxuav. Kuv ntxhov siab mus txog hnuv uas tej ntawd tiav tas.
- 51 Nej puas xav tias kuv tuaj pub txoj kev thaj yeeb nyob ntiaj teb no? Kuv hais rau nej, kuv tsis tuaj pub kev thaj yeeb, kuv coj kev sib ncaim tuaj.
- 52 Txij no mus, ib tse neeg muaj tsib leeg yuav sib ncaim, peb leeg yuav tiv ob leeg, ob leeg yuav tiv peb leeg :
- 53 sawv daws yuav sib ncaim, txiv yuav tiv tub, tub yuav tiv txiv, niam yuav tiv ntxhais, ntxhais yuav tiv niam, poj yuav tiv nyab, nyab yuav tiv poj."

Yog Huab Tais Yes Xus Lub Moo Zoo

HNUB CHIV 21 NRUAB XYOO A CHÚA NHẬT 21 THƯỜNG NIÊN NĂM A

ZAJ NYEEM IB: His Xais 22,19-23

Cov lus nyob hauv ntawv His Xais

- 19 Huab Tais hais rau Xes Nas uas yog tus uas tu haujlwm thiab saib xyuas txhua yam hauv vaj lub tsev tias : Kuv yuav caum koj tawm ntawm koj lub chaw mus, kuv yuav rho koj ntawm koj tej chaw ua dej num.
- 20 Hnub ntawd, kuv yuav hu kuv tus tub txib Es Lias Kis tuaj.
- 21 Kuv yuav muab koj lub tsho tshaj sab rau nws hnay, kuv yuav muab koj txoj siv rau nws sia, kuv yuav muab koj tus nom rau nws ua, nws yuav sawv ua cov neeg nyob Yes Lus Xas Les txiv thiab ua Yus Das tsev neeg txiv.
- 22 Kuv yuav muab Das Vis tsev neeg tus yawm sij tso saum nws xub pwg. Yog nws qhib mas tsis muaj leej twg yuav kaw, yog nws kaw mas tsis muaj leej twg yuav qhib.
- 23 Kuv cog nws xws li ib tug ntsia nyob hauv ib qho chaw khov, nws yuav hloov ua ib lub theej kiab muaj koob meej rau nws txiv tsev neeg."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 1371-3.6.8bc

Txais: HUAB TAIS, koj txoj kev hlub nyob mus ib txhiab ib txhis. Koj txhob tso cov hauj lwm koj txhais tes tsim pov tseg.

1. HUAB TAIS, kuv muab tas kuv siab ntsws los ua koj tsaug vim koj hnov cov lus tawm ntawm kuv lub ncauj los. Kuv hu nkauj cav txog koj nyob ntawm ib tsoom tshiab xub ntiag. Kuv yuav hawm koj nyob hauv koj lub tuam tsev ntshiab. **Teb**
2. Kuv ua tsaug rau koj lub npe vim koj hlub thiab pheej xeeb. Kuv hu txog koj, koj teb kuv, koj txhab zog rau kuv. **Teb**
3. HUAB TAIS nyob siab, nws txheem tus neeg me. Nws nyob deb zeem tau tus muab hlob. HUAB TAIS, koj lub siab hlub nyob mus ib txhiab ib txhis. Koj txhob tso cov hauj lwm koj txhais tes tsim pov tseg. **Teb**

ZAJ NYEEM OB: Los Mas 11,33-36

Cov lus nyob hauv Paj Lug tsab ntawv xa rau cov ntseeg nyob Los Mas

- 33 Kwv tij sawv daws, TSWV NTUJ cov paj tshab muaj nqis tas nrho ! TSWV NTUJ lub tswv yim thooob tsib tas nrho ! TSWV NTUJ cov txuj tob tas nrho ! Neeg tsom tsis tau TSWV NTUJ cov lus qhia. Neeg tsis to taub TSWV NTUJ tej kev.
- 34 Leej twg yuav paub tau zaj uas HUAB TAIS xav ? Leej twg yuav qhia tswv yim tau rau HUAB TAIS ?
- 35 Leej twg xub tau pub txiaj ntsim paj tshab rau TSWV NTUJ, ces nws yuav kom TSWV NTUJ them rov rau nws ?
- 36 Txhua yam tuaj ntawm TSWV NTUJ tuaj. Yog nws ua kom txhua yam tshwm sim los. Txhua yam yog nws tug. Lub hwj chim yog TSWV NTUJ tug mus ib txhiab ib txhis. Ua li.

Yog Tswv Ntuj Lo Lus

NKAUJ CAV TXOG LUB MOO ZOO: Mt 16,18

As les lus yas. As les lus yas. Koj yog lub pob zeb, kuv yuav tsa kuv lub Koom Txoos nyob rau saum lub pob zeb no. Dab phem cov qhov rooj yuav tiv tsis tau lub pob zeb no. As les lus yas.

NTAWV MOO ZOO: Mas Tais 16,13-20

Nej Mloog Ib Zag Nyob Hauv Mas Tais Ntawv Moo Zoo

- 13 YES XUS tuaj txog cheeb tsam ntawm Xes Ntxas Les Fis Lis Pos, ces nws nug cov thwj tim li no : "Luag tej hais tias Neeg Leej Tub yog leej twg ?"
- 14 Lawv teb tias : Ib txhia hais tias : Yog Zam Ntxuav Plig. Ib txhia hais tias, yog Es Lias. Tseem muaj lwm cov hais tias yog Yes Les Mias los yog ib tug hauv cov yaj saub. YES XUS hais tias :
- 15 Yes Xus ho hais rau cov thwj tim tias: "Nej ne, nej hais tias kuv yog leej twg ?"
- 16 Xis Moos Pob Zeb teb tias : "Koj yog Leej Pleev, yog tus TSWV NTUJ Muaj Txoj Sia Leej Tub."
- 17 YES XUS teb rau Pob Zeb tias: "Xis Moos, Yos Nas tus tub, koj txoj hmoov zoo, vim qhov koj paub no, tsis yog nqaij thiab ntshav qhia koj. Yog kuv Txiv nyob saum ntuj qhia koj.

- 18 Ua li mas kuv hais rau koj: Koj yog Pob Zeb, kuv yuav txhim kuv lub Koom Txoos rau saum lub pob zeb no. Dab phem teb cov qhov rooj yuav tiv tsis taus lub pob zeb no.
- 19 Kuv yuav muab Ntuj lub Ceeb Tsheej cov yawm sij rau koj. Koj khi yam twg nyob ntiaj teb no, Ntuj yuav saib yam ntawd yog khi nyob saum ntuj. Koj daws yam twg nyob ntiaj teb no, Ntuj yuav saib yam ntawd yog daws nyob saum ntuj."
- 20 Ces YES XUS txwv cov thwj tim tsis pub qhia leej twg tias nws yog Leej Pleev.

Yog Huab Tais Yes Xus Lub Moo Zoo

HNUB CHIV 21 NRUAB XYOO B CHÚA NHẬT 21 THƯỜNG NIÊN NĂM B

ZAJ NYEEM IB: Yos Xuas 24,1-2a.15-18b

Cov lus nyob hauv ntawv Yos Xuas

- 1 Yos Xuas hu tas nrho cov xeeb His Xas Lais tuaj nyob Xis Kes. Nws hu cov txwj laus His Xas Lais, cov nom tswv, cov txiav txim thiab cov thoob xwm ntawv tuaj sawv ua tej phiaj nyob ntawm TSWV NTUJ xub ntiag.
- 2a Ces Yos Xuas hais rau tsoom sid sawv daws tias :
- 15 “Tab sis yog nej tsis zoo siab tsoob hwb HUAB TAIS, mas nej cia li xaiv ib co dab uas nej xav tsoob hwb. Nej puas xaiv nej cov yawg koob thaud cov dab los puas xaiv cov As Mos cov dab, uas nyem no nej nyob hauv lawv teb chaws ? Ntawm kuv thiab kuv tsev neeg mas peb xav tsoob hwb HUAB TAIS.”
- 16 Ces tsoom sid teb tias : “Peb tsis tso HUAB TAIS pov tseg mus teev lwm cov dab li!
- 17 Peb tus HUAB TAIS TSWV NTUJ tsis yog tus tau coj peb cov yawg koob thiab coj peb tawm hauv Hais Nkws Tos teb los lod ? Nws cawm peb dim ntawm lub tsev ua qhev. Nws tau ua hwj huam loj rau peb qhov muag pom xyeem. Thaum peb mus kev thiab peb hla pej kum teb chaws, nws tau txuag peb.
- 18b Peb kuj yuav tsoob hwb HUAB TAIS, vim nws yog peb tus TSWV NTUJ.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 33,2-3.16-23

Txais: Nej saj ces nej yuav pom HUAB TAIS lub siab zoo.

1. Kuv cav lus zoo txog HUAB TAIS txhua niaj txhua hnuv. Kuv lub ncauj yuav cav lus zoo txog nws. Kuv tus ntsuj plig yuav muaj ntsej muag nyob hauv HUAB TAIS. Cov neeg me hnov kuv cov lus, lawv yuav zoo siab. **Teb**
2. HUAB TAIS dauv muag ntsia cov neeg ncaj, nws tig ntsej los mloog lawv lub suab. HUAB TAIS tiv cov neeg ua phem, Nws ua kom ntiaj teb neeg txhob nco qab txog lawv. **Teb**
3. Cov neeg siab ncaj quaj hu txog HUAB TAIS. Nws hnov lawv lub suab, nws npo lawv. HUAB TAIS nyob ze cov neeg ntxhov siab, nws cawm cov neeg qaug zog. **Teb**

4. Thaum tus siab ncaj raug xwv txheej, HUAB TAIS npo nws. HUAB TAIS zov tus siab ncaj cov pob txha, nws tsis cia kom ib tug pob txha lov. **Teb**
5. Kev puas tsuaj puas ntsoog tua tus neeg phem, tus neeg ncaj cov yeeb nuab yuav raug txim. HUAB TAIS txhiv nws cov tub txib txoj sia: cov tuaj nkaum hauv HUAB TAIS, tsis raug nplua ib tug li. **Teb**

ZAJ NYEEM OB: Es Fes Xos 5,21-32

Cov lus nyob hauv Paj Lug tsab ntawv xa rau cov ntseeg nyob Es Fes Xos

- 21 Kwv tij sawv daws, nej yuav rov sib mloog hais, vim nej hwm Leej Plev.
- 22 Cov poj niam yuav mloog lawv tus txiv lus, ib yam li mloog HUAB TAIS.
- 23 Tus txiv yog poj niam tus tswv, ib yam li Leej Plev yog lub Koom Txoos tus Tswv, thiab yog tus cawm lub cev.
- 24 Lub Koom Txoos mloog Leej Plev lus. Ua li mas cov poj niam kuj yuav mloog lawv tus txiv lus.
- 25 Nej cov ua txiv, nej yuav hlub nej cov poj niam xws li Leej Plev hlub lub Koom Txoos. Leej Plev muab nws txoj sia los cawm lub Koom Txoos.
- 26 Leej Plev ua kom lub Koom Txoos ntshiab tuaj thiab huv tuaj, nyob hauv cov dej uas ntxuav lawv, nrog lo lus ib txhij hais.
- 27 Vim YES XUS xav cev ib lub Koom Txoos ci ntsa iab rov rau nws, ib lub Koom Txoos uas tsis tsuas ib tee qias, lub ntsej muag tsis muaj ib kab txoom, tsis muaj ib yam xyeej. Ces nws thiaj yuav tau ib lub Koom Txoos ntshiab, tsis tsuas ib tee.
- 28 Ua li mas, cov ua txiv yuav hlub lawv cov poj niam, ib yam li lawv lub cev kiag. Nyiam yus tus poj niam, yog rov nyiam yus kiag.
- 29 Tsis muaj leej twg yuav ntxub nws lub cev: yus yug yus lub cev, thiab yus tu kom zoo. Leej Plev ua zoo li ntawd rau lub Koom Txoos:
- 30 peb tsis yog cov tes taw hauv Leej Plev lub Cev lod ?
- 31 Vim li ntawd, ‘Tus txiv neej yuav tso nws niam nws txiv tseg, mus nrog nws poj niam ua ib nkawg. Nkawd ob leeg yuav ua ib lub cev xwb’ :
- 32 lo lus tob no muaj ib lub ntsiab loj ; kuv xav qhia tias, lo lus tob no, hais txog Leej Plev thiab lub Koom Txoos.

Yog Tswv Ntuj Lo Lus

NKAUJ CAV TXOG LUB MOO ZOO: s. Zam 6,63c.68c

As les lus yas. As les lus yas. HUAB TAIS, koj cov lus yog txoj sia thiab ntsuj plig. Koj muaj cov lus pub txoj sia nyob mus li. As les lus yas.

NTAWV MOO ZOO: Zam 6,54a.60-69

Nej Mloog Ib Zag Nyob Hauv Zam Ntawv Moo Zoo

- 54a Huab Tais Yes Xus hais tias: "Hos tus noj kuv lub cev nqaij thiab haus kuv cov ntshav, nws muaj txoj sia nyob mus li."
- 60 YES XUS ib co thwj tim coob tau hnov cov lus ntawd, ces lawv hais tias : "Cov lus no tawv dhau, leej twg yuav mloog tau ?"
- 61 Tab sis YES XUS yeej paub hauv nruab siab tias nws cov thwj tim yws txog cov lus ntawd, nws thiaj hais rau lawv tias : "Tej lus ntawd dawm nej taw lod ?"
- 62 Yog nej tseem pom Neeg Leej Tub nce mus saum qhov chaw uas thaud nws nyob, nej yuav ua li cas to taub ?
- 63 Yog tus ntsuj plig ua kom muaj txoj sia, lub cev nqaij ua tsis tau dab tsi. Cov lus uas kuv hais rau nej yog ntsuj plig thiab yog txoj sia.
- 64 Tab sis nyob hauv nej, muaj ib co tsis ntseeg." Vim txij lub hauv paus los, YES XUS yeej paub tias cov tsis ntseeg yog leej twg, thiab tus yuav muab nws muag yog leej twg.
- 65 Ces YES XUS hais tias : "Vim li no kuv thiaj hais rau nej tias tsis muaj leej twg tuaj cuag kuv tau, yog Leej Txiv tsis pub qhov ntawd rau nws."
- 66 Txij thaum ntawd los, YES XUS ib co thwj tim coob thiaj li rov qab mus tsev, lawv tsis nrog YES XUS mus ntxiv lawm.
- 67 YES XUS thiaj hais rau Pab Kaum Ob tias: "Nej ne, nej puas xav mus thiab ?"
- 68 Xis Moos Pob Zeb teb rau YES XUS tias : "HUAB TAIS, peb yuav mus nrog leej twg ? Koj muaj cov lus pub txoj sia nyob mus li.
- 69 Peb ntseeg thiab peb paub tias koj yog TSWV NTUJ tus Ntshiab."

Yog Huab Tais Yes Xus Lub Moo Zoo

HNUB CHIV 21 NRUAB XYOO C CHÚA NHẬT 21 THƯỜNG NIÊN NĂM C

ZAJ NYEEM IB: His Xais 66,18-21

Cov lus nyob hauv ntawv His Xais

- 18 Thaum cov His Xas Lais mus nyob txim nyob Npas Npis Los, lawv rov los txhim lub Tuam Tsev Teev Ntuj, mas Huab Tais kom tus yaj saub hais tias: “Kuv tuaj sau txhua lub kuj cuab thiab txhua xeem lus. Lawv yuav tuaj, lawv yuav pom kuv lub hwj chim.
- 19 Kuv yuav tsa ib lub cim nyob hauv cov kuj cuab. Kuv yuav xa cov neeg dim ntawm kev raug txim mus cuag cov kuj cuab, thiab cov pov txwv nyob deb uas tsis tau hnov hais txog kuv, tsis tau pom kuv lub hwj chim. Cov dim ntawm kev raug txim yuav tshaj kuv lub koob meej nyob hauv cov kuj cuab.
- 20 Lawv yuav coj nej toom kwv tij tas huv si nyob hauv cov kuj cuab rov qab los, yuav cev lawv ua thaj txi HUAB TAIS. Tus caij nees kuj muaj, tus caij tsheb ob lub log los plaub lub log kuj muaj. Tus caij luj los caij ntxhuav kuj muaj. Lawv tuaj txog kuv lub roob ntshiab Yes Lus Xas Les. HUAB TAIS hais tias lawv ua xws li toom His Xas Lais, lawv cev toob xib nyob hauv cov phaj ntshiab huv los txi Ntuj hauv HUAB TAIS lub tsev.
- 21 Kuv yuav tsa lawv tej tug los ua Leej Choj thiab ua Les Vis.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 116,1-2

Txais: Nej mus thoob qab ntuj, nej tshaj kuv lub moo zoo rau txhua leej txhua tus.

1. Tas txhua haiv neeg, nej cav lus zoo txog HUAB TAIS. Tas ib toom neeg, nej cav txog nws lub koob meej. **Teb**
2. HUAB TAIS lub siab hlub muaj zog tas nrho. Nws lub siab pheej xeeb mus ib txhiab ib txhis. **Teb**

ZAJ NYEEM OB: Hes Nplaws 12,5-7.11-13

Cov lus nyob hauv tsab ntawv xa rau cov ntseeg Hes Nplaws

- 5 Kwv tij sawv daws, nej puas nco qab lo lus uas Ntuj hais rau nej xws li hais rau ib co tub tias : “Me tub, koj txhob thuam HUAB TAIS lo lus qhuab. Thaum nws cob qhia koj, koj txhob ua siab me.
- 6 Vim tias tus uas HUAB TAIS nyiam mas HUAB TAIS cob nws, thiab HUAB TAIS nplawm tus uas HUAB TAIS txais los ua nws tus tub.”
- 7 Kev raug luag hiam, yog ib txog kev cob nej. TSWV NTUJ cob nej xws li nws cov tub. Puas muaj ib tug tub uas nws txiv tsis cob qhia nws ?
- 11 Txoj kev cob qhia yeej tsis ua kom leej twg zoo siab tam sim ntawd, tsuas muaj ua kom chim siab xwb. Tsuas yog yav tom ntej, mas txoj kev cob qhia thiaj txi txiv rau hauv txoj kev thaj yeeb thiab txoj kev ncaj.
- 12 Ua li mas nej kav tsij rov tsa nej ob txhais tes tsaug leeg, rov sawv ntseeg saum nej lub hauv caug ntshaus raws.
- 13 Thiab nej ua kom tej kev nkhaus ncaj tuaj rau nej ob txhais taw, kom tus ceg tawv txhob lem ko taw, nws thiaj yuav zoo taus.

Yog Tswv Ntuj Lo Lus

NKAUJ CAV TXOG LUB MOO ZOO: Zam 14,6

As les lus yas. As les lus yas. Huab Tais hais tias, “Kuv yog txoj kev, qhov tseeb thiab yog txoj sia. Leej twg taug ntawm kuv, nws thiaj yuav mus txog Leej Txiv.” As les lus yas.

NTAWV MOO ZOO: Lus Kas 13,22-30

Nej Mloog Ib Zag Nyob Hauv Lus Kas Ntawv Moo Zoo

- 22 YES XUS mus hauv cov nroog thiab cov zos, nws qhia sawv daws. Nws taug kev mus rau Yes Lus Xas Les.
- 23 Muaj ib tug hais rau YES XUS tias : "HUAB TAIS, cov yuav txais kev cawm puas yog cov tsawg ?" YES XUS hais rau lawv tias :
- 24 "Nej ua tiag mus hauv lub qhov rooj nqaim mog. Kuv hais rau nej: coob leej yuav nrhiav kev mus lawm hauv, tab sis lawv yuav mus tsis txog.
- 25 Thaum tus tswv tsev sawv mus kaw qhov rooj lawm, tab sis nej tseem nyob nraum zoov, nej yuav pib khob qhov rooj thiab nej yuav hais tias :

- 'HUAB TAIS, koj qhib qhov rooj rau peb mas,' ces nws yuav teb rau nej tias : 'Kuv tsis paub nej nyob qhov twg tuaj.'
- 26 Ces nej yuav hais rau nws tias : 'Peb twb noj thiab haus nyob ntawm koj xub ntiag, hos koj twb qhia sawv daws nyob hauv peb cov tshav puam.'
- 27 Ces tus tswv tsev yuav hais rau nej tias : 'Kuv tsis paub nej nyob qhov twg tuaj. Nej txav mus deb kuv, tas nej cov ua tsis ncaj huv tib si.
- 28 Nej yuav pom Has Nplav Has, His Xas Has, Yas Kos, thiab ib tsoom yaj saub nyob hauv TSWV NTUJ lub Ceeb Tsheej, hos nej yuav raug luag ntiab mus nyob sab nraud, mas thaum ntawd nej yuav quaj ncia thiab yuav tom hniav nkawv.
- 29 Luag yuav tuaj Xib Fab thiab Toob Fab tuaj, tuaj Naj Fab thiab Pej Fab tuaj. Sawv daws yuav tuaj zaum ntawm rooj qav, nyob hauv TSWV NTUJ lub Ceeb Tsheej.
- 30 Ces muaj ib co neeg ua luag qab, yuav tau ua ntej, hos ib co ua ntej yuav ua qab."

Yog Huab Tais Yes Xus Lub Moo Zoo

HNUB CHIV 22 NRUAB XYOO A CHÚA NHẬT 22 THƯỜNG NIÊN NĂM A

ZAJ NYEEM IB: Yes Les Mias 20,7-9

Cov lus nyob hauv ntawv Yes Les Mias

- 7 HUAB TAIS, koj ntxias tau kuv lawm. Kuv mag koj ntxias. Koj nthos tau kuv lawm, koj yeej kuv lawm. Luag niaj hnub thum kuv, thiab hnyos kuv.
- 8 Kuv hais lus zaum twg mas kuv yuav tsum qw thiab tshaj tias : "Peb teb chaws yuav raug luag ntaus, peb teb chaws yuav ploj mus." Tas niaj tas hnub HUAB TAIS lo lus uas kuv tshaj ua kom kuv txaj muag thiab raug luag thum.
- 9 Ces kuv hais tias : "Kuv yuav tsis nco txog HUAB TAIS ntxiv, kuv yuav tsis tuav txog nws lub npe lawm. Tab sis nyob hauv kuv nruab siab thiab hauv kuv tej pob txha mas cuag li muaj hluav taws hlawv kuv." Kuv siv zog cheem kuv kom cov hluav taws ntawd txhob tshwm rau sab nraud, tab sis kuv nyiaj tsis taus li.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 62,2-6.8.9

Txais: Tswv Ntuj, koj yog kuv tus Tswv Ntuj ! Kuv tus plig nqhis koj!

1. TSWV NTUJ, koj yog tus kuv nrhiav ! Kuv lub cev seev yees txog koj. Kuv tus plig nqhis txog koj, puav tam li av qhuav tsis tau dej yug. **Teb**
2. Kuv mus ntsia koj nyob hauv lub tuam tsev ntshiab, kuv pom koj lub zog thiab lub hwj chim. Koj txoj kev hlub muaj nqis dua txoj sia, kuv lub ncauj yuav cav txog koj lub koob meej. **Teb**
3. Kuv yuav cav txog koj tas kuv sim neej. Kuv yuav tsa tes hawm koj thiab hu txog koj lub npe. Kuv tus plig zoo siab puav tam li tus tau noj ib roog qav. Kuv di ncauj hom khaj, kuv lub ncauj yuav cav txog koj. **Teb**
4. Koj tau pab kuv, kuv nqua suab hu nkauj nyob hauv koj phab tis qhov ntsoov. Kuv tus plig nyob ruaj nreb hauv koj, koj phab xis hwj kuv. **Teb**

ZAJ NYEEM OB: Los Mas 12,1-2

Cov lus nyob hauv Paj Lug tsab ntawv xa rau cov ntseeg nyob Los Mas

- 1 Kwv tij sawv daws, kuv tuav txog tus TSWV NTUJ khuv leej neeg lub npe, kuv thov qhuab ntuas nej, kom nej muab nej lub cev los txi rau TSWV NTUJ, zoo li ib co txim ntshiab muaj txoj sia ntxim TSWV NTUJ lub siab. Qhov ntawd yog txoj kev teev Ntuj nyob hauv nruab siab.
- 2 Nej tsis txhob koj ib tug cwj pwm raws li lub ntiaj teb : vim nej twb hloov ib lub tswv yim tshiab lawm. Lub tswv yim tshiab ntawd yuav ua kom nej hloov txhua yam, kom nej txawj tsum TSWV NTUJ lub siab xav, tsum qhov zoo, tsum qhov ntxim TSWV NTUJ siab, tsum qhov zoo tshaj plaws.

Yog Tswv Ntuj Lo Lus

NKAUJ CAV TXOG LUB MOO ZOO: s. Es Fes Xos 1,17-18

As les lus yas. As les lus yas. Thov kom peb tus HUAB TAIS YES XUS Leej Txiv tso qhov pom kev tuaj kaj peb siab kom peb tso siab lug taug txoj kev uas Ntuj hu peb vim Ntuj muaj hwj huam loj. As les lus yas.

NTAWV MOO ZOO: Mas Tais 16,21-27

Nej Mloog Ib Zag Nyob Hauv Mas Tais Ntawv Moo Zoo

- 21 Txij hnuv Xis Moos Pob Zeb teb tias : "Koj yog Leej Plev, yog tus Tswv Ntuj Muaj Txoj Sia Leej Tub", YES XUS pib qhia nws cov thwj tim tias nws yuav tsum mus Yes Lus Xas Les. Nyob ped, nws yuav raug cov txwj laus, cov thawj leej choj thiab cov Kws Ntawv Ntshiab tsim nws. Lawv yuav muab nws tua. Hnuv peb, nws yuav sawv rov los.
- 22 Pob Zeb rub YES XUS los ntawm nws, nws nroo rau YES XUS tias: "HUAB TAIS, xav kom TSWV NTUJ txuag koj ! Tsis pub kom tej yam ntawd tuaj raug koj !"
- 23 Tab sis, YES XUS fee hlo, nws hais rau Pob Zeb tias : "Xas Tas, koj lawv kuv qab. Koj thaiv kuv kev. Vim qhov koj xav, tsis yog qhov TSWV NTUJ xav, yog tej yam neeg xav xwb."
- 24 YES XUS hais rau nws cov thwj tim tias : "Yog leej twg xav los raws kuv, nws yuav tsum nrauj nws, nws yuav kwv nws tus ntoo cuam, nws yuav lawv kuv qab.

- 25 Vim leej twg xav cawm nws txoj sia, mas nws yuav plam nws txoj sia. Hos leej twg plam nws txoj sia vim kuv, mas nws yuav rov tau nws txoj sia.
- 26 Yog ib tug neeg txeeb tau tas lub ntiaj teb huv tib si los ua nws tug, tab sis yog nws txoj sia ploj lawm, mas nws tau dab tsi ? Neeg yuav muab dab tsi los pauv tau nws txoj sia ?
- 27 Vim tias Neeg Leej Tub yuav nrog nws cov Tub Xo los, muaj Leej Txiv lub hwj chim, ces nws yuav pauj rau nyias raws li nyias cov hauj lwm.

Yog Huab Tais Yes Xus Lub Moo Zoo

HNUB CHIV 22 NRUAB XYOO B CHÚA NHẬT 22 THƯỜNG NIÊN NĂM B

ZAJ NYEEM IB: Txoj Cai Ob 4,1-2.6-8

Cov lus nyob hauv ntawv Txoj Cai Ob

- 1 Mais Xes hais rau cov His Xas Lais: "Cov His Xas Lais, zaum no nej mloog txoj cai lij choj, thiab tej kab lis kev cai uas kuv qhia nej hnuv no, kom nej coj raws nraim txoj cai ntawd. Ces nej yuav muaj txoj sia, thiab nej yuav tau mus nyob hauv lub teb chaws uas nej cov yawg koob tus HUAB TAIS TSWV NTUJ muab rau nej nyob, kom nej tau txais los ua nej tug.
- 2 Nej yuav tsis txhob ntxiv ib lo lus rau qhov kuv qhia nej ua, tsis txhob tso ib lo lus pov tseg. Nej yuav khaws nej tus HUAB TAIS TSWV NTUJ cov lus qhuab qhia raws nraim li kuv ceeb toom rau nej.
- 6 Nej yuav mloog, yuav coj raws nraim cov lus qhia ntawd, nej thiaj yuav ua neeg thoob tsib, ua neeg ntse nyob ntawm cov pej kum neeg xub ntiag. Thaum lawv hnov hais txog txoj cai no, lawv yuav tsa suab hlo hais tias : Tsuas muaj ib haiv neeg xwb thiaj thoob tsib thiab ntse, yog haiv neeg loj ntawd !"
- 7 Haiv neeg twg thiaj muaj ib tug HUAB TAIS nyob ze lawv li peb tus HUAB TAIS TSWV NTUJ nyob ze peb niaj zaus peb hu txog nws ?
- 8 Haiv neeg twg thiaj muaj ib txog cai lij choj thiab ib co kab lis kev cai ncaj npaum li Txoj Cai uas kuv muab cev rau nej hnuv no ?"

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 14,2-4ab.5

Txais: HUAB TAIS, leej twg yuav tau mus nyob hauv koj lub tsev tsam phooj?

1. Tus neeg coj tus yeeb yam tsis muaj chaw xyeej, yog tus ua ncaj rau luag, tus xav qhov tseeb tuaj nruab siab; nws tsis cia nws tus nplaij hais lus dag. **Teb**
2. Tus tsis ua phem rau luag, tus tsis ua tub qaug cov neeg nyob ze nws, tus ntsub qhov phem thiab hwm cov neeg hwm Ntuj. **Teb**
3. Tus qiv nyiaj txiag rau luag, nws tsis tsub paj. Nws tsis txais luag nqi xiab kom muab txim rau tus tsis txhaum. Tus twg ua li no yuav nyob ruaj nreb. **Teb**

ZAJ NYEEM OB: Yas Kos 1,17-18.21b-22.27

Cov lus nyob hauv Yas Kos tsab ntawv

- 17 Kwv tij sawv daws, cov txiaj ntsim zoo thiab cov paj tshab tsis muaj chaw xyeej, yog tuaj saum ntuj tuaj tas huv si, yog Leej Txiv, uas nws ua kom txhua yam pom kev, tso nqes los tas huv tib si. Nyob hauv nws, tsis muaj ib yam txawj hloov, los txawj puas.
- 18 Leej Txiv pom zoo hais ib lo lus tseeb yug peb, kom peb ua thawj cov txiv txi hauv txhua yam uas nws tsim los.
- 21b Nej qhib ib lub siab zoo txais TSWV NTUJ Lo Lus uas nws muab cog rau hauv nej. Lo Lus ntawd yuav cawm nej tus plig.
- 22 Nej coj Lo Lus mus ua neej. Nej txhob cia li mloog Lo Lus xwb, nej txhob rov dag nej.
- 27 Txoj kev hwm Ntuj huv tsis lo ib yam qias, uas nyob ze ntawm peb Txiv TSWV NTUJ yog txoj no : yog mus xyuas cov me nyuam ntsuag thiab cov poj ntsuam uas raug kev tu siab, yog txuag yus lub siab kom txhob tsuas ib teev qias, yog nyob deb lub qab ntuj neeg.

Yog Tswv Ntuj Lo Lus

NKAUJ CAV TXOG LUB MOO ZOO: Yas Kos 1,18

As les lus yas. As les lus yas. Leej Txiv txaus siab muab lo lus tseeb yug los nyob hauv peb kom peb ua thawj cov txiv txi hauv txhua yam uas TSWV NTUJ tau tsim los nyob hauv ntiag teb. As les lus yas.

NTAWV MOO ZOO: Mas Kos 7,1-8a.14-15.21-23

Nej Mloog Ib Zag Nyob Hauv Mas Kos Ntawv Moo Zoo

- 1 Cov Fas Lis Xais thiab tus puav Kws Ntawv Ntshiab tuaj Yes Lus Xas Les tuaj, lawv sib sau ntsauv YES XUS.
- 2 Lawv pom tus puav thwj tim xuas tes tsis huv noj mov, yam li lawv tsis xub ntxuav tes,
- 3 vim tias cov Fas Lis Xais, thiab tas cov Yus Das huv tib si, mas lawv tsis noj mov yog lawv tsis xub ntxuav tes zoo zoo tso.
- 4 Thaum lawv mus kav kiab kav khw rov los, yog lawv tsis tau xub pov dej rau tso, mas lawv tsis noj mov. Tseem muaj ntau yam uas cov Yus Das ua raws li tej laus qhia kom ua : ntxuav khob, ntxuav hub, thiab ntxuav tais tooj dag.

- 5 Vim li ntawd, cov Fas Lis Xais thiab cov kws Ntawv Ntshiab thiaj nug YES XUS tias : "Ua cas koj cov thwj tim tsis ua raws li tej laus kev cai ib txwm qhia kom ua, lawv cia li xuas tes tsis huv noj mov ?"
- 6 YES XUS hais rau lawv tias : "Neeg zoo sab nraud, His Xais hais raug nej kawg, Ntawv thiaj sau tseg tias : Haiv neeg no tsuas hwm kuv saum di ncauj, lawv lub siab nyob deb kuv.
- 7 Lawv lam teev kuv dag, lawv muab neeg tej kab ke los nthuav xws li yog Ntuj lus qhia !
- 8a "Nej tso TSWV NTUJ lo lus qhia tseg, nej muab nej khi rau neeg tej kev cai."
- 14 YES XUS rov hu toom sid los ntawm nws, ces nws hais rau lawv tias : "Tas nej sawv daws, nej mloog kuv kom nej to taub mog !
- 15 Tsis muaj dab tsi nyob sab nraum neeg lub cev, uas nkag rau hauv neeg, yuav ua kom neeg tsis huv. Yam ua kom neeg tsis huv yog yam tawm hauv neeg los.
- 21 Vim tej yam phem uas txhawv hauv neeg nruab siab los yog : kev ua dev ua npua, ua tub sab, tua neeg,
- 22 deev luag txij nkawm, cuaj khaum, lim hiam, ua cuav, ntxias luag ua plees ua yi, khib, xyav luag moo, muab hlob, ywj fab ywj fwj.
- 23 Txhua hom kev phem no tawm sab hauv los, mas thiaj ua kom neeg tsis huv."

Yog Huab Tais Yes Xus Lub Moo Zoo

HNUB CHIV 22 NRUAB XYOO C CHÚA NHẬT 22 THƯỜNG NIÊN NĂM C

ZAJ NYEEM IB: Npes Xis Las 3,17-18.20.28-29

Cov lus nyob hauv ntawv Npes Xis Las

- 17 Me tub, thaum koj ua koj tes dej num, koj txhob muab hlob, ces cov neeg uas ntuj xaiv yuav nyiam koj.
- 18 Koj yim yog tus loj, koj yim yuav nyiam ua tus me, koj thiaj yuav yog tus neeg xis HUAB TAIS siab.
- 20 Vim HUAB TAIS lub hwj huam loj tas nrho, thiab yog cov neeg me thiaj cav lus zoo txog nws.
- 28 Thaum tus neeg muab hlob raug txom nyem mas tsis muaj tshuaj kho tau nws zoo, vim ib tug yub phem nrhau cag tob nyob hauv nws lawm.
- 29 Tus neeg xyuam xim xav ntsoov txog cov paj lug nyob hauv nruab siab. Tus neeg thoob tsib ntshaw ib lub pob ntseg qhib lug mloog.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 67,4-5ac.6-7ab.10-11

Txais: TSWV NTUJ, koj lub siab zoo, koj yog cov neeg txom nyem lub chaw nyob.

1. Cov neeg ncaj zoo siab, lawv hom khaj nyob ntawm TSWV NTUJ xub ntiag. Nej hu nkauj rau TSWV NTUJ, nej hu nkauj cav txog nws lub npe. **Teb**
2. Tus TSWV NTUJ nyob hauv lub tsev ntshiab, yog cov ntsuag nos txiv, nws txheem cov poj ntsuam. Tus neeg uas luag tso pov tseg, TSWV NTUJ pub tsev rau nws nyob. Cov neeg nyob hauv tsev loj faj, TSWV NTUJ tso lawv dim mus ua neej ywj siab. **Teb**
3. TSWV NTUJ, thaum koj lub teb chaws qhuav nkig nkuav, koj ywg dej nag kom nws rov muaj sia. Koj haiv neeg tau los nyob hauv lub teb chaws uas koj pub ua lawv tug. Koj lub siab zoo, koj pub rau cov pluag. **Teb**

ZAJ NYEEM OB: Hes Nplaws 12,18-19.22-24a

Cov lus nyob hauv tsab ntawv xa rau cov ntseeg Hes Nplaws

- 18 Kwv tij sawv daws, nej tsis tau txav mus ze ib yam uas nej kov tau, xws li cov hluav taws kub kub, twv huab dub, qhov tsaus ntuj nti, thiab cua daj cua dub,
- 19 lub suab hom los tej suab hais lus nrov doog diaj. Cov thaum ub tau hnov, lawv thov kom txhob hais lus ntxiv rau lawv.
- 22 Tab sis nej, mas nej tau txav los ze lub roob Xis Yoos, ze tus TSWV NTUJ muaj txoj sia lub tsheej Yes Lus Xas Les saum ntuj, ze txhiab vam tus Tub Xo uas sib txoos ua ntees lom zem,
- 23 ze ib tsoom tub hlob uas muaj npe sau nyob saum ntuj, ze tus TSWV NTUJ txiav txim rau tas lub qab ntuj neeg, ze cov neeg ncaj cov plig uas Ntuj twb ua kom lawv zoo txhij zoo txhua tas.
- 24a Nej tau txav los ze YES XUS uas yog tus sawv peb chaw cog lus tshiab.

Yog Tswv Ntuj Lo Lus

NKAUJ CAV TXOG LUB MOO ZOO: Mt 11,29ab

As les lus yas. As les lus yas. HUAB TAIS hais tias: “Nej yuav txais kuv tus quab. Nej kawm ntawm kuv, nej yuav khaws kuv cov lus qhia vim kuv lub siab zoo tsis muab hlob.” As les lus yas.

NTAWV MOO ZOO: Lus Kas 14,1.7-14

Nej Mloog Ib Zag Nyob Hauv Lus Kas Ntawv Moo Zoo

- 1 Muaj ib zaug, hnuv Xas Npas Tos, YES XUS tuaj noj ib pluag mov nyob hauv cov Fas Lis Xais ib tug thawj koj tsev. Lawv nyas ntshis YES XUS.
- 7 YES XUS hais ib zag paj lug rau cov neeg tuaj noj mov, vim nws pom lawv xaiv thawj cov rooj zaum. Nws hais rau lawv tias :
- 8 "Thaum luag caw koj mus noj tshoob, koj tsis txhob mus zaum thawj cov rooj, tsam luag caw ib tug muaj meej mom dua koj tuaj thiab.
- 9 Nyob tsam tus tswv tsev uas tau caw neb tuaj lam los hais rau koj tias : 'Koj cia qhov chaw kod rau tus no.' Ces koj yuav sawv mus zaum lub rooj puag nram qab, koj yuav txaj muag.
- 10 Thaum luag caw koj, koj yuav mus zaum lub rooj puag nram qab, kom thaum tus caw koj los txog, nws hais rau koj tias : 'Npawg, koj nce los

pem toj.' Ces koj yuav tau ntsej muag nyob ntawm cov neeg tuaj nrog koj koom rooj qav xub ntiag.

- 11 Vim tias tus uas nws tsa nws siab, mas Ntuj yuav txo nws qis, hos tus uas nws txo nws qis, mas Ntuj yuav tsa nws siab."
- 12 YES XUS tseem hais rau tus neeg caw nws tias : "Thaum koj npaj ib roog su los ib roog hmo, koj txhob nqua hu koj cov phooj ywg, koj cov kwv tij, koj cov neej tsa, thiab cov neeg nplua nuj uas nyob ze koj. Tsam lawv ho caw koj thiab pauj koj rooj nqaj rooj hno.
- 13 Thaum koj ua ib roog qav, koj nqua hu cov pluag, cov tu tes tu taw, cov ceg tawv, cov dig muag.
- 14 Koj yuav zoo siab, vim lawv tsis muaj dab tsi pauj rau koj. Thaum cov neeg siab ncaj yuav sawv rov los, mas Ntuj yuav pauj rau koj."

Yog Huab Tais Yes Xus Lub Moo Zoo

HNUB CHIV 23 NRUAB XYOO A CHÚA NHẬT 23 THƯỜNG NIÊN NĂM A

ZAJ NYEEM IB: Es Xes Kias 33,7-9

Cov lus nyob hauv ntawv Es Xes Kias

- 7 Huab Tais hais rau Es Xes Kias tias : "Neeg leej tub, kuv tau tsa koj ua tus peeb zov His Xas Lais lub tsev. Thaum koj hnov kuv lub ncauj hais ib lo lus mas koj yuav qhia lawv paub.
- 8 Yog kuv hais rau tus siab phem tias : "Neeg siab phem, koj yuav tuag !" Tab sis koj tsis qhia tus siab phem kom nws tso nws qhov phem tseg, mas yog tus siab phem yuav tuag vim nws cov txhaum, tab sis kuv yuav nug koj txog nws txoj sia, ces koj yuav tsum them.
- 9 Yog koj xub qhia tus siab phem kom nws tso qhov phem tseg thiab tig los yuav lub siab tshiab, tab sis nws tsis tig los yuav lub siab tshiab, mas nws yuav tuag vim nws muaj txhaum. Hos koj yuav cawm koj txoj sia."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 94,1-2.6-9

Txais: Hnub no yog nej hnov HUAB TAIS lub suab lawm, nej tsis txhob cia nej lub siab tawv li pob zeb.

1. Nej tuaj, peb sawv daws hu nkauj zoo siab cav txog HUAB TAIS! Peb qw suab zoo siab hawm lub Tsua cawm peb. Peb txav los ntawm nws xub ntiag ua nws tsaug. Peb npuaj teg hu nkauj cav txog nws. **Teb**
2. Nej chaws los, peb khoov cev, peb pe. Peb txhos caug hawm tus HUAB TAIS tsim peb los. Nws yog peb tus TSWV NTUJ, peb yog nws haiv neeg, yog pab yaj nws txhais tes hwj. **Teb**
3. Hnub no, nej cia li mloog HUAB TAIS lub suab. Nej tsis txhob cia nej lub siab tawv li pob zeb zoo li thaum nej nyob Mes Lis Npas thiab nyob Mas Xas hauv teb chaws suab puam. Thaum ntawd, nej cov yawg koob twb pom kuv cov hauj lwm muaj hwj huam, tsis kav tseem twv kuv thiab sim kuv. **Teb**

ZAJ NYEEM OB: Los Mas 13,8-10

Cov lus Paj Lug sau tuaj rau cov ntseeg nyob Los Mas

- 8 Kwv tij sawv daws, nej tsis txhob tshuav luag nuj luag nqi. Yam nuj nqis uas nej tshuav ntawm luag tej, mas yog lub siab nyiam luag. Vim tus nyiam luag tej, mas nws ua raws li Ntuj Txoj Cai tas huv tib si lawm.
- 9 Ntuj cov lus qhia hais tias: “Koj txhob zes luag txij luag nkawm, koj txhob tua neeg, koj txhob ua tub sab, koj lub siab yuav tsis txhob ntshaw”: cov lus qhuab qhia no thiab lwm cov lus qhia tas huv tib si lub ntsiab txhais tias: “Koj yuav nyiam luag tej ib yam li koj nyiam koj.”
- 10 Tus twg nyiam luag tej, mas nws tsis ua ib qho phem rau luag. Ua li mas Txoj Cai lub ntsiab yog txoj kev nyiam.

Yog Tswv Ntuj Lo Lus

NKAUJ CAV TXOG LUB MOO ZOO: 2 Kos Lis Nthos 5,19

As les lus yas. As les lus yas. TSWV NTUJ yog tus ua kom ntiaj teb neeg rov sib nyiam thiab rov sib haum xeeb nyob hauv Leej Plev. Nws pub kom peb txawj hais cov lus pab luag lwm tus. As les lus yas.

NTAWV MOO ZOO: Mas Tais 18,15-20

Nej Mloog Ib Zag Nyob Hauv Mas Tais Ntawv Moo Zoo

- 15 Yes Xus hais rau cov thwj tim tias: “Yog koj ib tug kwv tij ua txhaum, koj yuav mus cuag nws. Thaum neb ob leeg nyob ua ke, koj yuav ntuas nws. Yog nws mloog koj, mas koj pab tau nws lawm.
- 16 Yog nws tsis mloog koj, koj yuav coj ib leeg los ob leeg nrog koj mus dua, kom ob tug los peb tug tim khawv nrog tu tej lus ntawd.
- 17 Yog nws tsis mloog cov nrog koj thiab, koj yuav qhia lub Koom Txoos paub. Yog nws tseem tsis mloog lub Koom Txoos hais thiab, ces koj yuav saib nws zoo li ib tug neeg teev pej kum dab los ib tug sau se.
- 18 Kuv hais tseeb rau nej : nej khi yam twg nyob ntiaj teb no, mas Ntuj yuav saib yam ntawd yog khi nyob saum ntuj. Nej daws yam twg nyob ntiaj teb no, mas Ntuj kuj yuav saib yam ntawd yog daws nyob saum ntuj.”

- 19 “Kuv hais tseeb rau nej tias : yog muaj ob leeg hauv nej koom suab thov dab tsi nyob ntiaj teb no, mas kuv Txiv nyob saum ntuj yuav pub yam ntawd rau nkawd.
- 20 Thaum ob leeg los peb leeg sib sau ua ke tuav txog kuv lub npe, mas kuv nyob hauv nruab nrab lawv.”

Yog Huab Tais Yes Xus Lub Moo Zoo

HNUB CHIV 23 NRUAB XYOO B CHÚA NHẬT 23 THƯỜNG NIÊN NĂM B

ZAJ NYEEM IB: His Xais 35,4-7a

Cov lus nyob hauv ntawv His Xais

- 4 Nej hais rau cov siab muag tias : "Nej ua siab loj ! Nej txhob ntshai ! Ntsia saib ! Nej tus TSWV NTUJ nyob ntawm no !" Kev rob caub tab tom tuaj, TSWV NTUJ cov txim pauj neeg cov txhaum tuaj cawm peb.
- 5 Ces cov dig muag ob lub qhov muag rov rua hlo, cov pob ntseg lag yuav qhib plho.
- 6 Tus neeg ceg tawv dhia nrawm xws li tus muas lwj. Tus nplaig txhav qw tej suab zoo siab. Vim ib co dej txhawv hauv cov teb chaws suab puam los, tej tus dej ntwis hla cov teb chaws maj sab.
- 7a Thaj av kub ntaiv yuav hloov ua pas dej. Lub teb chaws tuag dej yuav txhawv tej tus kaus dej txaws txua tawm los.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 145,6b-10

Txais: Kuv tus plig, koj cav lus zoo txog HUAB TAIS.

1. HUAB TAIS TSWV NTUJ nco ntsoov nws cov lus mus ib txhiab ib txhis. Nws tswj txoj kev ncaj rau cov neeg uas raug luag hiam. Nws pub rau cov neeg tshaib noj, nws tso cov neeg nyob txim. **Teb**
2. HUAB TAIS qhib cov neeg dig muag kom rov pom kev; nws tsa cov neeg qaug zog. HUAB TAIS nyiam cov neeg ua ncaj, nws pov hwm cov pej kum neeg. **Teb**
3. Nws txhawb cov poj ntsuam thiab cov ntsuag nos. Nws mooj cov siab phem kom lawv yuam kev. HUAB TAIS yog tus vaj nyob mus li. Xis Yoos, nws yog koj tus TSWV NTUJ mus tiam dhau tiam. **Teb**

ZAJ NYEEM OB: Yas Kos 2,1-5

Cov lus nyob hauv Yas Kos tsab ntawv

- 1 Kwv tij sawv daws, nej yog ib co neeg ntseeg txog peb tus HUAB TAIS YES XUS PLEEV muaj hwj chim, mas nej txhob saib tias muaj tej tus neeg loj tej tus neeg me.

- 2 Yog tias thaum sawv daws tuaj ua lub Txoos, muaj ib tug chaws los hauv tsev, tus ntawd koj nplhaib kub, hnav tsoos tsho zoo nkauj ; hos muaj dua lwm tus kuj chaws los thiab, tus no yog neeg pluag, nws cov ris tsho qias neeg.
- 3 Nej tig ntsia tus hnav tsoos zoo nkauj, ces nej hais rau nws tias : “Koj mus zaum ntawm lub chaw zoo !” Hos nej hais rau tus pluag tias : “Koj sawv ntsug mog !” los hais tias : “Koj zaum hauv no, ntawm kuv lub tog tiag taw mog !”
- 4 Yog nej ua li ntawd, mas puas yog nej saib tias neeg tsis muaj nqis ib yam? Nej tsis ua ib yam nkaus li ib co nom txiav txim siab nkhaus thiab lod ?
- 5 Kwv tij zoo nyiad, nej mloog mog ! TSWV NTUJ tsis tau xaiv cov neeg uas lub qab ntuj neeg saib lawv pluag, kom los ua ib co neeg nplua nuj nyob hauv txoj kev ntseeg lod ? TSWV NTUJ tsis tau xaiv lawv los ua cov txais lub Ceeb Tsheej ua lawv lub cuab tam, raws li nws cog lus rau cov neeg nyiam nws lod ?

Yog Tswv Ntuj Lo Lus

NKAUJ CAV TXOG LUB MOO ZOO: s. Mt 4,23

As les lus yas. As les lus yas. YES XUS tshaj Lub Moo Zoo hais txog HUAB TAIS Ntuj Lub Ceeb Tsheej. Nws kho cov neeg tuaj cuag nws, lawv tej mob zoo hlo. As les lus yas.

NTAWV MOO ZOO: Mas Kos 7,31-37

Nej Mloog Ib Zag Nyob Hauv Mas Kos Ntawv Moo Zoo

- 31 YES XUS tso Tws Los teb tseg, nws taug txoj kev hla Xis Doos mus rau dej ntuj Nkas Lis Lais, uas nyob hauv xeev Des Kas Pos Lis.
- 32 Luag koj ib tug neeg lag ntseg, hais lus txhav qhi, tuaj rau YES XUS. Lawv thov kom YES XUS tsa tes rau saum nws.
- 33 YES XUS koj nws tawm ntawm tsoom sid mus rau ib cag, YES XUS muab nws ntiv tes ntxig rau tus lag ntseg ob lub qhov ntsej, nws muab aub ncaug pleev tus neeg ntawd tus nplaig.
- 34 YES XUS tsa muag ntsia saum ntuj, nws xyu ib suab, nws hais rau tus lag ntseg tias : "Es fas tas," txhais tias : "Koj qhib los."

- 35 Tus lag ntseg ob lub qhov ntsej qhib hlo, hos cov hlua khi nws tus nplaig kuj plam plaws tam sim ntawd, ces nws hais lus meej.
- 36 YES XUS txwv tsis pub lawv hais qhov ntawd rau leej twg li. Tab sis YES XUS yim txwv, lawv yim tshaj.
- 37 Qhov ntawd raug lawv siab tshaj txhua yam, ces lawv hais tias : "Nws ua tau ib puas tsav yam zoo : nws ua kom cov lag ntseg hnov lus, thiab ua kom cov nplaig txhav hais lus tau."

Yog Huab Tais Yes Xus Lub Moo Zoo

HNUB CHIV 23 NRUAB XYOO C
CHÚA NHẬT 23 THƯỜNG NIÊN NĂM C

ZAJ NYEEM IB: Thoob Tsib 9,13-18

Cov lus nyob hauv ntawv Thoob Tsib

- 13 Leej tib neeg twg paub tau TSWV NTUJ zaj ? Leej twg mem tau yam HUAB TAIS siab nyiam ?
- 14 Peb cov txawj tuag tej tswv yid qauj les thiab lub hom phiaj zuav zaws.
- 15 Lub cev ciab zib hnyav ntsuj plig thiab daim vuas av luaj ntxhov tswv yim ntau zaj.
- 16 Yam saum av peb twb xam tsis thoob thiab ntawm tes twb ceeb laj, yam saum qaum ntuj leej twg txawj xam ?
- 17 Leej twg paub tau koj zaj, yog koj tsis pub kev thoob tsib thiab tsis xa koj ntsuj plig ntshiab puag txheej saud tuaj ?
- 18 Cov nyob saum daim av txoj kev thiaj pom qab taug, tib neeg thiaj paub kawm yam ntxim koj siab thiab kev thoob tsib thiaj cawm tau lawv.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 89,3-6.12-14

Txais: HUAB TAIS, koj yeej ib txwm yog peb qhov chaw vam khom tiam dhau tiam.

1. HUAB TAIS, koj ua kom neeg rov mus ua av luaj. Koj hais tias, “As Das toom tub ki, nej rov mus ua plua av !” Koj saib ib txhiab xyoo zoo li ib hnuv. Koj saib ib hmos zoo li ib teev. **Teb**
2. Koj rho neeg txoj sia thaum lawv tsaug zog nruab dab ntub. Lawv ploj ntais zoo li nroj tsuag tawg paj yav sawv ntxov, tab sis yav tsaus ntuj, lub paj qhuav tas. **Teb**
3. Thov koj qhia kom peb paub suav peb lub hnuv nyoog ua neej, peb thiaj yuav tau ib lub siab thoob tsib. HUAB TAIS, thov koj rov qab los. Thov koj hluv koj cov tub txib mas ! **Teb**
4. Sawv ntxov tsees, thov koj pub koj txoj kev hluv rau peb, peb yuav qw suab zoo siab tas peb sim neej. Thov HUAB TAIS lub siab hluv nqes los roos peb kom cov hauj lwm peb txhais tes khwv vam meej. **Teb**

ZAJ NYEEM OB: Fis Les Moos 9b-10.12-17

Cov lus nyob hauv Paj Lug tsab ntawv xa rau Fis Les Moos

- 9b Tus yuav hais lus rau koj no, yog Paj Lug, tus laus neeg Paj Lug, uas nyem no nws yog YES XUS PLEEV tus neeg nyob txim.
- 10 Kuv thov koj rau kuv tus me nyuam Os Nes Xis Mos, uas kuv yug nws nyob hauv cov saw hlau.
- 12 Kuv xa nws rov qab los rau koj. Nws yog kuv nplooj siab.
- 13 Kuv twb xav cia nws nyob ze kuv, kom nws sawv koj chaw pab kuv nyob hauv cov saw hlau uas lub Moo Zoo pub rau kuv.
- 14 Tab sis, kuv tsis xav ua ib yam uas kuv tsis tau xub nug koj lus pom zoo tso. Yam zoo uas koj yuav ua, mas kuv tsis yuam koj, koj yuav tsum zoo siab ua koj xwb.
- 15 Os Nes Xis Mos tau ncaim ntawm koj ib ntus, ntshai yog vim Ntuj xav xa nws rov qab los ua koj tug mus li.
- 16 Ntuj tsis xa nws rov los ua koj ib tug qhev. Nws zoo tshaj tus qhev. Nws rov los ua ib tug kwv tij uas koj hlab. Nws twb yog kuv ib tug kwv uas kuv nyiam kawg. Mas nws haj yam yuav ua ib tug kwv tij uas koj yuav nyiam tshaj nyob hauv tsoom sid, thiab nyob hauv HUAB TAIS.
- 17 Yog koj saib tias wb yog ob tug sib raug zoo, mas koj yuav txais nws ib yam li txais kuv.

Yog Tswv Ntuj Lo Lus

NKAUJ CAV TXOG LUB MOO ZOO: NPN 118,135

As les lus yas. As les lus yas. HUAB TAIS, thov koj ua lub ntsej muag ci ntsa iab tuaj rau koj tus tub txib thiab qhia koj txoj cai rau kuv. As les lus yas.

NTAWV MOO ZOO: Lus Kas 14,25-33

Nej Mloog Ib Zag Nyob Hauv Lus Kas Ntawv Moo Zoo

- 25 Tej pab neeg coob nrog YES XUS taug kev. YES XUS tig los hais rau lawv tias :
- 26 "Leej twg los raws kuv, yog nws tsis nyiam kuv dua nws niam nws txiv, nws poj niam me nyuam, nws cov kwv tij thiab cov muam, thiab yog nws nyiam nws txoj sia dua kuv, mas tus ntawd ua tsis tau kuv thwj tim.

- 27 Leej twg tsis kwv nws tus ntoo cuam thiab tsis lawv kuv qab, mas nws ua tsis tau kuv thwj tim."
- 28 "Yog nej leej twg xav txhim ib tug pej thum, nws yuav tsis xub zaum xam saib yuav siv nyiaj npaum li cas, thiab ntsuas saib nws puas muaj nyiaj txaus ua kom tiav lod ?
- 29 Tsam nws pib txhim cov taw ntsa tas, ho ua tsis tau kom tiav. Ces tas cov neeg pom yuav thum nws hais tias :
- 30 Saib ! Tus neeg no pib txhim, ho ua tsis tau kom tiav !
- 31 Los ib tug vaj, yuav sawv kev mus ua rog ntaus lwm tus vaj, nws yuav tsis xub zaum xam saib nws muaj kaum txhiab leej tub rog, nws puas yuav tiv tau tus vaj uas koj nees nkaum txhiab leej tuaj ?
- 32 Yog nws paub tias yuav tiv tsis tau, mas thaum lwm tus vaj tseem tuaj txog deb, nws yuav xa ib pab tiam lis mus thov kom cia lub teb chaws nyob thaj yeeb.
- 33 Nej kuj zoo ib yam li ntawd : nej leej twg tsis tso nws lub cuab tam tseg, nws ua tsis tau kuv thwj tim.

Yog Huab Tais Yes Xus Lub Moo Zoo

HNUB CHIV 24 NRUAB XYOO A CHÚA NHẬT 24 THƯỜNG NIÊN NĂM A

ZAJ NYEEM IB: Npes Xis Las 27,30 – 28,7

Cov lus nyob hauv ntawv Npes Xis Las

27,30 Kev cib nyeej thiab kev npau yog ib yam plhom ntawm tus neeg phem.

28,1 Tus paj yuav raug HUAB TAIS nplua vim nws pom tag txhua yam txhaum.

2 Zam rau koj tus kwv tij kev tub qaug, thaum koj thov ntuj, koj tej txhaum kuj yuav thim.

3 Tus neeg khib qees rau ib tug twg, puas thov tau TSWV NTUJ kho nws qhov mob zoo ?

4 Ib tug neeg twb tsis hlub luag tus zoo li nws, yuav ua cas thov ntuj rau nws kev tub qaug neeg !

5 Zoo li nws nqaij no cib nyeej, leej twg yuav zam tau nws tej txhaum ?

6 Koj yuav nco ntsoov caij nyoog, txawj ploj, txawj tuag, txhob ntxub neeg, txuag qees tej lus qhuab qhia.

7 Koj yuav nco ntsoov tej lus qhia, tus nyob siab cov lus cog tseg, txhob cib nyeej rau tus twg, hla plaws txoj kev chib.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 102,1-4.9-12

Txais: HUAB TAIS hlub mos nyoos, nws khuv leej neeg, nws npau taws qeeb, nws hlub neeg tas nrho.

1. Kuv tus plig, koj cav lus zoo txog HUAB TAIS ! Kuv tej siab ntsws, nej cav lus zoo txog nws lub npe ntshiab. Kuv tus plig, koj cav lus zoo txog HUAB TAIS. Koj txhob mom nws txheej. Koj yuav nco ntsoov nws tej txiaj ntsim. **Teb**

2. Nws zam koj cov txhaum, nws kho koj tej mob nkeeg. Nws muab nws lub siab zoo thiab khuv leej neeg roos koj. Nws cawm koj txoj sia ntawm kev puas tsuaj. **Teb**

3. Nws tsis nrog neeg ua plaub, nws tsis cib nyeej. Nws tsis nplua peb raws li peb cov txhaum. Nws tsis pauj kev phem rau tej txhaum peb tau ua. **Teb**
4. HUAB TAIS lub siab hlub cov neeg hwm Ntuj. Nws tshem peb cov txhaum mus deb peb npaum li sab hnuv tuaj nyob nrog deb sab hnuv poob. **Teb**

ZAJ NYEEM OB: Los Mas 14,7-9

Cov lus nyob hauv Paj Lug tsab ntawv xa rau cov ntseeg nyob Los Mas

- 7 Kwv tij sawv daws, peb tsis muaj ib tug uas nws ua neej vim nws xav rov tsoob hwb nws xwb ; tsis muaj ib tug tuag uas nws xav tuag rau nws xwb.
- 8 Yog peb ua neej nyob, mas peb nyob tsoob hwb HUAB TAIS ; yog peb tuag, mas peb kuj tuag rau HUAB TAIS. Txawm peb ua neej nyob, los peb tuag, mas peb yog HUAB TAIS tug.
- 9 Vim Leej Pleev tuag, thiab nws rov muaj txoj sia kom tau ua tsoom neeg ciaj neeg tuag tus HUAB TAIS.

Yog Tswv Ntuj Lo Lus

NKAUJ CAV TXOG LUB MOO ZOO: Zam 13,34

As les lus yas. As les lus yas. HUAB TAIS hais tias: “Kuv muab ib lo lus tshiab tso rau hauv nej. Nej yuav sib nyiam sib hlub li kuv nyiam thiab hlub nej.” As les lus yas.

NTAWV MOO ZOO: Mas Tais 18,21-35

Nej Mloog Ib Zag Nyob Hauv Mas Tais Ntawv Moo Zoo

- 21 Thaum ntawd, Pob Zeb txav los hais rau YES XUS tias : “HUAB TAIS, yog kuv tus kwv ua txhaum rau kuv, kuv yuav zam pes tsawg zaus ? Kuv puas yuav zam txog xya zaus ?”
- 22 YES XUS hais rau Pob Zeb tias : “Kuv tsis hais rau koj tias 'xya zaus'. Kuv hais rau koj tias, 'xya caum xya zaus'.”
- 23 “Li ntawd, Ntuj lub Ceeb Tsheej yog zoo li ib tug vaj uas xav nrog nws cov tub txib txheeb nws tej nyiaj txiag.

- 24 Thaum lawv pib txheeb, ces luag coj ib tug tub txib uas tshuav nuj nqis ib vam nras nyiaj, tuaj rau tus vaj.
- 25 Tus tub txib tsis muaj dab tsi them, ces tus vaj kom luag muab nws thiab nws poj niam, nws cov me nyuam thiab tas nws lub cuab tam huv si muag, los them cov nuj nqis ntawd.
- 26 Tus tub txib txhos caug ntua ntawm tus tswv ko taw, nws pe tus tswv, nws hais tias : “Thov koj ua siab ntev rau kuv, kuv yuav them kom tas rau koj.”
- 27 Tus tswv hlub tus tub txib, ces nws tso tus tub txib mus thiab tseem zam cov nuj nqis huv tib si rau nws.
- 28 Thaum tus tub txib tawm rov qab mus, nws ntsib nws ib tug npawg, uas tshuav nqi ntawm nws ib puas lub txiaj nyiag. Tus tub txib ntawd nthos nkaus nws tus npawg caj dab, zawm tus npawg caj pas, thiab hais tias : “Them koj cov nqi.”
- 29 Nws tus npawg txhos caug ntua ntawm nws ko taw thov tias: “Thov koj ua siab ntev rau kuv, kuv yuav them rau koj.”
- 30 Tab sis tus tub txib ntawd tsis kam li, nws kom luag muab nws tus npawg kaw hauv tsev loj faj mus txog hnuv tus npawg them nuj nqis tas huv tib si rau nws.
- 31 Tus tub txib cov phooj ywg pom nws ua li ntawd, lawv chim kawg, lawv mus qhia tej ntawd rau lawv tus tswv.
- 32 Ces tus vaj hu tus tub txib tuaj, nws hais rau tus tub txib ntawd tias: “Tub txib siab phem dab tsi ! Cov nuj nqis uas koj tshuav ntawm kuv, kuv twb zam tas huv si rau koj, vim koj thov kuv.
- 33 Ua cas koj tsis hlub koj tus npawg zoo li kuv tau hlub koj ?”
- 34 Ces tus vaj npau taws heev, nws muab tus tub txib rau cov tub hiam neeg mus txog hnuv nws them nws cov nuj nqis tas huv tib si.
- 35 Nej txhua tus, yog nej tsis zam hauv nruab siab rau nej ib tug kwv tij, mas kuv Txiv nyob saum Ntuj kuj yuav ua ib yam li ntawd rau nej thiab.

Yog Huab Tais Yes Xus Lub Moo Zoo

HNUB CHIV 24 NRUAB XYOO B CHÚA NHẬT 24 THƯỜNG NIÊN NĂM B

ZAJ NYEEM IB: His Xais 50,5-9a

Cov lus nyob hauv ntawv His Xais

- 5 HUAB TAIS TSWV NTUJ qhib kuv pob ntseg, mas kuv tsis npau taws, kuv tsis yig, kuv tsis thaub qab.
- 6 Lawv ntaus kuv, mas kuv tig kuv nraub qaum rau lawv ntaus. Lawv xav rho kuv cov hwj txwv, mas kuv tig kuv sab plhu rau lawv. Lawv xav ib tawg ncuav rau kuv thiab xav nto qaub ncaug rau kuv ntsej muag, los kuv tsis fee plhu rau lawv.
- 7 Tab sis HUAB TAIS TSWV NTUJ tsom kwm kuv, vim qhov ntawd mas kuv tsis poob ntsej muag. Ces kuv ua kuv ntsej muag tawv li pob zeb. Kuv paub tias kuv yuav tsis raug kev txaj muag.
- 8 Tus pom tias kuv siab ncaj, nws nyob ze kuv, leej twg yuav txiav txim tau tias kuv muaj txhaum ? Kom peb ua ke tuaj ntawm lub rooj txiav txim mas ! Leej twg yog tus tau mus kom kuv rau cov nom txiav txim ? Kom nws kaj tsij txav los cuag kuv saib !
- 9a Ntsia saib ! HUAB TAIS TSWV NTUJ tsom kwm kuv ! Leej twg yuav txiav txim rau kuv tau ?

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 114,1-6.8.9

Txais: Kuv yuav taug kev ntawm HUAB TAIS xub ntiag nyob hauv tsoom neeg ciaj lub teb chaws.

1. Kuv nyiam HUAB TAIS vim nws mloog kuv lub suab thov. Nws tig ntsej los ze kuv, kuv yuav hu txog nws tas kuv sim neej. **Teb**
2. Txoj kev tuag cov hlua nyob ncig kuv. Ntuj txias teb tsaus cuab hlua ntes kuv. Kuv poob hauv kev txhawj xeeb, kev tu siab. Kuv hu txog HUAB TAIS, kuv tuav txog nws lub npe tias: “HUAB TAIS, thov koj hlub kuv thiab npo kuv.” **Teb**
3. HUAB TAIS hlub neeg, nws siab ncaj. Nws zam txhaum rau neeg. Nws txuag cov neeg me. Thaum kuv qaug zog, nws cawm kuv. **Teb**
4. Koj npo kuv tus plig ntawm txoj kev tuag. Koj so kuv kua muag. Koj hwj kuv txhais taw kom kuv txhob ntog. Kuv yuav taug kev hauv cov neeg ciaj lub teb chaws nyob ntawm HUAB TAIS xub ntiag. **Teb**

ZAJ NYEEM OB: Yas Kos 2,14-18

Cov lus nyob hauv Yas Kos tsab ntawv

- 14 Kuv cov kwv tij, thaum ib tug tsis ua cov hauj lwm, yog nws hais tias : “Kuv lub siab ntseeg”, mas nws txoj kev ntseeg muaj qab hau dab tsi ? Lub siab ntseeg puas cawm tau nws ?
- 15 Thaum ib tug kwv, los ib tug muam, tsis muaj dab tsi hnav, thiab tsis muaj mov txaus noj txwm hnuv,
- 16 yog nej ib tug hais rau lawv tias: “Nej mus nyob kaj siab lug mog ! Nej mus nte taws sov so, nej noj tsau npo mog !” Tab sis nej tsis tau pub dab tsi pab lawv lub cev, mas nej lo lus muaj qab hau dab tsi ?
- 17 Hais txog txoj kev ntseeg, kuj zoo li ntawd. Yog kev ntseeg tsis muaj cov hauj lwm pab luag, mas kev ntseeg tuag lawm.
- 18 Qee tus hais tias : “Koj muaj lub siab ntseeg, hos kuv muaj cov hauj lwm zoo.” Yuav teb rau nws tias : “Koj muab koj lub siab ntseeg tsis ua cov hauj lwm rau kuv pom, ces kuv yuav muab kuv lub siab ntseeg cov hauj lwm rau koj pom.”

Yog Tswv Ntuj Lo Lus

NKAUJ CAV TXOG LUB MOO ZOO: Nkas Las Tias 6,14

As les lus yas. As les lus yas. Ntawm kuv, mas yog kuv xav tau ntsej muag, mas kuv kawg xav kom tau nyob hauv peb tus Huab Tais Yes Xus Plev tus ntoo cuam xwb. Nws muab lub ntiaj teb neeg dai saum ntoo cuam rau kuv, thiab nws muab kuv dai saum ntoo cuam rau lub ntiaj teb neeg. As les lus yas.

NTAWV MOO ZOO: Mas Kos 8,27-35

Nej Mloog Ib Zag Nyob Hauv Mas Kos Ntawv Moo Zoo

- 27 YES XUS nrog nws cov thwj tim mus rau cov zos nyob cheeb tsam ntawm Xes Ntxas Les Fis Lis Pos. Thaum lawv mus kev, YES XUS nug cov thwj tim li no : "Luag tej hais tias kuv yog leej twg ?"
- 28 Cov thwj tim teb tias : "Ib txhia hais tias koj yog Zam Ntxuav Plig, ib txhia hais tias koj yog Es Lias, hos ib txhia hais tias koj yog ib tug hauv cov yaj saub."
- 29 YES XUS nug lawv tias : "Hos nej, mas nej hais tias kuv yog leej twg ?" Pob Zeb teb rau YES XUS tias : "Koj yog Leej Plev."
- 30 Ces YES XUS txwv lawv nruj kom txhob hais txog nws rau leej twg li.

- 31 YES XUS pib qhia cov thwj tim hais tias : "Neeg Leej Tub yuav tsum raug txom nyem loj. Cov txwj laus, cov thawj leej choj thiab cov thoob xwm yuav muab nws xyeeb pov tseg ; luag yuav muab nws tua. Peb hnuv tom qab, nws yuav sawv rov los.
- 32 YES XUS qhia tej ntawd tshab plaws. Pob Zeb rub YES XUS los ntawm nws, ces Pob Zeb nroo rau YES XUS.
- 33 Tab sis YES XUS tig ntsia cov thwj tim, nws cem Pob Zeb hnyav ncawv tias : "Xas Tas, koj lawv kuv qab ! Vim cov lus koj xav tsis yog TSWV NTUJ cov lus, yog neeg cov lus xwb !"
- 34 YES XUS hu tsoom sid thiab cov thwj tim los, nws hais rau lawv tias : "Yog leej twg xav los raws kuv, nws yuav tsum nrauj nws, nws yuav kwv nws tus ntoo cuam, nws yuav lawv kuv qab.
- 35 Vim leej twg xav cawm nws txoj sia, mas nws yuav plam nws txoj sia. Hos leej twg plam nws txoj sia vim kuv thiab vim lub Moo Zoo, mas nws cawm nws txoj sia.

Yog Huab Tais Yes Xus Lub Moo Zoo

HNUB CHIV 24 NRUAB XYOO C CHÚA NHẬT 24 THƯỜNG NIÊN NĂM C

ZAJ NYEEM IB: Kev Tsiv 32,7-11.13-14

Cov lus nyob hauv ntawv Kev Tsiv

- 7 Ces HUAB TAIS hais rau Mais Xes tias : "Koj kav tsij nqes mus sai, vim koj haiv neeg uas koj tau koj tawm ntawm Hais Nkws Tos teb los, twb ua phem lawm.
- 8 Lawv tos tsis taus, lawv twb maj ncaim ntawm txoj kev uas kuv nyuam qhuav qhia kom lawv taug. Lawv twb nchuav tau ib tug mlom nyuj rau lawv teev, lawv pe, thiab lawv tua tsiaj txi tus mlom. Lawv hais tias : Cov His Xas Lais, nej ntsia, tus no yog nej tus TSWV NTUJ uas tau koj nej tawm ntawm Hais Nkws Tos teb los."
- 9 HUAB TAIS hais ntxiv rau Mais Xes tias : "Kuv pom tias haiv neeg ntawd yog ib haiv neeg xwb qwb txhav dhau.
- 10 Zaum no, koj cia kuv npau taws rau lawv, kuv yuav muab lawv rhuav pov tseg kom tas, kuv mam li muab koj mus tsim dua ib haiv neeg loj."
- 11 Mais Xes ua tib zoo thov nws tus HUAB TAIS TSWV NTUJ kom HUAB TAIS zoo siab, nws hais tias : "HUAB TAIS, vim li cas koj thiaj li npau taws rau haiv neeg uas koj lub zog loj thiab koj txhais tes muaj hwj huam tau koj tawm ntawm Hais Nkws Tos teb los ?
- 13 Thov koj nco ntsoov txog koj cov tub txib Has Nplas Has, His Xas Has thiab His Xas Lais, uas koj tau cog lus ruaj rau lawv tias : ‘Kuv yuav ua kom nej cov xeeb ntxwv huam vam coob npaum li cov hnub qub, thiab kuv yuav muab lub teb chaws uas kuv tau hais rau nej, pub rau nej cov xeeb ntxwv, ua lawv tug mus ib txhis.’"
- 14 Ces HUAB TAIS thim xav, nws tsis ua phem rau nws haiv neeg raws li nws tau hais.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 50,3-4.12-13.17.19

Txais: Kuv yuav sawv tsees mus cuag kuv Txiv.

1. TSWV NTUJ, koj lub siab zoo, thov koj khuv leej kuv. Koj lub siab dav hlub neeg, thov koj so kuv cov txhaum. Thov koj ntxuav kuv qhov phem pov tseg, yaug kuv cov txhaum kom kuv ntshiab tuaj. **Teb**
2. TSWV NTUJ, thov koj tsim ib lub siab huv rau kuv. Koj tso dua ib lub tswv yim khov rau hauv kuv. Koj tsis txhob ntiab kuv mus deb ntawm

koj lub ntsej muag, txhob thau koj lub tswv yim ntshiab ntawm kuv.
Teb

3. HUAB TAIS, thov koj qhib kuv di ncauj, kuv lub ncauj yuav cav lus zoo txoj koj. TSWV NTUJ, cov txim uas kuv yuav cev rau koj yog lub tswv yim ntuag. TSWV NTUJ, koj tsis thum lub siab ntuag siab lwj.
Teb

ZAJ NYEEM OB: 1 Tis Mos Tes 1,12-17

Cov lus nyob hauv Paj Lug tsab ntawv ib xa rau Tis Mos Tes

- 12 Kuv ua tsaug rau tus tau pub zog rau kuv : nws yog peb tus HUAB TAIS YES XUS PLEEV. Nws saib kuv yog ib tug neeg ncaj tsis fav xeeb, ces nws hu kuv los tsob hwb nws.
- 13 Thaud, kuv yog ib tug neeg thum TSWV NTUJ lub npe, ib tug hiam luag, thiab tsawm luag. Kuv tau ua li ntawd vim kuv tsis paub, thiab kuv nyob deb txoj kev ntseeg. TSWV NTUJ tau zam rau kuv.
- 14 Nyem no, peb tus HUAB TAIS lub txiaj ntsim tuaj ntau ntau rau hauv kuv. Lub txiaj ntsim ntawd, ib txhij tuaj nrog kev ntseeg thiab kev nyiam nyob hauv YES XUS PLEEV.
- 15 Lo Lus kuv yuav hais nyem no, yog ib lo lus tseem ceeb uas tsim nyog peb yuav ntseeg : YES XUS PLEEV tuaj nyob ntiaj teb no, nws tuaj cawm cov neeg txhaum : kuv yog thawj tug hauv cov neeg txhaum ntawd.
- 16 YES XUS PLEEV tau zam rau kuv ua ntej, yog vim nws xav muab nws lub siab ntev rau sawv daws pom : nws muab kuv ua ib tug piv txwv rau cov neeg yuav ntseeg txog nws, kom lawv tau txoj sia nyob mus li.
- 17 Tus Vaj kav ib txhiab ib txhis, tus TSWV NTUJ tsis txawj tuag, thiab neeg pom tsis tau, nws tib leeg yog TSWV NTUJ, nws muaj koob meej nto moo, thiab muaj hwj chim txheej dhau txheej tis dhau tis. Ua li.

Yog Tswv Ntuj Lo Lus

NKAUJ CAV TXOG LUB MOO ZOO: 2 Kos Lis Nthos 5,19

As les lus yas. As les lus yas. TSWV NTUJ yog tus ua kom ntiaj teb neeg rov sib nyiam thiab rov sib haum xeeb nyob hauv Leej Pleev. Nws pub kom peb hais tau cov lus pab neeg kom nrog nws rov sib haum xeeb. As les lus yas.

NTAWV MOO ZOO: Lus Kas 15,1-32

Nej Mloog Ib Zag Nyob Hauv Lus Kas Ntawv Moo Zoo

- 1 Tas cov neeg sau se thiab cov neeg txhaum txav los ze YES XUS, lawv xav mloog YES XUS hais.
- 2 Ces cov Fas Lis Xais thiab cov Kws Ntawv Ntshiab nroo zom zaws tias : "Tus neeg ntawd txais cov neeg txhaum, nws tseem nrog lawv noj mov thiab !"
- 3 YES XUS thiaj hais zaj paj lug no rau lawv :
- 4 "Yog nej leej twg muaj ib puas tus yaj, tab sis ib tug ploj lawm, mas nws yeej yuav tso cuaj caum cuaj tus yaj tseg rau tom hav quav poj, nws mus nrhiav kom tau tus uas poob zoo lawm.
- 5 Thaum nws nrhiav tau tus yaj poob zoo lawd, nws muab kwv saum xwb pwg, nws zoo siab tas nrho.
- 6 Nws rov los tsev, ces nws nqua hu nws cov phooj ywg thiab cov nyob ze nws tuaj, nws hais rau lawv tias : 'Nej nrog kuv zoo siab, vim kuv nrhiav tau kuv tus yaj poob zoo lawm.'
- 7 Kuv hais rau nej tias, thaum ib tug neeg txhaum hloov siab los ntub kev txhaum, mas muaj kev zoo siab loj nyob saum ntuj. Kev zoo siab ntawd loj dua kev zoo siab rau cuaj caum cuaj leeg siab ncaj uas tsis tas yuav hloov siab los ntub kev txhaum."
- 8 "Hos tus poj niam uas nws muaj kaum lub txiaj nyiag, yog ib lub poob lawm, mas nws yuav taws teeb cheb tsev, ua tib zoo nrhiav kom tau nws lub txiaj nyiag.
- 9 Thaum nws nrhiav tau lawm, nws nqua hu nws cov phooj ywg thiab cov nyob ze nws tuaj, nws hais tias : 'Nej nrog kuv zoo siab mas ! Vim kuv nrhiav tau lub txiaj uas poob lawm !
- 10 Kuv hais rau nej tias, thaum ib tug neeg txhaum hloov siab, mas muaj kev zoo siab loj nyob hauv TSWV NTUJ tsoom Tshiab ib yam li ntawd thiab."
- 11 YES XUS tseem hais tias : "Ib tug neeg muaj ob tug tub.
- 12 Tus tub ntxawg hais rau nws txiv tias : 'Txiv, koj muab koj lub cuab tam feem uas yog kuv tug faib rau kuv.' Ces leej txiv thiaj muab nws lub cuab tam faib rau nws ob tug tub.

- 13 Ob peb hnuv tom qab, tus tub ntxawg sau feem uas yog nws tug tas huv si, nws khiav mus ib lub teb chaws deb. Nyob ntawd nws muab nws lub cuab tam phob vim nws coj ib lub neej tsis tsim txiaj.
- 14 Thaum nws muab nws lub cuab tam phob tas huv si lawm, ces lub teb chaws tshaib plab loj. Nws pib paub txoj kev yoo tshaib yoo nqhis.
- 15 Nws thiaj mus ua zog hauv ib tug neeg nyob txawm lub teb chaws ntawd. Luag kom nws mus zov npua tom teb.
- 16 Tus tub ntxawg ntshaw noj cov qos uas npua noj kom tsau nws plab, tab sis tsis muaj neeg pub rau nws noj.
- 17 Nws lub siab mam li ras dheev tias : 'Pes tsawg leej tub zog nyob hauv kuv txiv tsev tau mov noj seem noj so, hos kuv nyob tuag tshaib ntuas ntawm no.
- 18 Kuv xav mus cuag kuv txiv, kuv yuav hais rau nws tias : 'Txiv, kuv ua txhaum rau Ntuj thiab rau koj.
- 19 Kuv tsis tsim nyog koj hu kuv ua koj tus tub ntxiv. Thov koj saib kuv ib yam li koj ib tug tub zog.'
- 20 Tus tub ntxawg thiaj sawv kev rov los cuag nws txiv. Thaum tus tub tseem los txog deb, nws txiv twb pom nws. Leej txiv hlub kawg, nws khiav mus puag tus tub caj dab, thiab nwj nws tub tub ntev loo.
- 21 Tus tub hais rau leej txiv tias : 'Txiv, kuv ua txhaum rau Ntuj thiab rau koj. Kuv tsis tsim nyog koj hu kuv ua koj tus tub ntxiv.'
- 22 Tab sis leej txiv hais rau cov tub txib tias : 'Nej tsuag tsuag mus nqa lub tsho zoo nkauj tshaj los ntawm no, nej muab rau nws hnav, nej muab ib nti nplhaib los ntxig nws ntiv tes, thiab ib nkawg khau los ntxig nws ko taw.
- 23 Nej cab tus xyuas nyuj rog los tua. Peb noj, peb ua lom zem.
- 24 Vim tias kuv tus tub no tuag lawm, nyem no nws ciaj rov los. Nws ploj lawm, nyem no rov nrhiav tau nws.' Ces lawv sawv daws noj haus lom zem.
- 25 Thaum ntawd, tus tub hlob tseem nyob tom teb. Thaum nws rov los yuav txog tsev, nws hnov suab paj nruag thiab suab dhia seev cev nrov ntsuag qees.
- 26 Nws hu ib tug tub txib kom tawm mus cuag nws, nws nug saib lub suab ntawd yog dab tsi.

- 27 Tus tub txib hais rau nws tias : 'Yog koj tus kwv rov qab los tsev, koj txiv tua tus xyuas nyuj rog, vim nws tau koj tus kwv rov los, noj qab nyob zoo.'
- 28 Ces tus tub hlob npau taws, nws tsis kam los hauv tsev. Leej txiv tawm tuaj thov kom nws los hauv tsev.
- 29 Tab sis tus tub hlob teb rau nws txiv tias : 'Saib, kuv lis koj tej hauj lwm cuag li ib tug qhev tau npaum no xyoo, kuv tsis tau hla koj ib lo lus li, koj twb tsis muab ib tug me nyuam tshis pub kuv ib zaug, kom tau nrog kuv cov phooj ywg noj ib pluag lom zem.
- 30 Hos koj niag tub ntawd, mus nrog cov niam ntiav muab koj lub cuab tam nqos tas, thaum nws rov los tsev, koj tua tus xyuas nyuj rog rau nws !'
- 31 Ces leej txiv hais rau tus tub hlob tias : 'Me tub, koj ib txwm nrog kuv nyob. Ib puas tsav yam uas yog kuv tug, mas kuj yog koj tug.
- 32 Tab sis, peb yuav tsum noj ib roog qav thiab ua lom zem, vim koj tus kwv no tuag lawm, zaum no nws ciaj rov los, nws ploj lawm, nyem no nrhiav tau nws rov los."

Yog Huab Tais Yes Xus Lub Moo Zoo

ZAJ NYEEM LUV LUV: Lus Kas 15,1-10

Nej Mloog Ib Zag Nyob Hauv Lus Kas Ntawv Moo Zoo

- 1 Tas cov neeg sau se thiab cov neeg txhaum txav los ze YES XUS, lawv xav mloog YES XUS hais.
- 2 Ces cov Fas Lis Xais thiab cov Kws Ntawv Ntshiab nroo zom zaws tias : "Tus neeg ntawd txais cov neeg txhaum, nws tseem nrog lawv noj mov thiab !"
- 3 YES XUS thiaj hais zaj paj lug no rau lawv :
- 4 "Yog nej leej twg muaj ib puas tus yaj, tab sis ib tug ploj lawm, mas nws yeej yuav tso cuaj caum cuaj tus yaj tseg rau tom hav quav poj, nws mus nrhiav kom tau tus uas poob zoo lawm.
- 5 Thaum nws nrhiav tau tus yaj poob zoo lawd, nws muab kwv saum xwb pwg, nws zoo siab tas nrho.
- 6 Nws rov los tsev, ces nws nqua hu nws cov phooj ywg thiab cov nyob ze nws tuaj, nws hais rau lawv tias : 'Nej nrog kuv zoo siab, vim kuv nrhiav tau kuv tus yaj poob zoo lawm.'

- 7 Kuv hais rau nej tias, thaum ib tug neeg txhaum hloov siab los ntxub kev txhaum, mas muaj kev zoo siab loj nyob saum ntuj. Kev zoo siab ntawd loj dua kev zoo siab rau cuaj caum cuaj leeg siab ncaj uas tsis tas yuav hloov siab los ntxub kev txhaum.”
- 8 “Hos tus poj niam uas nws muaj kaum lub txiaj nyiag, yog ib lub poob lawm, mas nws yuav taws teeb cheb tsev, ua tib zoo nrhiav kom tau nws lub txiaj nyiag.
- 9 Thaum nws nrhiav tau lawm, nws nqua hu nws cov phooj ywg thiab cov nyob ze nws tuaj, nws hais tias : ‘Nej nrog kuv zoo siab mas ! Vim kuv nrhiav tau lub txiaj uas poob lawm !
- 10 Kuv hais rau nej tias, thaum ib tug neeg txhaum hloov siab, mas muaj kev zoo siab loj nyob hauv TSWV NTUJ tsoom Tshiab ib yam li ntawd thiab.”

Yog Huab Tais Yes Xus Lub Moo Zoo

HNUB CHIV 25 NRUAB XYOO A CHÚA NHẬT 25 THƯỜNG NIÊN NĂM A

ZAJ NYEEM IB: His Xais 55,6-9

Cov lus nyob hauv ntawv His Xais

- 6 Nej nrhiav HUAB TAIS mog ! Nyem no yog lub caij zoo ntsib nws. Nws nyob ze lawm, nej hu txog nws mog !
- 7 Tus siab phem, nws yuav tso nws txoj kev phem tseg. Tus siab nkhaus tso nws lub tswv yim lim hiam tseg. Nws yuav tig los cuag HUAB TAIS. HUAB TAIS yuav khuv leej nws. Nws cia li los cuag TSWV NTUJ, vim TSWV NTUJ lub siab zam dav.
- 8 Nej zaj tswv yim tsis zoo li kuv zaj. Nej txoj kev tsis zoo li kuv txoj kev. Yog HUAB TAIS lus ceeb toom.
- 9 Lub ntuj nyob siab dua lub ntiaj teb, kuv txoj kev nyob siab dua nej txoj kev npaum li ntawd. Thiab kuv zaj tswv yim nyob siab dua nej zaj tswv yim.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 144,2-3.8-9.17-18

Txais: HUAB TAIS nyob ze cov neeg hu txog nws.

1. HUAB TAIS, kuv yuav niaj hnuab cav txog koj lub koob meej. Kuv yuav cav lus zoo txog koj lub npe mus ib txhiab ib txhis. HUAB TAIS loj tas nrho, tsim nyog cav txog nws. Nws loj tas nrho, neeg ntsuas tsis tau. **Teb**
2. HUAB TAIS siab zoo, nws khuv leej neeg, nws tsis npau taws sai. HUAB TAIS ua zoo rau txhua leej txhua tus. Nws hluv thiab txuag nws tej dej num. **Teb**
3. HUAB TAIS ua yam twg, nws ua ncaj. Nws lim xeeb rau txhua txoj hauj lwm raws txoj kev ntshiab. HUAB TAIS nyob ze cov neeg tuav txog nws lub npe. Nws nyob ze cov neeg muab tas nrho lawv lub siab lub ntsws hu txog nws. **Teb**

ZAJ NYEEM OB: Fis Lis Pos 1,20c-24.27a

Cov lus nyob hauv Paj Lug tsab ntawv xa rau cov ntseeg nyob Fis Lis Pos

- 20c** Kwv tij sawv daws, tab yog kuv ciao los tuag, mas Leej Pleev yuav muaj hwj chim nyob hauv kuv lub cev.
- 21** Kuv saib Leej Pleev yog kuv txoj sia. Kuv saib txoj kev tuag yog ib yam paj tshab.
- 22** Tsis kav, yog kuv lub cev ua neej nyob ntxiv, nws tseem yuav ua ib yam hauj lwm txi txiv ; mas kuv tsis paub tias, kuv yuav xaiv txoj kev ua neej nyob ntxiv, los txoj kev tuag.
- 23** Kuv hnov ob lub siab ua xyem xyav muab kuv dua ua ob sab: ib lub siab xav mus nrog Leej Pleev nyob, qhov ntawd yog qhov kuv nyiam dua.
- 24** Tiam sis, yog kuv lub cev ua neej nyob ntxiv, mas yuav zoo dua rau nej.
- 27a** Nej yuav coj ib lub neej kom tsim nyog Leej Pleev lub Moo Zoo.

Yog Tswv Ntuj Lo Lus

NKAUJ CAV TXOG LUB MOO ZOO: s. Hauj Lwm 16,14b

As les lus yas. As les lus yas. HUAB TAIS, thov koj qhib peb lub siab kom peb txawj mloog koj Leej Tub cov lus qhia. As les lus yas.

NTAWV MOO ZOO: Mas Tais 20,1-16a

Nej Mloog Ib Zag Nyob Hauv Mas Tais Ntawv Moo Zoo

- 1** Yes Xus hais zaj paj lug no : “Vim tias Ntuj lub Ceeb Tsheej piv tau rau ib tug tswv teb uas thaum kaj ntug, nws tawm mus nrhiav tub zog tuaj ua nws daim teb txiv cawv.
- 2** Nws nrog cov tub zog hais haum ib hnuv ib lub txiaj nyiag, ces nws xa lawv mus tom daim teb txiv cawv.
- 3** Ze cuaj teev, nws tawm mus ncig, nws pom ib co neeg nyob dag tom tshav puam.
- 4** Nws hais rau lawv tias : “Nej mus ua num tom kuv daim teb txiv cawv, kuv yuav muab nqi kom haum nej.”

- 5 Ces lawv mus. Kwv yees tav su, nws rov tawm mus ncig, thaum hnuv qaij peb teev nws rov mus ua li qub.
- 6 Thaum hnuv qaij ze li tsib teev, nws rov tawm mus ncig dua, nws tseem pom ib co nyob dag, nws hais rau lawv tias : “Vim li cas nej nyob dag tas hnuv ntawm no, tsis ua num dab tsi li ?”
- 7 Lawv hais rau nws tias : “Vim tsis muaj neeg ntiav peb.” Tus tswv hais tias : “Nej mus ua num tom kuv daim teb txiv cawv thiab mas.”
- 8 Thaum tsaus ntuj, tus tswv teb hais rau tus tswj nyiaj txiag tias : “Koj hu cov tub zog los, koj muab nyias tus nqe zog rau nyias. Koj xub hu cov tuaj tom qab zuj zus los xaus rau cov xub tuaj.”
- 9 Cov tub zog uas tuaj thaum tsib teev hnuv qaij los txog, lawv ib leeg tau ib lub txiaj nyiag.
- 10 Cov xub tuaj los txog, lawv xav tias lawv yuav tau txais nqi zog ntau dua, tab sis lawv ib leej kuj tau ib lub txiaj nyiag thiab.
- 11 Thaum lawv txais lawv tus nqi, lawv yws rau tus tswv teb tias :
- 12 “Cov tuaj tom qab ua num ib teev xwb, koj muab rau lawv ib yam li muab rau peb, hos peb, mas peb kwv nra thiab tiv tshav ib hnuv.”
- 13 Ces tus tswv teb hais rau cov xub tuaj ib tug tias : “Npawg, kuv tsis tau ua tsis ncaj rau koj : wb tsis tau hais haum tias ib hnuv ib lub txiaj nyiag no lod ?
- 14 Txais koj tus nqi zog, koj cia li mus. Kuv xav muab rau tus tuaj tom qab no, ib yam li muab rau koj :
- 15 kuv tsis muaj cai rho kuv tej nyiaj txiag raws kuv siab lod ? Los yog koj khib vim kuv siab zoo ?”
- 16a Cov tuaj tom qab yuav tau ua ntej, hos cov ua ntej yuav tuaj tom qab zoo li no.

Yog Huab Tais Yes Xus Lub Moo Zoo

HNUB CHIV 25 NRUAB XYOO B CHÚA NHẬT 25 THƯỜNG NIÊN NĂM B

ZAJ NYEEM IB: Thoob Tsib 2,12.17-20

Cov lus nyob hauv ntawv Thoob Tsib

- 12 Cov neeg nkhaus xav hauv lawv siab : Caws ntxiab rau tus ncaj, vim nws tiv peb, nws koj txawv peb koj, nws thum peb tsis mloog TSWV NTUJ txoj cai thiab liam peb tso peb tej kab ke pov tseg tas.
- 17 Peb ntsia saib nws tej lus puas tseem, peb sim nws yav kawg,
- 18 Yog tias tus ncaj yog TSWV NTUJ tub, TSWV NTUJ yuav pab nws, npo nws ntawm nws cov yeeb ncuab tes,
- 19 Muab nws lem thiab tsim nug nws, peb yuav paub nws siab mos nyoos tuas nws lub siab ntev,
- 20 Peb txiav txim ua kom nws poob tsim tuag kus saib puas yuav muaj tus zov nws li nws tej lus.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 53,3-6.8

Txais: HUAB TAIS tuaj kuv tog, nws txheem kuv.

1. TSWV NTUJ, koj lub npe cawm kuv; tso koj lub hwj huam los txheem kuv. TSWV NTUJ, thov koj mloog kuv zaj thov. Koj tig ntsej los mloog cov lus tawm hauv kuv lub ncauj los ! **Teb**
2. Cov neeg muab hlob sawv los tawm tsam rhuav kuv, cov ntxub kuv xav txo kuv txoj sia. Lawv tsis saib tias muaj TSWV NTUJ li. **Teb**
3. Nej ntsia saib ! TSWV NTUJ tuaj pab kuv lawm. HUAB TAIS txheem kuv, nws tsa kuv cai. Kuv zoo siab cev ib co txim los txi rau koj. HUAB TAIS, kuv cav lus zoo txog koj lub npe vim koj lub npe zoo tas nrho. **Teb**

ZAJ NYEEM OB: Yas Kos 3,16 – 4,3

Cov lus nyob hauv Yas Kos tsab ntawv

- 3,16 Kuv cov kwv tij, vim tias, qhov chaw uas neeg sib khib thiab sib ceg, mas muaj ntau yam kev ntxhov, thiab ntau yam hauj lwm phem.
- 17 Hos txoj kev thoob tsib nqes saum ntuj los, mas yog kev thoob tsib huv, yog kev thoob tsib tseb kev thaj yeeb, kev thoob tsib tiaj tus, nws nrhiav kev sib zam, nws khuv leej, nws txi ntau yam txiv zoo, nws tsis tsa leej twg cai, tsis ua txuj yog neeg zoo.
- 18 Cov neeg tsim kev thaj yeeb txi ib lub txiv phim kev ncaj nyob hauv kev thaj yeeb.
- 4,1 Tej kev sib ntaus rog, thiab tej lus sib ceg hnyav hauv nej pab neeg, txhawv qhov twg los ? Puas yog los ntawm tej kev ntshaw hauv nej pab neeg ?
- 2 Nej ntshaw, tab sis nej tsis muaj. Nej ntshaw, ces nej khib, vim nej tsis tau raws li lub siab ntshaw, nej thiaj sib ceg, thiab sis ntaus rog. Nej tsis muaj vim nej tsis thov.
- 3 Nej thov, tab sis nej tsis tau txais, vim nej tsis ua tib zoo thov, nej tsuas xav tau nyiaj txiag siv rau nej lub cev kom tau zoo.

Yog Tswv Ntuj Lo Lus

NKAUJ CAV TXOG LUB MOO ZOO: s. 2 Tes Xas Los Nis 2,14

As les lus yas. As les lus yas. Ntuj hu peb los txais kev ntseeg nyob hauv Lub Moo Zoo kom peb tau txais HUAB TAIS YES XUS PLEEV lub koob meej nyob mus li tas ib txhiab thiab ib txhis. As les lus yas.

NTAWV MOO ZOO: Mas Kos 9,30-37

Nej Mloog Ib Zag Nyob Hauv Mas Kos Ntawv Moo Zoo

- 30 YES XUS thiab cov thwj tim tawm qhov chaw ntawd mus, lawv hla xeev Nkas Lis Lais, YES XUS tsis xav kom muaj neeg paub.
- 31 Vim YES XUS qhia nws cov thwj tim tias : "Luag yuav muab Neeg Leej Tub muag rau hauv tsoom neeg txhais tes. Luag yuav muab nws tua. Thaum luag muab nws tua tuag lawd, peb hnuv tom qab, nws yuav sawv rov los."

- 32 Cov thwj tim tsis to taub lo lus ntawd, tab sis lawv ntshai nug YES XUS.
- 33 Lawv mus Kas Fas Naus. Thaum lawv mus txog tsev, YES XUS nug lawv tias : "Nej sib cav txog dab tsi nyob tom kev?"
- 34 Lawv nyob ntsiag to, vim nyob tom kev, lawv sib cav tias leej twg yog tus loj dua cov.
- 35 YES XUS zaum, nws hu Pab Kaum Ob los, nws hais rau lawv tias: "Leej twg xav ua tus thawj, mas nws yuav ua tus tuaj tom sawv daws qab, thiab yuav ua sawv daws tus tub txib."
- 36 Ces YES XUS coj ib tug me nyuam los sawv hauv nruab nrab lawv, nws puag tus me nyuam, ces nws hais rau lawv tias :
- 37 "Leej twg txais ib tug me nyuam yaus zoo li tus no, vim kuv lub npe, yog nws txais kuv. Thiab leej twg txais kuv, mas tsis yog nws txais kuv, yog txais Tus xa kuv tuaj."

Yog Huab Tais Yes Xus Lub Moo Zoo

HNUB CHIV 25 NRUAB XYOO C CHÚA NHẬT 25 THƯỜNG NIÊN NĂM C

ZAJ NYEEM IB: As Mos 8,4-7

Cov lus nyob hauv ntawv As Mos

- 4 Nej mloog qhov no, nej cov muab tus txom nyem tsuj nthi noj cov pluag hauv teb chaws,
- 5 Hais tias: “Tav twg mam dhau hli xiab thiab xas npas peb thiaj tau qoob muag qhib nplej muab cov teev noj nqe ua me ntxuag luj kom tsam peev.
- 6 Muab tus txom nyem pauv nyiaj hos tus pluag ntaus nkawm khau, npluag nplej muag tib si.”
- 7 HUAB TAIS cog lus tseg vim Yas Kos kev khav theeb : “Kuv yuav tsis hnov qab mus ib txhis tej yam lawv tau ua no.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 112,1-2.4-8

Txais: Peb cav lus zoo txog HUAB TAIS vim nws tsa cov neeg txom nyem.

1. HUAB TAIS cov tub txib, nej cav lus zoo txog nws mas ! Nej cav txog nws kom nws lub npe nto moo lug, txij no mus txog txhiab niag tim puas xyoo. **Teb**
2. HUAB TAIS kav tas ib tsoom haiv neeg. Nws lub koob meej nyob siab dua cuaj txheej ntuj. Leej twg thiaj yuav zoo li peb tus HUAB TAIS TSWV NTUJ uas zaum lub theej kiab nyob txheej ntuj saud ? **Teb**
3. Nws tsa tus neeg me hauv plua av los. Nws rub tus txom nyem hauv qhov chaw qias los nrog cov tub huab tais zaum ua ib txig thiab nrog cov tub huab tais hauv nws haiv neeg ua ke. **Teb**

ZAJ NYEEM OB: 1 Tis Mos Tes 2,1-8

Cov lus nyob hauv Paj Lug tsab ntawv ib xa rau Tis Mos Tes

- 1 Li ntawd, kuv xav ntuas nej, kom nej xub thov Ntuj, teev Ntuj, thiab hais tej zaj ua Ntuj tsaug rau tas ib zeej tsoom.
- 2 Nej yuav thov Ntuj rau cov vaj, thiab cov muaj cai tswj luag tej, kom peb tau kev coj ib lub neej nyob nyab xeeb thiab tiaj tus nyob hauv txoj kev hwm Ntuj thiab muaj tsim.
- 3 Tej ntawd yog kev zoo thiab xis tus TSWV NTUJ cawm peb lub siab.

- 4 TSWV NTUJ xav kom tas zeej tsoom txais kev cawm thiab paub qhov tseeb.
- 5 Vim muaj tib tug TSWV NTUJ xwb. Nyob ntawm TSWV NTUJ thiab tsoom neeg kis nruab nrab, tsuas muaj tib tug cev lus xwb : yog YES XUS PLEEV. Nws yog neeg, nws muab nws los ua nqi txhiv peb sawv daws.
- 6 Thaum txog lub caij teem, nws tau ua tim khawv zeem tseeb txog tej yam ntawd.
- 7 Ntuj tsa kuv ua tus tshaj lus thiab tus Hauv Paus Xa Lus. Kuv hais lus tseeb, kuv tsis dag. Kuv yog tus thoob xwm Txoj Cai, qhia cov neeg teev pej kum dab, kom lawv paub txoj kev ntseeg thiab paub qhov tseeb.
- 8 Li ntawd, kuv xav kom nyob tas qhov txhia chaw, sawv daws thov Ntuj, thiab tsa tes hwm Ntuj, hu txog Ntuj, kom txhob muaj kev npau taws, txhob muaj lus sib ceg.

Yog Tswv Ntuj Lo Lus

NKAUJ CAV TXOG LUB MOO ZOO: 2 Kos Lis Nthos 8,9

As les lus yas. As les lus yas. HUAB TAIS YES XUS PLEEV yog tus nplua nuj, tsis kav nws tuaj yeem ua ib tug neeg pluag. Nws txoj kev pluag yuav ua kom nej sawv daws nplua nuj tuaj. As les lus yas.

NTAWV MOO ZOO: Lus Kas 16,1-13

Nej Mloog Ib Zag Nyob Hauv Lus Kas Ntawv Moo Zoo

- 1 YES XUS tseem hais rau cov thwj tim tias : "Muaj ib tug neeg nplua nuj, nws muaj ib tug tim xyoob xam txiaj. Luag qhia tus tswv tias tus tim xyoob muab nws tej nyiaj txiag siv lwj siv liam.
- 2 Tus tswv hu tus tim xyoob tuaj, nws hais rau tus tim xyoob tias : ‘Kuv hnov hais dab tsi txog koj ? Koj qhia saib koj siv kuv tej nyiaj txiag li cas. Txij no mus, koj yuav tsis tau ua tus xam txiaj ntxiv.’
- 3 Tus tim xyoob xav zoj rau nruab siab tias : Kuv yuav ua li cas, vim kuv tus tswv yuav tshem txoj hauj lwm xam txiaj ntawm kuv? Mus ncaws teb ? Kuv tsis muaj zog. Mus thov khawv ? Kuv kuj txaj muag.
- 4 Kuv paub kuv yuav ua dab tsi kom thaum lawv tshem txoj hauj lwm xam txiaj ntawm kuv lawd, muaj neeg txais kuv mus nyob hauv lawv tsev.

- 5 Ces tus tim xyoob hu cov neeg tshuav nqi ntawm tus tswv ib tug zuj zus tuaj. Nws hais rau thawj tug tias : Koj tshuav nuj nqi ntawm kuv tus tswv npaum li cas ?
- 6 Tus tshuav nqi teb tias : Ib puas hub roj. Tus tim xyoob hais rau nws tias : 'Muab koj daim ntawv tshuav nqi los, koj zaum, koj sau sai sai ua tsib caug.'
- 7 Tus tim xyoob hais rau lwm tus tias: Koj ne, koj tshuav nqi pes tsawg? Nws hais tias: Ib puas phawv nplej. Tus tim xyoob hais rau nws tias: 'Muab koj daim ntawv tshuav nqi los, koj sau ua yim caum.'
- 8 Tus tswv qhuas tus tim xyoob siab tsis ncaj txawj ua neeg xyuam xim. Vim ntiaj teb neeg cov tub, thaum lawv nrog lawv cov npawg ua ke, lawv xyuam xim dua kev kaj cov tub.
- 9 Kuv hais rau nej : "Nej xuas tej nyiaj txiag los coj neeg mus rau hauv kev tsis ncaj, mus tsim phooj ywg. Ces thaum nyiaj dua toj tas lawm, cov phooj ywg ntawd yuav txais nej mus hauv cov tsev tsam phooj nyob mus li.
- 10 Leej twg pheej xeeb thaum nws saib tej yam me me, nws kuj pheej xeeb thaum nws saib ib yam loj. Leej twg ua tsis ncaj thaum nws saib tej yam me me, nws kuj ua tsis ncaj thaum nws saib tej yam loj.
- 11 Yog nej tsis pheej xeeb saib cov nyiaj txiag uas xeeb kev tsis ncaj, mas leej twg yuav muab yam zoo tseem ceeb rau nej saib ?
- 12 Thaum nej saib yam uas yog luag tug, yog nej ua tsis ncaj, mas leej twg yuav muab yam uas yog nej tug rau nej tuav.
- 13 Tsis muaj ib tug tub txib tsob hwb ob tug tswv tau. Nws yeej yuav ntxub ib tug, nyiam lwm tus. Nws yuav npuab ib tug, thuam lwm tus. Nej yuav ua TSWV NTUJ tub txib thiab nyiaj txiag tub txib tsis tau."

Yog Huab Tais Yes Xus Lub Moo Zoo

HNUB CHIV 26 NRUAB XYOO A CHÚA NHẬT 26 THƯỜNG NIÊN NĂM A

ZAJ NYEEM IB: Es Xes Kias 18,25-28

Cov lus nyob hauv ntawv Es Xes Kias

- 25 Huab Tais hais tias: “Tim li cas nej yuav muaj cuab kav hais tias HUAB TAIS ua tsis ncaj ? His Xas Lais, nej mloog zoo zoo, puas yog kuv ua tsis ncaj? Ntshai yog nej ua tsis ncaj los tsis sub ?
- 26 Tus neeg siab ncaj nws ncaim ntawm nws txoj kev tsis ncaj lawm, nws ua txhaum, nws yuav tuag nyob hauv nws txoj kev ua txhaum.
- 27 Tus neeg siab phem nws tso nws txoj kev phem pov tseg, nws los ua qhov ncaj qhov tsim nyog ua, nws txoj sia yuav nyob.
- 28 Nws pom dheev nws cov txhaum thiab nws tso nws txoj kev phem pov tseg, mas nws yuav tsis tuag.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 24,4-9

Txais: HUAB TAIS, thov koj nco ntsoov koj txoj kev khuv leej neeg.

1. HUAB TAIS, koj ua kom kuv paub koj txoj kev; qhia koj txoj xub ke rau kuv paub. Koj coj kuv mus taug koj txoj kev tseeb. Koj qhia kuv mas vim koj yog tus TSWV NTUJ cawm kuv. **Teb**
2. HUAB TAIS, koj nco txog koj lub siab khuv leej neeg thiab nco ntsoov koj lub siab nyiam uas koj ib txwm muaj. Koj txhob nco txog kuv cov txhaum. HUAB TAIS, koj nco txog kuv vim koj hlub kuv. **Teb**
3. HUAB TAIS siab zoo ncaj tas nrho ! Nws qhia nws txoj kev rau cov neeg txhaum. Nws coj cov neeg me mus rau txoj kev ncaj. Nws qhia nws txoj kev rau cov neeg me paub. **Teb**

ZAJ NYEEM OB: Fis Lis Pos 2,1-11

Cov lus nyob hauv Paj Lug tsab ntawv xa rau cov ntseeg nyob Fis Lis Pos

- 1 Kwv tij sawv daws, kuv taj nej tsis tseg kom nej rov sib nplij nyob hauv Leej Pleev, sib nres nyob hauv txoj kev nyiam, sib koom nyob hauv LEEJ NTUJ PLIG, kom nej muaj kev sib hlub thiab sib khuv leej.

- 2 Nej ua kom kuv txoj kev zoo siab puv phwj yaws : ua li mas nej yuav muaj tib lub siab xav, tib lub siab nyiam, tib tug plig, thiab tib lub tswv yim xwb.
- 3 Nej tsis txhob swb txoj kev ua ob peb lub siab, txhob swb lub koob meej cuav : nej nyias yuav saib nyias yog tus me dua cov, yuav saib luag tej loj dua nej.
- 4 Nej nyias txhob nrhiav yam zoo rau nyias ; yuav nrhiav yam zoo rau luag.
- 5 Nyob hauv nej, sawv daws yuav muaj tib lub tswv yim zoo li YES XUS PLEEV lub.
- 6 YES XUS PLEEV yog TSWV NTUJ, tiam sis nws tsis cia nws lub hwj chim TSWV NTUJ rau luag hawm : nws muab nws lub hwj chim hle.
- 7 Nws yeem ua ib tug qhev, nws yug los ua neeg xws li ib tsoom neeg. Luag pom nws tus yam ntxwv yog yam ntxwv tib neeg.
- 8 Nws txo nws qis : nws tuaj yeem mloog Ntuj lus mus txog qhov tuag, thiab tseem xaiv txoj kev tuag saum ntoo cuam.
- 9 Vim li ntawd, mas TSWV NTUJ thiaj tsa YES XUS ua ib tug loj nyob siab siab. TSWV NTUJ muab lub npe uas nyob siab dua lwm cov npe rau nws.
- 10 Li ntawd, tus twg hnov tuav txog YES XUS lub npe, tsis hais nyob saum cov txheej ntuj, los nyob ntiaj teb no, los nyob nruab yeeb, mas tus ntawd cia li txhos caug hawm.
- 11 Txhua xeem lus yuav tsum cav tias YES XUS PLEEV yog HUAB TAIS: LEEJ TXIV TSWV NTUJ thiaj muaj koob meej nto moo lug.

Yog Tswv Ntuj Lo Lus

NKAUJ CAV TXOG LUB MOO ZOO: Zam 10,27

As les lus yas ! Huab Tais hais tias: “Kuv cov yaj mloog kuv lub suab. Kuv paub kuv cov yaj, lawv raws li nraim kuv mus.” As les lus yas !

NTAWV MOO ZOO: Mas Tais 21,28-32

Nej Mloog Ib Zag Nyob Hauv Mas Tais Ntawv Moo Zoo

- 28 Yes Xus hais rau cov thawj leej choj thiab pej xeem cov laus neeg tias: “Nej sim hais saib, nej xav li cas. Ib tug neeg muaj ob tug tub. Nws

hais rau thawj tug tias : “Me tub, hnub no koj mus ua num tom teb txiv cawv.”

- 29 Tus tub ntawd teb tias : “Kuv tsis xav mus.” Tab sis, ib me ntsis, nws khuv xim, ces nws cia li mus ua teb.
- 30 Leej txiv kuj hais rau lwm tus tub ib yam li rau thawj tug thiab. Tus tub ntawd teb tias : “Huab tais, kuv yuav mus.” Tab sis nws tsis mus.
- 31 Ob tug tub no, tus twg tau ua raws li leej txiv xav kom ua ? Lawv teb tias : “Yog thawj tug.” YES XUS hais rau lawv tias : “Kuv hais tseeb rau nej, cov sau se thiab cov niam ntiav xub mus hauv Ntuj lub Ceeb Tsheej dua nej.
- 32 Vim tias, Zam tuaj qhia Txoj Kev ncaj rau nej, tab sis nej tsis ntseeg txog nws. Hos cov sau se, thiab cov niam ntiav ntseeg txog nws. Tab txawm nej pom lawv tus qauv zoo, tom qab no, nej kuj tsis hloov siab los ntseeg txog nws.”

Yog Huab Tais Yes Xus Lub Moo Zoo

HNUB CHIV 26 NRUAB XYOO B CHÚA NHẬT 26 THƯỜNG NIÊN NĂM B

ZAJ NYEEM IB: Xam Phaj 11,25-29

Cov lus nyob hauv ntawv Xam Phaj

- 25 HUAB TAIS nqes los nyob saum twv huab. Mais Xes nrog nws tham, ces TSWV NTUJ tso nws lub Tswv Yim nqes los tsaws saum xya caum leej txwj laus ntawd. Thaum TSWV NTUJ lub Tswv Yim nyob saum lawv, mas lawv ua yaj saub thaum ntawd, tiam sis lawv tsis rov qab ua ntxiv lawm.
- 26 Muaj ob tug txiv neej nyob hauv yeej, ib tug hu ua Es Das, ib tug hu ua Mes Das, TSWV NTUJ lub Tswv Yim los nyob saum nkawd thiab, txawm tias nkawd tsis tuaj nyob ntawm lub Tsev Tsam Phooj, thiab nkawd tsis nrog lawv muaj npe. Tsis kav nkawd pib ua yaj saub nyob hauv lub yeej.
- 27 Ib tug tub hluas khiav tuaj hais qhia Mais Xes tias : "Es Das thiab Mes Das nkawd ua yaj saub nyob hauv yeej lawm."
- 28 Yos Xuas uas yog Nuv tus tub, nws ib txwm pab Mais Xes txij thaum yau los, nws teb ntua hais tias : "Leej Hlob Mais Xes, koj tsis txhob pub nkawd ua li ntawd !"
- 29 Mais Xes teb tias : "Koj puas sawv kuv chaw khiab ? Ntawm kuv, mas kuv xav kom tas HUAB TAIS haiv neeg txawj ua yaj saub, kom HUAB TAIS pub nws lub Tswv Yim rau lawv !"

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 18B,8.10.12-14

Txais: HUAB TAIS cov lus qhuab qhia yog lus ncaj, ua kom neeg lub siab kaj.

1. HUAB TAIS txoj cai zoo tas nrho, nws ntxiv zog rau tus ntsuj plig. HUAB TAIS tus txhooj nyob ruaj nreb, nws ua kom tus neeg tswv yim tsawg thoob tsib tuaj. **Teb**
2. HUAB TAIS cov lus qhuab qhia yog lus ncaj ua kom neeg lub siab kaj. HUAB TAIS lo lus qhia ntshiab si ua kom neeg pom kev. **Teb**
3. Kev hwm HUAB TAIS yog kev dawb huv. Kev hwm HUAB TAIS yuav nyob mus li. HUAB TAIS txoj cai yog lus tseeb, yog cov lus txiav txim ncaj. **Teb**
4. HUAB TAIS txoj cai muaj nqis dua cov tseem kub thiab qab dua zib ntab zib mu. **Teb**

ZAJ NYEEM OB: Yas Kos 5,1-6

Cov lus nyob hauv Yas Kos tsab ntawv

- 1 Kuv cov kwv tij, nyem no, hais rau nej cov nplua nuj. Nej yuav quaj ntsuag qees, nej yuav seev kev tu siab. Vim xwv txheej tuaj raug nej.
- 2 Nej tej cuab yeej cuab tam lwj tas, kas noj nej tej tsoos tsho.
- 3 Nej tej nyiaj tej kub xeb tas : cov nyiaj cov kub xeb ntawd yuav ua tim khawv txiav txim rau nej, thiab yuav tom nej tej nqaij. Nej ceev nyiaj zoo li ceev ib co hluav taws uas hnuv kawg yuav hlawv nej.
- 4 Cov tub zog uas sau nej tej qoob, nej tsis pub nqe zog rau lawv. Cov nqe zog ntawd qw, thiab cov tub zog lub suab quaj nce mus txog tus HUAB TAIS kav cuaj txheej ntuj.
- 5 Nyob ntiaj teb no, nej tau noj qab nyob zoo, nej tau kev ua si ntau kawg, lub caij tua tsiaj nej tau noj tsau npo.
- 6 Nej tau muab txim, nej tau muab tus siab ncaj tua pov tseg, vim nws tsis tiv nej.

Yog Tswv Ntuj Lo Lus

NKAUJ CAV TXOG LUB MOO ZOO: s. Zam 17,17

As les lus yas. As les lus yas. HUAB TAIS, koj lo lus yog lus tseeb. Koj tau xaiv peb los nyob hauv koj txoj kev tseeb. As les lus yas.

NTAWV MOO ZOO: Mas Kos 9,38-43.45.47.48

Nej Mloog Ib Zag Nyob Hauv Mas Kos Ntawv Moo Zoo

- 38 Zam hais rau YES XUS tias : "Xib Hwb, peb pom ib tug neeg hu txog koj lub npe los ntiab dab, tab sis nws tsis yog ib tug nrog peb. Peb xav txwv nws, vim nws tsis nrog peb.
- 39 Tab sis YES XUS hais tias : "Nej txhob txwv nws, vim tsis muaj ib tug neeg hu txog kuv lub npe los ua hwj huam yees ntxwv tas, ho yuav hais lus phem txog kuv tam sis ntawd.
- 40 Leej twg tsis tiv peb, mas nws tuaj peb tog."
- 41 "Leej twg muab ib khob dej rau nej haus, vim nej yog Leej Pleev tug, mas kuv hais tseeb rau nej, tus ntawd yuav txais koob haum."

- 42 Yog leej twg coj ib tug neeg ntseeg me me no, kom ua txhaum, mas txhiaj khoov cia luag muab lub zeb uas luj zom mus dai ntawm nws caj dab, thiab muab nws pov rau hauv dej ntuj.
- 43 Yog koj txhais tes coj koj mus ua txhaum, muab txiav pov tseg : txhiaj khoov koj tu ib sab tes mus hauv Txoj Sia, zoo dua koj muaj ob sab tes mus hauv dab phem teb, uas hluav taws tsis txawj tuag.
- 45 Yog koj txhais taw coj koj mus ua txhaum, muab txiav pov tseg : txhiaj khoov koj tu taw mus hauv Txoj Sia, zoo dua muaj ob txhais taw, tab sis koj poob hauv dab phem teb.
- 47 Yog koj lub qhov muag coj koj mus ua txhaum, muab kaus pov tseg: txhiaj khoov koj dig ib sab qhov muag mus hauv TSWV NTUJ lub Ceeb Tsheej, zoo dua koj muaj ob sab qhov muag, tab sis koj poob hauv dab phem cov hluas taws,
- 48 hauv lub teb chaws uas lawv cov kas tsis txawj tuag, thiab hluav taws tsis txawj kug.

Yog Huab Tais Yes Xus Lub Moo Zoo

HNUB CHIV 26 NRUAB XYOO C CHÚA NHẬT 26 THƯỜNG NIÊN NĂM C

ZAJ NYEEM IB: As Mos 6,1a.4-7

Cov lus nyob hauv ntawv As Mos

- 1a Lawv yuav raug txoj hmoov phem, cov uas lawv nyob dag ua si nyob saum Xis Yoos, cov tso siab rau yav tom ntej nyob saum lub roob Xas Mas Lias,
- 4 Lawv pw saum tej lub txaj kaus ntshw, lawv khaum tes khaum taw saum cov rooj zaum tswm zooj, lawv noj luag tej me nyuam yaj, noj luag tej thav nyuj.
- 5 Lawv qw tej zaj kwv txhiaj ntxuag thaj cheej xws li Das Vis, lawv tsim tej twj ua paj nruag.
- 6 Lawv haus cov cawv txiv ntoo puv tej lub ntim loj. Lawv muab roj tsw qab tshaj los pleev lawv lub cev. Lawv tsis ntxhov siab txog qhov His Xas Lais tab tom yuav raug xwv txheej.
- 7 Vim li ntawd, nyem no txog lub caij lawv yuav ua tsoom pej xeem ntej mus nyob txim lawm pej kum teb. Nyem no dua lub caij uas cov neeg pw tsa ceg cos haus cawv qaug cawv lawm.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 145,6b-10

Txais: Kuv tus plig, koj cav lus zoo txog HUAB TAIS.

1. HUAB TAIS TSWV NTUJ nco ntsoov nws cov lus mus ib txhiab ib txhis. Nws tswj txoj kev ncaj rau cov neeg uas raug luag hiam. Nws pub rau cov neeg tshaib noj, nws tso cov neeg nyob txim. **Teb**
2. HUAB TAIS qhib cov neeg dig muag kom rov pom kev, nws tsa cov neeg qaug zog. HUAB TAIS nyiam cov neeg ua ncaj, nws pov hwm cov pej kum neeg. **Teb**
3. Nws txhawb cov poj ntsuam thiab cov ntsuag nos. Nws mooj cov siab phem kom lawv yuam kev. HUAB TAIS yog tus vaj nyob mus li. Xis Yoos, nws yog koj tus TSWV NTUJ mus tiam dhau tiam. **Teb**

ZAJ NYEEM OB: 1 Tis Mos Tes 6,11-16

Cov lus nyob hauv Paj Lug tsab ntawv ib xa rau Tis Mos Tes

- 11 Ntawm koj, mas koj yog TSWV NTUJ tus neeg, koj txav mus deb ntawm tej ntawd tib si. Koj xyaum mus taug txoj kev ncaj, kev hwm Ntuj, kev ntseeg, kev nyiam, kev tij lim, kev hlub luag mos nyoos.
- 12 Koj ntaus ntsug rog zoo los pab kev ntseeg. Koj yuav txeeb tau txoj sia nyob mus li : Ntuj hu koj los txais txoj sia ntawd. Thiab yog vim koj xav tau txoj sia nyob mus li, ces koj thiaj ua zaj zeem kev ntseeg zoo nkauj rau cov tim khawv pom.
- 13 Kuv tuav txog TSWV NTUJ lub npe, uas nws pub txoj sia rau txhua tsav txhua yam thiab tuav txog YES XUS PLEEV lub npe, uas nws tau hais lo lus zeem tseeb zoo nkauj, nyob ntawm Poos Xyus Pis Las Tos xub ntiag.
- 14 Koj coj lo lus qhia zoo, txhob ua ib yam tsis huv, txhob muaj chaw xyeej. Koj ua li ntawd mus txog hnuv peb tus HUAB TAIS YES XUS PLEEV yuav tawm los rau pom xyeeem.
- 15 Thaum txog lub caij teem, tus yuav ua kom YES XUS tawm los, yog tus HUAB TAIS nto koob meej, tus Vaj kav tas tsoom vaj, tus HUAB TAIS kav tas tsoom huab tais,
- 16 yog tus muaj txoj sia tsis txawj tuag ua nws tug, yog tus nyob txawm saum qhov pom kev, uas neeg mus tsis tau, yog tus uas leej tib neeg tsis tau pom dua, thiab pom tsis tau. Kev nto koob meej thiab kev muaj hwj huam yog nws tug mus ib txhiab ib txhis! Ua li!

Yog Tswv Ntuj Lo Lus

NKAUJ CAV TXOG LUB MOO ZOO: 2 Kos Lis Nthos 8,9

As les lus yas. As les lus yas. HUAB TAIS YES XUS PLEEV yog tus nplua nuj, tsis kav nws tuaj yeem ua ib tug neeg pluag. Nws txoj kev pluag yuav ua kom nej sawv daws nplua nuj tuaj. As les lus yas.

NTAWV MOO ZOO: Lus Kas 16,19-31

Nej Mloog Ib Zag Nyob Hauv Lus Kas Ntawv Moo Zoo

- 19 Yes Xus hais rau cov Fas Lis Xais zaj paj lug no : "Muaj ib tug neeg nplua nuj, nws hnav ntaub tsuj liab tsam xem thiab ntaub pag mos. Nws niaj hnuv noj tej rooj qav zoo kawg.
- 20 Muaj ib tug pluag hu ua Las Ntxas Los, nws ib ce mob kiav txhab tas, nws pw ze ntawm tus nplua nuj lub rooj loog.

- 21 Las Ntxas Los ntshaw noj tej yam poob ntawm tus nplua nuj lub rooj mov kom tsau nws plab... Dev tseem tuaj yaim nws tej qhov txhab thiab.
- 22 Muaj ib hnuv, tus pluag tuag, cov Tub Xo tuaj nqa nws mus rau hauv Has Nplav Has xub ntiag. Tus nplua nuj kuj tuag thiab, luag muab nws coj mus faus.
- 23 Tus nplua nuj nyob hauv ntuj txias teb tsaus, nws txom nyem loj kawg. Nws tsa muag ntsia pom Has Nplav Has nyob deb thiab pom Las Ntxas Los nyob hauv nws xub ntiag.
- 24 Nws hu nrov tias : Txiv Has Nplav Has, thov koj khuv leej kuv, thov koj xa Las Ntxas Los tuaj muab nws ntsis ntiv tes tub dej rau kuv tus nplav kom txias, vim kuv raug tsim txom nyob hauv cov hluav taws no. Tab sis Has Nplav Has hais tias:
- 25 Kuv tub, koj nco ntsoov tias thaum ua neej nyob koj tau txais koj cov nyiaj txiag, hos Las Ntxas Los tau txais kev mob. Zaum no Las Ntxas Los txais kev npliv nyob ntawm no, hos koj raug tsim txom.
- 26 Thiab tsis tag li ntawd : muaj ib lub qhov ntuj tob kawg kem peb rau ntawm nej, kom cov uas xav hla ntawm peb rau tim nej hla tsis tau, thiab kom cov nyob tim nej txhob hla tau los rau tim no.
- 27 Ces tus nplua nuj hais tias : "Txiv, kuv thov koj xa Las Ntxas Los mus hauv kuv txiv tsev,
- 28 vim kuv muaj tsib tug kwv tij, kom Las Ntxas Los mus ua pov thawj qhia lawv, kom lawv tsis txhob tuaj nyob hauv qhov chaw raug tsim txom no."
- 29 Ces Has Nplav Has hais tias: "Lawv muaj Mais Xes thiab cov Yaj Saub. Cia lawv mloog Mais Xes thiab cov Yaj Saub qhia.
- 30 Tab sis tus nplua nuj hais tias : "Txiv Has Nplav Has, yog tias ib tug hauv cov tuag mus cuag lawv, mas lawv yuav hloov siab.
- 31 Tab sis Has Nplav Has hais rau nws tias : "Yog lawv tsis mloog Mais Xes thiab cov Yaj Saub, mas tab yog ib tug sawv hauv cov tuag mus qhia lawv, lawv kuj yuav tsis ntseeg nws."

Yog Huab Tais Yes Xus Lub Moo Zoo

HNUB CHIV 27 NRUAB XYOO A CHÚA NHẬT 27 THƯỜNG NIÊN NĂM A

ZAJ NYEEM IB: His Xais 5,1-7

Cov lus nyob hauv ntawv His Xais

- 1 Kuv yuav hu nkauj rau tus kuv nyiam. Yog kuv tus phooj ywg zaj nkauj hais txog nws lub vaj txiv cawv. Tus kuv nyiam muaj ib lub vaj txiv cawv nyob saum ib plag toj av zoo.
- 2 Nws ncaws, nws dawj pob zeb pov tseg, nws xaiv ib co ceg zoo los cog. Nyob nruab nrab, nws txhim ib lub sam thiaj. Nws khawb ib lub qhov xwv cawv. Nws vam tias nws yuav tau sau ib co txiv zoo nkauj. Tab sis lub vaj txi ib co txiv caws maum.
- 3 Nyem no, cov pej xeem nyob Yes Lus Xas Les, cov neeg nyob Yus Das teb, kuv thov nej txiav txim saib puas yog kuv txhaum, los yog kuv lub vaj txhaum ?
- 4 Tshuav dab tsi uas kuv tsis tau ua rau nws ? Kuv vam tias nws yuav txi tej ntwg txiv zoo nkauj, vim li cas nws txi ib co txiv caws maum?
- 5 Vim li ntawd, kuv qhia nej paub tias kuv yuav ua dab tsi rau kuv lub vaj txiv cawv. Kuv yuav rhuav cov ntoo xov vaj, ces tsiaj yuav ntxo nws, kuv yuav rhuav nws cov laj kab, kom neeg tsuj nws.
- 6 Kuv yuav ua kom kuv lub vaj puas tsuaj. Yuav tsis muaj neeg tav ntsis, tsis muaj neeg dob nroj, ces pos thiab nroj yuav laum, kuv yuav ua kom huab txhob tso nag los ywg lub vaj.
- 7 Tus HUAB TAIS kav tsoom tub rog lub vaj txiv cawv, yog His Xas Lais lub cuab, yog Yus Das lub yig, lawv yog cov ceg txiv cawv nws hlub. Nws vam tias lawv yuav ua ncaj, tab sis nws tsuas pom lawv ua ntshav ntws. Nws vam tias lawv yuav mloog Txoj Cai, tab sis nws tsuas hnov neeg ntshai lub suab quaj qw.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 79,9.12-16.19-20

Txais: Haiv His Xas Lais yog HUAB TAIS lub vaj txiv cawv.

1. Koj rho tsoob txiv cawv ntawm Hais Nkws Tos teb los. Koj coj los cog, koj ntiab ntau haiv neeg tawm mus. Nws cab hmab mus txog ntug hiav txwv; nws hlav ntsuag mus txog tus niam dej. **Teb**

2. Ua cas koj rhuav lub laj kab xov nws, cia cov neeg dua kev de nws tej txiv? Tej tsiaj qus tuaj noj lwj ntsuav, tej tsiaj nyeg tuaj tshom lwj ntxaws. **Teb**
3. TSWV NTUJ muaj hwj huam tas nrho, koj rov los mas ! Koj nyob saum ntuj dauv muag los ntsia, koj yuav pom. Thov koj nqes los xyuas koj lub vaj txiv cawv; koj nqes los xyuas tsob txiv uas koj txhais tes xis tau cog thiab xyuas tus tub uas txais koj lub zog. **Teb**
4. Peb yuav tsis txav mus deb koj ib zaug ntxiv. Koj ua kom peb muaj txoj sia tshiab, peb yuav hu txog koj lub npe. TSWV NTUJ muaj hwj huam tas nrho, thov koj koj peb rov los. Thov cia koj lub ntsej muag ci tuaj rau peb ces peb yuav tau txais kev cawm. **Teb**

ZAJ NYEEM OB: Fis Lis Pos 4,6-9

Cov lus nyob hauv Paj Lug tsab ntawv xa rau cov ntseeg nyob Fis Lis Pos

- 6 Kwv tij sawv daws, nej tsis txhob txhawj dab tsi. Thaum nej thov Ntuj, thiab nej teev Ntuj, mas nej kuj yuav ua Ntuj tsaug. Thiab tej yam nej xav tau, nej yuav hais rau TSWV NTUJ paub.
- 7 TSWV NTUJ txoj kev thaj yeeb zoo tshaj qhov yus xav tau : nws txoj kev thaj yeeb yuav txuag nej lub siab thiab nej lub tswv yim kom nyob hauv YES XUS PLEEV.
- 8 Kwv tij sawv daws, tej yam muaj tsim, tej yam ncaj, tej yam huv, tej yam zoo nyiam, tej yam tsim nyog hwm, tas txhia yam zoo uas neeg ua thiab neeg cav txog, mas nej yuav ntshaw tas zog.
- 9 Txhua yam nej tau kawm ntawm kuv, thiab nej tau txais, los nej hnov ntawm kuv, thiab nej pom nyob hauv kuv, mas nej yuav xyaum coj tas huv tib si. Ces tus TSWV NTUJ pub kev thaj yeeb yuav nrog nej nyob.

Yog Tswv Ntuj Lo Lus

NKAUJ CAV TXOG LUB MOO ZOO: s. Zam 15,16

As les lus yas. As les lus yas. HUAB TAIS hais tias: “Kuv tau xaiv nej thiab xa nej mus kom nej txi txiv, kom nej cov txiv nyob ruaj nreb. As les lus yas

NTAWV MOO ZOO: Mas Tais 21,33-43

Nej Mloog Ib Zag Nyob Hauv Mas Tais Ntawv Moo Zoo

- 33 Yes Xus hais rau cov thawj leej choj thiab pej xeeem cov laus neeg tias: “Nej mloog dua ib zag paj lug li no. Muaj ib tug tswv teb, nws cog tau ib thaj txiv cawv. Nws xov laj kab ncig nws thaj teb. Nws txaug ib lub zeb zom txiv cawv, thiab tseem txhim tau ib lub lawj siab siab cia. Nws ntiav ib co neeg zov, ces nws tawm rooj mus kev deb.
- 34 Thaum yuav txog caij de txiv, nws xa nws cov tub txib mus nqa txiv cawv ntawm cov zov teb.
- 35 Cov neeg zov teb ntes cov tub txib, muab ib tug ntaus, muab ib tug tua, muab pob zeb los txawb lwm tus kom tuag.
- 36 Tus tswv rov xa ib co tub txib coob dua thawj cov mus, cov zov teb kuj ua ib yam li lawv ua rau thawj cov.
- 37 Qhov kawg, nws xa nws tus tub mus cuag lawv, nws xav tias: “Lawv yuav hwm kuv tus tub.”
- 38 Tab sis cov zov teb pom dheev tus tub, lawv sib tham tias : “Tus ntawd yog tus yuav txais cuab tam. Tsuag tsuag ! Peb muab nws tua. Lub cuab tam thiaj yuav yog peb tug.”
- 39 Ces lawv ntes ntho tus tub, coj nws mus pov rau tom ntug teb thiab muab nws tua.
- 40 Thaum tus tswv teb txiv cawv tuaj txog, nws yuav ua dab tsi rau cov zov teb ?”
- 41 Lawv teb rau YES XUS tias : “Nws yuav ua kom cov zov teb siab phem ntawd tuag txom nyem ntsuav, ces nws yuav ntiav lwm cov neeg zov nws daim teb. Thaum txog caij txiv cawv siav, cov ntawd yuav xa cov txiv rau tus tswv.”
- 42 YES XUS hais rau lawv tias : “Nej puas tau nyeem ib zaug li txog cov lus hauv Ntawv tias: Lub pob zeb uas cov tub txhim tsev muab pov tseg, yog lub pob zeb txheem lub ncov ruv tsev. Qhov ntawd yog tuaj ntawm HUAB TAIS tuaj. Yog ib yam zoo nkauj zoo saib rau ntawm peb qhov muag.
- 43 Vim li ntawd, kuv hais rau nej: Ntuj yuav thau lub Ceeb Tsheej ntawm nej los cev rau ib haiv neeg uas yuav muab siab rau tu kom txi txiv.”

Yog Huab Tais Yes Xus Lub Moo Zoo

HNUB CHIV 27 NRUAB XYOO B CHÚA NHẬT 27 THƯỜNG NIÊN NĂM B

ZAJ NYEEM IB: Hauv Paus 2,18-24

Cov lus nyob hauv ntawv Hauv Paus

- 18 HUAB TAIS TSWV NTUJ hais tias : "Cia txiv neej nyob ib leeg mas tsis zoo. Kuv yuav ua ib tug pab nws kom phim nws."
- 19 HUAB TAIS TSWV NTUJ thiaj muab av los puab tas puas tsav yam tsiaj qus thiab tas puas tsav yam noog ya saum ntuj. Nws coj los rau tus txiv neej xyuas saib nws yuav tis npe li cas rau. Txhua yam tsiaj yuav muaj lub npe raws li tus txiv neej tis rau.
- 20 Tus txiv neej tis npe rau tas txhua hom tsiaj nyeg, rau cov noog ya saum ntuj, thiab rau tas txhua hom tsiaj qus, tiam sis nws nrhiav tsis tau ib tug pab nws thiab phim nws.
- 21 HUAB TAIS TSWV NTUJ tso ib tug dab ntub hlob laum tus txiv neej, ces nws tsaug zog lawm. TSWV NTUJ rho nws ib tug tav tawm los, nws rov kaw lub qhov zoo li qub.
- 22 HUAB TAIS TSWV NTUJ muab tus tav uas nws rho ntawm tus txiv neej los puab ua ib tug poj niam. TSWV NTUJ coj los rau tus txiv neej saib.
- 23 Tus txiv neej nqua suab hlo tias : "Zaum no, tus no yog tseem txha ntawm kuv txha thiab tseem nqaij ntawm kuv nqaij tiag ! Tus no yuav hu ua 'poj niam,' vim tus no tawm ntawm txiv neej los !"
- 24 Vim li no txiv neej thiaj tso niam tso txiv tseg, mus npuab nws tus poj niam, ces nkawd ua ib lub cev nqaij xwb.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 127,1-6

Txais: Thov kom TSWV NTUJ foom hmoov zoo rau peb tas peb sim neej.

1. Cov neeg hwm HUAB TAIS thiab taug nws txoj kev, lawv txoj hmoov zoo. Koj tau noj cov txhiam xws koj ob txhais tes khwv. Koj txoj hmoov zoo, koj tau lub neej kaj siab lug. **Teb**
2. Koj poj niam zoo li tsob txiv cawv txi nyob hauv koj tsev. Koj cov tub ki zoo li cov ntsuag txiv ntoo roj nyob ncig koj lub phaj tsum. **Teb**

3. HUAB TAIS foom hmoov zoo rau tus hwm nws. Thov kom HUAB TAIS nyob saum Xis Yoos foom hmoov zoo rau koj. Niaj hnuv tas koj sim neej, koj yuav pom Yes Lus Xas Les vam meej. **Teb**
4. Koj yuav pom koj cov tub tej xeeb leej xeeb ntxwv. Thov kom kev thaj yeeb nyob hauv His Xas Lais ! **Teb**

ZAJ NYEEM OB: Hes Nplaws 2,9-11

Cov lus nyob hauv tsab ntawv xa rau cov ntseeg Hes Nplaws

- 9 Kuv cov kwv tij, YES XUS tau txo nws qis dua cov Tshiab ib me ntus, ces peb pom nws tau lub hwj chim thiab lub koob meej roos nws, vim nws tau txais txoj kev tuag. Nws yuav tsum saj txoj kev tuag, nws thiaj pab tau txhua tus neeg. TSWV NTUJ lub txiaj ntsim mus li ntawd.
- 10 Vim tias, tus tsim tas puas tsav yam los kom puas tsav yam ntawd tsob hwb nws, mas nws xav koj neeg tej tub ki coob coob mus txais koob meej thiab txais kev cawm. Phim nws yuav cia tus Ntaus Thawj raug txom nyem kom nws ntshiab tuaj.
- 11 Vim tus ua tau kom luag ntshiab, thiab cov txais kev ntshiab, lawv puav leej tawm ntawm ib lub hauv paus los. Vim li ntawd, tus ua tau kom luag ntshiab, thiaj tsis txaj muag hu cov txais kev ntshiab ua nws cov kwv.

Yog Tswv Ntuj Lo Lus

NKAUJ CAV TXOG LUB MOO ZOO: 1 Zam 4,12

As les lus yas. As les lus yas. Yog peb sib nyiam sib hlub mas TSWV NTUJ yuav nyob txawm hauv peb thiab nws txoj kev nyiam kev hlub uas zoo txhij txhua nyob hauv peb. As les lus yas.

NTAWV MOO ZOO: Mas Kos 10,2-16

Nej Mloog Ib Zag Nyob Hauv Mas Kos Ntawv Moo Zoo

- 2 Ib cov Fas Lis Xais xav sim YES XUS, ces lawv txav los nug nws tias : "Ib tug txiv neej yuav nrauj nws poj niam puas tau ?"
- 3 YES XUS teb rau lawv tias : "Mais Xes qhia dab tsi rau nej ?"
- 4 Lawv teb tias : "Mais Xes kom ua ntawv nrauj tso thiaj nrauj tau."
- 5 YES XUS teb rau lawv tias : "Yog vim nej lub siab txhav dhau, Mais Xes thiaj sau txoj cai ntawd."

- 6 Tab sis, thaum chiv lub keeb tsim neeg, TSWV NTUJ tsim nkawd ua txiv neej, thiab poj niam.
- 7 Vim li ntawd, txiv neej yuav tso nws niam nws txiv tseg,
- 8 nkawd ob leeg yuav ua ib lub cev nqaij xwb. Ua li mas nkawd tsis yog ob leeg lawm, nkawd yog ib lub cev nqaij xwb.
- 9 Yog vim qhov no, mas yam uas TSWV NTUJ muab sau los ua ke, neeg yuav tsis txhob muab cais.
- 10 Thaum lawv rov los txog tsev, cov thwj tim rov nug YES XUS txog qhov ntawd.
- 11 Ces YES XUS hais rau lawv tias : "Tus txiv neej twg nrauj nws poj niam, ho rov yuav dua lwm tus, mas nws yog ib tug muaj txij nkawm mus deev luag, nws ua txhaum rau thawj tug.
- 12 Hos tus poj niam twg nrauj nws tus txiv, rov yuav dua lwm tus, mas nws yog ib tug muaj txiv mus deev hluas."
- 13 Luag coj ib co me nyuam tuaj rau YES XUS kom YES XUS kov lawv, tab sis cov thwj tim cem lawv hnyav.
- 14 YES XUS pom li ntawd, nws npau taws, nws hais rau lawv tias : "Nej cia cov me nyuam tuaj cuag kuv, nej txhob txwv lawv. Yog cov neeg uas zoo li cov me nyuam no thiaj yuav tau TSWV NTUJ lub Ceeb Tsheej los ua lawv tug.
- 15 Kuv hais tseeb rau nej : leej twg tsis txais TSWV NTUJ lub Ceeb Tsheej zoo li ib tug me nyuam, mas nws yuav mus tsis tau hauv TSWV NTUJ lub Ceeb Tsheej.
- 16 Ces YES XUS puag cov me nyuam, nws tsa tes rau saum lawv, nws foom hmoov zoo rau lawv.

Yog Huab Tais Yes Xus Lub Moo Zoo

Zaj Nyeem Luv Luv: Mas Kos 10,2-12

Nej Mloog Ib Zag Nyob Hauv Mas Kos Ntawv Moo Zoo

- 2 Ib cov Fas Lis Xais xav sim YES XUS, ces lawv txav los nug nws tias : "Ib tug txiv neej yuav nrauj nws poj niam puas tau ?"
- 3 YES XUS teb rau lawv tias : "Mais Xes qhia dab tsi rau nej ?"
- 4 Lawv teb tias : "Mais Xes kom ua ntawv nrauj tso thiaj nrauj tau."

- 5 YES XUS teb rau lawv tias : "Yog vim nej lub siab txhav dhau, Mais Xes thiaj sau txoj cai ntawd.
- 6 Tab sis, thaum chiv lub keeb tsim neeg, TSWV NTUJ tsim nkawd ua txiv neej, thiab poj niam.
- 7 Vim li ntawd, txiv neej yuav tso nws niam nws txiv tseg,
- 8 nkawd ob leeg yuav ua ib lub cev nqaij xwb. Ua li mas nkawd tsis yog ob leeg lawm, nkawd yog ib lub cev nqaij xwb.
- 9 Yog vim qhov no, mas yam uas TSWV NTUJ muab sau los ua ke, neeg yuav tsis txhob muab cais.
- 10 Thaum lawv rov los txog tsev, cov thwj tim rov nug YES XUS txog qhov ntawd.
- 11 Ces YES XUS hais rau lawv tias : "Tus txiv neej twg nrauj nws poj niam, ho rov yuav dua lwm tus, mas nws yog ib tug muaj txij nkawm mus deev luag, nws ua txhaum rau thawj tug.
- 12 Hos tus poj niam twg nrauj nws tus txiv, rov yuav dua lwm tus, mas nws yog ib tug muaj txiv mus deev hluas."

Yog Huab Tais Yes Xus Lub Moo Zoo

HNUB CHIV 27 NRUAB XYOO C CHÚA NHẬT 27 THƯỜNG NIÊN NĂM C

ZAJ NYEEM IB: Has Npas Kws 1,2-3; 2,2-4

Cov lus nyob hauv ntawv Has Npas Kws

- 1,2 HUAB TAIS, cas kuv hu koj pab npaum twg los koj tsis hnov, txawm kuv qw tawg ntho rau koj los koj tsis cawm,
- 3 Ua cas koj ua kuv pom qhov nkhaus thiab txog siav qhi, koj ntsia twj ywm kev kub ntxhov kev puas ntsoog, ntawm kuv xub ntiag yog kev kub ntxhov kev puas tsuaj sib cav sib ceg ;
- 2,2 HUAB TAIS teb kuv, nws hais tias : Muab zaj yog toog no sau rau saum phiaj thiab qhia kom muaj tus nyeem zawg zog ;
- 3 Zaj yog toog kos tseg mam tshwm sim hnuv kawg, yeej tsis yuam kev, txawm nws tsis hnyoo tshwm, ua tiag tos, nws yuav tuaj sai saum no;
- 4 Tus neeg khav theeb hauv nws tsis ncaj ncees, hos tus ncaj yuav ciaj sia vim nws mloog lus.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 94,1-2.6-9

Txais: Hnuv no yog nej hnov HUAB TAIS lub suab lawm, nej tsis txhob cia nej lub siab tawv li pob zeb.

1. Nej tuaj, peb sawv daws hu nkauj zoo siab cav txog HUAB TAIS! Peb qw suab zoo siab hawm lub tsua cawm peb. Peb txav los ntawm nws xub ntiag ua nws tsaug ! Peb npuaj teg hu nkauj cav txog nws. **Teb**
2. Nej chaws los, peb khoov cev, peb pe. Peb txhos caug hawm tus HUAB TAIS tsim peb los. Nws yog peb tus TSWV NTUJ, peb yog nws haiv neeg, yog pab yaj nws txhais tes hwj. **Teb**
3. Hnuv no, nej cia li mloog HUAB TAIS lub suab. Nej tsis txhob cia nej lub siab tawv li pob zeb, zoo li thaum nej nyob Mes Li Npas thiab nyob Mas Xas hauv teb chaws suab puam. Thaum ntawd, nej cov yawg koob twb pom kuv cov hauj lwm muaj hwj huam, tsis kav lawv tseem twv kuv thiab sim kuv. **Teb**

ZAJ NYEEM OB: 2 Tis Mos Tes 1,6-8.13-14

Cov lus nyob hauv Paj Lug tsab ntawv ob xa rau Tis Mos Tes

- 6 Yog vim li ntawd, kuv thov ntuas koj, kom koj rov txhib lub txiaj ntsim uas TSWV NTUJ tso rau hauv koj hnuv kuv tiag tes rau koj.
- 7 Lub tswv yim uas TSWV NTUJ pub rau peb tsis yog ib lub tswv yim ntshai, yog ib lub tswv yim muaj zog, ib lub tswv yim nyiam, ib lub tswv yim pab yus tswj yus lub neej.
- 8 Koj txhob txaj muag ua tim khawv zeem peb tus HUAB TAIS. Txhob txaj muag zeem kuv uas yog YES XUS tus neeg nyob txim. Koj yuav zoo siab nrog kuv raug txom nyem vim lub Moo Zoo. Koj muaj TSWV NTUJ lub zog nres koj.
- 13 Txoj kev koj yuav taug yog cov lus ncaj uas koj tau hnov ntawm kuv nyob hauv txoj kev ntseeg thiab kev nyiam YES XUS PLEEV.
- 14 Koj ceev Ntuj cov lus qhia zoo zoo mog. Koj muaj LEEJ NTUJ PLIG NTSHIAB pab koj : nws nyob txawm hauv peb.

Yog Tswv Ntuj Lo Lus

NKAUJ CAV TXOG LUB MOO ZOO: 1 Pob Zeb 1,25

As les lus yas. As les lus yas. HUAB TAIS lo lus nyob mus ib txhis yuav tsis muaj hnuv kawg li. Lub Moo Zoo tuaj txog nej yog lo lus nyob mus li. As les lus yas.

NTAWV MOO ZOO: Lus Kas 17,5-10

Nej Mloog Ib Zag Nyob Hauv Lus Kas Ntawv Moo Zoo

- 5 Cov Hauv Paus Xa Lus hais rau HUAB TAIS tias : "Koj txhab kev ntseeg rau peb mas !"
- 6 Ces HUAB TAIS hais tias : "Yog nej muaj kev ntseeg luaj li lub noob zaub roj, mas nej yuav hais tau rau tsoob ntoo txiv pos no tias 'Rho koj cov cag, koj tshais mus cog koj rau hauv dej ntuj,' mas tsoob ntoo yuav mloog nej lus.
- 7 "Nyob hauv nej, yog leej twg tus tub txib mus laij teb, los nws mus zov tsiaj lawm, thaum nws rov tom teb los txog, nej leej twg yuav hais rau nws tias : "Koj tsuag tsuag los zaum noj mov ?"
- 8 Ntshai nws yuav hais rau tus tub txib tias : "Koj ua hmo rau kuv, koj sia siv, koj rau mov rau kuv. Thaum kuv noj kuv haus tas, mas koj mam li noj haus tom qab."

- 9 Tus tub txib ua raws li nws tus tswv txib, tus tswv puas pom nws txiaj ntsim ?
- 10 Nej kuj zoo ib yam li ntawd : thaum nej ua tas txhua yam raws li tej lus luag txib nej, mas nej hais tias : "Peb yog ib co tub txib tsis muaj nqi ; peb ua qhov uas peb yuav tsum ua."

Yog Huab Tais Yes Xus Lub Moo Zoo

HNUB CHIV 28 NRUAB XYOO A CHÚA NHẬT 28 THƯỜNG NIÊN NĂM A

ZAJ NYEEM IB: His Xais 25,6-10a

Cov lus nyob hauv ntawv His Xais

- 6 Nyob saum lub roob no, tsoom tub rog tus HUAB TAIS yuav ua ib rooj nqaij ib rooj hno rau tas cov haiv neeg huv tib si, yog ib rooj qav muaj hlwb puv pob txha, ib rooj cawv ntshiab tsis muaj txo.
- 7 Nyob saum lub roob no, HUAB TAIS yuav yaws daim ntaub vov tsoom neeg tib si, yuav rhuav chaws ntaub qhwv tsoom kuj cuab.
- 8 Nws yuav rhuav kev tuag ib txhiab ib txhis. HUAB TAIS TSWV NTUJ yuav so cov kua muag ntws saum sawv daws lub ntsej muag, nws yuav thau nws haiv neeg chaw poob tsim nyob thoob ntiag teb, vim HUAB TAIS tau hais li ntawd.
- 9 Hnub ntawd sawv daws yuav hais tias : "Nej ntsia peb tus TSWV NTUJ uas peb vam tias nws yuav cawm peb, yog tus HUAB TAIS uas peb tos. Peb kav tsij dhia hom khaj, kav tsij xyiv fab lom zem!
- 10a Vim HUAB TAIS yuav tso nws txhais tes nyob saum lub roob no.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 22,1-6

Txais: Kuv yuav nyob hauv HUAB TAIS tsev mus tag kuv sim neej.

1. HUAB TAIS yog kuv tus tswv zov yaj, kuv tsis ntshaw dab tsi. Nws tso kuv nyob hauv tej tshav zaub mos. Nws koj kuv mus so nyob ze dej, nws rov ntshav zog rau kuv tus plig. **Teb**
2. Nws koj kuv mus taug txoj kev ncaj kom nws lub npe nto koob meej. Tab yog kuv taug kev mus hauv lub kwj ha tsaus ntuj nti, kuv tsis ntshai vim koj nrog kuv, koj rab pas nrig yog kuv chaw tso siab. **Teb**
3. Cov neeg ntshav kuv, lawv hnyos kuv. Koj npaj ib roog qav rau ntawm kuv xub ntiag. Koj plev roj tsw qab rau saum kuv taub hau. Koj hliv cawv puv lub ntim rau kuv haus. **Teb**
4. Tas kuv sim neej, kev kaj siab thiab kev hluv nrog nraim kuv. Tas kuv sim neej, kuv yuav nyob hauv HUAB TAIS tsev. **Teb**

ZAJ NYEEM OB: Fis Lis Pos 4,12-14.19-20

Cov lus nyob hauv Paj Lug tsab ntawv xa rau cov ntseeg nyob Fis Lis Pos

- 12 Kwv tij sawv daws, kuv txawj yoo mov, ib yam li kuv txawj noj kom tsau thaum muaj txhiam xws txaus noj seem noj so. Tsis hais thaum twg, kuv tau xyaum yoog lub caij muaj noj muaj haus ib yam li yoog lub caij tshaib nqhis, kuv yoog txoj kev nplua nuj, ib yam li yoog txoj kev pluag.
- 13 Kuv ua tau tas puas tsav yam nyob hauv tus ua kom kuv muaj zog.
- 14 Tab sis, thaum kuv raug kev txom nyem, nej tau pab kuv, mas nej tau ua zoo kawg.
- 19 Kuv tus TSWV NTUJ pom tias, nej yuav tsum muaj dab tsi, ces nws thiaj pub tej ntawd rau nej, nws yuav pauj qhov nej tau pub rau kuv, vim nws nplua nuj, thiab nws siab dav nyob hauv YES XUS PLEEV.
- 20 Tus TSWV NTUJ no yog peb Leej Txiv, nws muaj koob meej nto moo mus txog txhiab niag tim puas xyoo. Ua li.

Yog Tswv Ntuj Lo Lus

NKAUJ CAV TXOG LUB MOO ZOO: s. Es Fes Xos 1,17-18

As les lus yas. As les lus yas. Thov kom peb tus HUAB TAIS YES XUS LEEJ TXIV tso qhov pom kev tuaj kaj peb siab kom peb tso siab lug taug txoj kev uas Ntuj hu peb vim Ntuj muaj hwj huam loj. As les lus yas

NTAWV MOO ZOO: Mas Tais 22,1-14

Nej Mloog Ib Zag Nyob Hauv Mas Tais Ntawv Moo Zoo

- 1 YES XUS tsa ncauj rov ua paj lug hais rau lawv ntxiv tias :
- 2 “Ntuj lub Ceeb Tsheej zoo li ib tug vaj uas nws ua tshoob rau nws tus tub.
- 3 Nws xa tub txib mus nqua hu neeg tuaj noj tshoob, tab sis lawv tsis xav tuaj.
- 4 Nws rov xa dua ib pab tub txib mus, nws hais li no : “Nej hais rau cov raug caw tias : Nej saib, kuv twb npaj kuv rooj qav tiav tas, kuv tej heev nyuj thiab cov tsiaj rog puav leej tua tas lawm. Txhua yam npaj txhij tas. Nej kav tsij tuaj nrog noj tshoob!”
- 5 Tab sis cov neeg ntawd tsis quav ntsej, lawv nyias mus nyias : ib tug mus tom teb, ib tug mus ua luam.

- 6 Hos lwm cov tseem nthos nkaus cov tub txib ntes, hiam lawv, muab lawv tua pov tseg.
- 7 Tus vaj npau taws, nws xa nws cov tub rog mus tua cov neeg txo luag siav ntawd thiab hlawv lawv lub nroog.
- 8 Ces nws hais rau nws cov tub txib tias : “Rooj tshoob npaj tau txhij, tab sis cov neeg kuv caw tsis tsim nyog noj.
- 9 Nej mus tom tej ncauj ke, nej pom tsawg leej, nej nqua hu kom tuaj noj rooj tshoob.”
- 10 Cov tub txib mus txhua txoj kev, lawv sau tas txhua leej txhua tus uas lawv ntsib, cov phem cov zoo tuaj huv tib si. Neeg tuaj puv nkaus lub tsev noj tshoob.
- 11 Tus vaj chaws los xyuas cov neeg tuaj koom lub ntees tshoob. Nyob ntawd, nws pom ib tug tsis hnav tsoos noj tshoob.
- 12 Tus vaj hais rau nws tias : “Npawg, koj tsis hnav tsoos noj tshoob, ua cas koj los hauv no ?” Tus neeg ntawd nyob ntsiag to.
- 13 Ces tus vaj hais rau cov tub txib tias : “Nej muab nws pav tes pav taw, muab nws pov rau nraum zoov, hauv qhov tsaus ntuj : nyob ntawd, yuav quaj tom hniav nkawv.”
- 14 Vim tias Ntuj hu ntau leej tuaj, tab sis tsawg leej raug xaiv.”

Yog Huab Tais Yes Xus Lub Moo Zoo

HNUB CHIV 28 NRUAB XYOO B CHÚA NHẬT 28 THƯỜNG NIÊN NĂM B

ZAJ NYEEM IB: Thoob Tsib 7,7-11

Cov lus nyob hauv ntawv Thoob Tsib

- 7 Kuv tau thov, ces kev txawj ntse muaj tuaj rau kuv. Kuv tau pe, ces lub tswv yim thoob tsib tuaj nyob saum kuv.
- 8 Kuv nyiam nws tshaj tej cwj vag thiab tej theej kiab. Rau kuv, kev nplua nuj tsis muaj nuj nqes ib qho piv rau nws.
- 9 Kuv tsis yeem muab nws piv rau tej paj zeb paj tsua. Tas ntiaj teb thooj kub ntawm nws ib sab yog nyuag suab puam, nyiaj nyuag av nkos.
- 10 Kuv nyiam nws tshaj kev tau zoo thiab kev zoo nkauj zoo nraug. Kuv yeem xaiv nws dua qhov pom kev, vim nws ci ntsa iab tsis qauj.
- 11 Kev thoob tsib coj tas puas tsav yam zoo nrog nws tuaj rau kuv. Nws txhais tes pub ib lub cuab tam nplua nuj ntsuas tsis tau rau kuv.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 89,12-17

Txais: HUAB TAIS, thov tso koj txoj kev hlub los nyob puv peb tej siab ntsws, peb yuav zoo siab hlo hu nkauj cav txog koj.

1. Thov koj qhia kom peb paub suav peb lub hnuv nyoog ua neej, peb thiaj yuav tau ib lub siab thoob tsib. HUAB TAIS, thov koj rov qab los, thov koj hlub cov tub txib mas ! **Teb**
2. Sawv ntxov tsees, thov koj pub koj txoj kev hlub rau peb. Peb yuav qw suab zoo siab tas peb sim neej. Thov koj muab kev lom zem los hloov lub caij peb raug txom nyem thiab hloov cov niaj xyoo uas peb raug kev quaj ntsuag. **Teb**
3. Thov koj qhia koj tes dej num rau koj cov tub txib pom, qhib koj lub hwj chim ci ntsa iab rau lawv cov tub ntsia. Thov HUAB TAIS lub siab hlub nqes los roos peb kom cov hauj lwm peb txhais tes khwv vam meej. **Teb**

ZAJ NYEEM OB: Hes Nplaws 4,12-13

Cov lus nyob hauv tsab ntawv xa rau cov ntseeg Hes Nplaws

- 12 Kwv tij sawv daws, TSWV NTUJ lo lus muaj txoj sia. TSWV NTUJ lo lus ua tau hauj lwm. TSWV NTUJ lo lus ntse dua ib rab ntaj ob sab

hniav. Nws txeem mus tau hauv tus plig thiab hauv nruab nrab lub tswv yim. Nws mus tau rau hauv cov pob qij txha thiab cov paj hlwb. TSWV NTUJ lo lus txawj txiav txim rau lub siab ntshaw, thiab rau tej zaj tswv yim nyob hauv nruab siab.

- 13 Tas puas tsav yam Ntuj tsim los, mas yeej tsis muaj ib yam uas TSWV NTUJ lo lus pom tsis tau. Txhua yam nqha nrig thiab du lug nyob ntawm TSWV NTUJ xub ntiag. Peb yuav tsum cev peb tej hauj lwm huv tib si rau nws pom.

Yog Tswv Ntuj Lo Lus

NKAUJ CAV TXOG LUB MOO ZOO: Mt 5,3

As les lus yas. As les lus yas. Cov tau hmoov zoo yog cov pluag hauv nruab siab, Ntuj Lub Ceeb Tsheej yuav yog lawv tug. As les lus yas.

NTAWV MOO ZOO: Mas Kos 10,17-30

Nej Mloog Ib Zag Nyob Hauv Mas Kos Ntawv Moo Zoo

- 17 Thaum YES XUS yuav sawv kev mus, muaj ib tug neeg khiav los txhos caug ntawm YES XUS xub ntiag, nws nug tias : "Xib Hwb siab zoo, kuv yuav ua dab tsi thiaj yuav tau txais txoj sia nyob mus li los ua cuab tam?"
- 18 YES XUS hais rau nws tias : "Vim li cas koj hais tias kuv siab zoo? Tsis muaj leej twg siab zoo, tsuas kawg TSWV NTUJ tib leeg xwb.
- 19 Koj paub cov lus qhia tias : koj txhob tua neeg, txhob zes luag txij luag nkawm, txhob ua tub sab, txhob ua tim khawv cuav, txhob ua luam cuav, hwm koj niam koj txiv."
- 20 Tus neeg ntawd teb rau YES XUS tias : "Xib Hwb, txij thaum kuv yav hluas los, kuv yeej koj raws nraim li ntawd."
- 21 YES XUS ntsia nws, ces YES XUS nyiam nws. Nws hais rau tus neeg ntawd tias : "Tsuas tshuav ib yam xwb koj tsis tau ua : koj mus, koj muab koj lub cuab tam muag, muab tus nqi pub rau cov pluag, koj yuav tau ib lub cuab tam muaj nqis nyob saum ntuj. Ces koj los raws kuv."
- 22 Tus neeg ntawd hnov lo lus no, nws lub ntsej muag ntshaus tas, ces nws rov mus tu siab nrho, vim nws muaj cuab yeej cuab tam ntau.

- 23 Ces YES XUS ntsia ib ncig nws, nws hais rau cov thwj tim tias: "Cov neeg nplua nuj mus hauv TSWV NTUJ lub Ceeb Tsheej mas nyuaj npaum no!"
- 24 Cov thwj tim yoob tas rau cov lus no. Tab sis YES XUS rov hais rau lawv tias : "Kuv cov me nyuam, kev mus hauv TSWV NTUJ lub Ceeb Tsheej mas yeej nyuaj npaum no !
- 25 Ib tug ntxhuav yuav nkag hauv lub qhov koob yooj yim dua ib tug nplua nuj nkag mus hauv TSWV NTUJ lub Ceeb Tsheej."
- 26 Cov thwj tim yim huab yoob heev. Lawv sib tham tias : "Leej twg thiaj yuav txais kev cawm ?"
- 27 YES XUS ntsia lawv, nws hais tias : "Yog neeg ua neeg xwb, mas yeej tsis tau li, tab sis TSWV NTUJ ua tau. Vim TSWV NTUJ ua tau tas ib puas tsav yam."
- 28 Pob Zeb hais rau YES XUS tias : "Peb, mas peb tso ib puas tsav yam tseg, peb los raws koj."
- 29 YES XUS hais tias : "Kuv hais tseeb rau nej, tsis muaj ib tug neeg uas tau tso vaj tse, kwv tij, muam, niam thiab txiv, me tub me nyuam, thiab liaj teb tseg vim kuv thiab vim lub Moo Zoo,
- 30 uas yuav tsis tau txais ib puas npaug ntawm vaj tse, kwv tij, muam, niam, txiv, me tub me nyuam, liaj teb, ntxiv rau kev raug luag hiam txij hnub ntawd mus, thiab lwm tiam, nws yuav txais txoj sia nyob mus li.

Yog Huab Tais Yes Xus Lub Moo Zoo

ZAJ NYEEM LUV LUV: Mt 10,17-27

Nej Mloog Ib Zag Nyob Hauv Mas Kos Ntawv Moo Zoo

- 17 Thaum YES XUS yuav sawv kev mus, muaj ib tug neeg khiav los txhos caug ntawm YES XUS xub ntiag, nws nug tias : "Xib Hwb siab zoo, kuv yuav ua dab tsi thiaj yuav tau txais txoj sia nyob mus li los ua cuab tam?"
- 18 YES XUS hais rau nws tias : "Vim li cas koj hais tias kuv siab zoo? Tsis muaj leej twg siab zoo, tsuas kawg TSWV NTUJ tib leeg xwb.
- 19 Koj paub cov lus qhia tias : koj txhob tua neeg, txhob zes luag txij luag nkawm, txhob ua tub sab, txhob ua tim khawv cuav, txhob ua luam cuav, hwm koj niam koj txiv."

- 20 Tus neeg ntawd teb rau YES XUS tias : "Xib Hwb, txij thaum kuv yav luas los, kuv yeej koj raws nraim li ntawd."
- 21 YES XUS ntsia nws, ces YES XUS nyiam nws. Nws hais rau tus neeg ntawd tias : "Tsuas tshuav ib yam xwb koj tsis tau ua : koj mus, koj muab koj lub cuab tam muag, muab tus nqi pub rau cov pluag, koj yuav tau ib lub cuab tam muaj nqis nyob saum ntuj. Ces koj los raws kuv."
- 22 Tus neeg ntawd hnov lo lus no, nws lub ntsej muag ntshaus tas, ces nws rov mus tu siab nrho, vim nws muaj cuab yeej cuab tam ntau.
- 23 Ces YES XUS ntsia ib ncig nws, nws hais rau cov thwj tim tias: "Cov neeg nplua nuj mus hauv TSWV NTUJ lub Ceeb Tsheej mas nyuaj npaum no!"
- 24 Cov thwj tim yoob tas rau cov lus no. Tab sis YES XUS rov hais rau lawv tias : "Kuv cov me nyuam, kev mus hauv TSWV NTUJ lub Ceeb Tsheej mas yeej nyuaj npaum no !
- 25 Ib tug ntxhuav yuav nkag hauv lub qhov koob yooj yim dua ib tug nplua nuj nkag mus hauv TSWV NTUJ lub Ceeb Tsheej."
- 26 Cov thwj tim yim huab yoob heev. Lawv sib tham tias : "Leej twg thiaj yuav txais kev cawm ?"
- 27 YES XUS ntsia lawv, nws hais tias : "Yog neeg ua neeg xwb, mas yeej tsis tau li, tab sis TSWV NTUJ ua tau. Vim TSWV NTUJ ua tau tas ib puas tsav yam."

Yog Huab Tais Yes Xus Lub Moo Zoo

HNUB CHIV 28 NRUAB XYOO C CHÚA NHẬT 28 THƯỜNG NIÊN NĂM C

ZAJ NYEEM IB: 2 Vaj 5,14-17

Cov lus nyob hauv ntawv Vaj phau ob

- 14 Nas Maas thiaj nqes mus hauv tus dej Yos Las Das, nws mus ntxuav cev xya zaus xws li Es Lis Xais hais, ces nws cov nqaij rov zoo tuaj xws li tus me nyuam mos tej nqaij. Nws huv tas lawm.
- 15 Nas Maas nrog nws cov tub txib rov los tom TSWV NTUJ tus neeg xub ntiag, nws hais tias : "Txij no mus, kuv paub tias tsis muaj dua lwm tus TSWV NTUJ nyob tas ntiag teb. Tsuas kawg muaj ib tug xwb nyob His Xas Lais teb ! Nyem no, kuv thov koj txais cov paj tshab uas koj tus tub txib cev rau koj no !"
- 16 Es Lis Xais teb tias : "Kuv tuav txog HUAB TAIS lub npe, yog tus muaj sia, yog tus kuv teev. Kuv cog lus tseeb tias kuv yuav tsis txais ib yam paj tshab li !" Nas Maas txhob txhob Es Lis Xais kom txais cov paj tshab. Tab sis Es Lis Xais tsis kam txais.
- 17 Ces Nas Maas hais tias : "Yog koj tsis kam txais ib yam paj tshab, mas thov koj pub ib co av txaus kuv ob tug luj thauj, vim txij no mus koj tus tub txib yuav tsis txi lwm cov tswv ntuj ntxiv, nws tsuas txi HUAB TAIS tib leeg xwb."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 97,1-4

Txais: HUAB TAIS muab nws lub hwj huam cawm neeg rau sawv daws pom.

1. Nej hu ib zag nkauj tshiab rau HUAB TAIS vim nws ua dej num muaj tsim nto moo. Nws sab xis muaj zog, nws sab npab ntshiab ua kom nws yeej. **Teb**
2. HUAB TAIS ua kom sawv daws paub nws txoj kev cawm neeg. Nws muab nws txoj kev ncaj rau ib tsoom haiv neeg pom. Nws nco ntsoov txog nws lub siab hlub neeg. Nws pheej xeeb rau His Xas Lais lub cuab lub yig. **Teb**
3. Npoo ntuj npoo ntiag teb pom peb tus TSWV NTUJ txoj kev cawm neeg. Ntiag teb nrag cais, nej hu nkauj cav txog HUAB TAIS. Nej nqua suab hu nkauj ntxuag suab paj nruag. **Teb**

ZAJ NYEEM OB: 2 Tis Mos Tes 2,8-13

Cov lus nyob hauv Paj Lug tsab ntawv ob xa rau Tis Mos Tes

- 8 Koj nco ntsoov txog YES XUS PLEEV, uas nws sawv hauv cov tub tuag rov los, nws yug hauv Das Vis haiv neeg los, raws li kuv lub Moo Zoo qhia.
- 9 Vim kuv nyiam Leej Pleev, kuv thiaj raug txom nyem thiab raug saw hlau xauv kuv xws li ib tug neeg tau ua phem. Tab sis TSWV NTUJ lo lus tsis raug saw hlau xauv.
- 10 Kuv ua siab ntev nyiaj txhua yam pab Ntuj cov xaiv, kom lawv tau txais kev cawm, thiab txais lub hwj chim nyob mus li nyob hauv YES XUS PLEEV.
- 11 Lo lus no, yog ib lo lus tseeb : Yog peb nrog Leej Pleev tuag, mas peb yuav nrog nws muaj txoj sia.
- 12 Yog peb ntseeg ruaj nreb, mas peb yuav nrog nws ua vaj. Yog peb tsis lees nws, mas nws yuav tsis lees peb.
- 13 Yog peb tsis npuab nws, los nws tseem npuab peb, vim nws yuav rov tsis lees nws tsis tau.

Yog Tswv Ntuj Lo Lus

NKAUJ CAV TXOG LUB MOO ZOO: s. 1 Tes Xas Los Nis 5,18

As les lus yas. As les lus yas. Txhua yam hauj lwm uas YES XUS PLEEV tau qhia rau peb sawv daws yog tuaj ntawm TSWV NTUJ tuaj, tsim nyog peb ua Ntuj tsaug. As les lus yas.

NTAWV MOO ZOO: Lus Kas 17,11-19

Nej Mloog Ib Zag Nyob Hauv Lus Kas Ntawv Moo Zoo

- 11 YES XUS taug kev mus Yes Lus Xas Les, nws hla Xas Mas Lias thiab Nkas Lis Lais ciam teb.
- 12 Thaum YES XUS yuav mus hauv ib lub zos, muaj kaum tus mob ruas tuaj cuag nws, lawv nres nrug deb.
- 13 Lawv tsa suab hais nrov rau nws tias : "Xib Hwb YES XUS, thov koj khuv leej peb."
- 14 YES XUS pom lawv, nws hais rau lawv tias : "Nej mus thws nej lub cev rau cov Leej Choj saib." Thaum lawv tab tom mus, ces lawv lub cev huv.

- 15 Muaj ib tug hauv pab ntawd pom tias nws lub cev zoo lawm, ces nws tig hlo rov qab los, nws tsa suab nrov cav txog TSWV NTUJ.
- 16 Nws pe ntsej muag ti av rau ntawm YES XUS ko taw, nws ua YES XUS tsaug. Nws yog ib tug Xas Mas Lias.
- 17 YES XUS thiaj tsa ncauj hais tias : Tsis muaj kaum leej rov huv tuaj lod ? Tshuav cuaj leeg ne, lawv dua qhov twg lawm?
- 18 Ua cas tsuas muaj tus qhua no xwb thiaj rov los cav txog TSWV NTUJ ?"
- 19 Ces YES XUS hais rau nws tias : "Koj sawv mus, koj lub siab ntseeg cawm koj lawm."

Yog Huab Tais Yes Xus Lub Moo Zoo

HNUB CHIV 29 NRUAB XYOO A CHÚA NHẬT 29 THƯỜNG NIÊN NĂM A

ZAJ NYEEM IB: His Xais 45,1.4-6

Cov lus nyob hauv ntawv His Xais

- 1 HUAB TAIS hais li no txog Kws Los, uas yog nws tus Plevv. Kuv tau nthos nkaus nws txhais tes xis los ua kom cov kuj cuab vau rau hauv pem teb, los hle cov vaj tej siv sia, los qhib cov qhov rooj ob sab nyob ntawm nws xub ntiag, kom cov rooj loog txhob kaw nti.
- 4 Yog vim kuv tus tub txib Yas Kos, yog vim His Xas Lais tus kuv xaiv, mas kuv thiaj tuav koj npe hu. Thaum koj tseem tsis tau paub kuv, mas kuv twb pub ib lub npe muaj hwj chim rau koj.
- 5 Kuv yog HUAB TAIS, tsis muaj lwm tus HUAB TAIS. Dhau kuv lawm mas tsis muaj lwm tus TSWV NTUJ ntxiv. Thaum koj tseem tsis tau paub kuv, mas kuv ua kom koj tuav ntaj tuav hmuov,
- 6 kom txij hnuv tuaj mus txog hnuv poob, paub tias dhau kuv lawm mas tsis muaj dab tsi li. Kuv yog HUAB TAIS, tsis muaj dua lwm tus HUAB TAIS.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 95,1.3-5.7-10ac

Txais: Nej cav txog TSWV NTUJ lub hwj xyeej ntshiab, nej teev hawm nws.

1. Nej hu ib zag nkauj tshiab rau HUAB TAIS. Tas ntiaj teb, nej hu nkauj rau HUAB TAIS mas. Nej tshaj nws lub koob meej rau cov haiv neeg paub. Nej tshaj nws cov hauj lwm nto moo rau ib tsoom haiv neeg. **Teb**
2. Nws yog tus HUAB TAIS loj, nws nto koob meej, nws muaj hwj xyeej. Nws nyob siab dua ib tsoom dab. Cov dab uas lwm haiv neeg teev mas lawv tsis muaj nqis dab tsi. TSWV NTUJ thiaj yog tus tsim yim txheej cuaj txheej ntuj. **Teb**
3. Tsoom haiv neeg cov cuab yim, nej cav lus zoo txog HUAB TAIS. Nej cav txog nws lub hwj chim. Tsim nyog nej cav txog nws lub npe muaj hwj chim. Nej nqa paj tshab, nej chaws mus hauv nws lub loog. **Teb**

4. Nej teev hawm HUAB TAIS. Ntiaj teb neeg, nej txhos caug hawm nws. Nej hais rau cov haiv neeg hais tias: “HUAB TAIS ua vaj, nws tswj txhua haiv neeg raws kev haum pheej.” **Teb**

ZAJ NYEEM OB: 1 Tes Xas Los Nis 1,1-5b

Cov lus nyob hauv Paj Lug tsab ntawv ib xa rau cov ntseeg nyob Tes Xas Los Nis

- 1 Paj Lug, thiab Xis Vas Nus thiab Tis Mos Tes, sau ntawv tuaj rau lub Koom Txoos nyob Tes Xas Los Nis, uas nyob hauv Leej Txiv Tswv Ntuj thiab nyob hauv Huab Tais Yes Xus Pleev. Thov kom lub txiaj ntsim thiab txoj kev thaj yeeb tuaj txog nej.
- 2 Thaum peb teev Ntuj, mas peb nco txog nej thiab peb ua Tswv Ntuj tsaug tsis tseg, vim nej sawv daws.
- 3 Peb nyob ntawm peb Txiv Tswv Ntuj xub ntiag, peb nco ntsoov tias, nej kub siab nyob hauv txoj kev ntseeg, nej rau siab ntso ua hauj lwm nyob hauv txoj kev nyiam, nej nyob ruaj nreb hauv txoj kev tso siab, vim peb tus Huab Tais Yes Xus Pleev.
- 4 Cov kwv tij uas Tswv Ntuj nyiam, peb paub tias nej yog cov neeg Tswv Ntuj xaiv.
- 5b Peb lub Moo Zoo muaj ib co hauj lwm tuaj nrog, thiab muaj Leej Ntuj Plig Ntshiab lub zog nyob hauv. Lub Moo Zoo tuaj khov kho. Nej paub tias thaum peb tuaj tsob hwb nej, peb tau coj tus yam ntxwv zoo li cas nyob nruab nrab hauv nej.

Yog Tswv Ntuj Lo Lus

NKAUJ CAV TXOG LUB MOO ZOO: Fis Lis Pos 2,15d.16a

As les lus yas. As les lus yas. Nej yuav ci ntsa iab li cov hnuv qub pom kev kaj lug, kaj rau lub ntiaj teb neeg. Nej yuav cev lo lus pub txoj sia rau ntiaj teb neeg mog. As les lus yas.

NTAWV MOO ZOO: Mas Tais 22,15-21

Nej Mloog Ib Zag Nyob Hauv Mas Tais Ntawv Moo Zoo

- 15 Ces cov Fas Lis Xais mus sab laj saib lawv yuav lem YES XUS li cas kom nws hais lus yuam kev.
- 16 Lawv thiaj xa lawv cov thwj tim nrog cov tuaj Hes Los tog mus hais rau YES XUS tias : “Xib Hwb, peb paub tias koj yog ib tug neeg hais

qhov tseeb, thiab koj qhia TSWV NTUJ txoj kev raws nraim li qhov tseeb, koj tsis tsa leej twg cai, tsis ntsia saib yog tus loj los tus yau.

- 17 Koj sim qhia peb saib, raws li koj xav, Txoj Cai puas kheev them se rau Xes Ntxas los tsis kheev ?”
- 18 Tab sis YES XUS twb paub lawv lub siab nkhaus, ces nws hais tias: “Neeg zoo sab nraud, vim li cas nej sim kuv ?
- 19 Muab nej lub nyiaj them se rau kuv saib.” Lawv cev ib lub txiaj nyiaj los.
- 20 Ces YES XUS hais rau lawv tias : “Tus duab hauv no yog leej twg tus ? Thiab cov npe ntawv hauv no yog leej twg li ?” Lawv teb tias :
- 21 “Yog Xes Ntxas li.” Ces YES XUS hais rau lawv tias : “Yam twg yog Xes Ntxas tug, mas nej muab rov rau Xes Ntxas. Yam twg yog TSWV NTUJ tug, mas nej muab rov rau TSWV NTUJ.”

Yog Huab Tais Yes Xus Lub Moo Zoo

HNUB CHIV 29 NRUAB XYOO B CHÚA NHẬT 29 THƯỜNG NIÊN NĂM B

ZAJ NYEEM IB: His Xais 53,10-11

Cov lus nyob hauv ntawv His Xais

- 10 HUAB TAIS pom zoo tsuj nws tus tub txib, nws ua kom nws tus tub txib raug mob raug nkees. Yog tus tub txib muab nws lub neej los ua ib thaj txi Ntuj kho kev txhaum, nws yuav muaj xeeb zeej xeeb ntxwv, nws ua kom nws lub hnuv nyoog kav ntev, nws txhais tes yuav ua tau raws li HUAB TAIS xav.
- 11 Vim nws tus plig tau raug txom nyem, nws yuav pom txoj kev pom kev, nws yuav lub siab puv npo vim nws paub txuj. Kuv tus tub txib siab ncaj yuav ua kom ntau leej ncaj tuaj. Tus yuav ris lawv cov txhaum yog nws.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 32,4-5.18-20.22

Txais: HUAB TAIS, thov koj khuv leej peb mas ! Peb tso siab rau koj.

1. HUAB TAIS lo lus yog lus ncaj, nws cov dej num nyob ruaj nreb. Nws nyiam kev ncaj thiab kev haum pheej. HUAB TAIS txoj kev hlub ntws puv lub ntiaj teb. **Teb**
2. HUAB TAIS zov cov neeg hwm nws. Nws zov cov neeg tso siab rau nws lub siab zoo. Nws npo lawv dim ntawm kev tuag. Nws txuag lawv txoj sia thaum lub teb chaws raug kev tshaib kev nqhis. **Teb**
3. Peb tus ntsuj plig tos ntsoov HUAB TAIS. Nws yog tus pab peb, nws yog peb daim leem phiaj. HUAB TAIS, thov kom koj lub siab hlub roos peb. Peb chaw tso siab yog nyob hauv koj. **Teb**

ZAJ NYEEM OB: Hes Nplaws 4,14-16

Cov lus nyob hauv tsab ntawv xa rau cov ntseeg Hes Nplaws

- 14 Kwv tij sawv daws, vim peb muaj TSWV NTUJ Leej Tub YES XUS ua Tuam Leej Choj thiab ua Vaj, nws hla dhau yim txheej cuaj txheej ntuj, mas peb yuav nyob ruaj nreb hauv txoj kev lees ntseeg.
- 15 Peb tus Tuam Leej Choj tsis yog ib tug Leej Choj tsis txawj hlub peb cov neeg zog me, rau qhov nws tau raug txoj kev sim siab txhij txhua ib yam li peb. Tsuas tshuav txoj kev txhaum xwb, nws thiaj tsis raug.
- 16 Peb kav tsij rhais ruam mus lawm tom ntej. Peb tso siab lug mus kom txog lub theej kiab muaj txiaj ntsim, kom peb tau txais kev khuv leej, kev zam, thiab kev pab ntawm lub theej kiab.

Yog Tswv Ntuj Lo Lus

NKAUJ CAV TXOG LUB MOO ZOO: Mk 10,45b

As les lus yas. As les lus yas. Neeg Leej Tub tsis tuaj kom luag lwm tus tau tsob hwb nws, yog nws tuaj tsob hwb sawv daws thiab ua nqi txhiv lub ntiaj teb neeg. As les lus yas.

NTAWV MOO ZOO: Mas Kos 10,35-45

Nej Mloog Ib Zag Nyob Hauv Mas Kos Ntawv Moo Zoo

- 35 Ntxes Npes Dais ob tug tub hu ua Yas Kos thiab Zam txav los ze YES XUS, nkawd hais rau YES XUS tias: "Xib Hwb, qhov wb yuav thov ntawm koj, mas wb xav kom koj ua rau wb."
- 36 YES XUS hais rau nkawd tias: "Neb xav kom kuv ua dab tsi rau neb?"
- 37 Nkawd hais tias : "Thov koj pub wb ib tug zaum ntawm koj sab xis, ib tug zaum ntawm koj sab laug nyob hauv koj lub hwj chim."
- 38 YES XUS hais rau nkawd tias : "Neb tsis paub neb thov dab tsi. Neb puas haus taus lub ntim uas kuv yuav haus ? Thiab txais taus lub cim ntxuav uas kuv yuav txais ?"
- 39 Nkawd teb tias : "Wb ua tau." YES XUS hais rau nkawd tias : "Lub ntim uas kuv yuav haus, neb kuj yuav haus, thiab lub cim ntxuav uas kuv yuav txais, neb kuj yuav txais."
- 40 Hos qhov yuav zaum ntawm kuv sab xis los sab laug, tsis yog kuv yuav muab rau neb. Ntuj npaj qhov ntawd rau leej twg, mas yog leej twg tug."

- 41 Kaum leej thwj tim hnov li ntawd, lawv tsis txaus siab rau Yas Kos thiab Zam nkawd.
- 42 YES XUS hu cov thwj tim los ntawm nws. Nws hais rau lawv tias: "Nej paub tias cov uas luag saib lawv yog thawj koj hauv cov kuj cuab, mas lawv kav sawv daws xws li ib co tswv. Thiab cov loj yuam sawv daws nruj.
- 43 Nyob hauv nej, mas yuav tsis zoo li ntawd : leej twg xav ua tus loj nyob hauv nej, nws yuav ua nej tus tub txib.
- 44 Hos leej twg xav ua tus ntaus thawj hauv nej, nws yuav ua sawv daws tus qhev.
- 45 Vim tias, Neeg Leej Tub tsis tuaj kom luag tsob hwb nws, nws tuaj tsob hwb sawv daws thiab muab nws txoj sia los ua nqi txhiv coob leej.

Yog Huab Tais Yes Xus Lub Moo Zoo

HNUB CHIV 29 NRUAB XYOO C CHÚA NHẬT 29 THƯỜNG NIÊN NĂM C

ZAJ NYEEM IB: Kev Tsiv 17,8-13

Cov lus nyob hauv ntawv Kev Tsiv

- 8 Cov As Mas Les tuaj ntaus cov His Xas Lais, ces lawv sib tawm tsam nyob Les Fis Dis.
- 9 Mais Xes hais rau Yos Xuas tias : "Koj xaiv ib pab txiv neej nrog koj, tag kis koj tawm mus ntaus cov As Mas Les; hos kuv, mas kuv yuav mus nyob saum lub ncov roob, tuav rawv TSWV NTUJ rab pas ntawm tes."
- 10 Yos Xuas ua raws li Mais Xes hais rau nws, nws tawm mus ntaus cov As Mas Les, hos Mais Xes, As Loos thiab Hwm lawv nce mus saum lub ncov roob.
- 11 Yog tias Mais Xes tsa nws ob txhais tes twj ywm, ces tog His Xas Lais yeej, yog nws tso nws ob txhais tes dauv, ces tog As Mas Les yeej.
- 12 Thaum Mais Xes tsaug leeg npab lawm, lawv muab ib lub pob zeb los rau Mais Xes zaum. Mais Xes zaum saum lub pob zeb, hos As Loos thiab Hwm nkawd txheem nws ob txhais tes, ib leeg nyob ib sab. Lawv ua li ntawd ces nws ob txhais tes thiaj tsa tas mus li txog thaum hnuv poob qho.
- 13 Ces Yos Xuas xuas ntaj los ntaus yeej As Mas Les thiab nws haiv neeg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 120,1-8

Txais: Txoj kev pab kuv tuaj ntawm HUAB TAIS tuaj, tuaj ntawm tus tsim lub ntuj lub teb tuaj.

1. Kuv tsa muag ntsia toj roob hauv pes saib leej twg yuav tuaj pab kuv? Tus yuav tuaj pab kuv yog tus HUAB TAIS tsim lub ntuj lub ntiaj teb. **Teb**
2. Thov kom nws txhob cia koj txhais taw npleem. Tus zov koj, nws tsis qaug dab ntub. Tus zov His Xas Lais, nws tsis qaug dab ntub, nws tsis tsaug zog. **Teb**
3. HUAB TAIS yog tus zov koj, nws yog tus duab ntsoov koj. Nws nyob ntawm koj sab xis. Nruab hnuv, lub hnuv yuav tsis ntaiv koj. Hmo ntuj, lub hli yuav tsis tsaus koj. **Teb**

4. HUAB TAIS yuav txuag koj ntawm txhua yam phem. Nws yuav txuag koj txoj sia. HUAB TAIS zov koj thaum koj mus thiab thaum koj rov los. Nws zov koj nyem no mus tas ib txhiab ib txhis. **Teb**

ZAJ NYEEM OB: 2 Tis Mos Tes 3,14 – 4,2

Cov lus nyob hauv Paj Lug tsab ntawv ob xa rau Tis Mos Tes

- 3,14 Ntawm koj, mas koj nyob twj ywm hauv txoj kev koj tau kawm, vim koj paub tias yog qhov tseeb. Koj paub tias koj tau txais tej yam ntawd ntawm cov xib hwb twg.
- 15 Koj yeej paub Ntawv Ntshiab txij thaum yau los. Cov Ntawv Ntshiab muaj peev xwm pub kev thoob tsib rau koj. Kev thoob tsib coj yus mus rau kev cawm neeg nyob hauv txoj kev ntseeg txog YES XUS PLEEV.
- 16 Tas cov Ntawv Ntshiab huv tib si, yog TSWV NTUJ tshoj neeg kom muab sau tseg. Cov Ntawv Ntshiab zoo pab yus qhia txuj, zoo pab yus tiv cov neeg dag, pab kho tej zaj yuam kev, pab mus taug kev ncaj.
- 17 Ua li mas, TSWV NTUJ tus neeg hlob tiav lawm. Nws muaj txhij muaj txhua pab nws ua cov hauj lwm zoo.
- 4,1 Kuv thov ntuas koj nyob ntawm TSWV NTUJ thiab YES XUS PLEEV xub ntiag. YES XUS PLEEV yog tus yuav txiav txim rau cov neeg cial thiab cov neeg tuag thaum nws yuav tawm los rau pom xyeem thiab yuav ua Vaj.
- 2 Koj tshaj Lo Lus mog ! Koj qhia Lo Lus tsis tseg, tsis muaj caij muaj thaum. Koj tiv cov neeg dag, koj hem lawv. Koj ua siab ntev qhuab qhia, txhob nkees txhob sab. Koj kub siab qhia sawv daws.

Yog Tswv Ntuj Lo Lus

NKAUJ CAV TXOG LUB MOO ZOO: Hes Nplaws 4,12

As les lus yas. As les lus yas. TSWV NTUJ lo lus muaj txoj sia. Nws txawj txiav txim rau lub siab ntshaw thiab rau tej zaj tswv yim uas nyob hauv neeg nruab siab nruab plawv. As les lus yas.

NTAWV MOO ZOO: Lus Kas 18,1-8

Nej Mloog Ib Zag Nyob Hauv Lus Kas Ntawv Moo Zoo

- 1 YES XUS hais ib zag paj lug rau lawv, nws qhia lawv tias yuav tsum teev Ntuj tsis tseg, txhob ntaus siab yau. YES XUS hais tias :
- 2 Nyob hauv ib lub nroog, muaj ib tug txwj laus txiav txim, nws tsis ntshai TSWV NTUJ thiab tsis hwm leej twg li.
- 3 Muaj ib tug poj ntsuam nyob hauv lub nroog ntawd tuaj cuag tus txwj laus txiav txim, nws hais tias : "Thov koj pab tsa kuv cai tiv tus neeg ntsub kuv."
- 4 Tus txwj laus tsis quav ntsej, nws ncuav ntev ntev. Tab sis ntev mus nws xav tias : "Tab yog kuv tsis hwm TSWV NTUJ thiab tsis ntshai ib tug neeg li,
- 5 tsis kav tus poj ntsuam ntawd txob kuv dhau, kuv yuav tsa nws cai tiv tus ntsub nws, kom xwv nws txhob tuaj txob kuv thiab txhob ua kuv dias taub hau ntxiv."
- 6 Ces HUAB TAIS hais tias : "Nej mloog tus txwj laus txiav txim siab tsis ncav cov lus saib.
- 7 Thaum TSWV NTUJ cov xaiv ua hnuv ua hmo hu txog nws tsis tseg, TSWV NTUJ yuav tsis tsa lawv cai lod ? Nws yeej ua siab ntev rau lawv.
- 8 Kuv hais rau nej, TSWV NTUJ yuav tsa lawv cai sai sai. Tab sis thaum Neeg Leej Tub rov los, nws puas yuav pom neeg ntseeg nyob ntiaj teb ?"

Yog Huab Tais Yes Xus Lub Moo Zoo

HNUB CHIV 30 NRUAB XYOO A CHÚA NHẬT 30 THƯỜNG NIÊN NĂM A

ZAJ NYEEM IB: Kev Tsiv 22,20-26

Cov lus nyob hauv ntawv Kev Tsiv

- 20 "Koj yuav tsis txhob hiam, tsis txhob yuam tus pej kum neeg, vim thaud nej yog ib co pej kum neeg nyob Hais Nkws Tos teb.
- 21 Koj yuav tsis txhob lim hiam rau ib tug poj ntsuam los ib tug me nyuam ntsuag.
- 22 Yog koj lim hiam rau nws, nws hu txog kuv, mas kuv yuav mloog nws lub suab quaj.
- 23 Kuv yuav npau taws heev thiab yuav ua kom hniav ntaj txo koj txoj sia, ces koj poj niam yuav ua poj ntsuam thiab koj cov tub yuav ua tub ntsuag.
- 24 Yog koj qiv nyiaj rau tus kwv tij hauv koj haiv neeg, los rau ib tug pluag hauv koj haiv neeg, mas koj yuav tsis txhob noj nws, koj yuav tsis txhob tsub paj rau nws them.
- 25 Yog koj txais ib tug lub tsho ntev uas nws muab yuam nuj nqes rau koj, mas thaum hnuab poob qho, koj yuav xa rov qab rau nws.
- 26 Nws tsuas muaj tib lub tsho ntawd ua pam vov thiab ua ris tsho hnav xwb, nws yuav pw zoo li cas? Yog nws hu txog kuv, kuv yuav mloog nws lub suab quaj, vim kuv lub siab hlub neeg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 17,2-4.47.51ab

Txais: HUAB TAIS, kuv nyiam koj, koj yog kuv lub zog.

1. HUAB TAIS, kuv nyiam koj, koj yog kuv lub zog. HUAB TAIS yog kuv phab tsua, yog kuv lub yeej ntsa zeb, yog tus npo kuv. **Teb**
2. Nws yog kuv tus TSWV NTUJ, yog lub tsua rau kuv khiav los nkaum. Nws yog kuv daim leem phiaj, yog rab ntaj ua kom kuv yeej. Nws yog kuv lub yeej ntsa zeb, peb cav lus zoo txog nws ! Kuv hu txog HUAB TAIS ces kuv yeej kuv cov yeeb ncuab. **Teb**
3. HUAB TAIS muaj txoj sia, nws yog kuv lub tsua nto koob meej. Tus TSWV NTUJ uas pub kev cawm rau kuv, nws nto koob meej. HUAB

TAIS muab kev yeej rau nws tus vaj, nws hlub tus nws pleev. Nws hlub Das Vis thiab Das Vis caj ces mus li. **Teb**

ZAJ NYEEM OB: 1 Tes Xas Los Nis 1,5c-10

Cov lus nyob hauv Paj Lug tsab ntawv ib xa rau cov ntseeg nyob Tes Xas Los Nis

- 5c Kwv tij sawv daws, nej paub tias thaum peb tuaj tsob hwb nej, peb tau coj tus yam ntxwv zoo li cas nyob nruab nrab hauv nej.
- 6 Nej thiaj yoog raws peb tus piv txwv, thiab yoog raws HUAB TAIS tus lwj lwm, vim nej tau txais Lo Lus. Nej tau raug ntau txoj kev txhawj xeeb, tab sis nej zoo siab nyob hauv LEEJ NTUJ PLIG NTSHIAB.
- 7 Ces nej tau ua ib tug piv txwv zoo rau cov neeg ntseeg nyob Mas Xes Dos Nias teb, thiab As Kas Yas teb huv tib si.
- 8 HUAB TAIS Lo Lus nrov ncha ntwis tim nej, mus txog Mas Xes Dos Nias thiab As Kas Yas teb ; nej txoj kev ntseeg ri mus tas qhov txhia chaw ; nyem no, tsis tas peb yuav hais txog qhov ntawd ntxiv.
- 9 Luag tej ob cag piav tias peb tuaj txog tim nej li cas, thiab nej ua li cas tig los ntseeg txog TSWV NTUJ, nej tso cov mlom pov tseg, nej los tsob hwb tus TSWV NTUJ muaj txoj sia uas yog tus tseeb.
- 10 Vim nej tos TSWV NTUJ Leej Tub yuav rov saum ntuj los. Leej Tub ntawd, yog YES XUS, uas TSWV NTUJ tsa hauv cov neeg tuag sawv rov los : YES XUS yog tus npo peb dim ntawm txoj kev npau taws, uas tab tom tuaj.

Yog Tswv Ntuj Lo Lus

NKAUJ CAV TXOG LUB MOO ZOO: Zam 14,23

As les lus yas. As les lus yas. Huab Tais hais tias: “Leej twg nyiam kuv, nws yuav coj kuv cov lus. Kuv Txiv yuav nyiam nws, kuv Txiv wb yuav nyob hauv nws.” As les lus yas.

NTAWV MOO ZOO: Mas Tais 22,34-40

Nej Mloog Ib Zag Nyob Hauv Mas Tais Ntawv Moo Zoo

- 34 Cov Fas Lis Xais hnov tias YES XUS teb rau cov Xas Dus Kais tws lus, ces lawv sib sau sab laj.
- 35 Lawv ib tug tuaj sim YES XUS, nws yog ib tug kws lij choj, nws nug tias :
- 36 “Xib Hwb, nyob hauv Txoj Cai, lo lus qhia twg loj dua cov ?
- 37 YES XUS hais rau nws tias : “Koj yuav muab tas koj lub siab, tas koj tus ntsuj plig, tas koj lub tswv yim los nyiam koj tus HUAB TAIS TSWV NTUJ.
- 38 Lo lus qhia no yog lo lus qhia loj tshaj cov, yog thawj lo lus qhia.
- 39 Lo lus qhia ob kuj zoo ib yam thiab : koj yuav nyiam tus nyob ze koj ib yam nkaus li koj nyiam koj.
- 40 Tas Txoj Cai thiab cov Yaj Saub puav leej dai ncuv rau ob lo lus qhia no.”

Yog Huab Tais Yes Xus Lub Moo Zoo

HNUB CHIV 30 NRUAB XYOO B CHÚA NHẬT 30 THƯỜNG NIÊN NĂM B

ZAJ NYEEM IB: Yes Les Mias 31,7-9

Cov lus nyob hauv ntawv Yes Les Mias

- 7 HUAB TAIS hais li no : "Nej kav tsij qw suab zoo siab txog Yas Kos mas ! Nej cav lus zoo txog ntiaj teb thawj lub kuj cuab ! Nej qw nrov nrov kom sawv daws hnov, nej hais tias : HUAB TAIS cawm nws haiv neeg lawm, yog pab seem His Xas Lais !"
- 8 "Kuv coj lawv pem lub teb chaws pej fab rov los. Kuv sau lawv tim npoo ntiaj teb rov los. Kuv sau tus dig muag nrog tus ceg tawv, sau tus poj niam muaj me nyuam nrog tus tseem nyob nruab hlis. Tas sawv daws ua lub txoos loj rov los ntawm no !
- 9 Thaum ub lawv mus, lawv quaj. Kuv coj lawv los, lawv muaj ntau yam nplij lawv. Kuv coj lawv mus cuag cov dej ntws, mus taug ib txog kev tiaj, lawv yuav tsis dawm ko taw. Vim kuv yog ib leeg txiv hlob His Xas Lais, thiab Es Fais yog kuv tus tub hlob."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 125,1-6

Txais: Peb zoo siab hom khaj vim HUAB TAIS ua tej yam loj kawg rau peb.

1. Thaum HUAB TAIS coj Xis Yoos cov neeg nyob txim rov los, peb xav tias yog npau suav. Peb lub ncauj muaj suab luag, peb tus nplaig hu nkauj zoo siab. **Teb**
2. Pej kum haiv neeg hais zom zaws tias, "HUAB TAIS tau ua tej yam loj tas nrho rau lawv."HUAB TAIS tau ua tej loj rau peb, peb zoo siab tas nrho. **Teb**
3. HUAB TAIS, koj coj peb cov neeg nyob txim rov los, xws li dej sab siav huam nyob teb chaws suab puam.Cov neeg tseb nplej, tseb ntxuag kua muag. Thaum lawv sau nplej, lawv sau nrog suab luag. **Teb**
4. Thaum mus, lawv quaj vim lawv ris cov seev noob. Thaum lawv rov los, lawv hu nkauj vim lawv ris cov nplej tshiab los. **Teb**

ZAJ NYEEM OB: Hes Nplaws 5,1-6

Cov lus nyob hauv tsab ntawv xa rau cov ntseeg Hes Nplaws

- 1 Kwv tij sawv daws, tsis hais tus Tuam Leej Choj twg, nws tsuas yog ib tug tawm hauv zeej tsoom los, mas nws ua Leej Choj pab neeg nyob hauv txoj kev fim TSWV NTUJ, pab cev paj tshab txi Ntuj them txim txhaum.
- 2 Tus Leej Choj hlub taus cov neeg tsis paub dab tsi thiab cov neeg yuam kev, vim tias nws kuj txawj ua txhaum xws li lawv.
- 3 Vim nws txawj ua txhaum, mas nws yuav tsum ua thaj txi Ntuj them nws cov txhaum, ib yam li nws txi Ntuj them tsoom sid cov txhaum.
- 4 Tsis muaj leej twg yuav rov muab nws tsa ua leej choj tau. Yog TSWV NTUJ hu nws mas nws thiaj ua leej choj tau, ib yam nkaus li TSWV NTUJ tau hu As Loos.
- 5 Leej Plevv, kuj tsis tau rov tsa nws ua Tuam Leej Choj muaj hwj chim, nws txais lub hwj chim ntawd ntawm tus hais rau nws tias : “Koj yog kuv Leej Tub. Hnub no, kuv xeeb koj.”
- 6 TSWV NTUJ tseem hais tias : “Koj ua leej choj mus ib txhiab ib txhis, raws li Mes Kis Xes Des txoj kev.”

Yog Tswv Ntuj Lo Lus

NKAUJ CAV TXOG LUB MOO ZOO: s. 2 Tis Mos Tes 1,10

As les lus yas. As les lus yas. Peb tus Cawm Seej YES XUS PLEEV rhuav txoj kev tuag lawm. Nws lub Moo Zoo coj txoj sia tshiab tuaj rau sawv daws. As les lus yas.

NTAWV MOO ZOO: Mas Kos 10,46-52

Nej Mloog Ib Zag Nyob Hauv Mas Kos Ntawv Moo Zoo

- 46 Yes Xus thiab cov thwj tim tuaj txog Yes Lis Kos. Thaum YES XUS nrog cov thwj tim thiab ib pab neeg coob tawm hauv Yes Lis Kos mus, muaj ib tug neeg dig muag thov khawv zaum ntawm ntug kev. Nws hu ua Npas Tis Mes, yog Tis Mes tus tub.
- 47 Thaum nws hnov tias yog YES XUS Nas Xas Les, nws pib hu tias: "YES XUS, Das Vis Leej Tub, thov koj khuv leej kuv !"
- 48 Muaj ntau leej cem nws kom ua twj ywm, tab sis tus dig muag haj yam hu nrov tias : "Das Vis Leej Tub, thov koj khuv leej kuv."

- 49 YES XUS nres, nws hais tias : "Nej hu nws los." Lawv hu tus dig muag tias : "Koj tso siab mog! Koj sawv mus. YES XUS hu koj."
- 50 Ces tus dig muag pov rrees nws lub tsho ntev cia, dhia mus cuag YES XUS.
- 51 YES XUS hais rau nws tias : "Koj xav kom kuv ua dab tsi rau koj?" Tus dig muag teb rau YES XUS tias : "Kuv tus Xib Hwb, kuv thov kom kuv qhov muag rov pom kev!"
- 52 YES XUS hais rau nws tias : "Koj mus mog ! Koj lub siab ntseeg cawm koj lawm." Tam sis ntawd, tus dig muag rov pom kev, ces nws taug kev lawv YES XUS qab.

Yog Huab Tais Yes Xus Lub Moo Zoo

HNUB CHIV 30 NRUAB XYOO C CHÚA NHẬT 30 THƯỜNG NIÊN NĂM C

ZAJ NYEEM IB: Npes Xis Las 35,12-14.16-18

Cov lus nyob hauv ntawv Npes Xis Las

- 12 HUAB TAIS yog ib tug txiav txim tsis kws leej twg cai.
- 13 Nws tsis kws leej twg cai los muab txim rau tus pluag. Thaum tus raug luag hiam thov HUAB TAIS mas HUAB TAIS mloog nws.
- 14 HUAB TAIS tsis thum tus me nyuam ntsuag lo lus thov, nws tsis thum tus poj ntsuam nws cov lus ntsaj.
- 16 Leej twg tsob hwb HUAB TAIS thiab ua raws li HUAB TAIS nyiam, mas HUAB TAIS mloog tus ntawd. Tus ntawd lub suab nrov mus txog txheej huab saud.
- 17 Tus neeg txheej qis cov lus thov hla mus dhau txheej huab saud. Tus neeg txheej qis zaj thov Ntuj tseem mus tsis tau txog HUAB TAIS, mas tus neeg txheej qis lub siab nyob tsis tus.
- 18 Yog tus Nyob Siab Tshaj tseem tsis tau tuaj xyuas tus neeg txheej qis, mas tus neeg txheej qis thov tsis tseg. Nws thov mus txog lub caj tus Nyob Siab Tshaj txiav txim thiab ua ncaj rau cov neeg siab ncaj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 32,2-3.16-19.23

Txais: Tus txom nyem quaj qw, HUAB TAIS mloog nws.

1. Kuv cav lus zoo txog HUAB TAIS txhua niaj hnuv. Kuv lub ncauj yuav cav lus zoo txog nws. Kuv tus ntsuj plig yuav muaj ntsej muag nyob hauv HUAB TAIS. Cov neeg me hnov kuv cov lus, lawv yuav zoo siab. **Teb**
2. HUAB TAIS tiv cov neeg ua phem. Nws ua kom ntiaj teb neeg txhob nco qab txog lawv. Thaum cov neeg ncaj quaj hu, HUAB TAIS hnov lawv lub suab. Nws npo lawv ntawm lawv tej kev ntxhov siab. **Teb**
3. HUAB TAIS nyob ze cov neeg ntxhov siab. Nws cawm cov neeg qaug zog. HUAB TAIS txhiv nws cov tub txib txoj sia. Cov tuaj khaub zig HUAB TAIS, lawv tsis raug txim. **Teb**

ZAJ NYEEM OB: 2 Tis Mos Tes 4,6-8.16-18

Cov lus nyob hauv Paj Lug tsab ntawv ob xa rau Tis Mos Tes

- 6 Ntawm kuv, mas txog lub caij hliv kuv roj ntsha los txi Ntuj lawm. Txog lub caij kuv yuav mus.
- 7 Tas kuv sid, kuv tau ua ib ntsug zoo rog. Kuv khiav mus txog chaw lawm. Kuv tau ceev txoj kev ntseeg.
- 8 Nyem no, HUAB TAIS twb npaj tau lub kaus mom yeej phim cov neeg ncaj rau kuv lawm. Lub zim txwv kawg, tus HUAB TAIS txiav txim ncaj yuav muab lub kaus mom ntawd rau kuv. Tsis yog yuav muab rau kuv ib leeg xwb : nws yuav muab rau tas tsoom neeg nyiam nws, thiab rau tas tsoom neeg tos lub Hnub Nyoog nws yuav tawm los rau pom xyeem.
- 16 Thaum cov nom hu kuv tuaj hauv lub tsev txiav txim thawj zaug, mas tsis muaj leej twg nres kuv li. Sawv daws tso kuv pov tseg. Kuv thov kom Ntuj txhob pauj txim rau lawv.
- 17 HUAB TAIS tau nrog nraim kuv. Nws tso nws lub zog rau hauv kuv, kom kuv tshaj lub Moo, kom lub Moo nrov mus txog cov neeg teev pej kum dab pob ntseg. Ntuj npo kuv dim ntawm tsov ntxhuav lub ncauj.
- 18 HUAB TAIS yuav npo kuv dim ntawm txhua hom kev nkhaus. HUAB TAIS yuav cawm kuv. Nws yuav txuag kuv rau nws lub Ceeb Tsheej nyob saum Ntuj. HUAB TAIS nto koob meej mus ib txhiab ib txhis. Ua li.

Yog Tswv Ntuj Lo Lus

NKAUJ CAV TXOG LUB MOO ZOO: 2 Kos Lis Nthos 5,19

As les lus yas. As les lus yas. Tus ua kom lub ntiaj teb neeg nrog Tswv Ntuj rov sib haum xeeb nyob hauv Leej Pleev, yog Tswv Ntuj ; nws pub kom peb hais tau cov lus pab neeg kom nrog nws rov sib haum xeeb. As les lus yas.

NTAWV MOO ZOO: Lus Kas 18,9-14

Nej Mloog Ib Zag Nyob Hauv Lus Kas Ntawv Moo Zoo

- 9 YES XUS tseem hais zaj paj lug no ntxiv, nws hais rau ib txhia neeg uas lawv khav tias lawv yog neeg ncaj, ces lawv thum luag tej.
- 10 "Muaj ob tug neeg nce mus teev Ntuj pem lub Tuam Tsev Teev Ntuj. Ib tug yog Fas Lis Xais, ib tug yog neeg sau se.

- 11 Tus Fas Lis Xais sawv ntsug, nws teev Ntuj li no nyob hauv siab : 'Aub, TSWV NTUJ, kuv ua koj tsaug, vim kuv tsis zoo li zeej tsoom sawv daws. Lawv mas lawv ua tub sab, ua tsis ncaj, deev luag txij luag nkawm, thiab tseem ua zoo li tus sau se ntawd.
- 12 Ib lis piam, kuv yoo mov ob zaug. Kuv pub ib feem kaum ntawm tas txhia yam uas kuv khwv tau.'
- 13 Tus sau se nyob deb, tsis muaj cuab kav tsa muag ntsia saum ntuj. Nws ntaus nws hauv siab, nws hais tias: 'Aub ! TSWV NTUJ, thov koj khuv leej kuv, vim kuv yog neeg txhaum !'
- 14 Kuv hais rau nej : tus sau se nqes rov mus tsev, nws ntshiab huv lawm, hos tus Fas Lis Xais tsis tau ntshiab huv. Vim tias leej twg tsa nws siab, Ntuj yuav txo nws qis, hos leej twg txo nws qis, Ntuj yuav tsa nws siab."

Yog Huab Tais Yes Xus Lub Moo Zoo

HNUB CHIV 31 NRUAB XYOO A CHÚA NHẬT 31 THƯỜNG NIÊN NĂM A

ZAJ NYEEM IB: Mas Las Kis 1,14b – 2,2b.8-10

Cov lus nyob hauv ntawv Mas Las Kis

- 1,14b Tsoom tub rog tus HUAB TAIS hais tias : Kuv yog ib tug tuam vaj. Tas txhia haiv neeg saib kuv lub npe muaj hwj xyeej nyob hauv cov kuj cuab.
- 2,1 Nyem no, cov Leej Choj, kuv qhia nej zoo li no :
- 2b Yog nej tsis mloog kuv, yog nej tsis muab siab rau ua kom kuv lub npe nto koob meej, mas kuv yuav xa txoj hmoov phem tuaj rau nej, kuv yuav tsawm nej cov lus foom hmoov zoo.
- 8 Nej ncaim ntawm txoj kev lawm. Nej tej lus qhia ua kom coob leej ntog. Lo lus uas kuv nrog cov Les Vis cog mas nej rhuav pov tseg tas lawm !
- 9 Ces kuv thiaj ua kom tas tsoom pej xeeb tuam nej thiab saib nej tsis muaj tsim, vim nej tsis taug kuv txoj kev thiab thaum nej qhia tsoom sid mas nej nyiam ib txhia thiab nej ntsub ib txhia.
- 10 Puas yog nws ua peb sawv daws ib leeg txiv ? Tsis yog nws TSWV NTUJ ib leeg tsim peb ? Tim li cas peb thiaj ntseev tib neeg tiv lwm tus rhuav peb cov yawg koob txoj lus.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 130,1-3

Txais: HUAB TAIS, kuv nrhiav tau kev thaj yeeb nyob hauv koj.

1. HUAB TAIS, kuv lub siab tsis ntshaw txoj hauj lwm loj, kuv tsis tsoom tej yam siab dhau. Kuv tsis nrhiav tej yam uas kuv lub tswv yim tsis duav. **Teb**
2. Kuv tus plig nyob thaj yeeb ntsuag to zoo li tus me nyuam khooj rau hauv nws niam xub ntiag, ib yam li kuv tus plig nyob hauv kuv. **Teb**
3. His Xas Lais, txij no mus, koj tso siab rau HUAB TAIS tas ib txhiab ib txhis. **Teb**

ZAJ NYEEM OB: 1 Tes Xas Los Nis 2,7b-9.13

Cov lus nyob hauv Paj Lug tsab ntawv ib xa rau cov ntseeg nyob Tes Xas Los Nis

- 7b Kwv tij sawv daws, thaum peb nyob nruab nrab hauv nej peb tau ua ib co neeg me ! Peb tau hlub nej xws li ib leeg niam tu thiab txuag nws cov me nyuam.
- 8 Peb ib txhij xav pub TSWV NTUJ lub Moo Zoo rau nej, thiab xav pub peb txoj sia rau nej : vim peb lub siab tau nyiam tiag.
- 9 Kwv tij, nej nco ntsoov txog peb tej hauj lwm, thiab txog peb tej kev iab kev khwv. Thaum peb tshaj TSWV NTUJ lub Moo Zoo rau nej, mas peb tau ua hauj lwm nruab hnuv thiab hmo ntuj, vim peb tsis xav ua ib lub nra hnyav rau nej ib tug twg ris li.
- 13 Yog vim tej ntawd, mas peb ua TSWV NTUJ tsaug tsis tseg, vim thaum nej txais TSWV NTUJ Lo Lus uas peb tau qhia nej, mas nej tsis txais Lo Lus ntawd xws li neeg lo lus ; nej txais raws nraim li TSWV NTUJ Lo Lus, vim yeej yog TSWV NTUJ Lo Lus tiag. Lo Lus ntawd tseem ua hauj lwm nyob hauv nej, cov ntseeg.

Yog Tswv Ntuj Lo Lus

NKAUJ CAV TXOG LUB MOO ZOO: Mt 23,9b.10b

As les lus yas. As les lus yas. Nej tsuas muaj tib Leej Txiv, yog tus nyob saum ntuj thiab ib tug Tswv uas yog HUAB TAIS YES XUS PLEEV. As les lus yas.

NTAWV MOO ZOO: Mas Tais 23,1-12

Nej Mloog Ib Zag Nyob Hauv Mas Tais Ntawv Moo Zoo

- 1 YES XUS qhia tsoom sid thiab nws cov thwj tim. Nws hais tias :
- 2 “Cov Kws Ntawv Ntshiab thiab cov Fas Lis Xais zaum Mais Xes lub theej kiab lawm.
- 3 Nej ua tas txhua yam lawv qhia nej, thiab nej khaws huv tib si tseg, tab sis nej txhob ua raws li lawv. Vim lawv qhia, tab sis lawv tsis ua raws.
- 4 Lawv nog tej lub nra hnyav yuam rau tsoom sid xwb pwg, tab sis lawv tsis kam cev ib tug ntiv tes los kov.

- 5 Lawv ua txhua tsav txhua yam kom luag qhuas. Yog li ntawd, lawv thiaj coj tej txws ntim Txoj Cai dav dav, thiab dai tej tw ntxhoo ntev ntev.
- 6 Thaum lawv mus noj nqaij haus cawv, lawv nyiam zaum thawj lub rooj. Nyob hauv cov tsev txoos, lawv nyiam zaum cov rooj pem hauv ntej.
- 7 Lawv nyiam kom luag hawm lawv tom tej tshav puam, nyiam hnov sawv daws hu lawv ua “Xib Hwb”.
- 8 Hos nej, mas nej txhob cia luag hu nej ua “Xib Hwb”, vim nej tsuas muaj tib tug Xib Hwb xwb, thiab nej sawv daws yog ib co kwv tij.
- 9 Nej txhob hu leej twg nyob ntiaj teb no ua “Txiv”, vim nej tsuas muaj tib leeg Txiv xwb, yog tus nyob saum ntuj.
- 10 Nej txhob cia luag hu nej ua “Thawj Tswj”, vim nej tsuas muaj tib tug Tswj xwb, yog Leej Plev.
- 11 Tus loj dua cov nyob hauv nej, yuav ua nej tus tub txib.
- 12 Tus twg tsa nws siab, Ntuj yuav txo nws qis. Tus twg txo nws qis, Ntuj yuav tsa nws siab.

Yog Huab Tais Yes Xus Lub Moo Zoo

HNUB CHIV 31 NRUAB XYOO B CHÚA NHẬT 31 THƯỜNG NIÊN NĂM B

ZAJ NYEEM IB: Txoj Cai Ob 6,2-6

Cov lus nyob hauv ntawv Txoj Cai Ob

- 2 Li ntawd, yog koj niaj hnub hwm HUAB TAIS koj tus TSWV NTUJ, yog koj ua raws li nws tej kev cai lij choj thiab nws cov lus qhia uas kuv hais rau koj hnub no, mas koj yuav ua neej nyob ntev, koj tus tub thiab koj tus tub cov tub kuj yuav ua neej nyob ntev.
- 3 His Xas Lais, koj mloog mog : Koj yuav ua raws cov lus qhia, kom koj tau nyob kaj siab, thiab huam vam raws li koj cov yawg koob tus HUAB TAIS TSWV NTUJ tau cog lus. Kom koj tau nyob hauv lub teb chaws uas mis nyuj thiab zib ntab ntwis lug, lub teb chaws HUAB TAIS muab rau koj.
- 4 His Xas Lais, koj mloog mog : HUAB TAIS, peb tus TSWV NTUJ yog tus tseem HUAB TAIS, tsis muaj dua lwm tus tswv ntuj.
- 5 Koj yuav nyiam HUAB TAIS, koj tus TSWV NTUJ. Koj yuav muab tas koj siab ntwis, koj tus ntsuj plig thiab koj lub peev xwm los nyiam nws.
- 6 Koj yuav khaws cov lus uas kuv hais rau koj hnub no rau nruab siab.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 17,2-4.47.51ab

Txais: HUAB TAIS, kuv nyiam koj, koj yog kuv lub zog.

1. HUAB TAIS, kuv nyiam koj, koj yog kuv lub zog. HUAB TAIS yog kuv phab tsua, yog kuv lub yeej ntsa zeb, yog tus npo kuv. **Teb**
2. Nws yog kuv tus TSWV NTUJ, nws yog lub tsua rau kuv los nkaum. Nws yog kuv daim leem phiaj, yog rab ntaj ua kom kuv yeej. Nws yog kuv lub yeej ntsa zeb, peb cav lus zoo txog nws ! Kuv hu txog HUAB TAIS ces kuv yeej kuv cov yeeb ncuab. **Teb**
3. HUAB TAIS muaj txoj sia, nws yog kuv lub tsua nto koob meej. Tus TSWV NTUJ uas pub kev cawm rau kuv, nws nto koob meej. HUAB TAIS muab kev yeej rau nws tus vaj, nws hlub tus nws pleev, nws hlub Das Vis thiab Das Vis caj ces mus li. **Teb**

ZAJ NYEEM OB: Hes Nplaws 7,23-28

Cov lus nyob hauv tsab ntawv xa rau cov ntseeg Hes Nplaws

- 23 Kwv tij sawv daws, thiab tseem muaj qhov no : Les Vis cov xeeb ntxwv tau ua leej choj coob leej, vim txoj kev tuag txiav lawv txoj kab xwm ua leej choj.
- 24 Ntawm Leej Plev mas nws nyob mus li, nws tuav nws txoj kab xwm ua Leej Choj mus ib txhiab ib txhis.
- 25 Vim li ntawd Leej Plev muaj peev xwm cawm tau cov neeg vam txog nws kom mus cuag TSWV NTUJ. Vim nws muaj txoj sia mus li, ces nws thov Ntuj pab lawv.
- 26 Tsim nyog peb yuav tsum muaj ib tug tuam Leej Choj zoo li ntawd, ib tug tuam Leej Choj ntshiab, tsis muaj chaw xyeej, tsis muaj ib yam tsuas nws, tsis nyob xyaw cov neeg txhaum, nws nyob siab dua cuaj txheej ntuj.
- 27 Tsis tas nws yuav niaj hnuv tua tsiaj txi Ntuj mus them nws cov txim txhaum thiab them tsoom pej xeem cov txim txhaum, xws li cov thawj leej choj uas lawv yuav tsum ua. Nws txi Ntuj ib zaug xwb, yog thaum nws rov muab nws txi rau Ntuj.
- 28 Txoj Cai tsa ib co neeg zog me ua leej choj. Tiam sis Txoj Cai twb dua lawm. TSWV NTUJ lo lus cog tsa Leej Tub uas yog tus zoo txhij zoo txhua kom ua leej choj mus ib txhiab ib txhis.

Yog Tswv Ntuj Lo Lus

NKAUJ CAV TXOG LUB MOO ZOO: Zam 14,23

As les lus yas. As les lus yas. HUAB TAIS hais tias: "Leej twg nyiam kuv, nws yuav koj kuv cov lus. Kuv Txiv yuav nyiam nws, kuv Txiv wb yuav nyob hauv nws." As les lus yas.

NTAWV MOO ZOO: Mas Kos 12,28b-34

Nej Mloog Ib Zag Nyob Hauv Mas Kos Ntawv Moo Zoo

- 28b Ib tug kws Ntawv Ntshiab txav los nug YES XUS tias : "Nyob hauv cov lus qhia tas huv tib si, lo lus qhia twg yog thawj lo lus qhia ?"
- 29 YES XUS teb rau nws tias : "Thawj lo lus qhia yog lo lus no : "His Xas Lais, koj mloog mog ! Peb tus HUAB TAIS TSWV NTUJ tib leeg xwb yog HUAB TAIS.
- 30 Koj yuav nyiam koj tus HUAB TAIS TSWV NTUJ tas siab tas ntsws, tas koj tus ntsuj plig, tas koj lub tswv yim thiab tas koj lub zog.

- 31 Lo lus qhia ob yog lo lus no : Koj yuav nyiam tus nyob ze koj ib yam li koj nyiam koj. Tsis muaj lwm lo lus qhia loj dua ob lo lus no."
- 32 Tus kws Ntawv Ntshiab hais rau YES XUS tias : "Koj hais raug kawg, Xib Hwb, koj hais qhov tseeb : muaj ib tug HUAB TAIS TSWV NTUJ xwb, tsis muaj dua lwm tus TSWV NTUJ dhau ntawm nws.
- 33 Kev nyiam TSWV NTUJ tas yus lub siab lub ntsws, tas yus lub tswv yim thiab tas yus lub zog, thiab nyiam tus nyob ze yus ib yam li yus nyiam yus, yog zoo tshaj tej tsiaj hlawv thiab tej thaj txi Ntuj huv tib si."
- 34 YES XUS pom tus kws Ntawv Ntshiab txhab ib lo lus thoob tsib, ces nws hais rau tus kws Ntawv Ntshiab tias: "Koj nyob tsis deb ntawm TSWV NTUJ lub Ceeb Tsheej lawm." Ces tsis muaj leej twg muaj cuab kav nug YES XUS ntxiv.

Yog Huab Tais Yes Xus Lub Moo Zoo

HNUB CHIV 31 NRUAB XYOO C CHÚA NHẬT 31 THƯỜNG NIÊN NĂM C

ZAJ NYEEM IB: Thoob Tsib 11,22 – 12,2

Cov lus nyob hauv ntawv Thoob Tsib

- 11,22 Huab Tais, ua ntej koj nyob, tag nrho lub qab ntuj khwb zoo li ib tug xuab zeb nyob rau hauv ib tug nplai, zoo li ib tug ncos lwg thaum sawv ntxov poob rau hauv av.
- 23 Koj khuv leej sawv daws, vim koj peev xwm ua tau puas tsav yam ; koj qi muag rau tib neeg cov txhaum kom lawv thim xav.
- 24 Koj nyiam tas puas tsav yam tshwm sim los, koj tsis qias ib yam dab tsi koj tau tsim los. Yog muaj yam dab tsi koj ntxub, koj yuav tsis ua kom muaj.
- 25 Puas yuav muaj taus tus tsav dab tsi, yog koj tsis pub muaj ? Yam twg koj tsis nqee nws puas yuav nyob taus ?
- 26 Xib Hwb phooj ywg ciał sia, koj txuag zias tas txhua yam, vim txhua yam yog koj tug;
- 12,1 Vim koj ntsuj plig tsis txawj puas ntsoog nyob hauv txhua yam.
- 2 Koj, tus ua tau cov qaug ncee nquag zuj zus ; koj qhia lawv, ua kom lawv pom lawv cov txhaum, muab qhov phem nrauj thiab ntseeg koj, HUAB TAIS !

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 144,1-2.8-11.13cd-14

Txais: Kuv tus HUAB TAIS TSWV NTUJ, kuv yuav cav txog koj lub npe mus ib txhiab ib txhis !

1. Kuv tus TSWV NTUJ, kuv cav lus zoo txog koj. Kuv yuav cav lus zoo txog koj lub npe mus ib txhiab ib txhis. Kuv yuav niaj hnuv cav txog koj lub koob meej. Kuv yuav cav lus zoo txog koj lub npe mus ib txhiab ib txhis. **Teb**
2. HUAB TAIS siab zoo, nws khuv leej neeg, nws tsis npau taws sai. HUAB TAIS ua zoo rau txhua leej txhua tus. Nws hluv thiab txuag nws tej dej num. **Teb**

3. HUAB TAIS, koj cov hauj lwm yuav cav txog koj. Cov ntseeg txog koj yuav cav lus zoo txog koj. Lawv yuav cav txog koj lub Ceeb Tsheej nto koob meej. Lawv yuav tshaj txog koj cov hauj lwm muaj hwj xyeej. **Teb**
4. Tswv Ntuj cov lus puav leej hais qhov tseeb tas huv si, nws cov hauj lwm tas huv si, yog nws lub siab hlub ua. HUAB TAIS tsa cov neeg poob tsag, nws tsa cov neeg raug luag hiam sawv. **Teb**

ZAJ NYEEM OB: 2 Tes Xas Los Nis 1,11 – 2,2

Cov lus nyob hauv Paj Lug tsab ntawv ob xa rau cov ntseeg nyob Tes Xas Los Nis

- 1,11 Yog vim peb xav txog tej yam li ntawd, mas peb thiaj thov Ntuj rau nej tsis tseg ; TSWV NTUJ yuav ua kom nej tsim nyog TSWV NTUJ hu nej, nws lub hwj huam yuav pab nej ua qhov zoo, thiab pab nej ua cov hauj lwm tawm hauv kev ntseeg los.
- 12 Li ntawd, peb tus HUAB TAIS YES XUS lub npe yuav muaj koob meej nyob hauv nej, thiab nej yuav muaj koob meej nyob hauv nws, raws li peb tus TSWV NTUJ thiab HUAB TAIS YES XUS PLEEV lub txiaj ntsim.
- 2,1 Kwv tij sawv daws, hais txog thaum peb tus HUAB TAIS YES XUS PLEEV yuav tawm los, thiab peb yuav sib sau nyob ze nws, mas kuv thov nej, kom nej txhob ntxhov siab sai.
- 2 Luag lam ua Yaj Saub qhia ub qhia no, nej txhob txhawj. Luag khaws tej lo lus los tej tsab ntawv, uas luag dag tias yog kuv sau. Tej lo lus ntawd ua kom nej xav tias twb txog HUAB TAIS lub Hnub Nyoog lawm.

Yog Tswv Ntuj Lo Lus

NKAUJ CAV TXOG LUB MOO ZOO: Zam 3,16

As les lus yas. As les lus yas. Tswv Ntuj nyiam lub qab ntuj neeg npaum no : nws thiaj muab nws Leej Tub twm zeej rau, kom xwv tus ntseeg txog Leej Tub kom nws muaj txoj sia nyob mus li. As les lus yas.

NTAWV MOO ZOO: Lus Kas 19,1-10

Nej Mloog Ib Zag Nyob Hauv Lus Kas Ntawv Moo Zoo

- 1 YES XUS mus hauv Yes Lis Kos, nws hla lub tsheej.
- 2 Muaj ib tug neeg lub npe hu ua Ntxas Kais, nws yog ib tug nom hauv cov sau se, nws nplua nuj.
- 3 Nws nrhiav kom tau kev pom saib YES XUS yog leej twg, tab sis nws tsis tau kev, vim neeg coob dhau, thiab nws yog neeg qig taub.
- 4 Ces nws khiav mus ua ntej, nws nce saum tsob txiv cev kom tau pom YES XUS, vim YES XUS yuav hla ntawd mus.
- 5 Thaum YES XUS los txog ntawm qhov chaw ntawd, nws tsa muag ntsia, nws hais tias : "Ntxas Kais, koj nqes los sai, vim hnuv no kuv yuav tsum mus hauv koj tsev."
- 6 Ntxas Kais nqes nrawm nroos los, nws zoo siab txais YES XUS.
- 7 Sawv daws pom li ntawd, lawv yws yws hais tias : "Nws mus so hauv ib tug neeg txhaum lub tsev !"
- 8 Hos Ntxas Kais sawv ntsug, nws hais rau HUAB TAIS tias : "HUAB TAIS, saib, kuv yuav muab kuv tej cuab yeej cuab tam ib nrab pub rau cov pluag. Yog kuv tau ua tsis ncaj rau leej twg, mas kuv yuav muab plaub npaug pauj rau nws."
- 9 YES XUS hais rau Ntxas Kais tias : "Hnuv no, txoj kev cawm los txog hauv lub tsev no, vim tus no kuj yog Has Nplav Has ib leeg tub thiab.
- 10 Vim tias Neeg Leej Tub tuaj nrhiav thiab tuaj cawm yam uas ploj lawm."

Yog Huab Tais Yes Xus Lub Moo Zoo

HNUB CHIV 32 NRUAB XYOO A CHÚA NHẬT 32 THƯỜNG NIÊN NĂM A

ZAJ NYEEM IB: Thoob Tsib 6,12-16

Cov lus nyob hauv ntawv Thoob Tsib

- 12 Kev thoob tsib ci ntsa iab tsis txawj nphob ib zaug. Cov neeg nyiam kev thoob tsib, mas nws cia lawv ntsia ntsoov nws. Cov neeg nrhiav kev thoob tsib, mas nws cia lawv ntsib nws.
- 13 Kev thoob tsib xub tuaj thawj cov neeg ntshaw txog nws, nws tawm tuaj rau lawv paub nws.
- 14 Thaum nyuam qhuav kaj ntug, yog leej twg mus nrhiav kev thoob tsib mas nws tsis tas yuav khwv. Nws yuav pom kev thoob tsib zaum nraum nws qhov rooj tos nws.
- 15 Nrhiav kev thoob tsib mas yog txoj kev ntse zoo tshaj. Leej twg uas zov hmo kawm kev thoob tsib, mas nws yuav dim ntawm kev ntxhov siab sai.
- 16 Kev thoob tsib tawm mus tas qhov txhia chaw, nws nrhiav cov neeg tsim nyog txais nws. Kev thoob tsib tshwm ntawm tej xub ke, nws ua ntsej muag luag nyav rau cov uas tsis thum nws. Kev thoob tsib mus cuag lawv lub tswv yim tsis tseg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 62,2-8

Txais: Tswv Ntuj, koj yog kuv tus Tswv Ntuj ! Kuv tus plig nqhis koj.

1. Tswv Ntuj, koj yog kuv tus Tswv Ntuj ! Kuv nrhiav koj ; kuv tus plig nqhis koj ; kuv lub cev seev txog koj zoo puav tam li av qhuav qhawv, nkig nkuav, tsis tau dej. **Teb**
2. Kuv mus ntsia koj nyob hauv lub tuam tsev ntshiab, kuv pom koj lub zog thiab lub hwj chim. Koj txoj kev hlub muaj nqis dua txoj sia. Kuv lub ncauj yuav cav txog koj lub koob meej. **Teb**
3. Kuv yuav cav txog koj tas kuv sim neej. Kuv yuav tsa tes hawm koj thiab hu txog koj lub npe. Kuv tus plig zoo siab puav tam li tus tau noj ib roog qav. Kuv di ncauj hom khaj, kuv lub ncauj yuav cav txog koj. **Teb**

4. Thaum kuv pw saum txaj, kuv nco txog koj. Kuv teev koj txog ntuj teb tag hmo. Koj tau pab kuv, kuv nqua suab hu nkauj nyob hauv koj phab tis qhov ntxoov. **Teb.**

ZAJ NYEEM OB: 1 Tes Xas Los Nis 4,13-18

Cov lus nyob hauv Paj Lug tsab ntawv ib xa rau cov ntseeg nyob Tes Xas Los Nis

- 13 Kuv tij sawv daws, peb tsis xav kom nej tsis paub dab tsi txog cov neeg uas pw tsaug zog mus li. Thaum nej muaj ib tug neeg tuag, nej yuav tsis txhob tu siab xws li cov neeg uas tsis muaj kev tso siab.
- 14 Vim peb ntseeg tias, YES XUS tuag thiab sawv rov los. Peb kuj tso siab tias, cov neeg mus pw tsaug zog nyob hauv YES XUS, mas TSWV NTUJ yuav coj lawv mus nrog nws nyob. HUAB TAIS qhia ib lo lus rau peb, peb xav hais lo lus ntawd rau nej paub.
- 15 Yam li, hnuv Huab Tais rov los txog, mas peb cov neeg ciaj yuav tsis xub mus cuag Huab Tais dua cov uas tuag ntxov lawd.
- 16 Vim, thaum txog lub cajj teem, sawv daws yuav hnov thawj tug Tshiab lub suab, thiab hnov Tswv Ntuj lub puab nrov. Ces Huab Tais yuav nqes saum ntuj los. Cov neeg tuag nyob hauv Yes Xus Pleev yuav xub sawv rov los.
- 17 Hos peb cov uas tseem ciaj, mam li yuav tau mus nrog cov tuag sawv rov los ntawd sib txoos ua ke ; ces Ntuj yuav nqa peb nrog lawv nce mus saum cov huab, peb yuav mus cuag Huab Tais nyob saum ntuj. Peb yuav mus nrog Huab Tais nyob mus li.
- 18 Peb sawv daws nco ntsoov txog cov lus no, peb thiaj rov sib pab ua siab loj.

Yog Tswv Ntuj Lo Lus

NKAUJ CAV TXOG LUB MOO ZOO: Mt 24,42a.44

As les lus yas. As les lus yas. Nej zov hmo mog, vim Neeg Leej Tub yuav los lub sij hawm uas nej tsis nco faj. As les lus yas.

NTAWV MOO ZOO: Mas Tais 25,1-13

Nej Mloog Ib Zag Nyob Hauv Mas Tais Ntawv Moo Zoo

- 1 Yes Xus hais zaj paj lug no : “Ntuj lub Ceeb Tsheej yuav zoo xws li kaum leej ntxhais taws teeb tawm mus tos nraug vauv.

- 2 Nyob hauv lawv, muaj tsib leeg ruam, hos tsib leeg xyuam xim.
- 3 Cov ruam nqa teeb, tab sis tsis nqa roj nrog.
- 4 Hos cov xyuam xim nqa teeb thiab ntim roj rau hauv hwj nrog.
- 5 Nraug vauv los lig, ces lawv qaug dab ntub. Sawv daws tsaug zog.
- 6 Thaum ib tag hmo, ib lub suab nthe tias : “Nraug vauv los txog lawm ! Nej tawm los txais nws !”
- 7 Ces tas cov ntxhais hluas sawv los npaj teeb.
- 8 Cov ruam hais rau cov xyuam xim tias : “Nej pub ib qho roj rau peb mas, peb cov teeb tuag lawm.”
- 9 Tab sis cov xyuam xim teb rau cov ruam tias: “Ntshai roj yuav tsis txaus rau nej thiab rau peb. Nej mus muas roj tom cov tub luam rau nej.”
- 10 Thaum cov ntxhais ruam mus muas roj lawm, ces nraug vauv los txog. Cov uas tau npaj txhij tos, nrog nraug vauv chaws mus hauv chav tsev ua tshoob, ces luag kaw qhov rooj.
- 11 Thaum kawg, lwm cov ntxhais los txog thiab, lawv hais tias : “HUAB TAIS, HUAB TAIS, thov koj qhib qhov rooj rau peb.”
- 12 Tab sis nraug vauv teb tias : “Kuv hais tseeb rau nej, kuv tsis paub nej yog leej twg !”
- 13 Ua li mas nej zov hmo mog, vim nej tsis paub hnuv twg thiab lub sij hawm twg.”

Yog Huab Tais Yes Xus Lub Moo Zoo

HNUB CHIV 32 NRUAB XYOO B CHÚA NHẬT 32 THƯỜNG NIÊN NĂM B

ZAJ NYEEM IB: 1Vaj 17,10-16

Cov lus nyob hauv ntawv Vaj phau ib

- 10 Es Lias thiaj li sawv kev mus Xas Les Tas. Thaum nws tuaj txog ntawm ntug zos, nws ntsib ib tug poj ntsuam tab tom nrhiav taws rauv. Nws thov tus poj ntsuam tias : "Thov koj mus nqa ib qho dej tuaj pub rau kuv haus mog !"
- 11 Tus poj ntsuam txawm tig hlo yuav rov mus nqa dej. Es Lias txawm qw rau tus poj ntsuam ntxiv tias : "Thov koj nqa ib qho ncuav mov nyob hauv koj txhais tes tuaj rau kuv noj thiab!"
- 12 Tus poj ntsuam teb tias : "Kuv tuav txog koj tus HUAB TAIS TSWV NTUJ muaj txoj sia lub npe, kuv hais qhov tseeb tiag ! Kuv tsis muaj ib lub ncuav mov siav lawm. Kuv kawg tshuav me ntsis hmoov nplej nyob hauv lub qab hub xwb. Thiab tshuav me ntsis roj nyob hauv lub qab taig xwb. Zaum no, kuv tseem tab tom yuav tuaj mus nrhiav ib tsuag taws los rauv, tso kuv yuav ua ib lub ncuav mov rau kuv tus tub wb noj. Ces wb yuav nyob tos txog lub caij wb tuag tshaib xwb."
- 13 Es Lias hais rau tus poj ntsuam tias : "Koj txhob txhawj, koj xub mus nrhiav taws rauv tso. Ces koj los ua ib lub ncuav mov nqa tuaj rau kuv noj. Koj mam li mus ua rau neb ob niam tub noj."
- 14 Vim His Xas Lais tus TSWV NTUJ cog lus tias lub hub hmoov nplej yuav tsis txawj tas, lub tais ntim roj yuav tsis txawj qhuav mus txog hnuv TSWV NTUJ yuav tso dej los ywg lub ntiaj teb."
- 15 Ces tus poj ntsuam mus ua raws li Es Lias qhia. Lawv peb leeg tau noj ncuav mov tsau.
- 16 Ib ntus ntev loo lub hub rau hmoov nplej tsis txawj tas, lub tais ntim roj tsis txawj qhuav, xws li TSWV NTUJ tau kom Es Lias hais rau tus poj ntsuam.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 145,6b-10

Txais: Kuv tus plig, koj cav lus zoo txog HUAB TAIS.

1. HUAB TAIS TSWV NTUJ nco ntsoov nws cov lus mus ib txhiab ib txhis. Nws tswj txoj kev naj rau cov neeg uas raug luag hiam. Nws pub rau cov neeg tshaib noj. **Teb**

2. HUAB TAIS tso cov neeg nyob txim, nws qhib cov neeg dig muag kom rov pom kev, nws tsa cov neeg qaug zog. HUAB TAIS nyiam cov neeg ua ncaj, nws pov hwm cov pej kum neeg. **Teb**
3. HUAB TAIS pov hwm cov vaim kum neeg, nws txhawb cov poj ntsuam thiab cov ntsuag nos. Nws mooj cov siab phem kom lawv yuam kev. HUAB TAIS yog tus vaj nyob mus li. Xis Yoos, nws yog koj tus TSWV NTUJ mus tiam dhau tiam. **Teb**

ZAJ NYEEM OB: Hes Nplaws 9,24-28

Cov lus nyob hauv tsab ntawv xa rau cov ntseeg Hes Nplaws

- 24 Kwv tij sawv daws, Leej Pleev chaws mus hauv ib lub tsev Ntshiab uas tsis yog neeg txhais tes txhim, thiab tsis yog ib lub tsev ua piv txwv txog lub saum ntuj : Leej Pleev mus saum ntuj lawm tiag. Leej Pleev thiaj tawm los nyob ntawm TSWV NTUJ xub ntiag, nws cev lus pab peb.
- 25 Tsis tas Leej Pleev yuav rov cev nws rau TSWV NTUJ ob peb zaug, xws li tus tuam leej choj uas niaj xyoo nws yuav tsum rov mus cev ib co ntshav uas tsis yog nws cov ntshav nyob hauv Kem Ntshiab.
- 26 Yog Leej Pleev tsuas ua leej choj xws li lwm cov leej choj xwb, mas txij ntuj tsim teb raug los nws yuav tsum raug txom nyem ntau zaus. Tab sis thaum txog lub zwj ceeb kawg, nws tawm los ib zaug xwb, nws los ua nws thaj txi Ntuj rhuav kev txhaum pov tseg.
- 27 Leej tib neeg tsuas tuag ib zaug xwb, dhau qhov tuag lawm, yog lub caij txiav txim.
- 28 Leej Pleev rov muab nws txi Ntuj ib zaug xwb, kom nws tau ris ib zeej tsoom cov txhaum. Nws yuav tawm rov los zaum ob : zaum ntawd, nws yuav tsis ris kev txhaum, nws yuav tawm los rau cov neeg tos nws, nws yuav cawm lawv.

Yog Tswv Ntuj Lo Lus

NKAUJ CAV TXOG LUB MOO ZOO: Mt 5,3

As les lus yas. As les lus yas. Cov tau hmoov zoo yog cov pluag hauv nruab siab, Ntuj Lub Ceeb Tsheej yuav yog lawv tug. As les lus yas.

NTAWV MOO ZOO: Mas Kos 12,38-44

Nej Mloog Ib Zag Nyob Hauv Mas Kos Ntawv Moo Zoo

- 38 Thaum YES XUS qhia sawv daws, nws tseem hais tias : "Nej ceev faj rau cov kws Ntawv Ntshiab. Lawv nyiam hnav tej lub tsho ntev ua zam piav yeev. Lawv nyiam kom luag hawm lawv tom tej tshav puam.
- 39 Lawv nyiam zaum cov rooj kim txwv pem hauv ntej hauv tsev txoos, thiab thawj cov rooj zaum thaum lawv noj nqaij haus cawv.
- 40 Lawv dhuas cov poj ntsuam lub cuab tam nqos tas. Tsis kav lawv ua txuj hais tej zaj teev ntuj ntev. Lawv yuav raug txiav txim hnyav dua."
- 41 YES XUS zaum ncaj rau lub txhab ceev nyiaj. Nws ntsia zeej tsoom tso lawv cov txiaj toog rau hauv lub txhab ceev nyiaj. Cov nplua nuj coob leej tso nyiaj ntau rau hauv.
- 42 Muaj ib tug poj ntsuam pluag tuaj tso ob lub txiaj toog me me, tsis muaj nqi dab tsi.
- 43 Ces YES XUS hu cov thwj tim los ze nws, nws hais rau lawv tias : "Kuv hais tseeb rau nej, tus poj ntsuam no pluag, tab sis nws tso nyiaj ntau dua cov uas tau tso nyiaj rau hauv lub txhab ceev nyiaj huv tib si.
- 44 Vim tas cov neeg tso nyiaj ntawd, rho lawv tej nyiaj seem mus tso, hos tus poj ntsuam ntawd rho nyiaj hauv nws txoj kev pluag los : nws rho tas nrho nws lub cuab tam, uas nres nws txoj sia los tso rau hauv."

Yog Huab Tais Yes Xus Lub Moo Zoo

HNUB CHIV 32 NRUAB XYOO C
CHÚA NHẬT 32 THƯỜNG NIÊN NĂM C

ZAJ NYEEM IB: 2 Mas Kas Npes 7,1-2.9-14

Cov lus nyob hauv ntawv Mas Kas Npes phau ob

- 1 Tus Vaj As Nthias Kus ntes tau xya leej kwv tij nrog lawv niam. Tus vaj yuam lawv kom lawv noj nqaij npuas uas lawv Txoj Cai txwv tsis pub noj. Nws kom xuas pas thiab xuas leeg nyuj plawm lawv.
- 2 Ib tug tub txawm sawv xya leej kwv tij thiab lawv niam chaw hais rau tus vaj tias : "Koj xav paub saib peb xav li cas. Mas peb yeem tuag zoo dua qhov hla peb cov yawg koob Txoj Cai."
- 9 Thaum nws yuav tuag, nws hais tias : "Ib tug neeg siab phem li koj, koj tsis pub peb ua neej nyob. Tab sis tus vaj kav lub ntiav teb yuav tsa peb sawv rov los kom peb tau ib lub neej tsis txawj kawg, rau qhov peb tuag vim nws Txoj Cai."
- 10 Tus ob no tuag tas, lawv coj tus peb los. Lawv kom nws hlev nplaig, ces nws hlev nplaig tam sim ntawd thiab nws xyab nws ob txhais caj npab tam sim rau lawv.
- 11 Nws tseem muaj cuab kav hais tias : "Kuv txais kuv ob txhais tes no ntawm Ntuj los, vim nws tej kev cai mas kuv ntxub kuv ob txhais tes. Kuv tso siab tias nws yuav rov muab kuv ob txhais tes no rau kuv."
- 12 Tus vaj thiab nws cov neeg sawv daws ceeb tas tias vim li cas tus tub hluas ntawd yuav muaj lub siab loj kawg. Nws saib nws qhov txom nyem zoo li tsis muaj nqis dab tsi.
- 13 Nws txoj sia tu lawm, lawv kuj coj tus plaub los ua phem li ntawd rau thiab.
- 14 Thaum tus plaub yuav tuag, nws hais tias : "Kuv yeem tuag nyob hauv neeg txhais tes. Kuv tso siab tias Tswv Ntuj yuav tsa kuv ciaj rov los. Ntawm koj, mas koj yuav tsis tau ciaj rov los muaj txoj sia."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 16,1.4b-6.8.15

Txais: HUAB TAIS, kuv tsim dheev los, koj tus duab nyob puv kuv siab ntsws.

1. HUAB TAIS, thov koj mloog ib zaj lus ncaj ncees. Koj muab siab rau mloog kuv lub suab quaj. Koj tig ntsej los mloog kuv lo lus thov, kuv lub ncauj tsis dag. **Teb**

2. Kuv taug koj hneev taw, kuv yuav tsis npleem ko taw. Kuv tus TSWV NTUJ, kuv hu txog koj, koj yeej yuav teb kuv. Koj tig ntsej los mloog kuv lo lus. **Teb**
3. Koj txuag kuv zoo li txuag lub ntsiab muag. Koj zais kuv rau hauv koj phab tis qhov ntxoov. Kuv yuav pom koj lub ntsej muag. Kuv tsim dheev los, koj tus duab nyob puv kuv siab ntsws. **Teb**

ZAJ NYEEM OB: 2 Tes Xas Los Nis 2,16 – 3,5

Cov lus nyob hauv Paj Lug tsab ntawv ob xa rau cov ntseeg nyob Tes Xas Los Nis

- 2,16 Thov kom peb tus HUAB TAIS YES XUS PLEEV, thiab peb Txiv TSWV NTUJ nkawd nplij nej siab. TSWV NTUJ yog tus hlub peb, nws pub kev nplij mus li, thiab pub kev tso siab lom zem.
- 17 Thov kom nkawd nplij nej lub siab thiab nres nej tej hauj lwm, thiab nej tej lus huv tib si kom khov kho.
- 3,1 Kwv tij sawv daws, nej thov Ntuj rau peb thiab mog ! Nej thov kom HUAB TAIS Lo Lus mus taug nws txoj kev ntxiv, thiab kom Lo Lus nto koob meej ntxiv, ib yam li Lo Lus tau nto koob meej nyob hauv nej.
- 2 Nej thov Ntuj, kom peb dim ntawm cov neeg siab phem yuam kev: vim Ntuj tsis pub kev ntseeg rau sawv daws.
- 3 Tiam sis HUAB TAIS pheej xeeb : nws yuav nres nej kom ruaj nreb, nws yuav txuag nej ntawm tus phem.
- 4 Nyob hauv HUAB TAIS, peb tso siab rau nej kawg. Txhua yam peb qhia, mas nej ua raws, thiab nej yuav ua ntxiv mus.
- 5 Kuv thov kom HUAB TAIS coj nej lub siab, mus txog TSWV NTUJ txoj kev nyiam thiab txog Leej Pleev txoj kev ruaj nreb.

Yog Tswv Ntuj Lo Lus

NKAUJ CAV TXOG LUB MOO ZOO: Qhib Yav Tom Ntej 1,5a.6b

As les lus yas. As les lus yas. YES XUS PLEEV yog tus xub sawv hauv cov tub tuag rov qab los. Lub koob meej thiab hwj chim yog nws tug mus ib txhis. As les lus yas.

NTAWV MOO ZOO: Lus Kas 20,27-38

Nej Mloog Ib Zag Nyob Hauv Lus Kas Ntawv Moo Zoo

- 27 Muaj ob peb tug Xas Dus Kais txav los, lawv yog cov uas hais tias neeg tuag tsis muaj kev sawv rov los.
- 28 Lawv nug YES XUS tias : "Mais Xes sau cia rau peb tias : Yog leej twg tus kwv tij tuag lawm, tseg poj niam cia tsis tau muaj me nyuam li, mas

- tus kwv yuav tsum qaws tus poj ntsuam kom tsa tau tus kwv tij uas tuag lawd lub keeb sawv.
- 29 Muaj xya leej kwv tij. Thawj tug yuav poj niam, nws tuag tsis tau muaj tub ki.
- 30 Tus ob kuj tuag ib yam li ntawd.
- 31 Tus peb qaws tus poj niam. Tas lawv xya leej puav leej tuag tsis muaj tub ki li.
- 32 Thaum kawg, tus poj niam kuj tuag lawm thiab.
- 33 Ua li mas lub zim txwv neeg tuag yuav sawv rov los, tus poj niam ntawd yuav yog tus twg poj niam ? Vim lawv xya leej tau yuav nws ua poj niam."
- 34 YES XUS thiaj hais rau lawv tias : "Cov tub ki hauv lub qab ntuj no sib qaws ua txij ua nkawm.
- 35 Tab sis cov uas Ntuj txiav tias lawv tsim nyog txais ib feem nyob fab lwm tiam, thiab tsim nyog sawv hauv cov tuag rov los, mas lawv tsis yuav poj niam thiab tsis yuav txiv.
- 36 Rau qhov lawv yuav tsis txawj tuag ntxiv. Lawv nrog cov Tshiab sib txig. Lawv yog TSWV NTUJ cov tub, vim lawv yog kev sawv rov los cov tub.
- 37 Hais txog cov tuag sawv rov los, Mais Xes twb qhia txog qhov ntawd nyob hauv zaj hais txog Tsob Pos, thaum nws hu HUAB TAIS ua Has Nplas Has tus TSWV NTUJ, His Xas Has tus TSWV NTUJ, Yas Kos tus TSWV NTUJ.
- 38 Ua li mas TSWV NTUJ tsis yog cov tuag tus TSWV NTUJ, yog cov neeg ciaj tus TSWV NTUJ. Tas sawv daws muaj txoj sia kom tau hwm TSWV NTUJ."

Yog Huab Tais Yes Xus Lub Moo Zoo

HNUB CHIV 33 NRUAB XYOO A CHÚA NHẬT 33 THƯỜNG NIÊN NĂM A

ZAJ NYEEM IB: Paj Lug 31,10-13.19-20.30-31

Cov lus nyob hauv ntawv Paj Lug

- 10 Leej twg yuav nrhiav tau ib tug niam tsev nquag ? Tus niam tsev nquag muaj nqi dua tej hlaws npliag deg !
- 11 Nws tus txiv tso siab lug rau nws, tus txiv yuav tsis tshaib tsis ntshaw.
- 12 Nws ua zoo rau nws tus txiv tas ib sim neej, nws tsis ua phem rau tus txiv.
- 13 Nws tooj xov plaub yaj, saws ntuag, nws ob txhais tes ua hauj lwm nrawm nroos.
- 19 Nws ob txhais tes tuav leg xov, nws ntiv tes nthos nkaus ntxaiv los qaiv.
- 20 Nws cev tes pab cov neeg txom nyem, nws pub mov rau cov neeg pluag noj.
- 30 Tus muaj xom lees nws xav ntxias luag, tus zoo nkauj kuj tsis muaj nqis dab tsi. Tus poj niam hwm TSWV NTUJ mas luag yuav cav txog nws.
- 31 Nej pub cov txiv txi ntawm nws txhais tes rau nws. Kom nws cov hauj lwm rov cav lus zoo txog nws nyob ntawm cov qhov rooj tsheej.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 127,1-5

Txais: Cov tau txoj hmoov zoo yog cov hwm HUAB TAIS.

1. Cov neeg hwm HUAB TAIS thiab taug nws txoj kev, lawv txoj hmoov zoo. Koj tau noj cov txhiam xws koj ob txhais tes khwv. Koj txoj hmoov zoo, koj tau lub neej kaj siab lug. **Teb**
2. Koj poj niam zoo li tsob txiv cawv txi nyob hauv koj tsev. Koj cov tub ki zoo li cov ntsuag txiv ntoo roj nyob ncig koj lub phaj tsum. **Teb**
3. HUAB TAIS foom hmoov zoo rau tus hwm nws. Thov kom HUAB TAIS nyob saum Xis Yoos foom hmoov zoo rau koj. Niaj hnuv tas koj sim neej, koj yuav pom Yes Lus Xas Les vam meej. **Teb**

ZAJ NYEEM OB: 1 Tes Xas Los Nis 5,1-6

Cov lus nyob hauv Paj Lug tsab ntawv ib xa rau cov ntseeg nyob Tes Xas Los Nis

- 1 Kwv tij sawv daws, tsis tas kuv yuav qhia nej txog lub zim txwv thiab lub hnuv nyoog uas HUAB TAIS yuav rov los.
- 2 Nej twb paub meej tias, HUAB TAIS lub hnuv nyoog yuav los txog xws li ib tug tub sab uas tuaj thaum ib tag hmo.
- 3 Thaum zeej tsoom hais zom zaws tias : ‘Peb tau nyob kaj lug, thiab nyob nyab xeeb’, ces ib sij huam, txoj kev ploj yuav ya ntxiag tuaj raug lawv, xws li tus poj niam cev hnyav, uas ib sij huam nws cia li mob. Lawv yuav tsis tau kev dim.
- 4 Kwv tij, ntawm nej, mas nej tsis nyob hauv qhov tsaus ntuj ; lub hnuv nyoog ntawd yuav tsis tuaj muab nej, xws li ib tug tub sab.
- 5 Nej sawv daws puav leej yog qhov pom kev cov me nyuam, nej yog cov me nyuam mus nruab hnuv. Peb tsis yog cov neeg maub hmo ntuj, nyob hauv qhov tsaus ntuj.
- 6 Li ntawd, mas peb tsis txhob tsaug zog xws li luag tej : peb yuav zov hmo ; peb yuav noj me haus tsawg.

Yog Tswv Ntuj Lo Lus

NKAUJ CAV TXOG LUB MOO ZOO: Zam 15,4a.5b

As les lus yas. As les lus yas. HUAB TAIS hais tias: “Nej nyob hauv kuv yam li kuv nyob hauv nej. Leej twg nyob hauv kuv, nws thiaj li yuav txi txiv ntau.” As les lus yas.

NTAWV MOO ZOO: Mas Tais 25,14-30

Nej Mloog Ib Zag Nyob Hauv Mas Tais Ntawv Moo Zoo

- 14 Yes Xus hais zaj paj lug no : “Yog zoo li ib tug neeg uas yuav mus tawm rooj deb, nws hu nws cov tub txib los, nws muab nws lub cuab tam rau lawv ceev.
- 15 Nws muab tsib nras nyiaj rau thawj tug, muab ob nras rau tus ob, hos muab ib nras xwb rau tus peb. Nws muab rau lawv raws li lawv lub peev xwm, ces nws mus tawm rooj deb lawm. Tam sis ntawd,
- 16 tus uas tau txais tsib nras nyiaj, nqa cov nyiaj ntawd mus ntseev, nws tau paj tsib nras ntxiv.

- 17 Tus tau txais ob nras kuj ua li ntawd thiab : nws tau paj ob nras ntxiv.
- 18 Hos tus tau txais ib nras xwb mus khawb ib lub qhov rau hauv av, nws muab tus tswv nras nyiaj coj mus faus rau hauv.
- 19 Ib lub sij hawm ntev loo tom qab, cov tub txib tus tswv rov los txog. Nws nrog lawv txheeb nws cov nyiaj.
- 20 Tus uas tau txais tsib nras nyiaj tuaj txog. Nws cev tsib nras ntxiv, nws hais tias : “HUAB TAIS, tsib nras nyiaj no yog koj muab rau kuv : hos ntawm no yog tsib nras uas kuv coj mus ntseev tau paj ntxiv.”
- 21 Tus tswv hais rau nws tias : “Zoo kawg, tub txib siab zoo siab ncaj, thaum koj saib tej yam tsawg, koj ua ncaj. Kuv yuav tsa koj saib ntau yam. Koj los nyob hauv koj tus huab tais txoj kev zoo siab mog.”
- 22 Ces tus tau txais ob nras tuaj txog, nws hais tias : “HUAB TAIS, ob nras nyiaj no yog koj muab rau kuv : hos ntawm no yog ob nras uas kuv coj mus ntseev tau paj ntxiv.”
- 23 Nws tus tswv hais rau nws tias : “Zoo kawg, tub txib siab zoo siab ncaj. Thaum koj saib tej yam tsawg li no, koj ua ncaj. Kuv yuav tsa koj saib ntau yam. Koj los nyob hauv koj tus huab tais txoj kev zoo siab mog.”
- 24 Tus tub txib uas tau txais ib nras nyiaj xwb tuaj txog, nws hais tias: “HUAB TAIS, kuv paub tias koj yog ib tug neeg siab heev. Koj hlais nplej hauv tej teb koj tsis tau tseb, koj sau qoob hauv tej chaw koj tsis tau pov noob rau.
- 25 Kuv ntshai, kuv thiaj coj koj nras nyiaj mus faus rau hauv av. Saib ntawm no, koj rov tau yam uas yog koj tug.”
- 26 Ces tus tswv teb rau nws tias : “Tub txib siab phem thiab tub nkeeg, koj twb paub tias kuv hlais nplej hauv tej teb uas kuv tsis tau tseb, thiab kuv sau qoob hauv tej chaw uas kuv tsis tau pov noob rau.
- 27 Tsim nyog koj yuav nqa kuv cov nyiaj mus rau cov tub ceev nyiaj. Thaum kuv rov los, kuv yuav tau kuv cov nyiaj nrog cov paj.
- 28 Nej rho nras nyiaj ntawm nws, nej muab rau tus uas muaj kaum nras lawm.
- 29 Vim tias Ntuj yuav pub rau tus uas twb muaj lawm, ces nws yuav tau ntau ntxiv. Hos tus uas tsis muaj, Ntuj yuav thau qhov me me uas nws muaj.
- 30 Nej muab tus tub txib tsis tsim txiaj ntawd pov rau nraum zoov hauv qhov tsaus ntuj : nyob ntawd yuav quaj tom hniav nkawv.”

ZAJ NYEEM LUV LUV: Mas Tais 25,14-15.19-21

Nej Mloog Ib Zag Nyob Hauv Mas Tais Ntawv Moo Zoo

- 14 “Yog zoo li ib tug neeg uas yuav mus tawm rooj deb, nws hu nws cov tub txib los, nws muab nws lub cuab tam rau lawv ceev.
- 15 Nws muab tsib nras nyiaj rau thawj tug, muab ob nras rau tus ob, hos muab ib nras xwb rau tus peb. Nws muab rau lawv raws li lawv lub peev xwm, ces nws mus tawm rooj deb lawm. Tam sis ntawd,
- 19 Ib lub sij hawm ntev loo tom qab, cov tub txib tus tswv rov los txog. Nws nrog lawv txheeb nws cov nyiaj.
- 20 Tus uas tau txais tsib nras nyiaj tuaj txog. Nws cev tsib nras ntxiv, nws hais tias : “HUAB TAIS, tsib nras nyiaj no yog koj muab rau kuv : hos ntawm no yog tsib nras uas kuv coj mus ntseev tau paj ntxiv.”
- 21 Tus tswv hais rau nws tias : “Zoo kawg, tub txib siab zoo siab ncaj, thaum koj saib tej yam tsawg, koj ua ncaj. Kuv yuav tsa koj saib ntau yam. Koj los nyob hauv koj tus huab tais txoj kev zoo siab mog.”

HNUB CHIV 33 NRUAB XYOO B CHÚA NHẬT 33 THƯỜNG NIÊN NĂM B

ZAJ NYEEM IB: Das Nias 12,1-3

Cov lus nyob hauv ntawv Das Nias

- 1 Huab Tais tus Ntshiab hais rau Das Nias tias: “Txog lub zim txwv ntawd mas tus vaj txheeb loj Miv Kas yuav sawv los nyob ze koj tsoom pej xeeb huab hwm. Yuav yog ib lub caij txhawj xeeb tshaj plaws uas ib txwm txij thaum muaj neeg xeeb los nyob ntiaj teb no tsis tau pom dua ib zaug. Lub zim txwv ntawd koj tsoom pej xeeb uas lawv muaj lub npe sau cia rau hauv phau ntawv lawv yuav dim.
- 2 Cov pw tsaug zog hauv teb chaws plua tshauv plua av yuav rov tsim los ntau leej. Ib txhia yuav tau txoj sia nyob mus li, ib txhia yuav raug poob ntsej muag, raug kev txom nyem mus ib txhiab mus ib txhis.
- 3 Cov kws txawj kws ntse yuav ci ntsa iab xws li hauv ntuj ntsa. Cov tau qhia txoj kev ncaj kev ncees coob leej yuav ci ntsa iab mus ib sid xws li cov hnuv qub.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 15,5.8-11

Txais: Tswv Ntuj, thov koj txuag kuv, vim kuv tuaj khaub zig koj.

1. HUAB TAIS, koj yog lub cuab tam kuv tau txais los, yog lub ntim tuav kuv txoj hmoov. Kuv cia HUAB TAIS nyob ntawm kuv xub ntiag mus li. Vim nws nyob ntawm kuv sab xis, kuv yuav tsis qaij tsis qaug. **Teb**
2. Kuv lub siab luag ntshi, kuv tus plig hom khaj. Kuv cev nqaij nyob nyab xeeb vim koj tsis tso kuv pov tseg rau ntuj txias teb tsaus. Koj tsis kheev tus ntseeg koj poob rau hauv kev tuag. **Teb**
3. Koj qhia txoj kev muaj txoj sia rau kuv. Kev zoo siab txhawv ntawm koj lub ntsej muag los. Nyob ntawm koj sab xis muaj kev nplij siab mus ib sid. **Teb**

ZAJ NYEEM OB: Hes Nplaws 10,11-14.18

Cov lus nyob hauv tsab ntawv xa rau cov ntseeg Hes Nplaws

- 11 Kwv tij sawv daws, cov leej choj niaj hnuv sawv ntsug leg lawv txoj kab xwm, lawv rov cev cov thaj txi Ntuj ntau zaus, tab sis cov thaj txi Ntuj tsis muaj hwj huam daws txhaum tau.
- 12 Hos Leej Pleev, mas nws tsuas cev thaj txi Ntuj daws txhaum ib zaug xwb, ces nws zaum ntawm TSWV NTUJ phab xis mus li.
- 13 Nws tos kom Ntuj muab nws cov yeeb ncuab los ua rooj rau nws tiag taw lawm xwb.
- 14 Leej Pleev tsuas cev paj tshab ib zaug xwb, ces nws ua tau kom cov uas nws tau ntxuav lawv huv lawd zoo tiav nto ntsis.
- 18 Thaum Ntuj zam txhaum tas, mas tsis tas yuav rov ua thaj txi Ntuj them txhaum ntxiv.

Yog Tswv Ntuj Lo Lus

NKAUJ CAV TXOG LUB MOO ZOO: Lk 21,36

As les lus yas. As les lus yas. Nej ua ib co neeg feeb meej, nej teev Ntuj tsis tseg, nej thiaj yuav muaj zog sawv taus ntsug ntawm Neeg Leej Tub xub ntiag. As les lus yas.

NTAWV MOO ZOO: Mas Kos 13,24-32

Nej Mloog Ib Zag Nyob Hauv Mas Kos Ntawv Moo Zoo

- 24 Yes Xus hais rau cov thwj tim tias: “Thaum kev txom nyem nyuam qhuav dua tas, muaj ib ntus, lub hnuv yuav tsaus nti, lub hli yuav tsis xa qhov ci tuaj,
- 25 cov hnuv qub yuav poob saum ntuj los, hos txhua yam muaj hwj huam nyob txheej ntuj saud yuav co ua zog koog.
- 26 Ces sawv daws yuav pom Neeg Leej Tub tawm hauv cov huab los, muaj hwj huam loj thiab muaj koob meej nto moo lug.
- 27 Nws yuav xa cov Tub Xo kom mus sau nws cov xaiv nyob plaub ceg kaum ntuj, txij npoo ntiaj teb mus txog npoo ntuj.
- 28 Nej kawm zaj paj lug no ntawm tsob txiv ncuav pias. Txij thaum nws cov ceg pib zooj, thiab cov nplooj pib hlav, nej paub tias lub caij sov los txog ze lawm.

- 29 Ua li mas, thaum nej pom tej xwm ntawd tshwm sim tuaj, nej yuav tsum paub tias Neeg Leej Tub los txog ze lawm, nws twb nyob ntawm qhov rooj lawm.
- 30 Kuv hais tseeb rau nej, phaj neeg no tsis tau dua, tej xwm ntawd twb yuav tshwm sim tuaj.
- 31 Lub ntuj lub teb yuav ploj, tab sis kuv cov lus yuav tsis ploj.
- 32 Hais txog lub hnub nyoog thiab lub sij hawm ntawd, mas tsis muaj leej twg paub, cov Tub Xo nyob saum ntuj tsis paub. Neeg Leej Tub kuj tsis paub, kawg yog Leej Txiv thiaj paub xwb.

Yog Huab Tais Yes Xus Lub Moo Zoo

HNUB CHIV 33 NRUAB XYOO C CHÚA NHẬT 33 THƯỜNG NIÊN NĂM C

ZAJ NYEEM IB: Mas Las Kis 3,19-20a

Cov lus nyob hauv ntawv Mas Las Kis

- 19 Thaum hnuv ntawd tuaj yuav kub ntaiv npaum li qhov txos, cov neeg muab hlob thiab lim hiam, hnuv ntawd, yuav cig muaj ceem npaum quav nyab, yuav tsis seem cag thiab ntshuag, tsoom tub rog tus HUAB TAIS hais li.
- 20a Cov hwm kuv npe yuav tshwm plaws lub hnuv ncaj ncees thiab kev noj qab nyob zoo hauv nws sab tis ; nej yuav tawm rooj plaws dhia hom khaj npaum cov txiv heev nyuj luag muab qoob txav.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 97,5-9

Txais: HUAB TAIS tuaj tswj fwm cov haiv neeg raws kev ncaj.

1. Nej ntaus nkauj nog ncas cav txog HUAB TAIS ! Nej ntaus nkauj nog ncas ntxuag suab thaj cheej ! Nej tshuab xyu tshuab hom ntxuag suab kub nyuj ! Nej dhia hom khaj cav txog tus vaj vim nws yog peb tus HUAB TAIS. **Teb**
2. Dej ntuj thiab tej tsiaj nyob nruab deg, nej rag kev lom zem nroo ntwis mog ! lub sim ceeb thiab tsoom neeg nyob ntiaj teb, nej nqaum paj nqaum nruas lom zem. Tej me dej, nej ntas nrov nroo ntwis. **Teb**
3. Cov toj roob hauv pes, nej qw suab hom khaj nyob ntawm HUAB TAIS xub ntiag vim nws tuaj kav lub ntiaj teb. Nws yuav tswj lub qab ntuj neeg nyob hauv txoj kev haum pheej. **Teb**

ZAJ NYEEM OB: 2 Tes Xas Los Nis 3,7-12

Cov lus nyob hauv Paj Lug tsab ntawv ob xa rau cov ntseeg nyob Tes Xas Los Nis

- 7 Kwv tij sawv daws, vim nej paub zoo tias, nej yuav yoog peb li cas. Thaum peb nyob tim nej, peb tsis tau coj lub neej tsis haum txoj cai.
- 8 Peb tsis tau kom leej twg pub mov rau peb noj dawb : peb tau ua hauj lwm nruab hnuv hmo ntuj ; peb tau khwv iab khwv daw, vim peb tsis xav ua ib lub nra hnyav rau nej leej twg ris.

- 9 Tsis yog vim peb tsis muaj cai kom nej saib peb hnyav, tab sis, yog vim peb xav muab ib tug piv txwv rau nej yoog.
- 10 Thaum peb tseem nyob ze nej, peb kuj tau tsa ib txog cai tias, yog muaj ib tug neeg tsis kam ua hauj lwm, mas nws tsis txhob noj mov thiab.
- 11 Tiam sis nyem no, peb hnov tias, nyob tim nej muaj tej tus coj lub neej tsis haum txoj cai ntawd, lawv tsis ua hauj lwm dab tsi li, lawv tsuas xav kov tas puas tsav yam.
- 12 Peb thov ntuas cov neeg ntawd nyob hauv HUAB TAIS YES XUS PLEEV kom lawv ua hauj lwm thiab nyob twj ywm, thiab kom lawv noj cov mov uas lawv tau khwv ua.

Yog Tswv Ntuj Lo Lus

NKAUJ CAV TXOG LUB MOO ZOO: Lk 21,28

As les lus yas. As les lus yas. Nej yuav sawv, nej yuav tsa taub hau vim txoj kev txhiv nej los txog lawm. As les lus yas.

NTAWV MOO ZOO: Lus Kas 21,5-19

Nej Mloog Ib Zag Nyob Hauv Lus Kas Ntawv Moo Zoo

- 5 Thaum ntawd, ib txhia hais tias lub Tuam Tsev Teev Ntuj txhim tau pob zeb zoo nkauj rau thiab muaj paj tshab txi Ntuj zoo saib. YES XUS hais tias :
- 6 "Tej uas nej qhov muag ntsia ntawm no, muaj ib hnuv luag yuav rhuav tsis tseg ob lub pob zeb txhim sib tshooj sawv ntsug."
- 7 Lawv nug YES XUS tias : "Xib Hwb, thaum twg tej ntawd mam li tshwm sim tuaj, thiab yuav muaj lub cim dab tsi thaum tej ntawd yuav tshwm sim tuaj ?"
- 8 YES XUS hais tias : "Nej ceev faj txhob cia luag ua kom nej yuam kev. Vim yuav muaj coob leej siv kuv lub npe tuaj, lawv yuav hais tias : 'Yog kuv', thiab yuav hais tias : 'Lub zim txwv twb los txog ze ze lawm'. Mas nej txhob mus raws lawv.
- 9 Thaum nej hnov luag tham txog kev tsov rog thiab kev kub ntxhov, mas nej tsis txhob ntshai. Vim tias tej ntawd yuav tsum tshwm sim tuaj tso, tab sis tsis tau txog lub zim txwv kawg tam sis ntawd."
- 10 YES XUS hais rau lawv tias : "Ib haiv neeg yuav sawv los ntaus lwm haiv neeg, ib lub teb chaws yuav sawv los ntaus lwm lub teb chaws.

- 11 Lub ntiaj teb yuav qeeg heev kawg. Nyob rau ntau qhov chaw yuav muaj mob aws, thiab muaj kev tshaib. Yuav muaj tej yam xwm txaus ntshai kawg, thiab tej lub cim loj nyob saum ntuj.
- 12 Tab sis ua ntej ib puas tsav yam ntawd, luag yuav cev tes ntes nej, luag yuav hiam nej, luag yuav coj nej mus kom rau cov tsev txoos thiab tsev loj faj. Luag yuav coj nej mus rau ntawm cov vaj thiab cov nom tswj teb chaws xub ntiag vim kuv lub npe.
- 13 Tej ntawd yuav pub ib lub zoo sij hawm rau nej ua tim khawv.
- 14 Nej khaws rau nruab siab tias nej yuav tsis txhob npaj ib co lus teb kom txuag tau nej.
- 15 Vim kuv yuav muab ib co lus thiab ib txog kev thoob tsib rau nej, ces cov ntxub nej yuav tsis muaj ib tug teb tau thiab cav tau nej cov lus.
- 16 Tab yog nej niam nej txiv, nej cov kwv tij, cov txheeb ze, thiab cov phooj ywg, los lawv tseem yuav mus kom nej. Luag yuav muab nej ib txhia tua.
- 17 Luag yuav ntxub nej vim kuv lub npe.
- 18 Tab sis tsis muaj ib txoj plaub hau saum nej taub hau yuav ploj.
- 19 Nej ua siab ruaj kom tom thawj, ces nej yuav cawm nej txoj sia.”

Yog Huab Tais Yes Xus Lub Moo Zoo

**UA NTEJ PLAUB HNUB CHIV
NYOB NRUAB XYOO**

**HWM YES XUS UA VAJ
HNUB CHIV 34 CAIJ NRUAB XYOO A
ĐỨC GIÊSU KITÔ VUA VỮ TRƯ
CHÚA NHẬT 34 THƯỜNG NIÊN NĂM C**

ZAJ NYEEM IB: Es Xes Kias 34,11-12.15-17

Cov lus nyob hauv ntawv Es Xes Kias

- 11 HUAB TAIS TSWV NTUJ hais li no : Zaum no, tus yuav tsob hwb kuv pab yaj yog kuv. Kuv yuav mus tshuaj xyuas.
- 12 Kuv yuav mus tshuaj xyuas kuv pab yaj zoo li ib tug tswv zov yaj, thaum nws rov nrhiav tau nws cov yaj uas tawg ua lwj ua liam, thaum uas ntuj tsaus pos huab nti.
- 15 HUAB TAIS TSWV NTUJ hais li no: Yog kuv yuav coj kuv cov yaj mus nog zaub, thiab ua kom lawv tau so.
- 16 Kuv yuav nrhiav tus poob zoo, kuv yuav coj tus ncaim npoj rov los poo npoj, kuv yuav qhvw tus raug qhov txhab, kuv yuav kho tus muaj mob kom zoo. Tus yaj rog thiab noj qab nyob zoo kuv yuav saib xyuas nws. Kuv yuav coj cov yaj mus noj zaub raws txoj kev ncaj.
- 17 Nej cov uas yog kuv pab yaj pab tshis mas Huab Tais Tswv Ntuj hais li no rau nej tias, Saib maj, kuv yuav txiav txim rau kuv cov maum yaj ib tug zuj zus thiab txiav txim rau tej txiv tshis txiv yaj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 22,1-6

Txais: HUAB TAIS yog tus Zoo Tswv Zov Yaj, kuv tsis ntshaw dab tsi li!

1. HUAB TAIS yog kuv tus tswv zov yaj, kuv tsis ntshaw dab tsi. Nws tso kuv nyob hauv tej tshav zaub mos. **Teb**
2. Nws coj kuv mus so nyob ze dej, nws rov ntxiv zog rau kuv tus plig. Nws coj kuv mus taug txoj kev ncaj kom nws lub npe nto koob meej. **Teb**
3. Cov neeg ntxub kuv, lawv hnyos kuv. Koj npaj ib roog qav rau ntawm kuv xub ntiag. Koj pleev roj tsw qab rau saum kuv taub hau. Koj hliv cawv puv lub ntim rau kuv haus. **Teb**

4. Tas kuv sim neej, kev kaj siab thiab kev hlub nrog nraim kuv. Tas kuv sim neej, kuv yuav nyob hauv HUAB TAIS tsev. **Teb**

ZAJ NYEEM OB: 1 Kos Lis Nthos 15,20-26.28

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 20 Tab sis tsis yog zoo li ntawd. Leej Pleev sawv hauv cov tuag rov los lawm tiag. Nyob hauv ib tsoom neeg uas mus tsaug zog lawm, mas Leej Pleev yog thawj tug uas tau sawv rov los.
- 21 Tim ib tug neeg, mas txoj kev tuag thiaj li txeem los. Tab sis ib tug neeg rov coj tau txoj kev sawv rov los rau cov tuag.
- 22 Sawv daws tuag nyob hauv As Das. Tab sis sawv daws yuav ciaj rov los nyob hauv Leej Pleev.
- 23 Nyias muaj nyias lub sij hawm sawv rov los: tus xub sawv, yog Leej Pleev, nws yog tus ntaus thawj. Thaum txog Leej Pleev lub Hnub Nyooq tawm rov los, mas Leej Pleev cov neeg yuav sawv rov los.
- 24 Thaum ntawd yuav yog lub zim txwv kawg : Leej Pleev yuav rhuav cov vaj, cov tswj lub ntiaj teb, thiab cov muaj hwj huam, ces nws yuav muab lub hwj chim ua vaj cob rov rau Leej Txiv Tswv Ntuj.
- 25 Leej Pleev yuav ua vaj mus txog lub caij Leej Txiv tso tsoom yeeb ncuab tas tib si rau hauv nws qab xib taws.
- 26 Tus yeeb ncuab kawg, uas nws yuav rhuav, yog txoj kev tuag.
- 28 Thaum Leej Tub tau tas puas tsav yam nyob hauv nws qab xib taws lawm, mas nws kuj yuav zwm rau tus uas tau muab tas txhua tsav txhua yam los zwm rau nws, kom Tswv Ntuj nyob hauv txhua leej txhua tus.

Yog Tswv Ntuj Lo Lus

NKAUJ CAV TXOG LUB MOO ZOO: Mk 11,9.10

As les lus yas! As les lus yas. Tus uas Huab Tais xa tuaj muaj koob meej. Lub Ceeb Tsheej uas tab tom los, muaj koob meej, yog peb txiv Das Vis lub Ceeb Tsheej. As les lus yas.

NTAWV MOO ZOO: Mas Tais 25,31-46

Nej Mloog Ib Zag Nyob Hauv Mas Tais Ntawv Moo Zoo

- 31 Yes Xus hais rau cov thwj tim tias: “Thaum Neeg Leej Tub yuav rov los, nws yuav muaj koob meej. Tas tsoom Tub Xo yuav nrog nws los. Nws yuav zaum saum nws lub theej kiab muaj koob meej.
- 32 Tas ib tsoom haiv neeg yuav sib sau nyob ntawm nws xub ntiag. Nws yuav cais tsoom neeg xws li tus zov yaj cais cov yaj ntawm cov tshis.
- 33 Nws yuav cia cov yaj rau ntawm nws sab xis, cia cov tshis rau ntawm nws sab laug.
- 34 Ces tus Vaj yuav hais rau cov nyob sab xis tias : “Nej los mog ! Nej yog cov uas kuv Txiv pub txoj hmoov zoo rau. Nej txais lub Ceeb Tsheej uas Ntuj npaj tseg rau nej txij puag thaum pib tsim lub sim ceeb los ua nej tug.
- 35 Vim tias kuv tshaib plab, nej pub rau kuv noj ; kuv nqhis dej, nej pub rau kuv haus, kuv yog ib tug pej kum neeg, nej txais kuv ;
- 36 kuv liab qab, nej muab rau kuv hnav ; kuv mob, nej tuaj xyuas kuv; kuv nyob hauv tsev loj faj, nej tuaj tsham kuv.”
- 37 Ces cov neeg ncaj yuav teb tias: “HUAB TAIS, thaum twg peb tau pom koj tshaib plab ces peb tau pub rau koj noj, pom koj nqhis dej, ces peb tau muab rau koj haus,
- 38 pom koj yog ib tug pej kum neeg, ces peb tau txais koj, pom koj liab qab ces tau muab rau koj hnav ?
- 39 Pom koj mob los nyob hauv tsev loj faj, ces peb tau tuaj xyuas koj?
- 40 Tus Vaj yuav teb rau lawv li no : “Kuv hais tseeb rau nej. Nej tau ua npaum li cas rau cov me tshaj hauv kuv tsoom kwv, mas yog nej ua rau kuv.”
- 41 Ces tus vaj yuav hais rau cov nyob sab laug tias : “Nej txoj hmoov phem. Nej khiav mus deb kuv, mus nyob hauv cov hluav taws kub tsis txawj tuag, uas Ntuj npaj rau tus dab phem thiab nws cov dab.
- 42 Vim thaum kuv tshaib plab nej tsis pub rau kuv noj, kuv nqhis dej nej tsis pub rau kuv haus,
- 43 kuv yog ib tug pej kum neeg nej tsis txais kuv, kuv liab qab nej tsis muab rau kuv hnav, kuv mob thiab kuv nyob hauv tsev loj faj nej tsis tuaj xyuas kuv.”
- 44 Ces cov ntawd yuav teb rau tus Vaj tias : “HUAB TAIS, thaum twg peb tau pom koj tshaib plab los nqhis dej, pom koj yog ib tug pej kum neeg,

pom koj liab qab, pom koj mob los nyob hauv tsev loj faj, ces peb tsis tau pab koj ?”

- 45 Ces tus Vaj yuav teb rau lawv tias: “Kuv hais tseeb rau nej, nej tsis tau ua rau cov me tshaj hauv kuv tsoom kwv npaum li cas, mas yog nej tsis tau ua rau kuv.”
- 46 Ces cov no yuav mus raug txim ib txhiab ib txhis. Hos cov siab ncaj yuav mus txais txoj sia nyob mus li.”

Yog Huab Tais Yes Xus Lub Moo Zoo

**HWM YES XUS UA VAJ
HNUB CHIV 34 CAIJ NRUAB XYOO B
ĐỨC GIÊSU KITÔ VUA VỮ TRỤ
CHÚA NHẬT 34 THƯỜNG NIÊN NĂM B**

ZAJ NYEEM IB: Das Nias 7,13-14

Cov lus nyob hauv ntawv Das Nias

- 13 Hmo ntuj kuv ua npau suav pom tej ntawd, thiab kuv pom tej yam tuaj nyob saum cov huab zoo li ib tug neeg Leej Tub, nws txav los ze ntawm tus Laus, nws mus txog ntua ntawm tus Laus xub ntiag.
- 14 Neeg Leej Tub txais lub hwj huam, lub koob meej thiab kev ua vaj. Tas txhia haiv neeg, txhia kuj cuab, txhia xeeb lus tsoob hwb nws. Nws lub tuam teb yog ib lub tuam teb nyob mus li tsis txawj kawg. Nws lub teb chaws yuav tsis raug kev piam tseem.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 92,1-2.5

Txais: HUAB TAIS ua vaj, nws hnav lub hwj chim muaj tsim tas nrho.

1. HUAB TAIS ua vaj, nws hnav lub hwj chim muaj tsim tas nrho. HUAB TAIS lub zam muaj hwj xyeej, nws sia lub hwj huam. **Teb**
2. HUAB TAIS, thaum tsis tau muaj lub sim ceeb, koj yeej nyob lawm. Koj lub theej kiab nyob khov kho mus li. Koj txawb lub ntiaj teb ruaj nreb tsis txav chaw. **Teb**
3. Koj cov cai tswj hwm meej tas nrho. Txoj kev ntshiab nyob puv haug HUAB TAIS tsev mus txog txhiab niag tim puas xyoo. **Teb**

ZAJ NYEEM OB: Qhib Yav Tom Ntej 1,5-8

Cov lus nyob hauv ntawv Qhib Yav Tom Ntej

- 5 Txais txiaj ntsim thiab kev thaj yeeb tuaj ntawm YES XUS PLEEV, uas yog tus Tim Khawv pheej xeeb, tus xub yug hauv cov tub tuag los, tus tswj kav tsoom vaj nyob ntiaj teb. Nws nyiam peb, nws tau muab nws cov ntshav los ntxuav peb cov txhaum.
- 6 Nws tsa peb ua ib haiv neeg, ua ib co Leej Choj teev nws LEEJ TXIV TSWV NTUJ. Vim li ntawd, mas lub koob meej thiab lub hwj chim tswj fwm yog nws tug tas ib txhiab ib txhis. Ua li.

- 7 Ntsia saib ! Nws nrog cov huab los. Txhua leej txhua tus yuav pom nws, cov tau nkaug nws kuj yuav pom. Tas txhua haiv neeg nyob ntiaj teb yuav quaj yuav nyiav vim nws. Yuav muaj tseeb li ntawd
- 8 HUAB TAIS TSWV NTUJ hais tias : “Kuv yog As Fas thiab Os Mes Nkas; kuv yog Tus Nyob, Tus Ib Txwm Nyob, Tus Tab Tom Los. Kuv yog tus Muaj Hwj Huam tas nrho.”

Yog Tswv Ntuj Lo Lus

NKAUJ CAV TXOG LUB MOO ZOO: Mk 11,9.10

As les lus yas! As les lus yas. Tus uas Huab Tais xa tuaj muaj koob meej. Lub Ceeb Tsheej uas tab tom los, muaj koob meej, yog peb txiv Das Vis lub Ceeb Tsheej. As les lus yas.

NTAWV MOO ZOO: Zam 18,33b-37

Nej Mloog Ib Zag Nyob Hauv Zam Ntawv Moo Zoo

- 33b Pis Las Tos hais rau Yes Xus tias: "Koj puas yog cov Yus Das tus vaj ?"
- 34 YES XUS teb tias : "Puas yog koj hais koj, los yog luag tej hais txog kuv li ntawd rau koj ?"
- 35 Pis Las Tos teb tias : "Kuv puas yog ib tug Yus Das ? Koj haiv neeg thiab cov thawj leej choj koj tuaj rau kuv. Koj tau ua dab tsi ?"
- 36 YES XUS teb tias : "Kuv lub Ceeb Tsheej tsis nyob hauv lub qab ntuj no. Yog kuv lub Ceeb Tsheej nyob hauv lub qab ntuj no, mas kuv cov neeg yuav sawv ntaus rog thaiv kom kuv txhob poob rau hauv cov Yus Das txhais tes. Tab sis, kuv lub Ceeb Tsheej tsis nyob hauv lub qab ntuj no."
- 37 Pis Las Tos hais rau YES XUS tias : "Ua li koj yog vaj lod ?" YES XUS teb hais tias : "Yog koj hais tias kuv yog vaj. Yog vim qhov ntawd kuv thiaj yug los, thiab yog vim qhov ntawd kuv thiaj tuaj nyob hauv lub qab ntuj no : kuv tuaj ua tim khawv txog qhov tseeb. Leej twg yog txoj kev tseeb tug, mas nws mloog kuv lub suab."

Yog Huab Tais Yes Xus Lub Moo Zoo

**HWM YES XUS UA VAJ
HNUB CHIV 34 CAIJ NRUAB XYOO C
ĐỨC GIÊSU KITÔ VUA VŨ TRƯ
CHÚA NHẬT 34 THƯỜNG NIÊN NĂM C**

ZAJ NYEEM IB: 2 Xas Muas 5,1-3

Cov lus nyob hauv ntawv Xas Muas phau ob

- 1 Cov xeem His Xas Lais tib si tuaj cuag Das Vis nyob Hes Nploos. Lawv hais rau nws tias: "Peb nrog koj koom ib co pob txha ib ce nqaij.
- 2 Yav thaud, Xas Ws ua vaj, twb yog koj coj His Xas Lais mus los. HUAB TAIS tau hais rau koj tias : koj yuav coj kuv tsoom pej xeem His Xas Lais mus nog zaub. Koj yuav ua His Xas Lais tus tswv."
- 3 Tsoom txwj laus His Xas Lais thiaj tuaj cuag Das Vis nyob Hes Nploos. Tus vaj Das Vis nrog lawv cog lus nyob Hes Nploos, nyob ntawm TSWV NTUJ xub ntiag. Lawv pleev roj tsa Das Vis ua vaj His Xas Lais.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 121,1-2.4-5

Txais: “Peb mus pem HUAB TAIS tsev !” Kuv zoo siab hlo !

1. Thaum kuv hnov lawv hais tias, “Peb mus pem HUAB TAIS tsev,” kuv zoo siab hlo. Yes Lus Xas Les, peb nres ntawm koj cov qhov rooj lawm. **Teb**
2. Yog qhov chaw uas cov xeem nce tuaj, HUAB TAIS cov xeem neeg nce tuaj raws li txoj cai coj His Xas Lais, lawv tuaj cav lus zoo txog HUAB TAIS lub npe. Yog qhov chaw uas cov theej kiab txiav txim nyob txawm, Das Vis tsev neeg cov theej kiab nyob ntawd. **Teb**

ZAJ NYEEM OB: Kos Los Xais 1,12-20

Cov lus nyob hauv Paj Lug tsab ntawv xa rau cov ntseeg nyob Kos Los Xais

- 12 Ua li mas, nej yuav zoo siab ua nej Txiv tsaug, vim nej Txiv hu nej los nrog nws cov ntshiab koom txais ib txog hmoov nyob hauv qhov pom kev.
- 13 HUAB TAIS LEEJ TXIV rho peb ntawm lub Ceeb Tsheej tsaus ntuj los. Nws coj peb los nyob hauv nws Leej Tub lub Ceeb Tsheej.

- 14 Nyob hauv Leej Tub, peb tau txoj kev cawm, thiab txoj kev zam txhaum.
- 15 YES XUS yog tus TSWV NTUJ uas qhov muag pom tsis tau tus duab. Nws yog tus xub yug ntawm txhua tsav txhua yam uas Ntuj tsim los.
- 16 Nyob hauv Leej Plev, Ntuj tsim txhua yam nyob saum ntuj thiab nyob ntiaj teb no, tsim txhua yam pom tau thiab pom tsis tau, tsim txhua tus Tub Xo zaum saum theej kiab, thiab txhua tus Tshiab ua HUAB TAIS, ua Vaj Txheeb, thiab muaj hwj huam. Ntuj tsim tas puas tsav yam nyob hauv Leej Plev, kom lawv tsob hwb Leej Plev.
- 17 Leej Plev xub nyob dua txhua tsav txhua yam. Tas puas tsav yam muaj txoj sia nyob hauv Leej Plev.
- 18 Leej Plev yog lub Taub Hau nyob saum lub Cev : lub Cev yog lub Koom Txoos. Leej Plev yog lub Hauv Paus, nws yog tus xub yug hauv cov tub tuag los.
- 19 TSWV NTUJ muab txhua yam uas zoo tshaj, coj los nyob hauv Leej Plev.
- 20 Nyob hauv Leej Plev, TSWV NTUJ xyiv fab hlo rov nrog tas txhua tsav txhua yam sib haum xeeb. Vim Leej Plev, mas txhua tsav txhua yam nyob ntiaj teb thiab nyob saum ntuj rov tau nyob thaj yeeb hauv Leej Plev cov ntshav uas ntwis saum ntoo cuam.

Yog Tswv Ntuj Lo Lus

NKAUJ CAV TXOG LUB MOO ZOO: Mk 11,9.10

As les lus yas! As les lus yas. Tus uas Huab Tais xa tuaj muaj koob meej. Lub Ceeb Tsheej uas tab tom los, muaj koob meej, yog peb txiv Das Vis lub Ceeb Tsheej. As les lus yas.

NTAWV MOO ZOO: Lus Kas 23,35-43

Nej Mloog Ib Zag Nyob Hauv Lus Kas Ntawv Moo Zoo

- 35 Thaum lawv muab Yes Xus dai rau saum ntoo cuam, tsoom pej xeeb sawv ntsug ntawd ntsia. Cov thawj coj hnyos YES XUS, lawv hais tias: "Nws cawm tau luag tej. Yog tias nws yog TSWV NTUJ Leej Plev thiab tus Xaiv tiag, kom nws rov cawm nws mas!"
- 36 Cov tub rog kuj thum YES XUS. Lawv txav los, lawv cev ib co dej qaub rau YES XUS.

- 37 Lawv hais tias : "Saib koj yog cov Yus Das tus vaj no, koj cia li cawm koj mas !"
- 38 Tseem muaj ib co npe ntawv sau nyob siab me ntsis saum YES XUS taub hau, hais tias : "Tus no yog cov Yus Das tus Vaj."
- 39 Ob tug neeg phem dai saum ntoo cuam, muaj ib tug tsawm YES XUS tias: "Koj tsis yog Leej Pleev lod ? Koj rov cawm koj, thiab cawm wb mas."
- 40 Tab sis lwm tus qhib ncauj hais lus, nws cem tias: "Koj tseem tsis ntshai TSWV NTUJ lod ? Koj twb raug tib lub txim zoo li nws thiab !"
- 41 Wb mas, wb lub txim yog txoj kev ncaj, vim wb tau ua tej yam tsim nyog raug txim. Hos nws tsis tau ua dab tsi phem li."
- 42 Ces nws hais tias : "YES XUS, thaum koj mus txog hauv koj lub Ceeb Tsheej, thov koj nco txog kuv."
- 43 Ces YES XUS hais rau nws tias : "Kuv hais tseeb rau koj : Hnub no, koj yuav nrog kuv nyob hauv lub Nras Lom Zem."

Yog Huab Tais Yes Xus Lub Moo Zoo

HWM PEB LEEG HUAB TAIS, XYOO A CHÚA BA NGÔI, NĂM A

ZAJ NYEEM IB: Kev Tsiv 34,4b-6.8-9

Cov lus nyob hauv ntawv Kev Tsiv

- 4b Mais Xes sawv ntxov mus pem lub roob Xis Nais, raws li Tswv Ntuj qhia rau nws. Nws tuav ob daig txiag zeb.
- 5 HUAB TAIS nyob hauv ib twv huab nqes los, HUAB TAIS los nrog Mais Xes sawv ua ke. Mais Xes hu txog HUAB TAIS lub npe.
- 6 HUAB TAIS hla ntawm Mais Xes xub ntiag, ces Mais Xes qw nrov nrov tias: "HUAB TAIS, HUAB TAIS, tus TSWV NTUJ uas lub siab hlub mos nyoos, thiab khuv leej neeg, tus npau taws qeeb, tus pub paj tshab ntau, tus tsis fav xeeb.
- 7 Koj pub txiaj ntsim rau txhiab vam leej, koj ua siab ntev nyiaj ntsia neeg qhov phem, qhov yuam kev thiab qhov txhaum, tiam sis koj tsis cia leej twg dim txim. Thaum phaj txiv ua txhaum, koj nplua phaj tub thiab phaj xeeb ntxwv mus txog tiam peb tiam plaub huv si."
- 8 Thooj txhij ntawd, Mais Xes txhos caug ntua pe hauv av pe.
- 9 Ces nws hais tias: "HUAB TAIS, yog koj saib kuv tsim nyog, thov koj nrog nraim peb mus, txawm tias peb yog ib haiv neeg xwb qwb txhav, los thov koj zam peb qhov yuam kev thiab zam txhaum rau peb, koj muab peb los ua koj tug."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: Das Nias 3,52-56

Txais: Lub koob meej thiab lo lus cav yog Huab Tais yog mus tas ib txhiab ib txhis.

1. HUAB TAIS, peb cov yawg koob tus TSWV NTUJ, koj muaj koob meej nto moo, tsim nyog peb cav lus zoo txog koj tas ib txhiab ib txhis. Koj lub npe ntshiab nto moo lug, tsim nyog peb cav lus zoo txog koj tas ib txhiab ib txhis. **Teb**
2. Koj muaj koob meej nto moo lug hauv lub tuam tsev uas koj lub hwj chim ntshiab nyob, tsim nyog peb cav lus zoo txog koj lub koob meej tas ib txhiab ib txhis. Koj muaj koob meej nto moo lug saum lub theej kiab uas nyob hauv koj lub teb chaw, tsim nyog peb cav lus zoo txog koj tas ib txhiab ib txhis. **Teb**

3. Koj muaj koob meej nto moo lug. Koj zaum saum lub theej kiab uas cov Tub Xo Kes Lus Npis zov. Koj tsom pom puag hauv qab tiv txwv, tsim nyog peb cav lus zoo txog koj tas ib txhiab ib txhis. **Teb**

ZAJ NYEEM OB: 2 Kos Lis Nthos 13,11-13

Cov lus nyob hauv Paj Lug tsab ntawv ob xa rau cov ntseeg nyob Kos Lis Nthos

- 11 Kwv tij sawv daws, qhov kawg no, thov kom nej tau nyob kaj siab lug. Nej yeej meem muab siab rau ua neeg zoo txhij zoo txhua. Nej sib yaum ua siab loj. Nej koom ua ib lub siab ib lub ntsws mog. Nej coj nej lub neej nyob hauv txoj kev thaj yeeb. Ces tus TSWV NTUJ pub kev nyiam thiab kev thaj yeeb yuav nrog nej nyob.
- 12 Nej rov sib foom lus hmov tshua, nej sib nwj nyob hauv txoj kev ntshiab. Tas tsoom ntshiab foom lus hmov tshua rau nej.
- 13 HUAB TAIS YES XUS PLEEV lub txiaj ntsim, TSWV NTUJ txoj kev nyiam, thiab LEEJ NTUJ PLIG NTSHIAB txoj kev sib haum xeeb nrog nej sawv daws nyob.

Yog Tswv Ntuj Lo Lus

NKAUJ CAV TXOG LUB MOO ZOO

As les lus yas! As les lus yas. HUAB TAIS Leej Txiv, HUAB TAIS Leej Tub thiab HUAB TAIS LEEJ NTUJ PLIG muaj koob meej nto moo lug. Yog tus HUAB TAIS ib txwm nyob thiab yog tus tseem yuav los. As les lus yas !

NTAWV MOO ZOO: Zam 3,16-18

Nej Mloog Ib Zag Nyob Hauv Zam Ntawv Moo Zoo

- 16 TSWV NTUJ nyiam lub qab ntuj neeg npaum no: nws thiaj muab nws Leej Tub twm zeej rau, kom xwv tus ntseeg txog Leej Tub txhob tuag, tab sis kom nws muaj txoj sia nyob mus li.
- 17 TSWV NTUJ tsis xa Leej Tub tuaj hauv lub qab ntuj kom nws muab txim rau lub qab ntuj neeg, nws xa Leej Tub tuaj cawm lub qab ntuj neeg.

- 18 Tus ntseeg txog Leej Tub, nws tsis raug txiav txim. Tus tsis ntseeg, nws twb raug txiav txim lawm, vim nws tsis ntseeg txog TSWV NTUJ Leej Tub twm zeej lub npe.

Yog Huab Tais Yes Xus Lub Moo Zoo

HWM PEB LEEG HUAB TAIS, XYOO B CHÚA BA NGÔI, NĂM B

ZAJ NYEEM IB: Txoj Cai Ob 4,32-34.39-40

Cov lus nyob hauv ntawv Txoj Cai Ob

- 32 Mais Xes hais rau cov His Xas Lais tias: “Nej sim nug tej laus saib, txij hnuv TSWV NTUJ tsim neeg los nyob ntiaj teb, los txog hnuv no, txij qab ntug mus txog hauv ntuj, puas muaj ib lo lus muaj hwj chim npaum li TSWV NTUJ lo lus ? Puas muaj neeg tau hnov dua ib lo lus zoo li ntawd?”
- 33 Puas muaj lwm haiv neeg tau hnov tus TSWV NTUJ muaj txoj sia lub suab hais lus hauv hluav taws tuaj li nej tau hnov tas, thiab lawv tseem muaj txoj sia nyob ntxiv?
- 34 Puas muaj lwm tus TSWV NTUJ uas tuaj xaiv ib haiv neeg hauv lwm cov haiv neeg los ua nws tug ? Puas muaj lwm tus TSWV NTUJ tau ua tej yam los sim neeg siab, tej lub cim loj thiab tej yam txaus qhuas, tau sawv ntaus tej tsam rog, tau siv nws txhais tes muaj hwj huam thiab xyab nws txhais npab muaj zog, tau siv nws lub peev xwm ua tej yam txaus ntshai kawg, xws li nej tus HUAB TAIS TSWV NTUJ tau ua pab nej nyob Hais Nkws Tos teb, rau nej qhov muag pom ?
- 39 Hnuv no, nej yuav tsum paub, yuav tsum nco ntsoov rau nruab siab tias : HUAB TAIS yog TSWV NTUJ tiag, nws yog TSWV NTUJ nyob saum ntuj thiab nyob ntiaj teb no tib si. Tsis muaj dua lwm tus TSWV NTUJ.
- 40 Nej yuav khaws HUAB TAIS txoj cai thiab nws cov lus qhia uas kuv ceeb toom rau nej, kom nej thiab nej cov tub ki tau txoj hmoov zoo, thiab tau nyob ntev niaj ntau xyoo hauv lub teb chaws uas nej tus HUAB TAIS TSWV NTUJ muab pub rau nej nyob mus ib txhis.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 32,4-6.9.18-20.22

Txais: Haiv neeg Ntuj xaiv los ua HUAB TAIS lub cuab tam, lawv txoj hmoov zoo!

1. HUAB TAIS, lo lus yog lus ncaj, nws cov dej num nyob ruaj nreb. Nws nyiam kev ncaj thiab kev haum pheej. HUAB TAIS txoj kev hlub ntws puv lub ntiaj teb. **Teb**
2. HUAB TAIS lo lus tsim yim txheej cuaj txheej ntuj. Nws muab nws txoj pa los tsim cov hnuv qub. Nws hais ib lo lus ces txhua yam tshwm sim tuaj. Nws txib cees txhua tsav puas yam ua raws li nws hais. **Teb**
3. HUAB TAIS zov cov neeg hwm nws. Nws zov cov neeg tso siab rau nws lub siab zoo. Nws npo lawv dim ntawm kev tuag. Nws txuag lawv txoj sia thaum lub teb chaws raug kev tshaib kev nqhis. **Teb**
4. Peb tus ntsuj plig tso ntsoov HUAB TAIS. Nws yog tus pab peb, nws yog peb daim leem phiaj. HUAB TAIS, thov kom koj lub siab hlub roos peb. Peb chaw tso siab yog nyob hauv koj. **Teb**

ZAJ NYEEM OB: Los Mas 8,14-17

Cov lus nyob hauv Paj Lug tsab ntawv xa rau cov ntseeg nyob Los Mas

- 14 Kwv tij sawv daws, txhua leej txhua tus uas TSWV NTUJ Leej Tswv Yim coj, mas lawv yog TSWV NTUJ cov me nyuam tas huv tib si.
- 15 Nej tsis tau txais ib lub tswv yim ua qhev ; nej tsis txhob rov qab poob rau hauv txoj kev ntshai. Nej tau txais ib lub tswv yim ua tub ki tshiab, mas nej hu Tswv Ntuj tias : ‘As Npas ! Txiv !’
- 16 LEEJ NTUJ PLIG nrog peb lub tswv yim zeem tseeb tias peb yog TSWV NTUJ cov me nyuam tiag.
- 17 Vim peb yog Ntuj cov me nyuam, mas peb yog cov txais lub cuab tam : peb yog cov txais TSWV NTUJ lub cuab tam ; peb nrog Leej Pleev txais ib lub cuab tam, vim peb nrog nws raug txom nyem, peb yuav tau nrog nws muaj hwj chim.

Yog Tswv Ntuj Lo Lus

NKAUJ CAV TXOG LUB MOO ZOO

As les lus yas! As les lus yas. HUAB TAIS Leej Txiv, HUAB TAIS Leej Tub thiab HUAB TAIS LEEJ NTUJ PLIG muaj koob meej nto moo lug. Yog tus HUAB TAIS ib txwm nyob thiab yog tus tseem yuav los. As les lus yas !

NTAWV MOO ZOO: Mas Tais 28,16-20

Nej Mloog Ib Zag Nyob Hauv Mas Tais Ntawv Moo Zoo

- 16 Pab Kaum Ib leeg mus txog Nkas Lis Lais teb. Lawv mus saum lub roob uas YES XUS teem rau lawv.
- 17 Lawv pom YES XUS, lawv pe ; ib txhia tseem ua xyem xyav.
- 18 YES XUS txav los ze lawv, nws hais cov lus no rau lawv : "Ntuj pub ib puas tsav yam hwj huam rau kuv nyob saum ntuj thiab nyob ntiaj teb no.
- 19 Nej mus, nej ua kom tas ib toom haiv neeg los ua kuv thwj tim. Nej hu txog LEEJ TXIV, LEEJ TUB thiab LEEJ NTUJ PLIG NTSHIAB lub npe, nej ntxuav lawv.
- 20 Nej qhia kom lawv coj tas puas tsav yam uas kuv qhia rau nej. Hos kuv, mas kuv niaj hnuv nrog nej nyob mus txog lub zim txwv ntiaj teb kawg.

Yog Huab Tais Yes Xus Lub Moo Zoo

HWM PEB LEEG HUAB TAIS, XYOO C CHÚA BA NGÔI, NĂM C

ZAJ NYEEM IB: Cov Paj Lug 8,22-31

Cov lus nyob hauv ntawv Cov Paj Lug

- 22 Kuv yog txoj kev thoob tsib. Thaum lub hauv paus los, Tswv Ntuj yeej xub tsim kuv ua tas puas tsav yam ntej.
- 23 Txij lub hauv paus los, thaum tseem tsis tau muaj cov hnuv nyoog, thaum lub ntiaj teb tseem tsis tau xeeb los, mas kuv twb nyob lawm.
- 24 Thaum tseem tsis muaj cov tiv txwv, tseem tsis tau muaj cov qhov dej txhawv, kuv twb yug los.
- 25 Thaum tseem tsis tau muaj cov toj roob hauv pes sawv, kuv twb nyob lawm.
- 26 Thaum tseem tsis tau muaj ntiaj teb, tsis muaj lub sim ceeb thawj cov plua av plua tshauv, kuv twb yug los.
- 27 Thaum HUAB TAIS tsim cuaj txheej ntuj, thaum nws kos lub voj xov npoo ntuj, kuv twb nyob ntawd.
- 28 Thaum nws sau cov huab nyob txheej ntuj saud, thaum nws ua kom cov qhov dej hauv tiv txwv phwj los, kuv nyob ntawd.
- 29 Thaum HUAB TAIS tu ciam teb rau cov dej ntuj kom lawv txhob hla dhau lawv tej ntug, kuv nyob ntawd.
- 30 Kuv nyob rawv ntawm HUAB TAIS xws li ib leeg ntxhais. Txhua txhia hnuv kuv dhia hom khaj nyob ntawm HUAB TAIS xub ntiag, ua nws chaw kaj siab lom zem."
- 31 Kuv dhia hom khaj nyob lub ntiaj teb uas yog nws li thiab dhia hom khaj rau ib tsoom neeg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 8,4-9

Txais: Peb tus HUAB TAIS TSWV NTUJ, koj lub npe muaj hwj chim nyob puv ntiaj teb.

1. Thaum kuv ntsia lub ntuj uas koj txhais tes tsim los, ntsia lub hli thiab cov hnuv qub uas koj tsim, neeg yog dab tsi, koj thiaj nco txog. **Teb**
2. Koj muab neeg tsa siab yuav luag cuag li koj ib tug Tub Xo. Koj uab koob meej thiab hwj chim los cog rau neeg. Koj tsa neeg kav tas puas tsav yam koj txhais tes tsim los. Koj tso tas puas tsav yam rau hauv neeg qab xib taws. **Teb**
3. Tas cov tsiaj nyeg, tsiaj qus, me noog ya saum ntuj, me ntses khiav hauv dej, koj muab tas puas tsav yam koj tsim los rau neeg kav. **Teb**

ZAJ NYEEM OB: Los Mas 5,1-5

Cov lus nyob hauv Paj Lug tsab ntawv xa rau cov ntseeg nyob Los Mas

- 1 Yog vim peb txais kev ncaj ntawm kev ntseeg tuaj, mas peb thiaj nrog TSWV NTUJ nyob kaj siab lug nyob hauv peb tus HUAB TAIS YES XUS PLEEV.
- 2 YES XUS PLEEV pub kev ntseeg, ces peb tau txais txiaj ntsim; peb tau los nyob hauv lub txiaj ntsim ; peb cav lus zoo thiab peb tso siab tias peb yuav txais TSWV NTUJ lub hwj chim.
- 3 Tab yog peb raug kev txom nyem, peb tseem cav lus zoo thiab, vim peb paub tseeb tias txoj kev txom nyem rub lub siab kom ntev,
- 4 lub siab ntev tsim tus yam ntxwv zoo xwm yeem, tus yam ntxwv zoo xwm yeem tsim kev tso siab.
- 5 Kev tso siab ua kom peb tsis muaj chaw khuv xim, vim LEEJ NTUJ PLIG NTSHIAB, uas Ntuj pub rau peb, nws hliv TSWV NTUJ txoj kev nyiam rau hauv peb lub siab.

Yog Tswv Ntuj Lo Lus

NKAUJ CAV TXOG LUB MOO ZOO

As les lus yas! As les lus yas. HUAB TAIS Leej Txiv, HUAB TAIS Leej Tub thiab HUAB TAIS LEEJ NTUJ PLIG muaj koob meej nto moo lug. Yog tus HUAB TAIS ib txwm nyob thiab yog tus tseem yuav los. As les lus yas !

NTAWV MOO ZOO: Zam 16,12-15

Nej Mloog Ib Zag Nyob Hauv Zam Ntawv Moo Zoo

- 12 Yes Xus hais rau cov thwj tim tias: “Kuv tseem tshuav ntau yam yuav hais rau nej, tab sis nyem no nej ris tsis taus.
- 13 Thaum LEEJ NTUJ PLIG qhia qhov tseem ceeb tuaj txog, nws yuav coj nej mus rau qhov tseeb tas huv si. Vim nws yuav tsis hais nws cov lus, nws yuav hais qhov nws hnov, thiab nws yuav xub qhia nej txog tej xwm uas yuav tshwm sim tuaj.
- 14 Nws yuav ua kom kuv muaj koob meej, vim nws yuav coj yam uas yog kuv tug tuaj qhia rau nej.
- 15 Tas ib puas tsav yam uas yog Leej Txiv tug, mas kuj yog kuv tug huv tib si. Vim li ntawd kuv thiaj hais rau nej tias : Leej Nplij Neeg yuav coj yam uas yog kuv tug tuaj qhia rau nej.”

Yog Huab Tais Yes Xus Lub Moo Zoo

HWM LUB CIM YUG, XYOO A MÌNH VÀ MÁU THÁNH CHÚA KITÔ, NĂM A

ZAJ NYEEM IB: Txoj Cai Ob 8,2-3.14b-16a

Cov lus nyob hauv ntawv Txoj Cai Ob

- 2 Mais Xes hais rau cov His Xas Lais tias: “Koj nco ntsoov txog txoj kev uas HUAB TAIS koj tus TSWV NTUJ kom koj taug tau plaub caug xyoo nyob hauv teb chaws suab puam. Vim nws xav cob qhia koj kom ua neeg me, nws xav sim koj thiab xav paub koj lub siab kom thoob ; nws xav paub saib koj puas coj nraim nws cov lus qhia los tsis coj.
- 3 Nws tau cia koj poob ntsej muag, tau cia koj tshaib plab, nws tau muab mov Mas Nas rau koj noj, ib co mov uas koj thiab koj cov yawg koob tsis tau pom dua li. Nws ua li ntawd qhia kom koj paub tias neeg tsis kawg yuav noj mov los yug nws txoj sia xwb, neeg tseem yuav tsum txais tas puas tsav yam uas tawm ntawm HUAB TAIS lub ncauj los yug nws txoj sia thiab.
- 14b Tsam koj hnov qab HUAB TAIS koj tus TSWV NTUJ uas tau coj koj tawm Hais Nkws Tos teb, tawm hauv lub tsev ua qhev los.
- 15 Nws yog tus tau coj koj hla lub teb chaws suab puam loj dav thiab muaj chaw ntshai ntau kawg, lub teb chaws uas nab muaj taug, thiab laum kiv tshooj khiav ua ntshua niab, lub teb chaws tuag dej vim yeej tsis muaj dej qhov twg li. Yog HUAB TAIS ua kom dej txhawv hauv ib phab tsua zeb xob hnia rau koj haus.
- 16a Yog nws muab cov mov Mas Nas, uas nej cov yawg koob tsis tau pom dua rau koj noj nyob hauv teb chaws suab puam.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 147,12-15.19.20

Txais: Yes Lus Xas Les, koj cav txog HUAB TAIS mas !

1. Yes Lus Xas Les, koj nqaum paj nqaum nruas rau HUAB TAIS. Xis Yoos, koj cav txog koj tus TSWV NTUJ vim nws ua kom koj cov ntsia liaj rooj khov. Nws foom hmoov zoo rau koj tej tub ki hauv tsev. **Teb**
2. Nws pub kev thaj yeeb rau koj lub teb chaws; nws pub txhiam laj txhiam xws rua koj noj txaus siab. Nws txib nws lo lus tuaj rau ntiaj teb ces nws lo lus khiav yeev tuaj. **Teb**

3. Nws qhia nws lo lus rau Yas Kos. Nws qhia nws cov cai lij choj thiab cov lus qhia rau haiv His Xas Lais. Nws tsis tau ua li ntawd rau ib haiv neeg twg li; lwm haiv neeg tsis paub nws cov lus qhia. **Teb**

ZAJ NYEEM OB: 1 Kos Lis Nthos 10,16-17

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 16 Kwv tij sawv daws, lub ntim foom hmoov, uas peb cav txog, tsis ua kom peb koom siab nyob hauv Leej Pleev cov ntshav lod ? Cov mov uas peb muab ntais, tsis ua kom peb koom siab nyob hauv Leej Pleev lub cev lod ?
- 17 Muaj tib lub ncuav mov xwb, peb sawv daws koom ua ib lub cev xwb. Peb sawv daws koom ua ib lub cev, vim peb sawv daws txais tib lub ncuav mov.

Yog Tswv Ntuj Lo Lus

NKAUJ CAV TXOG LUB MOO ZOO: Zam 6,51

As les lus yas! As les lus yas. Huab Tais hais tias : “Kuv yog cov mov muaj txoj sia nqes saum ntuj los. Leej twg noj cov mov no, nws yuav ciaj nyob mus li.” As les lus yas.

NTAWV MOO ZOO: Zam 6,51-58

Nej Mloog Ib Zag Nyob Hauv Zam Ntawv Moo Zoo

- 51 Yes Xus hais rau cov Yus Das tias: “Kuv yog cov mov muaj txoj sia nqes saum ntuj los. Leej twg noj cov mov no, nws yuav ciaj nyob mus li. Cov mov uas kuv yuav muab pub rau lub qab ntuj neeg noj kom lawv muaj txoj sia, yog kuv lub cev nqaij.”
- 52 Ces cov Yus Das sib cav zom zaws tias : "Tus neeg ntawd yuav ua li cas muab tau nws cev nqaij los rau peb noj ?"
- 53 Yes Xus thiaj hais rau lawv tias : "Kuv hais qhov tseeb tiag rau nej : Yog nej tsis noj Neeg Leej Tub lub cev nqaij thiab tsis haus nws cov ntshav, mas nej yuav tsis muaj txoj sia nyob hauv nej.

- 54 Hos tus noj kuv lub cev nqaij thiab haus kuv cov ntshav, nws muaj txoj sia nyob mus li. Hnub kawg, kuv yuav tsa nws sawv rov qab los.
- 55 Vim kuv lub cev nqaij yog ib co tseem txhiam xws noj, thiab kuv cov ntshav yog ib yam zoo haus.
- 56 Tus noj kuv cev nqaij thiab haus kuv cov ntshav, nws nyob hauv kuv thiab kuv nyob hauv nws.
- 57 Leej Txiv uas nws muaj txoj sia, nws xa kuv tuaj, ces kuv muaj txoj sia vim Leej Txiv. Li ntawd, tus noj kuv, nws kuj yuav muaj txoj sia, vim kuv.
- 58 Cov mov nqes saum ntuj los yog zoo li ntawd. Cov mov no tsis zoo li cov uas cov yawg koob tau noj, tab sis lawv tuag tas lawm. Hos tus noj cov mov no, mas nws yuav ciao nyob mus li."

Yog Huab Tais Yes Xus Lub Moo Zoo

HWM LUB CIM YUG, XYOO B MÌNH VÀ MÁU THÁNH CHÚA KITÔ, NĂM B

ZAJ NYEEM IB: Kev Tsiv 24,3-8

Cov lus nyob hauv ntawv Kev Tsiv

- 3 Mais Xes rov los hais HUAB TAIS cov lus thiab cov kev cai qhia rau tsoom pej xeem, tas sawv daws pom zoo koom ib lub suab teb tias: "Cov lus uas HUAB TAIS tau hais mas peb yuav coj tas huv tib si."
- 4 Mais Xes muab HUAB TAIS cov lus sau rau hauv ib phau ntawv cia, ces tag kis, nws sawv ntxov, nws txhim ib lub thaj txi Ntuj rau ntawm taw roob thiab kaum ob tug ncej zeb rau kaum ob lub xeem His Xas Lais.
- 5 Ces nws xa ib co tub hluas His Xas Lais mus txi Ntuj, lawv coj tej tus thav nyuj mus hlawv txi rau HUAB TAIS.
- 6 Mais Xes cug cov tsiaj ntawd cov ntshav, nws muab ib nrab rau hauv phiab, nws muab ib nrab hliv ywg lub thaj txi Ntuj.
- 7 Ces nws muab phau ntawv cog lus los nyeem rau tsoom pej xeem mloog, lawv qw tias : "Txhua yam HUAB TAIS tau hais, peb yuav coj thiab peb yuav mloog."
- 8 Mais Xes txawm muab cov ntshav los nchos rau saum tsoom pej xeem sawv daws, nws hais tias : "Cov ntshav no yog ntshav cog lus, HUAB TAIS tau nrog nej cog lus raws li cov lus sau hauv phau ntawv."

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 115,12-13.15-18

Txais: Kuv yuav cev lub ntim cawm neeg, kuv yuav hu txog HUAB TAIS, kuv yuav tuav txog nws lub npe.

1. Kuv yuav muab dab tsi los paj ib puas tsav yam zoo uas HUAB TAIS ua rau kuv ? Kuv yuav cev lub ntim cawm neeg, kuv yuav hu txog HUAB TAIS, kuv yuav tuav txog nws lub npe. **Teb**
2. Thaum HUAB TAIS pom nws cov neeg tuag, nws mob siab tas nrho. HUAB TAIS, thov koj hluv kuv vim kuv yog koj tus tub txib tiag, yog koj tus ntxhais txib tus tub. HUAB TAIS, koj tau daws cov hlua khi kuv. **Teb**
3. Kuv yuav cev ib co txim los cav txog HUAB TAIS. Kuv yuav tuav txog koj lub npe. Kuv yuav cev paj tshab rau koj nyob ntawm koj haiv neeg xub ntiag. **Teb**

ZAJ NYEEM OB: Hes Nplaws 9,11-15

Cov lus nyob hauv tsab ntawv xa rau cov ntseeg Hes Nplaws

- 11 Tab sis Leej Pleev tuaj lawm, nws yog tus Tuam Leej Choj kav lub cuab tam tom ntej. Nws hla ib lub tsev tsam phooj loj dua, thiab zoo dua, uas tsis yog neeg txhais tes ua, tsis yog lub sim ceeb no ib lub tsev.
- 12 Leej Pleev mus hauv lub tsev Ntshiab, nws tsis nqa ntshav tshis los ntshav heev nyuj, nws hliv kiag nws cov ntshav, ces nws txhiv tau peb mus li.
- 13 Yog ntshav tshis, thiab ntshav heev nyuj, los ib co tshauv maum nyuj uas luag muab tsuag rau saum cov neeg tsis huv, ua tau kom cov tsis huv ntshiab tuaj, thiab lub cev nqaij rov huv tuaj tiag,
- 14 mas Leej Pleev cov ntshav haj yam ua tau kom peb lub siab huv tuaj thiab kom peb dim tau ntawm peb cov hauj lwm txhaum los teev tus TSWV NTUJ muaj txoj sia, vim Leej Pleev uas nrog LEEJ NTUJ PLIG nyob mus li, Leej Pleev uas tsis muaj ib qho xyeej, nws rov muab nws txi rau TSWV NTUJ.
- 15 Yog vim li ntawd mas Leej Pleev thiaj sawv peb chaw rov cog lus dua. Nws txoj kev tuag txhiv peb ntawm cov txhaum peb tau ua thaum kev cog qub lus kav. Cov neeg uas Ntuj hu, mas lawv yuav txais lub cuab tam uas Ntuj cog lus tias yuav pub.

Yog Tswv Ntuj Lo Lus

NKAUJ CAV TXOG LUB MOO ZOO: Zam 6,51

As les lus yas! As les lus yas. Huab Tais hais tias : “Kuv yog cov mov muaj txoj sia nqes saum ntuj los. Leej twg noj cov mov no, nws yuav ciaj nyob mus li.” As les lus yas

NTAWV MOO ZOO: Mas Kos 14,12-16.22-26

Nej Mloog Ib Zag Nyob Hauv Mas Kos Ntawv Moo Zoo

- 12 Thaum txog thawj hnuv noj cov mov tsis muaj poov xab, lawv tua tus Yaj Hla, cov thwj tim hais rau YES XUS tias : "Koj xav kom peb mus npaj pluas Hla rau koj noj nyob qhov twg ?
- 13 Ces YES XUS xa nws ob tug thwj tim, nws hais rau nkawd tias: "Neb mus hauv nroog, yuav muaj ib tug neeg kwv ib hub dej tuaj ntsib neb. Neb raws nws mus.

- 14 Nws chaws mus hauv lub tsev twg, mas neb yuav hais rau tus tswv tsev ntawd tias : “Xib Hwb hais tias kem tsev uas kuv yuav nrog kuv cov thwj tim noj puas Hla nyob qhov twg ?”
- 15 Ces nws yuav qhia ib kem tsev dav rau neb nyob theem saud, muaj rooj tog, thiab tu txhij tas. Neb npaj txhua yam kom tiav rau peb."
- 16 Ob tug thwj tim mus. Thaum nkawd mus txog hauv nroog, nkawd pom txhua yam raws li YES XUS tau hais rau nkawd, ces nkawd npaj puas Hla.
- 22 Thaum lawv tab tom noj mov, YES XUS tuav lub ncuav mov, nws hais zaj foom hmoov zoo rau, nws muab ntais, thiab muab faib rau nws cov thwj tim, nws hais tias : "Nej txais, qhov no yog kuv lub cev."
- 23 YES XUS tuav ib lub ntim, nws ua Ntuj tsaug, nws muab cev rau cov thwj tim, ces sawv daws haus hauv lub ntim ntawd.
- 24 YES XUS hais rau lawv tias : "Qhov no yog kuv cov ntshav, yog cov ntshav cog lus, cov ntshav no yuav ntws mus cawm coob leej.
- 25 Kuv hais tseeb rau nej : txij no mus, kuv yuav tsis haus cov kua txiv cawv no ntxiv, mus txog hnuv kuv rov haus cov cawv tshiab nyob hauv TSWV NTUJ lub Ceeb Tsheej."
- 26 YES XUS lawv hu cov nkauj paj nruag tas, ces lawv tawm mus pem roob Txiv Ntoo Roj.

Yog Huab Tais Yes Xus Lub Moo Zoo

HWM LUB CIM YUG, XYOO C MÌNH VÀ MÁU THÁNH CHÚA KITÔ, NĂM C

ZAJ NYEEM IB: Havv Paus 14,18-20

Cov lus nyob hauv ntawv Havv Paus

- 18 Mes Kis Xes Des, uas yog tus vaj nyob Xas Les nqa ncuav mov thiab cawv tuaj. Nws yog tus TSWV NTUJ nyob siab tus leej choj.
- 19 Nws hais cov lus foom hmoov no rau Has Nplas : "Thov kom tus TSWV NTUJ nyob siab uas tsim lub ntuj thiab lub ntiaj teb, foom hmoov zoo rau Has Nplas.
- 20 Thov kom tus TSWV NTUJ nyob siab nto koob meej, vim nws muab koj cov yeeb ncuab tso rau hauv koj lub xib teg lawm." Ces Has Nplas muab ib feem kaum ntawm tas puas tsav yam nws muaj, pub rau Mes Kis Xes Des.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 109,1-4

Txais: Koj ua leej choj raws nraim Mes Kis Xes Des tus piv txwv mus li.

1. HUAB TAIS hais rau kuv tus huab tais hais tias, “Koj zaum ntawm kuv sab xis mus txog hnub kuv muab koj cov yeeb ncuab los ua rooj rau koj tiag taw !” **Teb**
2. HUAB TAIS yuav tsa koj rab cwj ua vaj muaj hwj chim nyob saum Xis Yoos ! Koj kav nruab nrab hauv cov yeeb ncuab ! **Teb**
3. Txij hnub koj yug los, koj muaj vaj ntxwv lub hwj chim. Txij nruab thiab los, koj yeej txais lub koob meej ntshiab. **Teb**
4. HUAB TAIS cog lus cia, nws tsis hloov nws lo lus: “Koj ua leej choj mus raws nraim Mes Kis Xes Des txoj kev.” **Teb**

ZAJ NYEEM OB: 1 Kos Lis Nthos 11,23-26

Cov lus nyob hauv Paj Lug tsab ntawv ib xa rau cov ntseeg nyob Kos Lis Nthos

- 23 Kwv tij sawv daws, cov lus kuv qhia rau nej, yog cov lus kuv txais ntawm HUAB TAIS los. Yam li, hmo lawv muab HUAB TAIS YES XUS rau cov nom ntes, HUAB TAIS tuav ib lub ncuav mov,
- 24 nws ua Ntuj tsaug, nws muab lub ncuav mov ntais, nws hais tias : ‘Qhov no yog kuv lub cev uas cia cawm nej. Nej ua qhov no kom nej nco txog kuv.
- 25 Thaum noj hmo tas HUAB TAIS YES XUS tuav lub ntim cawv, nws hais tias : Lub ntim cawv no yog zaj cog lus tshiab nyob hauv kuv cov ntshav ; nej haus lub ntim no thaum twg, mas nej haus kom nej nco txog kuv.
- 26 Kwv tij, txij no mus, nej noj cov ncuav mov no thaum twg, thiab nej haus cov cawv no thaum twg, mas nej tshaj HUAB TAIS txoj kev tuag, nej ua li no mus txog hnub HUAB TAIS rov los.

Yog Tswv Ntuj Lo Lus

NKAUJ CAV TXOG LUB MOO ZOO: Zam 6,51

As les lus yas! As les lus yas. Huab Tais hais tias : “Kuv yog cov mov muaj txoj sia nqes saum ntuj los. Leej twg noj cov mov no, nws yuav ciaj nyob mus li.” As les lus yas !

NTAWV MOO ZOO: Lus Kas 9,11b-17

Nej Mloog Ib Zag Nyob Hauv Lus Kas Ntawv Moo Zoo

- 11b YES XUS txais lawv zoo, nws hais txog TSWV NTUJ lub Ceeb Tsheej rau lawv, thiab YES XUS kho cov uas vam txog nws.
- 12 Thaum lub hnub yuav poob qho, Pab Kaum Ob txav los hais rau YES XUS tias : "Koj kom tsoom sid rov mus, lawv thiaj tau kev mus nrhiav chaw so thiab txhiam xws noj hauv cov zos thiab tej tsev nruab teb uas tsis deb ib ncig ntawm no, vim peb nyob ib qho chaw tsis muaj neeg."
- 13 YES XUS hais rau lawv tias : "Nej muab mov rau lawv noj mas!" Cov thwj tim hais tias : "Peb tsuas muaj tsib lub ncuav mov thiab ob tug ntses xwb. Tsuas ntshai tias peb ho mus muas zaub mov rau tas tsoom neeg no noj."

- 14 Vim cov neeg tuaj ntawd muaj ze ntawm tsib txhiab leej txiv neej. YES XUS hais rau cov thwj tim tias : “Nej kom lawv zaum ua tej pawg tsib caug leej ua ke.”
- 15 Cov thwj tim ua raws li YES XUS hais. Lawv kom sawv daws zaum.
- 16 YES XUS tuav tsib lub ncuav mov thiab ob tug ntses, nws tsa muag ntsia saum ntuj, nws foom hmoov zoo rau cov mov thiab cov ntses. Nws muab ntais, nws muab rau cov thwj tim kom cev rau tsoom sid noj.
- 17 Sawv daws noj mov, sawv daws tsau tas. Lawv khaws tej sab mov seem puv kaum ob tawb.

Yog Huab Tais Yes Xus Lub Moo Zoo

HWM YES XUS LUB SIAB NTSHIAB, XYOO A THÁNH TÂM CHÚA GIÊSU, NĂM A

ZAJ NYEEM IB: Txoj Cai Ob 7,6-11

Cov lus nyob hauv ntawv Txoj Cai Ob

- 6 Mais Xes hais rau cov His Xas Lais tias: “Koj yog ib haiv neeg qee rau HUAB TAIS koj tus TSWV NTUJ; koj yog haiv neeg uas HUAB TAIS, koj tus TSWV NTUJ tau xaiv hauv tas txhua haiv neeg nyob hauv ntiaj teb, los ua nws haiv neeg.
- 7 Yog HUAB TAIS nyiam nej thiab xaiv nej, tsis yog vim nej coob dua lwm haiv neeg, rau qhov nej tseem yog ib haiv neeg tsawg dua cov.
- 8 Tab sis, vim HUAB TAIS hlub nej, thiab nws xav ua raws li lo lus uas nws tau cog rau nej cov yawg koob, ces nws thiaj siv nws txhais tes muaj zog rho nej tawm ntawm lub teb chaws ua luag qhev los, thiab npo nej ntawm Fas Las Oos, uas yog tus vaj Hais Nkws Tos lub hwj huam.
- 9 Li no koj yuav tsum paub tias HUAB TAIS koj tus TSWV NTUJ yog tus tseem TSWV NTUJ tiag, yog tus TSWV NTUJ tsis fav xeeb uas cog lus ruaj, thiab hlub cov neeg nyiam nws, thiab khaws nws cov lus qhia txheej dhau txheej.
- 10 Tab sis nws muab txim rau cov neeg ntxub nws. Nws ua kom tus neeg ntxub nws tuag tam sid ntawd, nws tsis ncuu lub txim.
- 11 Li ntawd, koj yuav coj cov lus qhia, cov kev cai lij choj uas kuv ceeb toom rau koj hnuv no.”

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 102,1-4.6-8.10

Txais: HUAB TAIS lub siab hlub roos cov neeg hwm nws mus ib txhiab ib txhis.

1. Kuv tus plig, koj cav lus zoo txog HUAB TAIS. Kuv tej siab ntsws, nej cav lus zoo txog nws lub npe ntshiab. Kuv tus plig, koj cav lus zoo txog HUAB TAIS. Koj txhob mom nws txheej. Koj yuav nco ntsoov nws tej txiaj ntsim. **Teb**
2. Nws zam koj cov txhaum, nws kho koj tej mob nkeeg. Nws muab nws lub siab zoo thiab khuv leej neeg roos koj. Nws cawm koj txoj sia ntawm kev puas tsuaj. **Teb**

3. HUAB TAIS siab zoo, nws khuv leej neeg tas nrho. Nws hlub neeg mus li, nws tsis npau taws sai. Nws tsis nplua peb raws li peb cov txhaum. Nws tsis paj kev phem rau tej txhaum peb tau ua. **Teb**

ZAJ NYEEM OB: 1 Zam 4,7-16

Cov lus nyob hauv Zam tsab ntawv Ib

- 7 Cov zoo nyiam, peb yuav sib nyiam sib hlub mog! Vim txoj kev nyiam tuaj ntawm TSWV NTUJ tuaj, ua li mas tus twg nyiam, tus ntawd yug ntawm TSWV NTUJ los, thiab nws paub TSWV NTUJ.
- 8 Tus tsis txawj nyiam, mas nws tsis paub TSWV NTUJ, vim TSWV NTUJ yog txoj kev nyiam.
- 9 TSWV NTUJ txoj kev nyiam peb tawm los rau qhov muag pom xyeem li no: TSWV NTUJ xa nws Leej Tub Twm Zeej tuaj nyob ntiaj teb no, kom peb ciaj nyob hauv nws Leej Tub.
- 10 Nws txoj kev nyiam yog zoo li no: tsis yog peb tau nyiam TSWV NTUJ, yog TSWV NTUJ tau nyiam peb, thiab yog nws xa nws Leej Tub tuaj ua nqi txhiv peb ntawm peb cov txhaum.
- 11 Cov zoo nyiam, yog TSWV NTUJ nyiam peb npaum li ntawd, mas peb kuj yuav sib nyiam sib hlub thiab.
- 12 Tsis muaj leej twg tau ntsia ntsoov TSWV NTUJ ib zaug li. Yog peb sib nyiam sib hlub, mas TSWV NTUJ nyob hauv peb, thiab nws txoj kev nyiam uas zoo txhij zoo txhua hlob tiav nyob hauv peb.
- 13 Peb paub tias peb nyob hauv TSWV NTUJ, thiab nws nyob hauv peb vim qhov no: yog qhov nws pub nws LEEJ NTUJ PLIG rau peb.
- 14 Ntawm peb, mas peb tau ntsia ntsoov, ces peb ua tim khawv zeem tias Leej Txiv tau xa Leej Tub tuaj cawm lub qab ntuj neeg.
- 15 Tus lees tias YES XUS yog TSWV NTUJ Leej Tub, mas TSWV NTUJ nyob txawm hauv nws, thiab nws nyob hauv TSWV NTUJ.
- 16 Peb paub TSWV NTUJ txoj kev nyiam peb lawm, ces peb ntseeg. TSWV NTUJ yog txoj kev nyiam: tus twg nyob hauv txoj kev nyiam, mas nws kuj nyob hauv TSWV NTUJ, thiab TSWV NTUJ nyob hauv nws.

Yog Tswv Ntuj Lo Lus

NKAUJ CAV TXOG LUB MOO ZOO: Mt 11,29ab

As les lus yas! As les lus yas. HUAB TAIS hais tias, ‘Nej yuav txais kuv tus quab. Nej kawm ntawm kuv, nej yuav khaws. Kuv cov lus qhia vim kuv lub siab zoo tsis muab hlob.’ As les lus yas.

NTAWV MOO ZOO: Mas Tais 11,25-30

Nej Mloog Ib Zag Nyob Hauv Mas Tais Ntawv Moo Zoo

- 25 Lub caij ntawd, YES XUS hais tias: "Txiv, Kuv cav lus zoo txog koj, HUAB TAIS kav lub ntuj lub teb, vim Koj zais tej yam ntawd rau cov neeg thoob tsib thiab cov neeg ntse, Koj ho qhib rau cov me nyuam yaus.
- 26 Muaj tseeb tiag, Txiv, Koj lub siab nyiam li ntawd.
- 27 Kuv Txiv muab tas ib puas tsav yam rau Kuv. Tsis muaj leej twg paub Leej Tub, tsuas kawg Leej Txiv thiaj paub. Kuj tsis muaj leej twg paub Leej Txiv, tsuas kawg Leej Tub thiaj paub, thiab tus uas Leej Tub pom zoo qhia rau kom paub.
- 28 "Tas nej sawv daws uas nej khwv, thiab ris nra hnyav, nej tuaj cuag Kuv mog! Kuv yuav cia nej so los siav.
- 29 Nej txais kuv tus quab. Nej kawm ntawm Kuv mog, vim Kuv siab zoo, Kuv tsis muab hlob, nej tus plig yuav nrhiav tau chaw so los siav.
- 30 Vim Kuv tus quab kwv yooj yim, thiab kuv lub nra sib.

Yog Huab Tais Yes Xus Lub Moo Zoo

HWM YES XUS LUB SIAB NTSHIAB, XYOO B THÁNH TÂM CHÚA GIÊSU, NĂM B

ZAJ NYEEM IB: Os Xes 11,1.3-4.5c.8ac-9

Cov lus nyob hauv ntawv Os Xes

- 1 Thaum haiv His Xas Lais tseem ua me nyuam kuv twb nyiam nws, kuv hu kuv tus tub khuam nyob Hais Nkws Tos teb kom los.
- 3 Hos kuv yog tus hwj cov Es Fais xyaum mus kev, kuv tuav lawv txhais npab. Lawv tsis to taub tias kuv saib xyuas lawv.
- 4 Kuv xuas ib co hlua mos cab lawv mus. Kuv tu lawv xws li ib tug niam puag nws tus me nyuam, kuv nyiam kuv hlub kuv plhws ntshis lawv. Kuv khoov cev rau saum lawv pub lawv noj.
- 5c Tab sis lawv tsis kam rov los cuag kuv.
- 8ac Es Fais, kuv yuav tso nej pov tseg puas tau ! His Xas Lais, kuv yuav muab nej muag rau luag tus qhua puas tau ! Kuv lub siab lub plawv ntseev tas lwj tas hauv kuv lub nrog cev. Kuv tej siab ntsws rhiab tas.
- 9 Kuv yuav tsis tso kuv lub siab npau taws. Kuv yuav tsis rhuav His Xas Lais. Vim kuv yog TSWV NTUJ, kuv tsis yog neeg. Nyob hauv nruab nrab nej, kuv yog tus Ntshiab, kuv yuav tsis tuaj rhuav nej pov tseg.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: His Xais 12,2-4bcd.5-6

Txais: Nej yuav zoo siab luag ntshi mus ce dej hauv cov qhov dej cawm neeg.

1. TSWV NTUJ yog tus cawm kuv tiag. Kuv tso siab rau nws, kuv tsis txhawj. HUAB TAIS yog kuv lub zog, nws yog kuv lub peev xwm, yog tus cawm kuv. Nej yuav zoo siab luag ntshi mus ce nws cov dej cawm neeg. **Teb**
2. Nej cav txog HUAB TAIS, nej hu txog nws lub npe. Nej tshaj txog nws cov hauj lwm loj nyob hauv cov haiv neeg kom sawv daws paub tias nws lub npe zoo tas nrho. **Teb**
3. Nej ntaus paj nruag rau HUAB TAIS vim nws tau ua nws lub hwj chim loj nrov ncha ntws nyob ntiaj teb no. Tsoom neeg nyob Xis Yoos, nej seev suab lom zem vim His Xas Lais tus Ntshiab muaj hwj xyeej nyob nruab nrab hauv nej. **Teb**

ZAJ NYEEM OB: Es Fes Xos 3,8-12.14-19

Cov lus nyob hauv Paj Lug tsav ntawv xa rau cov ntseeg nyob Es Fes Xos

- 8 Ntuj pub lub txiaj ntsim no rau kuv, tus me dua cov hauv tsoom ntshiab, kom kuv tshaj Leej Pleev cov paj tshab uas neeg ntsuas tsis tau rau cov teev pej kum dab,
- 9 kom kuv qhia sawv daws paub tseeb tias cov txuj ci zais tob tob yog dab tsi : cov txuj no nyob zais ntshis tau txhiab tiam hauv TSWV NTUJ, hauv tus tsim tas ib puas tsav yam.
- 10 Nyem no, cov Tub Xo ua vaj txheeb, thiab cov Tub Xo muaj hwj huam saum cov txheej ntuj pom TSWV NTUJ lub Koom Txoos, lawv thiaj paub TSWV NTUJ txoj kev thoob tsib uas tsis txawj kawg.
- 11 Vim TSWV NTUJ ib txwm npaj tej no nyob hauv peb tus HUAB TAIS YES XUS PLEEV.
- 12 Yog vim li no, peb muaj cuab kav tso siab lug txav los ze txoj kev ntseeg txog Leej Pleev.
- 14 Vim tej uas tau hais no, mas kuv txhos caug nyob ntawm Leej Txiv xub ntiag,
- 15 yog Leej Txiv uas tas ib tsoom ua txiv nyob saum ntuj, thiab nyob ntiaj teb no, txais lub npe txiv ntawm nws los.
- 16 Kuv thov kom Leej Txiv pub nws lub zog loj zog nchav los pab nej txoj sia sab hauv, nyob hauv LEEJ NTUJ PLIG, thov nws pub raws nraim li nws lub hwj chim nplua nuj.
- 17 Kuv thov kom Leej Pleev los nyob txawm hauv nej lub siab, vim nej ntseeg, ces nej yuav nrhau cag rau hauv txoj kev nyiam, thiab nej cog lub siab rau hauv txoj kev nyiam.
- 18 Nej yuav txais ib lub zog pab nej, kom nej nrog tsoom ntshiab to taub Leej Pleev txoj kev nyiam dav npaum li cas, ntev li cas, siab li cas, tob li cas.
- 19 Nej yuav paub Leej Pleev txoj kev nyiam, uas tob tshaj txhua txoj kev paub txuj. Ces txhua hom txiaj ntsim hauv TSWV NTUJ yuav los nyob puv hauv nej.

Yog Tswv Ntuj Lo Lus

NKAUJ CAV TXOG LUB MOO ZOO: Mt 11,29ab

As les lus yas! As les lus yas. HUAB TAIS hais tias: ‘Nej yuav txais kuv tus quab. Nej kawm ntawm kuv, nej yuav khaws. Kuv cov lus qhia vim kuv lub siab zoo tsis muab hlob.’ As les lus yas.

NTAWV MOO ZOO: Zam 19,31-37

Nej Mloog Ib Zag Nyob Hauv Zam Ntawv Moo Zoo

- 31 Hnub ntawd yog Hnub Npaj, mas cov Yus Das tsis xav cia cov tuag lub cev dai saum ntoo cuam hnub Xas Npas Tos, vim tias hnub Xas Npas Tos ntawd yog ib lub hnub nyoog loj. Cov Yus Das thov Pis Las Tos kom muab cov neeg dai saum ntoo cuam ob sab ceg lov thiab muab lawv lub cev txo nqes los.
- 32 Cov tub rog thiaj tuaj muab thawj tug ob sab ceg lov, thiab muab lwm tus uas nrog nws dai saum ntoo cuam ob sab ceg lov.
- 33 Thaum lawv los txog ntawm YES XUS, lawv pom nws twb tuag lawm, lawv tsis muab nws ob sab ceg lov,
- 34 tab sis ib tug tub rog xuas nws rab hmuv hno YES XUS phab tav, tam sis ntawd ib co ntshav thiab ib co dej tawm los.
- 35 Tus uas tau pom qhov ntawd ua pov thawj hais. Nws ua tim khawv hais qhov tseeb, nws paub tias qhov nws hais muaj tiag. Nws hais tej ntawd kom nej ntseeg.
- 36 Tej xwm no tshwm sim kom muaj raws li Ntawv sau cia tias: Nws cov pob txha tsis lov ib tug li.
- 37 Tseem muaj lwm lo lus hauv Ntawv hais tias : Lawv yuav ntsia tus uas lawv nkaug.

Yog Huab Tais Yes Xus Lub Moo Zoo

HWM YES XUS LUB SIAB NTSHIAB, XYOO C THÁNH TÂM CHÚA GIÊSU, NĂM C

ZAJ NYEEM IB: Es Xes Kias 34,11-16

Cov lus nyob hauv ntawv Es Xes Kias

- 11 HUAB TAIS TSWV NTUJ hais li no : Zaum no, tus yuav tsob hwb kuv pab yaj yog kuv. Kuv yuav mus tshuaj xyuas.
- 12 Kuv yuav mus tshuaj xyuas kuv pab yaj zoo li ib tug tswv zov yaj, thaum nws rov nrhiav tau nws cov yaj uas tawg ua lwj ua liam, thaum uas ntuj tsaus pos huab nti.
- 13 Kuv yuav kom lawv tsiv ntawm cov haiv neeg uas lawv nrog nyob, kuv yuav sau lawv ntawm pej kum teb los, kuv yuav coj lawv rov los rau hauv lawv thaj av. Kuv yuav cia lawv nog zaub nyob pem His Xas Lais tej hauv roob, nram tej vos hav thiab tas qhov txhia chaw uas muaj neeg nyob hauv lub teb chaws.
- 14 Kuv yuav cia lawv nog zaub nyob hauv ib thaj chaw zaub mos nyoos, thiab His Xas Lais tej hauv roob yuav yog lawv chaw nog zaub uas lawv yuav tau so dhuav. Kuv pab yaj yuav nog tej hav nyom ntsuab xiab saum His Xas Lais tej toj roob.
- 15 HUAB TAIS TSWV NTUJ hais li no: Yog kuv yuav coj kuv cov yaj mus nog zaub, thiab ua kom lawv tau so.
- 16 Kuv yuav nrhiav tus poob zoo, kuv yuav coj tus ncaim npoj rov los poo npoj, kuv yuav qhwm tus raug qhov txhab, kuv yuav kho tus muaj mob kom zoo. Tus yaj rog thiab noj qab nyob zoo kuv yuav saib xyuas nws. Kuv yuav coj cov yaj mus nog zaub raws txoj kev ncaj.

Yog Tswv Ntuj Lo Lus

NKAUJ PAJ NRUAG TXAIS NTUJ LUS: NPN 22,1-6

Txais: HUAB TAIS yog kuv tus tswv zov yaj, kuv tsis tshaib tsis nqhis dab tsi.

1. HUAB TAIS yog kuv tus tswv zov yaj, kuv tsis tshaib tsis nqhis dab tsi. Nws tso kuv nyob hauv tej tshav zaub mos. Nws coj kuv mus so nyob ze dej, nws rov ntxiv zog rau kuv tus plig. **Teb**
2. Nws coj kuv mus taug txoj kev ncaj kom nws lub npe nto koob meej. Tab yog kuv taug kev mus hauv lub kwj ha tsaus ntuj nti, kuv tsis ntshai vim koj nrog kuv; koj rab pas nrig yog kuv chaw tso siab. **Teb**

3. Cov neeg ntsub kuv, lawv hnyos kuv. Koj npaj ib roog qav rau ntawm kuv xub ntiag. Koj pleev roj tsw qab rau saum kuv taub hau. Koj hliv cawv puv lub ntim rau kuv haus. **Teb**
4. Tas kuv sim neej, kev kaj siab thiab kev hlub nrog nraim kuv. Tas kuv sim neej, kuv yuav nyob hauv HUAB TAIS tsev. **Teb**

ZAJ NYEEM OB: Los Mas 5,5b-11

Cov lus nyob hauv Paj Lug tsab ntawv xa rau cov ntseeg nyob Los Mas

- 5b Kwv tij sawv daws, vim LEEJ NTUJ PLIG NTSIAB, uas Ntuj pub rau peb, nws hliv TSWV NTUJ txoj kev nyiam rau hauv peb lub siab.
- 6 Vim li ntawd, lub sij hawm peb tsis muaj zog, thaum txog lub hnuv nyoog teem, Leej Pleev thiaj raug luag tua kom tau pab cov neeg tsis hwm Ntuj.
- 7 Yus yuav luag tsis kam tuag kom tau pab ib tug neeg ncaj ; nyaj tej zaus yus yuav muaj peev xwm tuag kom tau pab ib tug neeg siab zoo.
- 8 Yam uas zeem tseeb tias TSWV NTUJ nyiam peb yog qhov tias thaum peb tseem yog neeg txhaum, Leej Pleev tuag kom tau pab peb.
- 9 Nyem no peb twb ncaj tuaj nyob hauv Leej Pleev cov roj ntsha lawm, mas nws haj yam yuav cawm peb ntawm kev npau taws.
- 10 Thaum peb tseem ua yeeb ncuab rau TSWV NTUJ, nws Leej Tub kev tuag ua kom peb nrog TSWV NTUJ rov sib haum xeeb ; nyem no peb nrog TSWV NTUJ rov sib haum xeeb lawm, mas TSWV NTUJ Leej Tub txoj sia haj yam cawm peb.
- 11 Peb qhuas tau tias tam sim no, peb tau kev rov sib haum xeeb nyob hauv TSWV NTUJ, vim peb tus HUAB TAIS YES XUS PLEEV.

Yog Tswv Ntuj Lo Lus

NKAUJ CAV TXOG LUB MOO ZOO: Mt 11,29ab

As les lus yas! As les lus yas. HUAB TAIS hais tias, ‘Nej yuav txais kuv tus quab. Nej kawm ntawm kuv, nej yuav khaws. Kuv cov lus qhia vim kuv lub siab zoo tsis muab hlob.’ As les lus yas.

NTAWV MOO ZOO: Lus Kas 15,3-7

Nej Mloog Ib Zag Nyob Hauv Lus Kas Ntawv Moo Zoo

- 3 YES XUS thiaj hais zaj paj lug no rau cov Fas Lis Xais thiab cov Kws Ntawv Ntshiab tias:
- 4 “Yog nej leej twg muaj ib puas tus yaj, tab sis ib tug ploj lawm, mas nws yeej yuav tso cuaj caum cuaj tus yaj tseg rau tom hav quav poj, nws mus nrhiav kom tau tus uas poob zoo lawm.
- 5 Thaum nws nrhiav tau tus yaj poob zoo lawd, nws muab kwv saum xwb pwg, nws zoo siab tas nrho.
- 6 Nws rov los tsev, ces nws nqua hu nws cov phooj ywg thiab cov nyob ze nws tuaj, nws hais rau lawv tias : 'Nej nrog kuv zoo siab, vim kuv nrhiav tau kuv tus yaj poob zoo lawm.'
- 7 Kuv hais rau nej tias, thaum ib tug neeg txhaum hloov siab los ntsub kev txhaum, mas muaj kev zoo siab loj nyob saum ntuj. Kev zoo siab ntawd loj dua kev zoo siab rau cuaj caum cuaj leeg siab ncaj uas tsis tas yuav hloov siab los ntsub kev txhaum.”

Yog Huab Tais Yes Xus Lub Moo Zoo

